


國學基  
本叢書  
湖海詩傳  
四



書叢本基學國

傳 詩 海 湖

(四)

輯 昶 王

行發館書印務商

# 湖海詩傳卷三十六

張誠

字希和。平湖人。乾隆四十二年舉人。有熙河草堂集。

蒲褐山房詩話。孝廉矜情既勝。腰腳復健。志爲五嶽之遊。登岱宗。上嵩洛。訪予于關中。直躡蓮華峯。頂與廣東馮庶常敏昌吟眺。經月始下。又欲作峨眉之行。蓋徐霞客輩流人也。性好梅。作梅花詩話。凡若干卷。搜採辯論。頗稱繁縟。

光福里探梅

早讀笠澤書。野寺得光福。輕舟背日行。曉風十里速。山色迎人新。水光泛鵬綠。孤塔遙崢嶸。一溪自迴曲。傍岸編疎籬。開門隱修竹。居人爲我言。山中絕塵俗。望衡千餘家。種梅如種穀。梅熟子可沾。梅開香不鬻。不鬻當如何。客來恣所欲。

鄧尉一帶。皆單瓣白梅。至西磧始有硃砂紅。綠萼梅。玉蝶梅各種。自鄧尉下冒雨復至西磧山頂。山山不斷香。樹樹未消息。陡見斑陸離。振衣上西磧。隱隱籬落間。燦燦映朱碧。小紅桃杏色。綠萼羣仙列。東風飄靈雨。四野行人絕。余情苟信芳。塗泥寧所惜。陟岡亂雲侵。歷磴蒼蘚裂。交徑橫枝妍。倚澗芳華潔。顧慙塵俗軀。遊此神仙窟。何當來買山。永結子雲宅。

包山顯慶禪寺皮製美陸魯望有包山精舍詩即此

山行不知遠。叢木忽蒼翠。青嵐起層岡。幽幽隱古寺。初地肇蕭梁。嘉名錫唐帝。復有慈受僧。結廬傳宋世。寺前五株松。落落擎天勢。虬角不可攀。龍鱗時或墜。山僧頗好名。竊附五柳意。寺僧號五柳揖余爲余言。此樹閱千載。其下兩石幢。中藏佛舍利。別蘇試摩挲。其一本無誌。其一會昌年。僧契元書字。字字空王言。歷歷時日記。唐會昌二年壬戌九月八日僧契元書佛頂摩勝陀羅尼書法絕佳頗通瘦硬神。亦饒烟雲氣。幸藏深山間。勿爲椎拓累。守拙全天真。斯理得罕譬。少小慕松陵。倡和金蘭契。今來精舍中。風流結遐企。棟宇或劫灰。林壑餘古致。我亦烟波徒。儻然願高寄。

文大夫種墓墓在臥龍山下

賜劍南陽怨未伸。銀濤白馬並江神。臥龍何處尋遺冢。烹狗無端憶昔人。敵國十年三術破。故交一棹五湖春。君王自有同安樂。不念當初患難臣。

### 宋大樽

字左彝。號茗香。仁和人。乾隆四十二年舉人。官國子監助教。有學古集。

野老

田廬聚妻子。桑麻環繞之。今年已七十。一日無別離。舉酒互勸飲。頽然忘是非。醉歌扣牛角。牛角向我低。



客從何方來。勞勞已幾時。客歸抱黃犢。此樂客自知。

臨平山安隱寺最幽。偶往遊矚。

周覽若有失。遙懷輒引領。白雲先客在。春入空山靜。松風答樵歌。蘿月帶潭影。達者能棲心。至此更深省。飲維揚酒家送客。

江上忽離別。扁舟增暮寒。猶持故人酒。莫作異鄉看。送者有時返。此行應更難。朔風吹涕淚。獨自向長安。

田家作

昨夜春風生。今朝春鳥鳴。白頭先早起。紅日好深耕。隴畝留淳古。牛羊樂太平。歸來相勞苦。勸飲更多情。

趙秉淵

字少鈍。上海人。文哲子。乾隆四十二年以難蔭改補中書。今官成都知府。有卯君初稿、小斜川叢稿。

過述菴丈蒲褐山房出畫冊命題賦呈三首。

長安竊宦客。傲屋本難定。大抵近市喧。斷無樂幽屏。城西蒲褐居。巷僻隔塵境。精廬十笏寬。窗几瑩而淨。絕似書畫船。羅列尊彝鼎。藥欄數弓地。竹樹翠交映。茶聲沸庭陰。客至淪佳茗。先生澹蕩人。欸語意閒靜。時參文字禪。結跏味彌永。道是退院僧。十年住華省。

西山窈窕容。不肯入官府。爲愛愛山人。山色滿簷戶。誰將修眉痕。收拾到毫素。朝爽夕更佳。無事頗頻拄。

空庭老槐榆。離立狀奇古。秋花寫幽姿。作意弄媚嫵。先生笑忘言。寓目各有取。

涼颼入庭柯。淒切送清響。閒階亂蛩音。落葉滿床上。吳淞舊隱居。風味記疇曩。殘陽下亭臯。閒門靜扃兩。蕭蕭打吟窗。撼撼撼虛幌。篝燈賦秋聲。此境繁懷想。今夕坐高齋。晤言動悵惘。

木果木軍營題巴兵部尼理金江淬劍圖

我來西嶺觀軍容。和門高捲紅旗紅。行廬定省得少暇。軍譟祭酒紛過從。先生嗜古本儒雅。投筆不爲通侯封。穴中羣鼠喜觸鬪。忽爲狼狽交相訐。王師聲罪致厥討。務使荒微消烟烽。先生躍馬任參佐。囊筆磨盾陪元戎。昨冬先掃兔一窟。短蓬零孳隨秋風。降人感涕竊有獻。一劍脫手詞何恭。先生撫之投袂起。誓以此劍齒兩兇。人心劍氣歘然合。怒欲出室鳴宵中。金川之水何縱縱。滄沙激石行如龍。臨流坐愛清見底。山光樹影交玲瓏。昔曾請纓今枕甲。以水淬劍他山攻。匣中三尺本如水。匹練躍出青芙蓉。爛於初日艷於雪。撇波化作千霄虹。橫磨十萬此其一。指揮頭白難撓鋒。我今觀畫若觀戰。便思手挽百石弓。無勇非考古有訓。竟請摩壘從諸公。鵬膏不如逆酋血。三疊三沐旌爾忠。龍身虎氣繼讚頌。倚天欲共凌崆峒。

宋謝文節公橋亭卜卦硯歌爲查榕巢先生賦并序

宛平查太守禮得端溪古硯一。長約八寸。廣半之。額篆橋亭卜卦硯五字。背楷書宋謝侍郎硯五大字。左側鐫程文海銘曰。此石我友也。不食而堅。語有之。人心如石。不如石堅。誰似當年採微不

食守義賢也。右側刻題字云。大明永樂丙申七月洪水。去橋亭易爲先生祠。拍地得之。闔後學趨元行書二十七字。按宋史言先生當宋亡後。入建寧唐石山。轉茶坂。寓逆旅。日麻衣草履。東向而哭。旣而賣卜建陽市中。元翰林學士程文海薦之。不起。被魏天祐逼至燕京。居憫忠寺。見壁間曹娥碑。歎曰。小女子尙知節義。我寧不汝若哉。遂不食而卒。又考福建統志。今建寧縣南門外有朝天橋。一名濯錦橋。宋紹興中築。灑水十三道。覆屋七十二間。上有謝疊山祠。與元題字脗合。則橋亭之爲朝天橋無疑矣。特先生官止江西提刑副使。史傳及輟耕錄皆同。硯背刻謝侍郎。未知何据。俟再考。太守能詩好客。有前輩風流。而是硯爲孤臣遺澤所留。宜其寶逾拱璧也。丙戌九月廿四日太守置酒邀諸先生共觀。諸先生各賦長歌。余亦爲詩。

信州城一彈丸。安仁溪一衣帶。謝公當日作逋臣。忍死須臾有母在。崎嶇轉茶坂。蜿蜒朝天橋。上有突兀之老屋。下有嗚咽之寒潮。麻衣草履貞苦節。東向飲泣無昏朝。國家金甌已傷缺。不及區區片石猶堅牢。犀紋鶴眼詎在好標格。但覺墨光黯淡和淚痕。難消垂簾聊學成都客。卜肆沈埋人莫識。遺民姓氏混塵埃。我道明夷在周易。無端空谷下旌招。不道公心介于石。瓦全玉碎各有志。豈待行藏問龜策。燕山寺中燈影孤。南冠憔悴一餓夫。碑間女子寧汝愧。抗節直與首陽徒。橋亭人去久寂寞。杜鵑啼血空模糊。滄桑轉眼五百載。殘石猶有神明扶。打城洪水漂不去。天使光怪騰泥塗。流傳何日到公手。寶之不異于璠璣。

摩挲再四誦銘字。令我懷古心縈紆。嗚呼。玉帶生。信公友。此石千秋與同壽。文山疊山兩不朽。

過綠雲菴

逕曲蹤難覓。苔生白板扉。花香入齋鉢。竹色上僧衣。梵響隨風細。鐘聲度水微。此中參靜理。愜賞欲忘歸。

瞿叔游華寄示江村漫興詩。即用原韻奉酬。

幽棲地僻少塵埃。著屐蒹葭踏綠苔。水霧漸看朝雨合。林烟先向夕陽開。茶經藥錄時三復。竹塢梅坪日幾回。早晚故人倘相訪。牀頭共釀舊香醅。

春盡日寄遠

板橋細柳碧於烟。風信匆匆三月天。正是玉人春病懶。杜鵑啼到綺窗前。

徐蓀林蘇坡明經屬題澱湖漁隱圖。率賦三絕句。

湖中山色烟中樹。郭外斜陽水外村。不必并刀煩剪取。儂家自有水當門。  
撲水叢蘆綠幾灣。持竿心似渚鷗閒。還應添箇漁舟小。著我烟波浩淼間。  
鱸鱠莖滑溜匙。船娘纖手白凝脂。秋來好景無多子。只在斜風細雨時。

馮培

字玉圃。號寔菴。無錫人。乾隆四十三年進士。官戶科給事中。有鶴半巢詩鈔。

瘦銅惠筆賦謝

夙昔慕著書。竹素日蒐討。脂暇而墨晨。手錄務祕寶。座間管城子。結交最傾倒。所恨才力弱。研摩謝穿縞。名如地畫餅。言類海生棗。臨池亦未成。蛇蚓強縈繞。故人學殊富。星宿羅胸抱。興酣泚筆爲。秋實兼春藻。貽我青鏤束。爲我潤枯槁。細字鐫二行。東吳瑞符張造。段氏胡盧奇。蘇公散卓好。我指鈍於槌。銜巖鼠應惱。夢中五色花。塵土捐蕪早。年來直禁樞。橐筆軍書草。貴捷不貴工。取濡不取燥。三錢雞毛製。風雨足揮埽。番休暫歸沐。俗累苦相黜。磽确荒硯田。中書愁禿老。縱有字堪羨。其奈筆難飽。雪晴牕几明。乾鵲喜清曉。抽毫試拈弄。快得麻姑爪。自過水蟾蜍。聊用賡詩藁。

磬鍾峰

康熙間賜名俗名棒極峯

衆山連尻雁。匠師抱仙闕。其勢若奔馬。縱逸向空闊。山靈厭平坦。拔起烟霧窟。陡然石稜稜。一柱聳突兀。倒垂羚羊角。孤撐龍蛻骨。上有古石幢。尿淵字奇崛。石幢鑄尿淵卽卽四字尿古戶字見說文淵疑卽淵字武壘所造日字也幢未詳亦不知何時所建下瞰武列水。清秋蕩宓汨。熱河卽水經武列水大哉造化鑪。旁礴積日月。嘉名聖人肇。傲外秀不沒。吾將學米顛。肅拜具袍笏。

辛丑歲暮得述菴手書賦呈

晴雪封疎林。寒飈吹老屋。散直逼歲除。寂寥影蜚跼。書來自泖湖。長牋四五副。喜劇挑殘檠。盥手再拜讀。

首言離別久。禁庭遡曩躅。蝨簡袖書繁。螭毫視草速。相隨閱晨晡。共事積涼燠。回憶成昨夢。纏綿意三復。次言詞苑輩。文章非所屬。明代李何王。壇坫迭當軸。通籍皆曹司。領袖藝林伏。玉堂闈無聞。輕材空碌碌。姚涑楊維姓字湮。錢吳身名辱。國朝數鉅公。聲華競馥郁。多緣郎署階。罕入瀛洲錄。勿以改官故。中懷長刺促。努力期不朽。藏山富縑竹。末言瀧阡表。窀穸就吉卜。策杖繭重轡。負土泣奔鹿。衰鬢霜雪侵。壯志風雲縮。紙窮情有餘。琅然叩哀玉。先生羣雅宗。扶輪砥時俗。筆落萬石傳。弓衣織滇蜀。提劍出虎口。團蒲禮雞足。鑿厓傲外清。繡斧臺端肅。政成大江西。高並匡廬瀑。甄藻蒐湖海。噓枯拔巖谷。我比陳無已。歐陽實私淑。猥蒙齒牙芬。壤流附岳瀆。此風今已無。歎息鹽車服。感遇鬱難宣。古義自銘勗。何日從公遊。悵望春波綠。

聞詔予明季殉節諸臣謚恭紀

雍齒封原假。韓通傳竟遺。由來亡國社。未得表忠碑。河嶽精靈迴。春秋義例垂。易名洵曠典。異代疾風思。明政嗟解紐。難回寶鏡淪。三方無半壁。萬死有完人。頑儒遺風激。賢好定論真。闡幽千載事。大義在君臣。

古北口

北來鎖鑰屹雄關。不斷秦城指掌間。市地風雲連紫塞。倚天屏障削青山。長河疎柳龍媒度。古戍清笳虎旅閒。何事三邊誇重鎮。只今明月挂弓彎。



寓舍偶題次申笏山副憲前輩韻

依然傲寄小軒除。門隘難容長者車。滿屋山雲新雨後。一庭塞月晚涼餘。纔過濡水無長夏。濡水即今之灤河已覺燕臺是故居。下直喜逢封事少。不須頻問夜何如。

抵京後寄劉退谷孫香嚴並諸同人

西風一夜落黃榆。回首興州絕塞紆。山擁百盤通虎北。水分三藏下龍芻。歸鞍乍帶邊塵色。扈蹕方誇校獵圖。諸公並隨進哨明月臨關秋正滿。能思燕市酒人無。

馮敏昌

字伯子。號魚山。欽州人。乾隆四十三年進士。官戶部主事。

蒲褐山房詩話魚山所居欽州乃廣東西南瀕海處。蓋地近安南。漢以來無文學士。魚山讀書砥行。無師而成。自官庶常。改戶曹。益以攷訂校讐為事。工書能詩。名山大川。必往登涉。又修孟縣志。精確詳審。有功於金石。丁憂歸。遂不復出。聞在端溪書院。主講。從此山陬海澨。咸知古學。魚山為之先導也。

遊龍門謁大禹廟

萬年欽禹力。千仞睹龍門。山東峰巒壯。河驚氣勢奔。晴雷冬亦奮。白日晝應昏。感激為魚歎。真將捍患論。氣連將開闢。山河待始終。寧墮天地性。真作鬼神功。雲氣摩青壁。濤聲繞故宮。安瀾知有賴。感仰意何窮。

過平陸謁傅相祠

遯迹同遺老。旁求佇大賢。傳巖闕像日。殷室中興年。霖雨端由帝。星辰尙在天。精誠能陟降。且勿託神仙。巫相看鄰壤。巫相成父子。故里近在夏縣。阿衡得替人。如何先版築。且復事勞筋。一代君臣契。平生空乏身。驅車賂遺廟。感激動心神。

### 管世銘

字蘊山。陽湖人。乾隆四十三年進士。官至監察御史。

### 昭陵石馬歌

虬髯真人二十四。手挽黃間射機杼。百戰未嘗輕失利。出死人生憑一騎。凡鷲何能假鞭轡。蹀躞六龍天上至。拳毛白蹄特勒驃。骨相更數青騅驍。乘之陷車風雲高。盡使萬馬喑不驕。匪止褻鄂酣弓刃。次第削平諸僭逆。芻料登槽三品直。帝謂未足酬其力。肖像昭陵斲以石。過者見之猶辟易。百年天地生塵埃。鐵騎蹴踏潼關開。彷彿先帝神靈來。指揮殺賊賊氣摧。汗出浴石形槁。嗚呼。馬兮馬兮。生能騰驤死猶怒。不負文皇顏屢顧。下視哥舒直狐兔。五雲長飛松柏路。蘚積苔深誰敢仆。廣明劫火關天數。馬亦無聲臥寒露。繭紙蘭亭落何處。

### 響泉硯

錢郎叉手詩盈卷。短什長謠無不善。更工撥墨寫秋山。十載摩挲惟一硯。硯初得之自燕市。兩宋形模半

存毀磨礪更昇藝石翁。重發奇光有深理。本出端溪最上阮。蒼烟軟玉韜光精。千年溪水暗激射。背負齧  
缺蛟螭爭解人。因物出新意。凹凸隨形成位置。上作濺濺曲注痕。下取洶洶不平勢。勢得毫釐等千丈。几  
案真疑萬泉響。從此鐫銘號響泉。濠濮瀟湘落君掌。君攜此硯返華京。五上春官名未成。就中恐有卞生  
淚。淚滴入石同泉傾。硯乎硯乎時有待。鸚鵡青青眼常在。終當貢汝置玉堂。不使東坡擅龍尾。

送李雲岩大司馬世傑賜告還黔

當代封疆第一流。奮身掾史出邊陲。精勤吏事陶公篋。風厲官方晏子裘。上藥起衰馳鳳嶺。公初在四川總督任內引疾蒙賜人參一斤。安輿扶疾到龍樓。特旨屏輿入直。相臣請老司徒養。謂蔡葛山曹竹墟兩先生。又見公歸擁八騶。

風葉

浙瀝西風作意侵。紛紛黃葉捲疎林。江空與鳥分帆影。山靜兼泉亂屐音。一去故枝飛不定。欲爭初地力  
何任。無情未得枯桑似。獨客難禁萬里心。

錢世錫

字嗣伯。秀水人。載子。乾隆四十三年進士。官編修。

蒲菴山房詩話嗣伯長於登臨行旅之作而博雅足以副之瘦硬通神不減其父管中詩尤佳斷句亦清激聽雨云臥聞驟雨灑涼棚六月如秋枕簟清彷彿江湖宿漁艇菰蒲深處滴篷聲題絳守居園池記云樊文讀罷苦斨牙客舍青燈百感加太息彌伽老居士秋風落樹集寒雅嘉興張彌伽曾爲之注故云

自岢嵐往保德山行

盤盤山中路。巧作螺紋旋。將東反向西。似帆隨湘轉。上坡若挽船。踏蹬疲驢戰。下坡如放溜。坦迤趁勢便。壁立黃土堆。突兀已厭見。不定嶺雲姿。無名野花茜。晉地何寥闊。馬蹄將踏徧。

明宣宗仿宣和筆林檎鸚鵡

隴禽調舌立畫廊。臨風頻弄繼鏃光。豈如衝烟向深塢。秋露初熟林檎香。輕紅嫩黃盡佳果。不必香稻仍餘糧。雪衣踏枝枝欲動。絕自矜貴居中央。旁有綠衣如娣姁。展襟側睨蹲斜陽。物色生態乃如此。流傳繪事出尙方。宣皇御宇際熙洽。百工藝術俱精良。鬪雞磁翠瀉清醴。薰鴨銅鑄焚都梁。餞金雕盆籠蟋蟀。西川宮扇詠招涼。幾餘六法供遊戲。化國之日何舒長。猗蘭求賢況飢渴。鹽梅麴蘖資三楊。此圖偶仿宣和筆。枝枝葉葉能芬芳。神霄天子實天縱。調鉛殺粉真擅場。枇杷角鷹筆法在。不隨花石淪滄桑。青城流離亦氣數。未預浪子笑端王。金牌獨奈赤鸚鵡。來自汴水蒙風霜。舊人呼罷卜尙樂。萬歲泣下宮鬢傷。高宗康有大赤鸚鵡自江北來集行在承塵上。蓋道君時宮中所畜。足有小金牌。有宣和二字。比上膳草草無樂。鸚鵡大呼卜尙樂起方響久之曰。卜娘子不敬萬歲。蓋汴京掌樂宮人以方響引樂。故猶以舊格相呼。高宗爲罷膳泣下。見楓窗小牘。始知靈禽異凡羽。合與圖貌傳縑緗。絕勝蠻鳩與義燕。紛紛籬落空飛搶。

雪後

爐火微明老屋深。虛間空自抱冬心。山寒飢虎嘯當路。城寂栖雅懶出林。乾雪舞風停又起。凍雲漏日霽

還陰惱人不似江鄉好。欲見梅花何處尋。

### 李鼎元

字味堂。號墨莊。綿州人。乾隆四十三年進士。官宗人府主事。有師竹齋集。

蒲褐山房詩話。梁爲西南屏水。厲山刻隄而數十年來未有鍾其靈異者。近日綿州稱三李。以墨莊爲最。意沉摯。辭警拔。筮仕後。索米不足。遠遊江海。所過名山大川。發其抑鬱無聊之氣。拔地倚天。三吳士大夫以英挺自命者。未能或之先也。庚申初夏。余在武林。墨莊奉使琉球。過訪講舍。予謂君天才奇偉。又佐以域外之觀。海涵地負。當有賊心而怵目者。及使還。予已老病家居。未見所作。

### 舟發武林

三次出武林。水行道彌苦。天熱長無風。江淺耿不雨。扁舟困泥沙。動賴人夾輔。竹篙尙無濟。那復問柔艣。遙隣水中車。江上哭田甫。昨日水滿田。今日如斥鹵。江涸不及岸。車短焉足取。君看前溪中。無舟但網罟。對此心愀然。滴淚溼厚土。安得鞭睡龍。乘雲下天府。沛然作甘霖。稼穡始可睹。天乎聽不遠。感激輸肺腑。

### 石門洞觀瀑

白龍雲中翔。取水銀漢傍。水溢收不及。一落千丈強。雷聲破地出。雨氣連天長。中遭石一激。雪花霏微茫。石門洞天地。道經頗能詳。青芝產石田。語或非荒唐。我來逢九秋。淒淒風色涼。仙人隔珠簾。欲語不得將。何以洗我耳。更願滿我腸。待我俗緣盡。結茅此山岡。

### 牛頭山

日出羣木疎。山色遞晦靄。客子踏雲行。直上青天外。雄關踞牛角。江似蹄涔會。回頭望二劍。淬鋒將安賴。踴觸後來人。幾成滅頂害。四山爭向背。形勢辨襟帶。時清關吏疎。姦民或狼狽。頗聞渡口人。欺客恣狡獪。孤商休夜行。毒魚如蟒大。

朝天關

峩峩葭萌關。棧中第一隘。上壓石千尺。下截江一派。險勢過牛頭。峻極出天界。烈日掌中捧。崩雲馬頭挂。鈎梯與危磴。到此益奇怪。俯窺江上船。小若坳塘芥。五丁鑿不得。架木迹未壞。如何孟達輩。守此亦終敗。信哉險難恃。萬古一長噫。

七盤關

七盤盤人空。勢欲捫青天。路逐石角轉。人隨樹杪旋。誤入羊腸中。甘讓飛鳥先。風雲莽迴護。欲出愁無緣。嶺水一以分。隴蜀遂相懸。頗似歧路人。揮手揖馬鞭。有草烟外香。有花雨中然。好景寫不得。惆悵雲峯前。

滴水崖

人從崖下行。水自崖上落。迴風吹水飛。白雨洒林薄。馬滑進輒退。僕怨前且卻。如人大漏天。羲輪避難託。又恐息壤移。不受五丁鑿。藤蔓正得意。層層肆纏絡。能令白晝昏。峻嶺變幽谷。真如陰險人。天或助其虐。殷勤語從者。此處防失腳。



雞頭關

雞頭高入雲。人與雲爭路。夜行山不知。險隘未全露。月落烏亂啼。林黑馬頻顧。輿夫昧高低。亂踏滑石步。悄悄盡七盤。颺颺或驚去。微聞水瀾瀾。崖深自可悟。天雞鳴一聲。回望轉牛怖。失笑謝童僕。此險幸偷度。

柴關嶺

揮去青羊河。登頓上銜嶺。石齒排劍鏢。叢蔭蔽陽影。路與蛇虎爭。人挾風雲騁。重嵐溼征衣。飛泉灌客頂。山骨不受鋤。箐林獨完整。疑是叅神靈。保茲樹千挺。不然山盡禿。連理亦何幸。萬木劫運開。對此轉悲哽。

曲阜縣

我行半天下。所到探風俗。非官怨民頑。卽民怨官酷。官民本一家。胡爲心不睦。淳哉聖人鄉。禮樂尙薰沐。不取非義財。不爭無情獄。不負官吏租。不厭糜豆粥。懷刑君子心。屬饜小人腹。比戶敦廉讓。居人重耕讀。遠矣武城風。賢哉四氏族。智者擇里仁。此鄰不須卜。

出都

微祿雖云養。空文不救貧。那堪羈宦子。又作遠行人。故里歸何日。天涯寄此身。殷勤餘兩弟。菽水共艱辛。

萬仙樓

兩崖方對峙。一徑恰容樓。洞雨懸螭口。山雲絡馬頭。回看城若近。直上路仍幽。衣袖飄飄舉。翛然豁遠眸。

扇子巖

何來雲母扇。壁立插晴空。開閣陰陽異。炎涼歲月同。卽今能卻暑。終古不搖風。惟有新秋逼。洶騷起灌叢。

金星亭

絕壁疑無路。懸崖尙有亭。俯臨千澗黑。高接一天青。屋角雲常宿。簷前鳥未經。搖搖風欲墜。只合住金星。

遊雪竇

出郭緣山徑。蒼茫曉色分。鶻喧朝霽日。人踏亂峯雲。澗水澆田便。村農插稻勤。計程原不遠。午後一鐘聞。

夜直入東華門

一官未補是閒身。那更奔馳逐軟塵。折簡尙循前輩禮。看花空憶去年春。班超有志思投筆。汲黯無才嘆積薪。最恨東華門左館。卽今誰是舊詞臣。

病足

不著朝鞞且挂冠。未妨步履暫艱難。公卿本厭趨炎客。筆墨初宜耐冷官。舊歷山川來夢裏。故交風雨隔雲端。庸醫莫勸加針砭。自愛西窗臥榻寬。

蘭相如墓

相如智勇竟如何。歸璧秦庭未足多。膠柱真能知趙括。避車非是畏廉頗。千年蜀客還生慕。四尺荒墳不

忍過叱伏虎狼憑頸血。翻憐七首殺荆軻。

偶興

莫向瀛洲問謫仙。紫薇花近九重天。功名退似臨風鶴。家計清於吸露蟬。有子登科吾欲老。無財養母盜能憐。麤麤直類羊公鶴。不耐重驅到舞筵。

不堪回首是流年。機事機心早棄捐。肯效季良成畫虎。漫從墨翟刻飛鳶。貧除搜句無長策。富縱多文不直錢。行輩而今皆老大。情誰先著祖生鞭。

四月二十九日次子關官生同人集賀分得七律。

庭前歡笑正談經。婢報深閨次子生。但覺有聲震<sup>平</sup>戶牖。便求無難到公卿。關心老媪先稱賀。愛我良朋更洗觥。頗笑阿翁雙鬢雪。孫猶未抱望兒成。

王元勳

字叔華。嘉定人。乾隆四十三年進士。官徐州教授。有易圃詩鈔。

漁父

芙蓉落秋江。蒹葭生暮色。扁舟何容與。獨釣幽岩側。纖鱗不盈筐。持竿若有得。童稚遙相呼。妻孥供晚食。鼓枻歸去來。柴門未昏黑。業微力罕勞。欲寡情易愜。悠悠涉風濤。感君徒太息。

海上觀水山歌同毛海客賦

江南從無三尺冰。冬暖紫裘汗氣蒸。歲維辛巳月在丑。十日大寒昔未曾。北風吹海海水立。我我百丈隨  
墜。凝中流猶聞浪激撞。排空已見峰峻嶒。巨魚凍死尙蠲強。老龍僵臥難升騰。馮夷水仙弄寒月。髣髴夜  
半來相登。余時踏凍訪海客。驚見冰山高崩崩。陰森陰壓沃焦寒。空色明映扶桑碧。日從水底出冰上。貝  
闕珠宮光倒射。雲霞不礙水晶空。峯巒皆作火齊赤。恍疑有樹挂珊瑚。誰遣圍屏雕琥珀。蜃樓海市安足  
誇。雪車水柱徒爲役。須臾火輪埋黑雲。雷碾一聲搖乾坤。危崖中裂向夷島。斷嶺欹側連江濱。嵌空半帶  
魚鱗影。瘦削欲變波濤紋。太陰嚴凝太陽弱。消鑠日久方崩淪。平生壯觀此第一。衝寒縱覽留浹旬。直待  
東風春水發。挂帆浩蕩垂修綸。

出屏風關

行徑繞山微。陰崖凝夕霏。松風吹不斷。翠鷲欲霑衣。時有林花落。遙看瀑布飛。迢迢白雲際。無計叩岩扉。  
赤沙湖

八月雁南翔。湖波接混茫。水中散村落。木末度帆檣。山遠秋容淡。天低夕照黃。芳洲獨倚徙。宿莽引餘香。

漢江秋望

波光天影兩空明。雲外迢迢宿雁聲。帆帶夕陽歸夏口。山連秋色到樊城。銅鞮誰唱當時曲。鐵鎖空餘弔

古情欲訪滄浪漁父迹。濯纓閑對漢江清。

九月登憫忠寺閣同芷園作

西山晴翠滿城頭。乘興來登蕭寺樓。白雁早驚沙漠雪。黃柑遙憶洞庭秋。傳盃有客成高會。吹帽何人紀勝遊。樹下泠泠鐘磬發。夕陽寒色上茸裘。

嶧山道中

落日西風捲地寒。黛螺遠近疊晴巒。山家長在翠微住。不解行人駐馬看。

湘中雜興

垂楊垂柳滿長堤。薄霧輕烟晚更迷。三十六灣春草綠。鷓鴣聲裏夕陽低。渺渺春波鼓柁遲。蒼蒼曉色起愁思。深林杜宇啼初急。花落黃陵帝子祠。

徐大容

字莪沚。江南華亭人。乾隆四十四年舉人。有復堂詩鈔。

蒲褐山房詩話。我沚爲文。真公九世孫。性情蕭澹。幼耽吟詠。既從沈上舍大成遊。覃精經術。一以漢魏爲師。作詩好押劇韻。盤硬語。而近體亦復嫺雅。如垂老尙虛謀。負郭吟秋無恙健。登樓不見便同千里隔。得歸已負一年閒。總爲豬肝求不易。非關雞肋棄偏難。競渡已無人。盜漿憶歸。應感客登樓。皆雅音也。

牀山歸自括蒼。小集伴花吟塢。以洞庭始波木葉微。脫爲韻得葉字。

良友遠客歸。握手笑開曆。斗酒爲洗塵。盤蔬互相饁。是時秋雨霽。斜陽射城堞。涼颼颼然來。頓覺耳目懣。言念平生交。散若林中葉。而我病杜門。情興尤疲茶。得失任鷄蟲。寒暄付裘篋。已懶鼓齊瑟。詎暇彈馮鈇。辟彼焦冥巢。所樂在蠱睫。惟餘山水懷。寤寐尙躑躅。讀君括蒼稿。快意踰抓鑷。冷烟淥波名亭凝。活翠青城名山疊。相去千里餘。展卷恍親涉。宵長秋夢多。夢弭橫江楫。

拾硯齋觀曹雲西山水畫卷

我不解畫解讀畫。草堂四壁圖天池。徧游五岳志未遂。快意藉慰長相思。舊藏墨妙二十幅。天籟賞鑒多題辭。惜哉雲烟瞥過眼。神物聚散無常期。余家舊藏宋元人眞蹟二十幅近已散佚重光之歲日長至。扁舟訪舊城南陂。主人愛客揖客坐。示我妙蹟邀題詩。開圖知出雲西手。絹素黯澹神淋漓。空江濁浪鬱渺瀰。絕壁高嶺攢屨屨。白雲遮斷最高嶺。但見蒼蒼溼霧含朝曦。草枯無全葉。樹老無全枝。危橋曲磴互掩映。中有仙人來往乘雲螭。吾聞先生昔解組。義爰一卷常相隨。抱膝長吟意不樂。睥睨橫被羣兒嗤。偶然放筆寫異境。性靈不受雲山羈。此圖洵精妙。欲與眞宰爭神奇。流傳安得入君手。摩挲儘可忘朝飢。詩成把阿發浩歎。擾擾得失將何爲。行當拂衣謝塵壒。待畢婚嫁知何時。

游知止山莊

一徑入空翠。鞵痕破蘚斑。柳遮當戶日。花映隔溪山。僧梵青林外。漁歌淥水灣。頓忘歸路晚。相對白鷗閒。



林山新居小集分得居字

一抹溪雲十笏居。幽尋遙指故人廬。橋通小市魚蝦賤。徑接平蕪橘柚疏。客有素心能置酒。家承先澤只備書。插籬未了栽花急。爲待春深奉板輿。

茸城雜詠有序

壬辰冬。信宿西泖邨莊。風雪竟日。擁爐獨坐。偶詠吾郡風物。得絕句若干首。詰朝天已放晴。輟不復作。以俟它日興到續之。

卷篷船小疾於梭。柳外誰人載酒過。九曲塘西山九點。櫂聲吟軋翦春波。

熟梅時節雨冥冥。長日家家醉綠醺。聽說海鮮新上市。五更人語采花溼。鱖魚

甘欺崖密輒欺酥。淺碧輕黃隴畔鋪。柘館紅蠶新上簇。老農侵曉餉山廚。蠶豆

灘空鶴去水茫茫。廢圃猶傳篆鶴莊。記取中秋好明月。露涼清唳下迴塘。鷓鴣

玉竇泉清流澹沱。雨華洞古氣朦朧。夕陽一角前邨遠。臥聽蕭蕭紫竹風。玉竇泉

查山山下碧淪漣。寒月泉如第二泉。賒取月團三百片。竹鑪活火手煎煎。蘭筍山

汪如洋

字潤民。號雲壑。秀水人。孟錡子。乾隆四十五年殿試第一名及第。官修撰。有葆沖書屋集。

蒲褐山房詩話：雲壑爲康古次子，與兄念孫咸以文名，而雲壑和平端雅，以狀頭直上書房，爲公卿所器重，以爲安州尙書之比。其詩清圓朗隹，不襲棧枿枯瘦之習。年甫四十，遽歸道山，成親王哀其遺詩，刻於京邸。

送百泉之邗上

婀娜風穩帆，琴瑟驛喧鼓。詩人別我去，揮手柳陰午。平生患短視，才勝一目杜。攜書千里遊，肯學堅閉戶。西窮馬嶺巔，北飲滄洲醋。年年衣食謀，那復戀兒女。廣陵賢主人，講席春光煦。時赴蔣心餘編修之招，郵書忽相招。下榻欣有侶，及門俊髦多。樂可晨夕數，差幸作客佳。似忘離家苦，葫蘆蜀岡醉。芍樂玉鈎嫵，江山入錦囊。烟月費織組，吟筇橋廿四。歸艇秋三五。時有中秋返棹之約，後會相團圓。菱芡熟鄉土。

讀黃山谷詩疊前韻

涪翁大雅才，詩壘肅旗鼓。光芒發蒙翳，如日月當午。句奇酷追韓，律細飽參杜。豈惟窺牖牕，直已踞堂戶。螭蚌氣味佳，咀嚼勝甘醋。手如斷獄吏，羞學簪花女。艱澁閱宦途，少荷天恩煦。坡仙遠謫身，漫叟狂歌侶。入黔復入蜀，道里天涯數。投床鼻息大，那計迤邐苦。傳稱山谷安置黔州時，卽日受命投牀大鼾，人以是賢之。造詣勉益精，筆奪江花嫵。寧同俳玩列，几席炫麗組。我詩豈其朋，組麗等俳。玩集中答晃堯民句也。養丹火轉九，煉石色成五。誰歟傳此燈，吾欲醉黃土。

雙井無人后山死，只今誰子定傳燈。楊誠齋句。

十月廿四日橘頌山房小集，同補堂西潤舅氏惺渠賦木棉裘，得作字。

湖頭蘆絮飛。風信寒欲作。桁衣單袷收。卒歲婦功課。木棉熨貼宜。適體最柔悞。鋪如雪片輕。吹作雲朵大。輪碾核汰淘。槌軟花翻斂。縫裳製乃工。挾纊溫可佐。厚須銖兩勻。新戒油膩澆。敝裘三十年。毛落捉襟破。難求曝背溫。袖手苦僵坐。寬長復潦倒。得此已爲過。客來誚擁腫。吾性便嫵媚。稍禁窮袴冷。兼煖布衾臥。貂襜彼何人。被褐卽奇貨。

夏蟲篇戲仿山谷演雅體

驕陽燦冰水骨倒。夏蟲隆隆肆蕁惱。鼃尊井坎利藏拙。蜂聚餼糧但娛老。蒼蠅聖物瞞在腹。壁蝨鉤人痛。鍼腦蛾爭烈。燄死不知。蜥守微紅爛。猶擣若狂舉。國蠅集瓜一孕百子。蝻食稻微歌。土蚓貴優伶。喝道花蚊醜。輿皂蟬吞仙字。傲學究。蟻竊羶餘羨。廚媪。叩頭膈膊誠太卑。負版踉蹌亦何好。燈誇無盡可憐螢。檄討不然行及蚤。夕斯可死。蜉蝣癡。上若罔聞。蛾蠶禱。行泥科斗病卽僵。重閉顛當室。誰保。螳思奮臂轍與。鱗。蚌爲充腸糞皆寶。夫征婦歎。蟪蛄枯。父棄孩啼。果羸抱。倉中穀蠹味饑穰。甕裏醯雞憎昏早。觸蠻好鬪。讞局煩。好蚘失靈巫迹掃。頗聞縊女隨蛻蝶。或者王孫怨秋草。蟻螬居豈耐。硜硜。舴艋歸難乘。浩浩五更露下碧。無情翳樹一蟬清。欲稿。

蔣春雨以所藏項孔彰酒甕桃花幅索題得七古一首。孔彰嘗乞酒于友人。後來索甕而甕已破。乃以此幅報之。

墨林之孫善畫兼好酒。畫日百幅酒一斗。酒乾難佐筆墨豪。不謀諸婦乞諸友。書來索甕甕已破。報乏瑤

瑤情則那。折枝一幅聊解嘲。逸態寧容塵土澆。垂髫綽約神仙姝。淡素不買胭脂塗。殘磚剩甃少形似。酒香微潤桃腮腴。麴生烏有墨濡吻。此中已覺仙源近。請君臥甕尋醉鄉。定有漁人賦招隱。蔣君嗜古癖最深。得來此紙珍璆琳。晴窗示我玉叉挂。宛然攜酒花下吟。詩成試問花知否。花已沈酣欲墮襟。

抵滇後呈述庵先生

槐街漫刺十年殘。回首程門雪未乾。國士論知窮始信。名卿折節古猶難。棠陰忽布南天遠。萍葉知浮大海寬。萬里依然成負笈。山來奇字勝高官。

苦吟先子薄陰何。遺集編成待不磨。一序千金生死諾。三春六詔雨風和。碧雞暇溯前型美。銅雁傳觀古意多。席間出示漢銅雁足燈。云在西安時所得。感極情深詞轉拙。只如圓泖聽漁歌。吾師有三泖漁莊。曾令泮填買陂塘一闕。

再過燕子洞

契闊靈山乍兩年。重來仍是綵衣天。抽身皂莢黃塵外。到眼琪花碧草前。終古濤聲常作雨。經春苔印又如錢。使君不識忙閒事。偷伴孤雲一夕眠。

謹次皇十一子題太僕陳句山先生遺集後原韻

含毫三嘆渺何因。彷彿龍樓坐接茵。一日未忘師友分。半生虛現宰官身。定文辛苦秋窻雨。感舊蒼茫月榭塵。神理青山如可作。祇應合掌向天人。

贈王秋塋明府

三年梁苑隔知聞。燕市收鐙忽見君。宦跡遭迴太行道。詩篇精彩朔方軍。新婦對面難忘酒。謂屠笏死友關心獨定文。議刻四閩小住休教行色遽。六街花事又三分。岩刺史

江德量

字成嘉。號秋史。儀徵人。乾隆四十五年殿試第二人。及第。官至監察御史。

蒲謁山房詩話。秋史爲寶谷從子。父子九好金石。秋史承其家學。許雅菜。擲靡不綜覽。尤工八分。所書武成王廟碑。爲時所貴。兼能人物花卉。以北宋人爲法。卒時年四十餘。曾注廣雅。又輯泉志。未成。日還之。歿後皆散失。詩不多作。信手而佚。蓋非其所留意也。

王少林太守藉山讀書圖

太守里居有藉山樓。官漢陽時。署據鳳山之麓。構小閣讀書。用里居舊名名之。

借書人云癡。借山事益寡。不辦買山錢。林壑寄瀟灑。結構就岩麓。偏地去榛瓦。坐我松桂屏。言念粉榆社。拄笏對雞籠。初志用自寫。吏散山翠深。一卷時復把。風細籬篆高。花開鳥聲妖。無何別山去。載齊勞車馬。青山無處無。塵埃未能捨。此卷長隨身。此山成久假。

題千樓邨先生十三本梅花書屋圖。用查初白先生韻。

花前寫真事已奇。夢裏看花誰見之。忍冬老人乃畫夢。禹鴻臚之鼎作圖心花幻出水霜枝。歸臥草堂風日好。鶴

書不怕山靈移前身。明月來無迹。寫出情性非人爲。羅浮仙人抱冰雪。不喫梅蕊寧調飢。青瓊長物幾得  
失嘗失去十數載先生曾孫少林太守復購得展卷觸鼻香絲絲。枯槎倒亞瘦蛟偃。春陰濃壓茅檐卑。書幌午垂石屏護。香鑪  
茗椀安排宜。瞿然一翁坐擁膝。清風兩鬢烟霞姿。木蘭權妥春水闊。白鬚者誰翻來遲。化百東坡影搖蕩。  
仙耶佛耶人誰知。寫真能寫夢中叟。神妙直是非夷思。文孫築堂踐古夢。排門釐石知爲誰。少林構堂以  
力者排闥登其石以去且種梅花十三本。曰真曰夢皆非痴。

題時帆溪橋詩思圖

看花來北郭。訪竹過東橋。室邇人千里。溪斜水一條。閒心芳草長。塵夢曉鐘消。此日披圖見。吟成膝自搖。  
水流雲在意。同此證初心。選石坐春晝。惜芳穿故林。別驚詩力健。豪忘酒杯深。得句時還讀。琅琅和素琴。

法式善

本名連昌。奉旨改今名。蒙烏吉氏。字開文。號時帆。蒙古正黃旗人。乾隆四十五年進士。今官侍講。有  
存素堂稿。

蒲褐山房詩話時帆自登仕版即以研求文獻宏獎風流爲事故在詞垣著清秘述聞槐廳載筆在  
成均著備遺錄其餘有資典故著而未刻者甚多所居在厚載門北背城面市一畝之官有詩齋及  
梧門書屋室中收藏萬卷間以法書名畫外則移竹數百本寒聲練影翛然如在岩谷間經  
師文士一藝攸長莫不被其容接爲詩質而不癩清而能綺故問字求詩者往往滿堂滿室

遊西山宿祕魔窟得三首



曉出西直門。一雨山如沐。亭館生新涼。林樾淨含綠。波平若無流。花光澹而縛。郊行四十里。僧寮上初旭。松濤瀉地來。爐烟墮欄角。浮屠七級圓。倒影壓山足。泉聲穿石竇。遠向峯腰束。跌坐證空明。古佛自幽獨。清夢滌珠潭。孤情聳金岫。忽聞草露香。涓涓滴衣袖。萬樹鬱差峩。駢柯蝨蒼秀。偃僂烟翠中。一步一逗遛。日腳不落地。峯陰生白晝。人鳥俱無聲。松籟空音淡。三里始出林。巖際天光逗。借問採樵人。何處尋乳竇。凹凸陰晴殊。豐碑蘚花膩。溉以清浮泉。隱約露文字。文字果何爲。功德讚闍寺。著語非不工。惜哉貢諛媚。我方考圖經。搜別入巖翠。北印五百庵。一一探深闕。

六月三日邀蘓泉雲巢煦齋長河曉行看荷花。遂至極樂寺小坐。分體得五古廿四韻。

出郭荷暗薰。到門柳駢蟲。略約亘橫波。長堤界斷洑。露氣著衣冠。天光豁林籠。難期賓從賢。況際風日淑。凌晨偕四友。當暑忘三伏。客至不參禪。僧枯已如木。亭虛體自涼。水流心弗逐。殘夢破蝴蝶。閒雲曠鳥驚。穉笋迸石塔。古蘚繡板屋。芭蕉委地陰。葡萄當牖覆。檜老粉蕭蕭。松圓濤謾謾。對面起樓臺。闌腰嵌山谷。鶴築金碧輝。螺鬢翠膏沐。讀顏秘監詩。見李將軍幅。美景觀練若。勝游期信宿。市上十丈塵。饋中三年穀。形摧路坎坷。氣折車輻輳。何如初地佳。更藉遠公築。雖乏打漿翁。尙攜持盃僕。礙帽懸藤低。粘屐軟草溲。竹爐茶可潑。香廚葷初熟。消君碗礪胸。飽我藜苳腹。自居淡蕩人。略享清淨福。開窗看西山。萬朵芙蓉簇。

讀王鐵夫芭孫孝廉楞伽山房近詩。併其室人曹墨琴近作賦。

亦是人間語。塵埃一點無。曠懷小天地。好句滿江湖。入夜雁聲苦。到秋山影孤。櫻桃風味好。慎勿戀伊蒲。

韓城相國爲孝廉題櫻桃館額

取我淡花句。余近有淡花開不濃句爲孝廉所賞較待孤月詞。君近贈琢堂有月白孤清甫自疏之句情懷各無賴。風雨輒相思。苦尙綠雙屐。

菊剛黃半籬。到門認秋水。隔水是茅茨。

黃葉打門響。青山生暮寒。秋烟淡茶塢。墨氣出花欄。貧賤交心易。文章造命難。詩成在驢背。趁爾未爲官。豈但酒謀婦。併能詩佐君。房中結鷓侶。世上重鴛羣。搖筆柳飛雪。下簾蘆破雲。慚余老妻拙。畫紙不成文。

雨後游極樂寺贈誠上人

徑滑還支石上筇。羅門盡日碧苔封。兩三竿竹自秋色。千萬疊山皆雨容。詩卷涼生禪榻早。茶爐香壓佛花濃。煩君倒瀉天河水。一洗人間芥蒂胸。

同陸璞堂學士程東冶侍讀江秋史編修集許秋巖前輩秋水閣

一縷茶烟漾曉櫂。海棠風裏度清明。空齋倦客江湖夢。短巷斜陽鳥雀聲。呼酒不妨新月上。捲簾恰好晚春晴。西園下直吟詩慣。感我聽鐘十載情。令弟石泉編修曾於下直日吟詩于聽鐘書屋今已下世矣

吳樹萱

字少輔。吳縣人。俊弟。乾隆四十五年進士。官四川□□道。有霽春堂集。

武昌城南泛舟至東湖驛

武昌城頭月初落。黃鶴磯邊浪不惡。傍巖樓閣映參差。重來好與黃花約。烟櫓揖讓送人行。便有湖光映面清。菱蒲菱芡足秋色。鷺鷥點破江天晴。平生慣與烟水習。舍陸而舟意頗得。宛轉溪橋畫不如。兩岸浮嵐翠欲滴。白蘋風起浪吹花。欸乃聲中放客槎。回頭笑指晴川渡。無數估帆明落霞。

蒼溪

雞聲出茅屋。始信到蒼溪。荒戍仍烽火。孤城急鼓鼙。江流來劍北。秋色遠巴西。橘柚人烟外。霜華滿石梯。臨江試院夜吟

觀音巖

氣入蠻墟冷。星懸斗帳明。江流圍小郭。灘響逼殘更。遷謫人何在。艱難恨未平。雲安此去近。知有杜鵑聲。坂折捫蘿上。巖高拄杖看。仰天窺一線。匝地走千盤。樹古雲栽葉。江晴雪滿灘。花飛吹不到。叢翠擁諸巒。癸丑立秋日署齋歡讌翌日將有漢嘉之行適秋汀遣人致善吹笛者詩以付之。一聲吹裂萬山秋。月魄雲容韻裏收。我是江城舊何遜。落梅根觸故鄉愁。

謝振定

字薌泉。湘鄉人。乾隆四十五年進士。官至監察御史。有雲將山草。

蒲褐山房詩話。蘇泉在御史臺。巡城適道。遇勢家奴車。服侈麗。且相抗。乃縛而鞭責之。焚其車。事聞吏議弗善也。既罷官。性好山水。爲東南汗漫游。嘗訪予青溪。以病未見。乃歷五茸三泖。過嘉禾。至西湖。又渡曹娥江。覽鑑湖。巖山之勝。所至士大夫虛左迎之。酣暢淋漓。酒痕墨瀋。中獲其寸紙。珍爲拱璧。

胥門舟中晤唐陶山夜話

送君舟中別。癸丑歲游河送別。復此舟中遇。各各看髮毛。意氣尙如故。幾年雙鯉魚。纏綿道積愆。交永言可深。疊唱詩無數。自我淮南來。凌風欲飛渡。終焉隔帶水。盈盈有餘慕。萍蓬感東西。鷓鴣變朝暮。宦拙君所同。蓄意無由訴。我今釋重負。揮手謝鷗鷺。一舟汗漫行。雙屐雲嵐布。訪戴心所先。把袂忽一晤。君來非我夢。尋巧相赴。宵寒燭屢跋。瑣碎誦新句。遊蹤述髣髴。略領江山趣。遲我垂虹橋。十日酒中住。

遊吼山

放棹來繞門。尋幽過臯步。清漣淨如拭。白鷗宛相赴。舟從石洞穿。人向竹陰駐。迎客僧赤腳。彳亍導先路。遊鱗臥澄波。野鳥弄圓喙。嶄然見山骨。壁立空依附。萬笏排雲霄。一拳挺烟霧。玲瓏露圭角。堂皇出奧阼。迷離斧鑿痕。千載苔蘚護。匠斲本無意。極目發奇趣。更尋龍首巖。飛泉迸甘澍。跳珠落千尺。觸石有餘怒。緬昔石簣翁。於茲寫心素。矯首懷東山。長嘯獨欣慕。

郊行

看山忘遠近。躡屐破溪烟。雨足分秧水。風清曬麥天。機聲出茅屋。花氣上漁船。信美滄洲趣。環村叫杜鵑。

碧霞元君祠

作配青圭肅。凌空絳節飄。陰陽雙氣合。風雨萬靈朝。玉女泉猶冽。銅碑字半銷。翛然塵慮淨。清磬滿雲椒。

吳蔚光

字振甫。號竹橋。昭文人。乾隆四十五年進士。官禮部主事。有素修堂集。

蒲褐山房詩話。竹橋初登詞館。繼改儀曹。志尚幽閒。卽辭華臚。既而詰婦。總制湖湘。門諒。蘭詩。而向禽之志。彌專。箕穎之情。愈切。覃研文史。嘯傲湖山。跌宕琴樽。搜羅書畫。且與門人鮑叔治等。及女士席佩蘭。風宛仙。弦詩讀畫。粉墨淋漓。吾谷雲深。尚湖春暖。人誇雅集。望比臞仙。故發爲著撰。莫不刻羽引商。揚風扞雅。佳句如江城遠笛。秋風早山館。疎燈夜雨。多半湖流水。青通市十里。垂楊綠到城。捲幔榴花紅。有醖浮杯。莖葉碧生香。憑溫小盞。思題竹行。熟迴塘爲看花。水氣陰涼。將做午。山情平淡。怡逢秋。逢花客有留連意。對月人多太息聲。夢裏驅馳。歌白石。醉中薰麝。寫烏絲。貫來綠酒。堪爲簾幕。出青山。可當家。天寒睡怯。孤衾重。夜雨吟食。小閣幽。落花聲。氣簾櫳。悄門名。時光几格。幽斜陽。天星紅。雨半簾。飛蝶綠。雲千葉。蓋鴛鴦。空江短。櫂春波。色小院。重簾暮。雨聲。綠未了。時開卷。舊侶無多日。掩關雖畫。以旗亭之壁。寫以蜀錦之箋。殆不能窮也。

曉出西郭

初瞰麗陽林。微靄冒幽巘。稍聆谷鳥喧。條觀曙光顯。縱櫂聊逶迤。褰裾信繾綣。理洽慮自輕。意豁境逾緬。平田前野陳。曲渚後環轉。習習惠風爽。曖曖鮮雲衍。修儼鑒沈浮。崇蘭汜舒卷。感茲芳序延。一獲冲期展。撫景申長謠。忘形從所遣。

三月三日

良辰際元巳。令節屆春作。靈雨渙瑤流。鮮飈扇珠萼。命駕循芳林。褰裳踐蘅薄。園楊旣牂牁。山桃逾灼灼。文蔓纈繁蕤。明玕坼疏籜。睨皖鶯止邱。頡頏燕巢幕。紫鱗或負萍。紅蠶亦棲箔。緬彼風浴蹤。倦茲戒禊約。奉劍徵西河。流觴紀東洛。采艾心徒拳。握蘭懷偶托。樂矣庶毋荒。詠哉勿相謫。

攔江磯

衆磯踳風湍。疊石攢怪蝟。茲爲水所吞。江腹森戟鏃。汨汨疑爛糜。陰火日煎沸。疾流旣滄淪。縈波復溶溢。防之不及防。與舟爲鏃礪。太行鬱屨屨。孟門瀉湖漚。險巖在日睫。睹者得先戒。禍機發于陰。斯害小而大。動作苟或疏。一觸吳厥載。巨川無安瀾。激盪繁變態。利涉宜中孚。旣濟發深喟。

小孤山

豫章山童然。峴岬半成禿。小孤涌江心。秀削獨者鬪。亭亭麻姑紉。一鬢挽膏沐。俯照籀鏡光。羣娥影粗俗。又如坻泥笱。春町翠高蝨。其巔駢幽篁。娟淨染蛾綠。劖紫啟戶闥。梯青架樓屋。盤旋上下層。宛人老螺殼。烏鴉百千棲。黝色點犖确。物蠢知所止。或啄而或鷓。茲峰實瓊特。靈氣日照育。水澤交滄澄。林木紛潤黓。宜有神市司。秩禮視嶽瀆。珠幢建飄揚。羽葆衛肅穆。云胡異見聞。冠以女郎日。逝矣塵網牽。沿洄傍隈澳。擊汰行倭遲。弭旂睇綿藐。中章寓長謠。滿雪庶無舛。迴瞰澎浪磯。壁立自赧駭。

道士泚

峯者爲山。雁夷者爲山腹。迤者左右翼。是爲山股足。前頰而後仰。宛然道士伏。鞠躔滄江濱。詰屈悍流復。舟上與水爭。若車鏗其軸。十進九成退。以風鼓之速。舟師健於虎。至此牛穀觶。攝魄歸一心。貫精入雙目。得濟罷驚悸。過涉興怨謔。吁嗟山有靈。千禩長蒲服。坐令行旅人。所遇頰頰蹙。天關高九重。曷不飛片牘。剗平成康莊。錫我蒸黎福。

由祁門登陸至魚亭

宿烟屯修嶺。新漲馳迴谿。蒼蒼灌木陰。錯以榮麥畦。結翠下作塔。散金上成蹊。黎明發輿轎。辣闕鳴春泥。林風巾獵獵。嵐霧衣褰褰。前梯松岳高。後絕蘿坂低。行者如龍游。止者如雞栖。午餐見澄霽。日出景已西。閒花有千笑。幽鳥非一啼。行瞻百里道。砥平渺埃壘。或橐而或囊。或負而或攜。履坦緬遺澤。自祁門至魚亭路八十里。

皆先伯祖  
倡纂修成

矧彼頰與黎。極盛重所繼。務塞衆口詆。解裝及魚亭。延緣狎鳧鷖。

錢忠懿王金塗塔一版。縱二寸有奇。橫約寸半。陽面佛象已漶不可析。其陰有吳越國王錢宏俶敬造八萬四千寶塔乙卯歲記十九字。記下別有人字。蓋編次意也。按曝書亭集誌此。譌稱武肅者。竹垞翁實未之見。故繫元周方泉詩於後爲據。周詩但從如來捨身象起議。亦未確指爲忠懿。今可以證其失矣。趙味辛舍人攜出眎客。前輩翁覃溪學士因搨數十紙。并作長歌。學士語余。塔本四版。上函以蓋。友人曩于陝中賂之。櫛製旣多。流傳在世。茲特一中之一耳。余分所拓歸。展玩

不足亦成是章。

五材民並用。誰能去者兵。嗚呼八萬四千塔。如九州鐵錯鑄成。武肅當年賜金券。衣錦軍歌息征戰。誰詠鍾馗擊鬼圖。廢立先囚義和院。文德迎來重襲封。淮南江北助交鋒。賚兼羊馬恩原渥。獻盡珍奇禮最恭。荆楚諸邦歸命逼。孤危難仗空王力。風景河山幾百年。一朝舉族留京國。不知此實何時造。紀歲分明維乙卯。得非赤堇銅。或是嶺南寶。青蓮座下狻猊獸。紫竹林中鸚鵡鳥。摹倣寫狀髣髴存。龍女善財爭拜禱。應在太平輿國前。遣還兩浙喜欣然。買燈正散中朝綺。唱簿方收小戶錢。欲懺世尊銷怨讟。裝炭營鑪灶。高爇浮屠七級將。毋同後代猶聞呼保俶。一片聲疑替戾岡。朱斑綠駁出空囊。低眉欲現慈悲相。透頂虛生智慧光。何如盡變犁與鎛。蚌甲韜戈事耕作。

抵家四首疊用梅岑韻

自信平生少宦情。對山臨水眼偏明。策科幸脫今生累。詩卷慵沽後世名。閭里不須猜畫錦。階庭猶得趁冬晴。殘年光景竊收取。唱櫓歌春到處聲。

燈火連宵笑語譁。車塵馬勃隔東華。傳臚典大從頭數。省覲期寬放口誇。一壑一邱惟汝置。半村半郭本吾家。棉輕粥煖都行樂。除卻當前事恐賒。

芭籬短短約疎疎。嗚犬栖雞識敝廬。排日工夫花重護。漏春消息柳先舒。香風深巷鄰開兔。膏雨平疇客



荷鋤懸想來年春更好。長吟遠眺定容予。

扉屨逕掃自翛然。何必園稱小輞川。

小輞川錢秀峰侍御園居

璞屑久憑妻與子。荒唐終斥佛兼仙。碧芹翠韭還鄉味。

紅橘金柑度歲天。只媿曩遊筋力憊。已難親蒔隔谿田。

### 錢塘

字禹美。號學淵。嘉定人。乾隆四十五年進士。官江寧教授。有鶴原詩草。

### 定林寺夜起

夢覺聞寒鐘。起行向巖谷。草逕露氣深。流螢點修竹。宿鳥栖忽驚。山泉斷還續。余心憺無事。徙倚至明旭。

### 入室

房室總帷寒。燈火焰虛位。平生一杯酒。銜哀爲汝醉。依依外老姑。憐我面蕉萃。謂我幸自遣。生者固有逝。卽看兒嬌好。甥意已可慰。回指帳底女。少小聰明最。殷勤勸我歡。語罷亦拭淚。秉燭遂至曙。愴恨不能寐。

### 倪雲林山水巨幅歌

野夫春晴獨微步。有客扶筇訪村路。登堂爲贈倪迂畫。人眼林巒莽盤互。水墨雖黯淡。蕭爽見天趣。漫漫秋空雲。揮洒滿縑素。悅疑置我蒼梧元圃間。不然定是華壇赤城舊遊處。遠天極目磨青銅。曉嵐無際雲溶溶。游氛淨掃初日出。翠巖縹緲浮晴空。暑間一瀑布。蜿蜒赴壑疑奔龍。衝林激石直下不知幾千丈。但

覺耳邊眩轉生雷風。山下艸屋結構同。誅茅應是桑苧翁。數家屋壁互依倚。只有向背無西東。是時秋老霜正濃。門前颯颯脫葉紅。得非湘江二女偶過此。至今斑竹留寒叢。倪迂澹蕩人。托跡山水縣。生平幾兩屐。爛漫恣登踐。豈惟邱壑畫作殊。跌宕襟期總堪羨。雪甸灘頭放棹回。銅官山畔支筇遍。雲林堂。朱陽館。禪榻隱囊伴清燕。我獨何爲負前願。碧樹紅泉日待人。青鞵布襪行當辦。

九日同嚴冬友諸景雲王少陵汪緝青楊上玉畢文瀾金宋瑞登冶城山

時序易摧謝。江山感物華。百年幾令節。名士半離家。地迴日沈樹。天寒鴈落沙。空憐一罇酒。寂寞伴黃花。

夕次小赤壁下

孤櫂沙頭泊。西風蘆荻稀。晚潮隨月上。獨鳥傍船飛。樵唱歸林薄。禪燈出翠微。山村搖落候。處處搗寒衣。

春半

紅紫尙無信。萋萋綠漸遙。嫩寒歸柳陌。微雨及花朝。白舫隄邊水。青旗渡口橋。賣錫時節近。幾處有吹簫。

送江月溍歸黃山

聞發滄洲興。飄然問去程。寒波歸故國。短棹背孤城。山近雙臺峻。江連七里清。鐘聲雲際落。帆影鏡中行。翠嶂天都境。丹爐軒后名。未能同眺覽。相送獨含情。

寄諸佃榜

虎尾羊腸事可驚。頻年憂患苦相嬰。絕交豈敢如朱穆。入世誰當恕禰衡。慷慨帶刀豪士氣。蒼涼擊筑酒人情。過都一蹶非無爲。習坎由來未易行。

依然落落吐長虹。增繳何妨到冥鴻。高臥樓頭元意氣。倦居跨下亦英雄。命宮磨蝎三生定。身世藩羝一笑空。多謝故人相慰藉。阮生未擬哭途窮。

沈周畫

幾家茅屋接漁灣。樾隴松林夕照間。憶得卸帆亭畔望。晚烟紅樹皖公山。

程際盛

原名炎。字煥若。號東冶。長洲人。乾隆四十五年進士。官至監察御史。有稻香樓集。

蒲褐山房詩話東冶由舍人沅歷闕塞奉職三十餘年。退食而歸。掩關卻掃。惟以汲古窮經爲務。所著有說文古語考禮記古訓考周禮故書攷儀禮古文今文考。駢字分牋。續方言。補清河偶鈔。皆有功於學者。居京日久。故不爲吳士所深知。然繼朱伯原俞玉吾之遺軌者。非君奚屬。作詩曾問業於歸愚宗伯。綽有唐音。

夜泊燕子磯

江冥不可渡。江風淒以肅。亭橈向石磯。正傍青山麓。紅樹隱遙汀。蒼烟辨崖屋。絕壁聳千尋。窈窕結寒綠。驚濤夜有聲。觸石浪仍伏。扣舷不能寐。遐景載欣囑。徘徊沙月生。泠泠葦花曲。明日挂帆行。孤舟何處宿。

舟次青陽雪

孤艇沂烟流。朔風凍雲木。掖急灑烏篷。雪深壓茅屋。杳鷺人晴川。淪漣淡溪曲。湖雲結空青。林樹聳寒綠。沙灘驚雁飛。木杪歸鴉宿。數葢圻寒梅。千重映修竹。旅客契靜心。虛舟空羈束。山陰興未乘。秦鷗恣遐矚。渺渺暮歸人。悠悠屏塵俗。

暨陽歸舟懷葉麗農

離羣別鶴恨何依。水色蒼茫烟靄微。斜日風高潮正落。暮寒酒冷雪初飛。浪遊泛泛歸心切。去路迢迢旅夢稀。卻憶荒園梅幾樹。幽香知已拂人衣。

消夏次王西莊先生韻

蘭草侵堦嬾未芟。此身長暑散人衙。竹花細影浮湘簾。蕉葉清芬滿葛衫。靜坐團蒲聽梵語。閒凭方罍拭碁函。不愁繁日長繩少。午景遲遲度翠巖。薰風習習動微涼。十畝青瑤傍草堂。紫筍新煎浮竹色。紅蓮早熟半松香。蕭疎境別如濠濮。嬾慢人過盡惠莊。一枕羲皇高隱几。悠然曉夢落瀟湘。

陸伯焜

字重暉。號璞堂。青浦人。乾隆四十五年進士。官至浙江按察使。有玉筍山房詩鈔。

虎邱晚憩同竹嶼麗農泛月歸

理策尋林邱。天寒氣候變。入寺霜葉飛。聞鐘棲鳥散。涼烟空翠交。夕霽明霞亂。旛影護香壇。松陰靜僧院。開軒有餘清。孤懷自舒卷。泠然竹間琴。飛泉注幽澗。

華月升林端。陰岷延夕景。鳴禽戛風籟。修竹亂人影。流目興未闌。揚舲夜方永。野橋俯晴川。游鱗動浮荇。水氣生夕涼。停琴酒初醒。卻眺翠微間。蒼蒼亂烟暝。

### 華山

蒼蒼嵐翠濃。浙浙商籟肅。泠泠御風行。杳杳孤雲逐。單椒秀華趺。秋容若新沐。石牀枕雲棧。鳥道入林曲。竹木暗四山。往來稀樵牧。絕壁劖空青。方池淨寒綠。天籟流笙竽。風泉韻琴筑。林響蒼鼠竄。梵靜馴猿伏。懷新無近尋。賞異得遠目。雲影晃游氛。山花媚幽獨。我聞千葉蓮。服食可辟穀。何如謝聲聞。松陰結茆屋。

### 晚憇法螺

侵晨越華跗。畢景向雲闕。林壑非預期。秀色紛攬結。丹梯歷由旬。碧徑知幾折。金地圍微瀾。瑤壇翳深樾。稍聞烟外鐘。已露松間月。嵐陰夕復佳。定香晚初歇。泠泠千花鈴。流響入寥泐。晏坐生道心。習靜味禪悅。一鼓風中琴。微雲自超忽。

### 白雲泉

山半聞清音。偶隨石林轉。文瀾蕩晴暉。絕壁架雲厂。銀華滴千乳。雪竇穿一線。陰岷激寒玉。月壑澄素練。

潛虬靈漢涵。觸石碎珠濺。浮采自晶瑩。回光亦凌亂。冥心愴忘歸。水觀有餘戀。

題王繹如山憲掃葉圖

天宇澹寥閤。山齋遠塵市。商聲人林葉。械械墮階屝。紛然掃更落。校書差可擬。之子愛三餘。丹黃勘圖史。豈徒注蟲魚。亦欲辨亥豕。佔畢嗤腐儒。俗學陋穠秕。慎莫享斂帚。譚藪自今始。

春愁次韻寄熊筠涓

峭寒如水柳如絲。觸忤閑愁只自知。一夜餞春啼鳩後。五更殘醉落花時。綠波南浦天涯路。芳草西堂夢裏詩。惜別懷人苦無緒。好憑魚素爲開眉。

消夏

連朝梅雨漲魚缸。分得吳淞水半江。高樹受風涼入戶。疎簾障日靜當窻。雲開忽現青螺九。烟暝還翹白鷺雙。好趁晚來明鏡裏。菱荷香泛木蘭釐。

苔痕侵徑不教芟。一室觀心便隔凡。草際暗葢鳴絡緯。庭陰清露滴松杉。偶思小憩揮蕉扇。漸覺新涼透葛衫。忽憶玉堂天上境。條冰久已換頭銜。

史國華

字濟寰。溧陽人。乾隆四十五年進士。官至吏部員外郎。有石淙山房詩。

蒲藕山房詩話濟寧爲相國史文靖公從孫王子予主順天鄉試濟寧爲同考官望之溫然卽之沖然與予譚藝極爲相得惜年僅中歲而歿集中五言如山光隨短棹燈影送寒潮疎砧欺短夢老樹入新秋溼烟分燕尾小砌長龍須種蕉宵聽雨採藥曉穿雲石邊泉脉細松下竹門深七言如山雲帶溼蒸茅屋溪雨添肥漲小橋當徑草深寒食雨衝簾燕怯杏花風日影半從窗外過鳥聲多自樹間來野水陂塘雙燕影落花門巷亂鶯聲池紫細浪迴魚網柳暗深村映酒旗皆有晚唐風味

### 送陳廣山歸山陽

夫子淮南去添人十日愁帆開黃葉雨江冷白蘋秋是處才名噪相逢氣誼投田園歸固好何以慰離憂

### 小築

小築向江干秋光祇獨看片雲高岫溼一雨暮春寒烟火伍茅舍琴書靜藥闌幽棲無客到隨分著衣冠

### 深溪邨居卽景

我愛佳山水乘閒到古村好峯圍屋角野逕入雲根生計依茶筍家居聚子孫淳風安簡樸披褐道爲尊

### 雲陽驛

雙槳凌風出潤州雲陽百里片時收練塘四面圍村隴建業千峯對戍樓估客帆檣停夕照江城鼓角壯新秋潮聲早晚曾經此古驛扁舟起暮愁

### 江行

扁舟直上接空冥山勢盤旋四面青十幅蒲帆衝細雨一江秋水盪寒星花深蘆荻高人隱味熟蓴鱸客

夢醒。最是旅愁消未得。寒鴻淒楚不堪聽。



# 湖海詩傳卷三十七

楊揆

字荔裳。金匱人。乾隆四十五年召試。賜舉人。官至四川布政使。贈太常寺卿。有桐華吟館詩稿。  
蒲褐山房詩話。荔裳借其伯兄才雄藻密。世號二難。張千臂之錦繡。調八尺之珊瑚。其爲貴重。無以逾也。然蓉裳既已黃巾青幘。著績岩疆。而荔裳復以禰門而外出。寒數千里耳。目所見。得未曾有。與前代文人。譬毫佩玉。雍雍華要者不同。蓋造化奧區。久而必發。而窮荒戰地。自嘉州昌黎之後。紀載無多。天或借翰墨以發其奇。兩君遭際。洵非偶然。宜閱之者如游絕域。如讀異書也。

熊耳山

名山古熊耳。禹跡詳紀載。嶙峋勢如蹲。嵩華屹相對。衆峯互迴抱。百里分向背。中見雙崖披。半壁色純黛。車輪愁欲脫。馬力行苦憊。摩空磴道盤。危步履齒礙。疎花坼林紅。驚羽隨巖翠。下視浮濠流。出澗僅如帶。隨山三百折。始與洛水匯。中原苦平行。到此意殊快。全秦收不得。奇杳落關外。長空捲層陰。絕壑忽晝晦。飛雲入太行。流影過衣袂。因知二陵近。風雨如有待。循途陟高岡。勇進非敢退。投足得山坳。漫告僕夫瘁。

青海道中

朝從青海行。暮傍青海宿。平野浩茫茫。隆冬氣何肅。懸軍通間道。萬騎誇拙速。嚴霜拂大旗。邊聲動哀角。飛沙怒盤旋。迎面驟如雹。時當澤腹堅。海水互而涸。層冰搖光晶。黯慘一片綠。或聞大聲發。凍折千丈玉。

中流起危峯。勢可俯喬嶽。將傾未傾雲。欲飛不飛瀑。云是太古雪。壓疊如駮塚。出沒罔象形。吐納蛟蜃毒。西荒此巨浸。洪流所瀦蓄。卑禾百戰地。秦漢尙遺鏃。蕭蕭古壘平。兀兀邊牆矗。青燐風焰小。白骨苔花馱。夜深駐戎帳。凍土徧燒塢。冷月懸一鈎。荒荒墮厓谷。嗟哉征戍士。辛苦離鄉曲。試聽青海頭。煩冤鬼猶哭。

皮船

剡木製爲舟。利用涉水可。大如編與航。小或艇與舸。駕風蒲帆揚。沿流篾鉅鎖。指迷師用篙。躡險工喚柁。今來藏江側。厲揭測誠叵。洪濤奔奔翻。巨石聳破礮。番人誇蕩舟。舟小殊眇麼。外圓裁皮蒙。中虛截竹荷。淺類筥可盛。欬訝筐欲簸。著足當中央。俯身戒側左。形模嗤渾沌。軀壳僅螺贏。傍岸任孤行。邀人祇雙坐。俄驚層波掀。真擬一壺妥。駭耳聲錚縱。眩眼勢崑礪。附毛識命輕。存鞞嗟身墮。相觸心母褊。羣爭指休墮。微生慣江湖。到此良坎珂。尙從魚腹吞。寧殊馬革裹。曾聞慧海航。止泛蓮花朵。彼岸幸非遙。津梁勿慵惰。

索橋

山行阻洪流。深廣詎可越。兩崖兀相望。怪石起齒峯。飛空架索橋。鎖鈕危欲絕。曳踵窘不前。森然豎毛髮。宛宛虹舒腰。落落蛻蛇骨。迴疑匹練鋪。窄抵長絙拽。誰遣高梯橫。莫挽巨篾脫。翻風乍飛鷲。緣雲更馳鷹。手怯朽索捫。足苦縮版裂。前行不得縱。後武寧許突。俯視逆流迸。疾較飛電掣。天矯龍尾垂。凌亂雁齒缺。驅躡既難憑。駕鵠苦乏術。拄杖心魂魂。褰裳趾兀兀。杠非多月成。繩豈太古結。艱危信多端。絕險誰所設。

行矣勿回顧。中道未容輟。側聽步虛聲。長吟踏搖闔。柱敢馬卿題。馭比王尊叱。一墜無百年。登陸股猶慄。

魯工喇屬達隆宗

稜稜聳石角。設險抵劍門。雪霰零其巔。草木亦不蕃。徑仄復斜注。僅有屐迹存。冰柱森槎枒。袖手莫敢捫。願借九火輶。畀以一炬燔。庶使窮谷底。飛灰轉春溫。此志寧易遂。徒與愚公論。拄杖三歎息。誰爲收驚魂。

丹達山路逕奇險上有雪城山神履著靈異奏列祀典

昔聞茲山奇。絕險今始遭。玉龍何之而。勢欲與天鬪。連峯排岝嶸。寒色逼金宿。突兀窮荒中。陽和不能透。想當鴻蒙闢。鉅手出極構。石稜間缺齧。嵌空琢冰整。一片玻璃光。千斛瓊屑糝。陰風中怒號。虛響沸岩竇。行旅慘不前。十步九顛覆。勇上未盈尺。陡落千丈溜。躑躅馬脫蹄。毳毼鳥縮喙。有時朝日開。如髮綰縠纒。乍晴相激射。到眼肯眩矜。我尋西荒經。險阻亦旣覩。信知九州遙。豈爲五嶽囿。何岡歸程急。到此空引脰。人言山之神。靈爽茲妥侑。陰霾變條忽。窈冥失旦晝。來從萬玉妃。旋轉飄縞袖。築雪如作城。森寒巨靈守。時虞長圍壓。誰敢孤軍逗。狂飈一倒吹。萬牛盡回首。往往昏黑中。不復辨崖岫。倏見神燈迎。出險相引救。我行日亭午。千洞鳴玉漱。幸值氣暄和。謂爲神所祐。心怯卦習坎。事喜象遇姤。整衣拜叢祠。兼以村酒酌。視秩少桓圭。升香無玉豆。作詩誌茲行。用當神弦奏。

飛越嶺屬清溪縣

沈黎古邊郡。頗覺山水惡。凌晨過清溪。迎面聳厓嶠。元和置縣廢。遺址失城郭。歸然峻嶺存。拔地上寥廓。艱危扳石磴。百折勢礚礚。陰霾慘冥冥。蜚廉肆威虐。囚澗伏蛟蜃。騰空斷雕鶚。若亭見叩喙。修坂天際落。蝮蛇何素素。吐瘴昏且錯。毒厲能中人。奚敢試徒搏。其巔尤峻嶒。虹棟構飛閣。莽莽控番夷。天然設局鑰。西陲倚屏障。造化非苟作。險可一夫守。隘豈五丁鑿。經春霜威嚴。不夜燐火爍。叢灌走魍魅。穹岫嘯猿猱。平生跳盪心。顧盼成駭愕。著足藉蟠藤。捫手怯朽索。我欲圖真形。放筆寫岩壑。縹緲無端倪。方壺定慚作。

星宿海歌

即火敦腦兒

平沙浩浩不無垠。黃霧四塞長風翻。憑高極眎目眩眴。漭泆巨浸圻混元。誰歟遠佩囊與鞬。直跨地首摩天根。十步九折愁攀援。瘴烟黯澹旂旗旛。我聞導河出崑崙。貫納忽蘭兼赤賓。寧知一脈遐荒存。灑氣磅礴相吐吞。皇輿地載窮垓埏。祀典崇列胙蠻尊。陳以卣鬯投犧豚。遠超岳瀆陵厚坤。百泓所進萬馬奔。泡汨汨還渾渾。沮洳洄洑失曉昏。高瀉直欲浮中原。巨靈伸掌不敢捫。蓄束幸藉山爲門。陽烏味縮鼈足踏。下穴龍蜃蛟鼉鼃。雄吐雌噉卵育繁。欲出不可層波掀。霜隄中夜迷征輶。衆星倒景何焯焯。車舍旛積勾陳垣。大若懸甕小覆罇。分野莫辨牛斗痕。有時天際生朝暎。白毫萬丈慘不溫。玉龍露脊遙蜿蜒。乃是太古堅冰嶠。漢家使者辭帝關。遠過大夏經烏孫。枯槎安得通星源。沐日浴月搖心魂。鑿空或者乘鷗鷗。我行陟險隨戎軒。弓刀列帳千軍屯。窮冬草落山頂髡。斧冰鑿雪勞炮燔。馬蹄半脫驪與驟。車軸全折輶

與軫清角夜奏同哀猿。壯士僵立愁還轅。何如排風驅九鯤。手握斗柄凌雲騫。下瞰大澤如盃盆。倘遇博望毋卮言。

聞伏羌警

三月家書斷。迢迢盼隴雲。塵魚甘寂莫。風鶴又傳聞。蕃部初飛檄。蕭關已勒軍。山城如斗大。雉堞遍妖氛。誓衆眞倉猝。何曾習鼓鼙。當衝臨渭北。走險遏洮西。乍放空營鴿。俄聞半夜雞。儒生心力弱。何計戮鯨鯢。聞說金城畔。籌邊昔有樓。旌麾煩上相。劍槊領通侯。好待援兵集。還看壯志酬。長宵占月暈。遠照海西頭。

辛亥冬子從嘉勇公相出師衝藏取道甘肅時伯兄官靈州牧適以稽查臺站馳赴湟中取別同賦並示三弟

彈指三年別。相逢却黯然。煩君馳驛騎。慰我事戎旃。禁旅風行速。軍書火急傳。天寒聽隴水。出塞正濺漣。聞道烏斯國。遙連舍衛城。談空惟選佛。縱敵竟銷兵。搜括徒輸幣。跳梁敢悔盟。皇威震重譯。叢爾漫縱橫。上相承方略。專征大纛開。銀刀嚴部伍。玉帳許趨陪。愧未工蠻語。何能辨劫灰。梯山兼棧谷。前路劇崔嵬。作客身原慣。茲行學荷戈。窮荒春不到。沙磧草無多。健翻摩蒼鶴。明蹄騁紫駝。莫持青鏡照。雙髻恐先皤。臨歧本倉猝。欲去強逡巡。制淚各無語。加餐惟此身。衣裘煩料理。童僕勉艱辛。纔作連牀夢。聽雞又向晨。

伯兄以守城功保舉久遲未得入都寄懷四律

秦風涇原路幾千。沉魚翔雁兩茫然。孤城兵火存三日。絕徼風波近十年。東走河聲環木峽。西來山勢接祁連。官程屈指應堪數。消息誰傳到日邊。

五載慈顏一笑開。板輿先御向燕臺。自憐薄宦長安住。反累衰年遠道來。話到存亡俱有淚。

學和姊丈和叔兄俱歿于

伏身雖憂患尙餘哀。輸他兒女齊誇口。曾聽嚴城戰鼓催。

風前心緒劇懸旌。欹枕中宵夢不成。豈有池魚驚失火。休疑社鼠更憑城。

時聞伏羌城樓被火

防秋事早煩籌策。行

部威猶費送迎。曾記軺車西去日。有人韓范許平生。

蔣心餘先生送行詩。有著書畢竟空言耳。韓范功名在此行之句。

三山縹緲隔塵紅。破浪雲帆會許通。詞客今能談出塞。才人俱豔說從戎。鳴甄計就心真壯。磨盾詩成話

更工。

兄有伏羌紀事詩一百韻

何日對牀風雨夜。重提舊事一尊同。

呈大將軍福嘉勇公

徼外軍書午夜來。將星又見動中台。九重授鉞先聲壯。三十登壇衆望推。佩印密承宣室詔。分旗盡典羽林材。路人爭問嫖姚貴。此是專征第幾回。

暫駐牙旗大衆歡。籌邊樓上倚闌干。中宵鼓角橫戈聽。絕域山川聚米看。燃燭兩行分草檄。解鞍千騎會

傳餐。

時調索倫助旅甫抵前藏

須知上將能持重。姓氏先令賊膽寒。

袴褶蠻韉結束輕。容參幕府學談兵。摩雲遠過閻浮界。計日應收的博城。麾下偏裨皆壯士。軍中禮數到

書生驕驕感贈銀蹄迅得免長途款段行。余經行青海馬力甚疲公以所乘馬予之甫得途前藏。

### 趙懷玉

字億孫號味辛武進人乾隆四十五年召試舉人今官青州府同知有亦有生齋詩鈔

#### 林屋洞

湖寬地肺通土裂山腹厚初猶竈可容漸覺釜低覆蛇行辭杖策蟻伏嫌襟袖驚霆左右轉駭石首尾闕陰陽異早潦明暗雜昏晝撲炬起蟄禽風跡閱陰巖金庭企靈威石函虛篆籀始疑造化洩轉忤心志陋奇遊倘可續敢惜疲軀復

#### 登焦山

焦山不見山積翠天際浮挂席指海門乘潮達巖陬初升繚而曲漸陟高且修樹陰清晝羃木勢厝崖樛  
警然露微罅驚踏滄波流身輕失久疾地曠獨煩憂是時天宇肅萬象澄清秋蓬瀛氣東至呼吸如可求  
俯視松與寥下等土一坏決背鵬隼疾隕魄龍躡游昃景澹欲沉罡風凜難留真人向我招乘翳驅玉蚪  
曉過羅喉嶺行十餘里憩潭石

山曉日未高白雲羃如帳花明亂殘月十里同一望籃輿陟崇嶺人面森列嶂忽然青蒼開金碧落天上  
不見枯千章猶餘松十丈碑留明昌刻寺遡嘉福創泛觴隨波流折竹引泉羨風來殿鷗翔鐘動篋蛇放

遺蹤半泯沒。過客猶想像。憑高俯傑閣。陡覺心眼暢。一峯峙中央。九峯互環向。日光亭午低。石色不肯讓。閒房晝如年。坐臥空色相。山僧謂余勞。早具伊蒲餉。

七月十四夜京口對月

入秋毒熱苦未減。況復束體投孤篷。今宵乍得泊洲渚。披襟獨受涼颺衝。蒼山如煙散波面。皓月作勢升雲中。白氣空涵一天地。金花碎迸千虬龍。老僧臨江口持咒。倚佛自說無邊功。楊枝露潤鬼界黑。菡萏燈逐濤頭紅。風流千古此淘盡。直欲粒米招羣雄。騎鯨太白去不返。抱月思躡仙人蹤。茲行日遇石尤惡。塔上鈴語仍顛風。三更露重入篷底。夢醒正打金焦鐘。

題文信國書爲錢唐鮑文學廷博

書凡三百四十七字。前幅已缺。文載清河書畫舫。向在李中丞鹿山處。今歸於鮑。後有一峯跋語。謂空坑敗後所寄。一峯不知姓氏。小印署永蘖二字。或云宋遺民也。王光祿盛鳴以書中入汀一語疑之。辨其非空坑作。其他跋語頗多。皆近人。故不及焉。

半閒堂築西湖幽。法書名畫傾公侯。木棉菴中攜不得。半作劫燼無人收。當時豈索信公書。至今尺紙逾天球。鮑生家亦居湖濱。物不貴異惟其人。牙籤錦贖幾千軸。得此謂可空其羣。寥寥三百卅七字。空坑敗後從容寄。幅殘似恥瓦欲全。色淡還思淚深漬。已教八口墮虎穴。忍令孤城怯螳臂。間關久置成敗筭。頽



仰尙兼家國計。臨危示法先示信。檢點殘軍收割印。人亡縱失將伯助。天意不教以疾困。公書云。在瑞金一病甚可愛。  
可憐覆巢難復全。生兒天折女棄捐。魂從朱鳥返天上。心照青簡傳人間。傳疑傳似任史臣。黃冠故里恐非真。況爲曲筆揜正氣。大元革命邦維新。浮蹤偶向閩海寄。聚訟空若鴻溝分。如公可死死亦矯。龍首黃扉致身早。歿殊葛公節義傳。生勝睢陽宰輔表。後來豈少登科名。豪華但學公平生。讀書不識忠孝字。翰墨亦稱稽古榮。

請水詞

郡城東有白龍祠。每早太守率官吏往禱。迎池中水歸。間卽得雨。謂之請水也。

天陰黯黯雲蓬蓬。樹頭吹盡東南風。立秋半月到處暑。五日十日仍不雨。有時屋角雷聲小。雷聲未終日杲杲。小兒入市執柳行。常俗禱雨作柳龍行。市中小兒折柳隨之。農夫坐隴嗟苗槁。攜苗報縣求勸災。官賑未發徵先開。朝聞阿殿門外過。云是請水城東來。城東祠宇祀老龍。焚香山積寶炬紅。老龍善睡兩耳聾。勺水不敢貪天功。官民束手兩無計。蝗旱此邦亦神意。昨日禁屠今宰羊。太守縣官賓在堂。

水車謠

水車聲晝不止。赤日烘人皮肉死。水車聲夜不息。官河日乾水一尺。河乾難致百斛船。柴米添價鹽添錢。青簾官舫上流至。一泊三日空沿緣。兩岸農夫不停手。長鯨怒翻渴蜺走。關南有雨關北晴。聞蘇松得雨。天意

獨吝吾鄉久。君不見東南饒富推淮揚。去年河決今年蝗。彼民悔不生此方。水車雖勞何足傷。

長毋相忘漢瓦歌爲張舍人填賦

秦宮已灰漢宮作。靈臺置酒面寥廓。淒然誰使漢王憐。共舉當時薄姬約。主家歌舞稱平陽。承恩特賜千金裝。一朝上車入宮去。拊背但說毋相忘。漢朝故事有如此。片瓦銘辭誓終始。毋忘若比天久長。長樂長生皆妄耳。甘泉忽譴拳夫人。執扇風多華殿塵。君心反覆那可恃。少翁空致帷中神。鴛鴦易冷琉璃脆。滄桑幾見秦山碎。瓦乎土質獨能全。中有多情萬古淚。色帶霜華形滿月。四字分明辨豪髮。銅爲沓冒玉作階。曾蓋何宮覆何闕。爾來好古集良朋。金石搜奇得未曾。昨見封宮傳舉契。早聞鈎弋出遺鏹。侯官林昔作瓦圖記。排山朱近日尤能事。如何倚樵尙見遺。天意將爲舍人賜。我交舍人近廿載。素衣漸化朱顏改。寒窻風雨一摩挲。車笠前盟宛然在。好裁壁友伴愁吟。舍人製瓦爲研莫問蘭池與上林。鼠鬣成塚魚鱗盡。歷劫難磨耿耿心。

宣和琴歌

爲莊畫英明府作。琴名夏玉。背有宣和御寶印。

宣和古琴善形製。背面斷紋蛇腹細。黃金爲徽玉作軫。祕印依稀鐫四字。秋風颯颯黃鶴哀。良工方選陰陽材。此琴是否百琴一。誰與伴者惟春雷。當時定樂委方士。更出樂章重郊祀。朱絃疏越一再彈。居然解慍歌風旨。君王玩好無不精。法書名畫紛縱橫。殿名易在改元後。念琴進御非承平。按宣和殿有百琴堂。宣和元年改宣和殿。

爲保和殿。人間不聽元音久。忽入南華散仙手。錦囊高置郭公磚。良物從來必有偶。焚香試請歌一曲。短側長清相斷續。響泉灑灑聲琅琅。銘背信堪呼夏玉。虛堂漸覺悲風生。淒切不似從前聲。平沙萬里塞雁落。想見去國蒙塵行。勸君囊琴且莫撫。世人但解耽歌舞。知音遠在麤餘。避劫茫茫思太古。琴君不見會稽陵破見穿雲。弓劍何人葬故君。飄零更有汪供奉。操出思歸不忍聞。

景州

遙指隔谿塔。驅車過景州。春光先在水。暝色欲歸樓。燈市新年盛。人烟近郭稠。賢良誰第一。故宅問山邱。皆口伍行人祠。

夜烏啼罷冷宮梧。祠墓千秋尙枕湖。蹤跡已開游俠傳。山川空負霸王圖。入秦七日偏存楚。報越三年竟覆吳。猶有未忘恩怨在。怒潮如雪動寒蘆。

留別都門諸子

去住眞知兩不堪。且尋鄉夢返江潭。下車事已同馮婦。縮屋心誰信魯男。聽到悲歌先自淚。傾殘薄酒未成酣。故人知我緣親在。寄語夷吾謾諱貪。三日風光歲又新。平生未識帝城春。空羣冀北難爲馬。捷徑終南況有人。彩筆久疎江令夢。素衣空惹庾郎塵。竈前檢點更炊具。合是勞薪作後身。

任邱追悼李先生中簡

宦海歸來松鞠殘。重過槐里夕陽寒。一經鄭重頻題篋。先生無子三黜蹉跎到蓋棺。傲屨屢愁生計短。賜園猶憶主恩寬。乙酉夏余請樂于西苑澄寰園剎那廿載傷心事。門下彭宣淚未乾。

劍門

斧鑿何年到五丁。攢如錄釣列如屏。通天箭栝層層黑。出陣芙蓉朵朵青。西蜀地形勞夢想。北宗畫法見遺型。只嫌拂水無聲久。願借山靈風雨聽。

哀張三舍人墳

昨歲書來今年報。忽傳惡耗自長安。汗青手定千秋業。垂白身終七品官。君以己丑入中書。今二十年矣。老遂客懷孫抱久。貧憐遠道殯歸難。春明舊會頻傷逝。歲辛丑。同人有詩酒之會。魚門辛餘兩前輩。相繼祖謝及君而三矣。存篋遺詩忍重看。

王鼎

字祖錫。號條山。江南華亭人。乾隆四十五年舉人。有蘭綺堂詩鈔。

擬韋左司寺居

城闌厭翳塵。林巖釋羈縛。偶謝郡符繁。遂茲禪扉樂。松風謾謾來。山月墮秋壑。澄懷物我間。萬慮渺何着。至道趨衆形。有無泯垠堦。智士出于機。靜者得所托。悠悠元契初。中心安澹泊。

鹿城秋夜對月偕秋潭竹嶼德甫習菴分韻

碧瀾散清景。蒼然夕靄昏。相攜坐明月。捉席秋梧根。落葉紛以積。棲禽時一翻。何人弄橫竹。離思滿前村。

謁袁海叟墓

一代遺才出處難。感懷殘碣夕陽間。魚龍有地潛東海。猿鶴何人誚北山。老鐵千秋知已在。白燕篇成。爲鐵崖激賞。

青邱幾輩故園還。公獨以見。幾免禍。羅龜風節期誰伴。明季猶菴先生亦曾遊跡於此。展謁能生壯士顏。

舟經太湖口

雙帆剪破碧玻璃。秋色空濛望欲迷。七十二峯何處好。夕陽一角洞庭西。

汪學金

字敬箴。號杏江。鎮洋人。乾隆四十六年殿試第三人。及第。官左庶子。有靜厓詩初。

蒲褐山房詩話。杏江爲持齋少司空。詞體情既勝。才調彌嘉。標格則玉樹瓊枝。詞賦乃金荃蘭畹。所鑄初稿。已有揚州烟月。江左文章之目。最工聯體。爲余僕三泖漁莊圖詩序。時謂其工。既由詞館。游陟宮僚。兩次請假南還。世俱嘉其雅尚。所營靜厓小築。水竹鬱環。樓臺窈窕。梵磬霜鏗。儼然世外。朋舊中如武林潘侍御。庭筠同之餘人。莫遠也。蓋其夙植淨綠者深矣。

秋日同朱元圃晚步南園遲王萬夫雁湖不至

秋容媚夕景。幽境結遐想。佳時愜勝尋。清遊惜孤往。將儔覓素心。探邃獲元賞。雲霞氣澄藕。原陸勢蕭爽。亂流散石淙。細路伏榛莽。林壑迭映蔚。軒除坐超朗。陰厓露氣凝。寒圃月容廣。閒庭一葉投。悄壁百蟲響。

素節悼奄徂。前遊憶疇曩。願言敦古歡。毋爲役塵網。志合跡自親。義孚道豈枉。攬衣望停雲。卻立增悽快。  
延清軒觀大理文石爲張萼聯賦

春陰三尺低壓檐。虛堂雲氣春氍毹。延清軒中貯文石。漆匣乍啓爭窺覘。骨節堅潤色蒼碧。文理刻畫皆  
精嚴。荆關闢筆寫不得。天然靈氣成飛巖。巖端仙人髻毛綠。玉芝瑤草堆筠籃。巖下清江清見底。遊魚連  
尾依澄潭。樹石禽鳥盡形相。物態栩栩生毫尖。四座拍手叫奇絕。賤子據案摩挲三。平生好玩百不入。此  
物竟使成奇貪。米公攫取吾豈敢。平泉祕惜君何慙。此時老梅花撲簾。社酒百甕開醅甜。但得主人日召  
客。芒屨踏破南城南。

新晴卽事

雨歇平蕪外。舟人蕩槳喧。魚蝦江上市。雞犬水邊村。官驛三千里。春風廿四番。梅花將落盡。玉笛最銷魂。  
北河舟次

平野連天闊。長河帶郭斜。客程遲候燕。暮色上歸鴉。烟柳低垂岸。春潮淺露沙。直沽七十二。是處酒人家。  
過趙北口

燕趙中原地。蒼涼獨客過。西風吹易水。落日下滹沱。大澤龍蛇動。荒原鴈鷺多。市中屠狗散。無復有悲歌。  
清江道中

古渡綠陰低。人家半水西。叢篁當路密。幽鳥過村啼。衆澗歸溪合。羣峯傍堞齊。夕陽多暮色。蒼翠使人迷。

芭蕉

爾亦工愁者。相依倍有情。自然含雨氣。容易作秋聲。昔夢成何事。空中笑此生。小窻三葉後。且與醉鄉成。

舟中見月

月出照汀洲。江空夜色幽。星河低浦樹。風露近灘舟。亂葦漁塘夕。涼螢水驛秋。我行殊未已。信美不能留。

初春重遊百花洲有懷陸輕桴

重到同遊地。浩然懷故人。鄉園歸遠客。江國看初春。南浦風光霽。東湖草色新。應知婁水曲。樽酒話佳辰。

七夕旅懷

天末起孤愁。明河入夜流。今年初作客。此夕最悲秋。南國無鴻雁。他鄉見女牛。更誰吹玉笛。雙淚落盧溝。

晚至汶上縣

晚路貪新霽。行行送夕曛。亂雅先客宿。歸雁入春聞。浦樹明殘雪。村家隔暮雲。思歸汶水淚。不到楚江濱。

同述菴司寇游海寧寺。因至弇州山人祠。歸憩小齋。卽事三首。

步履來初地。朋簪集上方。露齋僧供潔。水觀道心涼。隣竹分清蔭。池荷遞遠香。因從輞川老。一話舊漁莊。海內推詞伯。瑯琊大道南。文章存四部。第宅失三龔。淨業祠依刹。元風觀記壘。六時結禪誦。香火舊情諧。

時議修葺祠宇。卽於左方  
重建壘陽觀。以僧守之。

自笑衡門下。居然銷夏灣。周堂三面水。支閣一卷山。客塵蘭言美。仙枰橘趣閑。行藏無異撰。風浴詠歌還。

過桐城左忠毅公墓

羣小要屏主。孤忠忤大璫。清流成黨禍。冤獄借封疆。北寺朝臣盡。東林士氣傷。龍眠山色在。常照墓門旁。

胥江夜泊同存塘舅氏曹南枝先生登萬年橋望月

胥口驛前風露饒。鐘聲漁火劇魂銷。月明子夜誰家笛。人上吳江第幾橋。舊雨漸成萍跡散。春風應惜馬蹄遙。緣知一別愁如許。剪燭篷牕話晚潮。

卽事效松陵體

梅花將盡柳將絲。蝶驪鴛嬌作意遲。野圃未鋤留菜甲。山泉新汲試茶旗。春風烏帽花間酒。夜雨紅燈竹裏基。取次江南櫻筍候。家園孤負踏青時。

初晴舟發苦竹洲

苦竹洲邊宿雨晴。江村風景近清明。柴門流水山棠發。戍壘斜陽野養生。社燕歸時春社散。潮雞啼處午潮平。兒童踏慣青溪路。倒跨烏韉旁岸行。

晚秋感興



江樓東望俯三吳。落照西風彭蠡湖。鄉信又聞荒稻蟹。今歲江南不收客懷何處覓尊鱸。晚霞圍郭山深淺。秋水連洲雁有無。最好郡齋吟咏地。不教詩興敗催租。

初夏晚憲卽事

芭蕉影裏坐攤書。但得清閑百不如。新綠簾櫳春去後。淡黃庭院月來初。荒齋速客三升酒。小圃歸童一剪蔬。休笑十年塵網內。依然清夢到樵漁。

皖江道中

潯江西去皖江東。席帽征衫笑轉篷。山鷓數聲松葉雨。溪蟬十里藕苗風。旗亭貰酒缸花綠。村店題詩蠟穗紅。明日燕雲南望處。吳頭楚尾怨青楓。

觀春明夢餘錄載黃石齋先生事

頑懦能興百代風。當年直節表青官。崎嶇絕地文丞相。憤切危言汲侍中。萬死邊關思補袞。孤軍海嶠殉遺弓。聖朝明詔憐忠義。青史成名荷大公。

書侯朝宗先生集後

梁苑遺編迴絕倫。英名奇氣未全湮。少年濁世佳公子。垂死清流舊黨人。直以文章褫馬阮。肯將名節負吳陳。風流江左傳遺事。爭唱桃花曲部新。

懷上海施秋水

天人策罷動螭坳。海上才名早夢蛟。賦命屢愁磨蝸限。得時初應漸鴻爻。機雲京洛稱佳士。孔李門牆託密交。聞道秋風理歸棹。尊鱸話舊掩衡茅。

曾煥

字賓谷。南城人。乾隆四十六年進士。今官兩淮鹽運使。

蒲褐山房詩話。維揚爲南北要衝。又有平山蜀崗虹橋諸名勝。故士大夫往來者。籃輿笻屐。徘徊旬日而不能去。然二十餘年。覓船投轄地。主無人。每有文酒寂寥之嘆。賓谷開東閣之樽。集南都之彥。子門下士。被其容接者尤多。而擘紙揮毫。散華落藻。攬題襟館詩兩集。遂覺烟月爭輝。江山生色。

擬游焦山不果。卻寄王夢樓太守謝鄉泉侍御胡黃海學博以江流天地外。山色有無中。分韻得

天字

海嶽庵中今米顛。謂夢樓飽餐山綠吞江烟。雙峯勝處口能述。過我屢結游山緣。我行有期已神往。況逢使

節開江船。謝公清興善吟嘯。幕下客又能詩篇。謂黃海瀕行與我三日約。神其鑒此惟焦先。蓬萊方丈多飛

仙。凡夫欲到風引還。恨無彩虹亘萬丈。化作飛橋長駕天。我生性僻愛山水。來官茲土宜最便。轅車何乃

太刺促。咫尺不辦雙行纏。遙知公等同拍肩。朝嵐夕沙景屢遷。剔銘好趁江水落。問鼎驚見雲雷旋。華嚴

界現海雲相。羅漢岩有金剛禪。斯時念我定譏笑。山靈見怪奚辭焉。坡公懷慙意獨往。不退未肯因無田。

嗟我胡爲在塵滓。蝸廬苔卜雙峯顛。

遊慧山飲第二泉有感

不汲鑪塘今十年。

丙午冬試泉于此。

胸塵萬斛無由滿。眼明江上見九隴。我似渴驥來奔泉。泉底山光青倒出。泉

邊水洞風蕭瑟。在山泉水竟常清。照我容顏非昔日。山僧爲我燒竹爐。示我孟端漁隱圖。品泉讀畫心眼

豁。便欲相從漁隱居。我家麻姑神功水。釀爲冬醞清且旨。

吾邑釀神功泉。謂之麻姑酒。

自謀食肉出山來。不飲亦經十

年矣。年華逝水乃如斯。歸買薄田幾時始。

眞州準提菴老梅行

白沙江村有老梅。百年劫火餘枯菱。春風一夜忽鼓動。玉筍旁迸千枝開。天地有心試冰雪。龍蛇偶蟄驚  
霆雷。今人爭繞月觀樹。往日誰踏僧廊苔。廿四橋邊萬花海。我無暇去翻遠來。名姿往往寄幽獨。相賞故  
不從塵埃。疑是仙人萼綠降。返魂自得眞香催。惜無酒醅花前杯。參橫月落人空回。

瓜洲登大觀樓記所見

樓前破浪嘗鼓楫。樓上旌竿望中出。平生意興豪登臨。風利帆飛竟何及。夜深怒噫阻瓜步。曉起荒城拾  
苔級。振衣忽與三霄摩。俯首便同衆山揖。蕭公北顧此南望。六代烟嵐盡收拾。是時海門初上日。西北浮  
雲飛歛集。江天瀕洞如黃昏。一線電光吐還翕。雷聲撼崖崖欲走。雨勢掣水水皆立。潮汐疑爭赭龜放。金

焦恐作羅浮合。喬柯併力猶垂垂。浮圖裊空頗岌岌。不知神鬼何往來。祇覺乾坤徧霑濕。大橋森竦餓鴟叫。小艇低昂浴鳧入。樓中立脚愁傾欹。衣袂輕吹向江急。反着僕從色黯慘。警欬無聲但噓吸。方春二月發陽氣。宜有蛟龍欲啓蟄。我來相值亦偶然。窮此大觀記篇什。

題宮娥乞巧圖

新月微黃露華白。樓臺迴與明河直。一縷爐煙裊空碧。諸仙綽約當風立。何代宮娥乞巧夕。神光奕奕瞻九霄。鬢蟾飛動掣娥嬌。人語不聞衣帶飄。冰肌此際愁單綃。別有深房銀燭燒。銀燭相看兩神女。似說媧媧常獨處。但見明河不見橋。雙星今竟在何許。牕外梧桐滴殘雨。

汪梅村訪道圖

一路飛泉響。樓臺隱暮霞。不知春幾許。開遍碧桃花。有客扶邛竹。尋仙餌玉華。嗟予求道晚。婚嫁願何奢。

東臺道中

小邑無城郭。村圍衆壑深。地卑秋不爽。海近晝多陰。野艇因魚活。荒田費雁尋。水鄉生事儉。念此一悲吟。

正月十二日探梅鄧尉

昨日信風來。癡雲爲我開。前數日甚雨。十日立春始晴。鶯聲過茂苑。草色發蘇臺。小巷緣村曲。羣峯與柁迴。忽看花倒

影。舟已繫林隈。

處處載春塢。家家向水扉。橫枝從礙路。香霧漸霏衣。憩石憐青蘚。扶筇盼翠微。此時幽興極。老圃欲相依。

上方寺看梅

贈王述菴侍郎得告歸里

纔看飛旆覲明光。去冬侍郎假滿赴都經過邗上。旋報懸車返故鄉。一代勳名在麟閣。五湖烟水占漁莊。侍郎有三經師御漁莊圖。

盡匯先儒義。名士多從弟子行。他日吳中成洛社。白頭司寇醉吟長。

汪容甫輓詞

兩篇述學世空存。容甫著有述學兩外篇。茲事憑誰更共論。生有狂名過阮籍。死無弔客似虞翻。杳然東閣花前影。

淒絕西湖雪裏魂。容甫卒於杭州。重檢蜀州人日句。滿箋遺墨是新痕。今年人日遊蜀岡。容甫有詩見貽。

種竹

舊日叢生竹。清陰亦頗饒。場師嫌養小。春鳥欲遷喬。鋤出三弓地。移來百尺條。護根纔累土。立節已干霄。門逕全疑碧。樓臺更覺遙。響令風有韻。影待月來描。柳拂新添態。花穿越助嬌。帶霜猶矯矯。無雨亦蕭蕭。借爾能招鳳。求鄰莫瘞貓。引竹者多於隔牆埋死貓則笋過墻矣。爲竿經幾歲。成町卽今朝。鞋底防萌觸。衣邊看粉飄。敢言千戶等。庶共七賢邀。當暑休愁晝。聽秋好度宵。安排碁局坐。添得酒香澆。儻惠風人詠。從教律呂調。

浮山禹廟聯句

淮海惟揚州。禹功所排決。三江古統名。曾煨一郡今獨轄。念茲處塗泥。吳宛爾在營窟。孰障湍千迴。蔣徒

恃十一撮。列岫奔長江。胡森如龍赴巨渤。何時掉頭過。吳嵩此地片甲脫。側聞黑墳起。黃郁正值洪流割。浮

玉勢若浮。堂拔山力難拔。遙分城子尊。陳近與蜀岡兀。蓮花涌地肺。郭鍊柱撐石骨。鰲戴蓬萊峯。前國

驚飛蒼閣岫。詫異同博羅。何錦傳疑比郁鬱。交州石豈沈。煨慎縣槎不沒。瑤瑤泗濱磬。森汎汎龍池鉢。恐由

夸娥徙。知定受神人撻。衆响安得漂。森息壤故能遏。永惟刊旅勞。嵩實使昏墊活。篠蕩敷益饒。郁瑤琨產

無竭。筐篚具織貝。堂島夷安卉葛。有廟崇報功。變以時肅展謁。樸猶傲茨土。莖美但飾冕黻。畫梁欲通靈。

國鑄鼎亦象物。虛壁驚生雲。錦大珪仰如月。薦果宜包柚。煨膳羞戒用鰲。纒藉玉曰瑚。森粢盛豆以楬。兩

階列于舞。知九奏想球夏。湖自岩岳齋。森於時石簣發。四載異所乘。嵩六扈均所察。庚辰助淪注。郁豎埃

周垓圮。導水淮獨艱。堂倒瀾江最闊。黃龍既曳尾。變支祁復穿頰。然後瀉流沙。莖以次闢伊闕。厥壤咸則

三。國于外歷年八。綏綏歌新婚。錦呱呱泣遠別。豈惟手盡胼。煨不覺胼無胫。始藏洞庭簡。森更立响樓碣。

山海成圖經。知靈怪極荒忽。或為有臂螭。森或為從日妹。或為無口隸。嵩或為比肩蟹。或為鳥翼而魚。郁或

人面而猾。日或炙女丑。堂雨或止女魃。神或司羽民。變類或號嬰姪。雷獸或鳴夔。莖貳負或受桎。至今喜

傳摹。知八廟尙髣髴。風雨紛欲飛。錦埃塵罔敢拂。府事允修治。煨聲教斯暨訖。臯拜予何言。森帝曰汝不

伐作服兼作會讓納總還納枯龜負洛水疇森烏耘會稽袋食報宜孔張梁明禮曷嘗越相沿宋代觀章  
共誌梁時場。昨者吾山平堂幾爲大河汨澤陂思夏甸雙薪厨迫冬日賴彼典則貽堂感茲胙饗達隄根  
榿竹牢國水勢放渠裕澤國慶平成浮山永不齧煥

古赤刀聯句

有客懷寶至綈函玉徑尺色倅禹錫圭會名取用命册不以五城當煥使爲萬人敵温其貴仁和堂磨  
乃用剛克精從委然孕徐靈變滄耳赫執此元璜元吳謂之赤堇赤一片橫烏雲煥幾時化虹霓輕冰  
翦其峯煥平砥巨其脊其本經綸文梁其陰頡籀畫缺痕如月牙蓋鑿竅類雲成右良工匪斯今蓋  
寶器聞在昔粵若周王劍煥輔之太保奭上宗奉同珥煥西序設宏璧言念先君公堂不休肇王迹干戈  
載啓行蓋鞞琫具容飾越惟賜彤弓梁逮及動黃鉞腥聞滅輕呂名豔體授小白武成戢而燬煥毒  
揀列若剔維茲赤刀藏堂久隸典寶職膏塗駢剛釁蓋鋒令虎威辟西能御虎佩赤金刀陳器在雕几蓋  
流輝射篋席用彰厥聲靈煥所重斯手澤緊誰割虹光煥做古作露拍采從黑水中堂言鑄赤冶側後  
帝以晉璣楚琕蓋嬖宋斤魯削叶有聲戛球聲蓋如鑑濯絲髮腦緊雞冠比煥鱗脫蛇尾滑珍宜並枝斯昭  
事勇不藉椒亦戰聖朝治偃武堂君子貴比德獻賈來于闐蓋貢刀鄙大食誰數戎衣勳蓋已邁干  
羽格探入博古圖配之鼎鬯煥

十月初八日夜集題襟館

冬暄陶令辰。地敞適高館。纖月升上弦。青浦王昶小春叶陽瑄。梅信東閣催。奉賢陳廷慶斗望南豐寬。欣隨杖履來。

婁縣楊之灝辱顧車騎滿。昔雨今雨偕。曾煥湖雲海雲縮。弱冠與風浴。謂蔣山南城吳煊老齡勤瑟僞。謂蘭泉師詩盟長不寒。

陳雙宴席此相煖。飲分大小戶。啓榮沐值上下澣。晚松翠盈盤。婁縣王蔚宗殘菊香入棧。悄悄漏水長。張彭年搖搖

燭跋短。樂意陶斯詠。俞國鑑醉顏笑而莞。方請題襟題。元和蔣微蔚共矜辨才辨。賢主振風騷。祖諸生侍闈侃。評

詩沿謝翺。廷慶隸韻陋孫恂。篇常翻水成。之灝句似連珠演。月弄兼風嘲。煥露鈔并雪募。樂府宣正聲。燈禪宗

具法眼。見善如不及。雙聞歌必使反。羣依玉界尺。肇爭踏鐵門限。船為張憑喚。蔚宗楊因徐孺展。宗風倡廬

陵。彭年仁問匹荆峴。洪惟大雅材。國鑑敢謂知言選。自顧類穢賦。微蔚終應比瑚璉。老夫荷久要。祖賤子申中款。

飛雲石作供。慶以八座雲石贈都轉廷慶落木硯新盟。開泉先生贈都轉硯名落木義托他山交。之灝珍添子墨伴。蘇銘僕未能。煥顛

拜公不免。傳觀愜朋權。燈錄別張祖餞。來為十日留。雙歸去九峯遠。開泉古華兩先生俱言歸潮生荻洲寒。肇霜落楓

橋晚。米舫臨米書。古華太守所居齋名蔚宗

漁莊瀾漁隱。開泉司寇有蹤跡萍合乍。彭年阻長水湖宛。共期令名崇。國鑑

陳廷慶

字兆同。號桂堂。奉賢人。乾隆四十六年進士。官辰州府知府。有古華詩鈔。



將之長沙舟中作

雲低嶽麓陰。帆挂銅官渚。山雪瞬空明。水天澹容與。我欲弔沈湘。飯筒雜角黍。三戶縱亡秦。九歌尙悲楚。臺榭非襄王。江潭但漁父。水濯滄浪纓。瑟凭湘靈鼓。鶴羽翻縞衣。雁聲似柔艣。一往烟波深。滔滔自今古。枕上聽雪口占

雪澤冬來少。詩人句不成。夜寒方料峭。風定益淒清。病枕聽猶細。山窗映漸明。疎慵朝未起。髣髴郢歌聲。舟行天心湖玩月

春江歸棹駛。載酒愜幽尋。一雁橫空唳。迢迢千里心。輕帆張月夜。遠岫落雲陰。欲問升沉事。漁歌入浦深。

虛白樓

在河湫山太和觀

細雨沐春山。樓尋濕翠間。坐來虛室靜。看去白雲閒。竹裏高人臥。松陰獨鶴還。幸當明月影。清夜對孱顏。偕葉桂樵中翰符訪社亭銓部雨中留飲薄暮登廣仁嶺乘月而歸

雲釀雨濛濛。人來空翠中。繁頭山色變。婪尾酒尊同。漸覺涼聲少。還欣晚霽通。三人蹤迹合。一笑印泥鴻。踏遍西郊路。山陰似此無。遙天千嶂合。落日一亭孤。俯壑心猶凜。凌梯膽轉麤。圓輝看未上。重爲跋須臾。舟次呈述庵先生

靈光公望峻榆枌。玉尺叨量舊著文。蒲褐瓣香容屢接。寒山鐘梵又同聞。五溪向說灘聲惡。萬籟能將筆

力分。時讀公瀨楚紀遊詩游野臨關勞送客。新詩首唱倚斜曛。同送芸臺宗伯公詩先成。

楊倫

字西禾。陽湖人。乾隆四十六年進士。今官荔浦知縣。有九栢山房吟稿。

蒲禍山房詩話西禾德器溫醇如太圭不琢太鑿不和望而知爲儒者生平論學以不欺爲本主武昌江漢書院七年其門下多尊而信之撰杜詩鏡詮實能照見古人心髓足與朱鶴齡上下

過廬陵弔文信國

半閒堂中蟋蟀鳴。遂令鼙鼓東南驚。崖山風雨事悽絕。尙有一老支餘生。文山大節高嶸嶸。一篋無由障江決。辛勤萬里覓遺孤。屢敗非關用兵拙。孤忠百折不一更。獨有正氣胷中橫。當時生弔出炎午。公豈目激成其名。取義成仁符讀誦。得賢早賀天門玃。蓬萊首選歲有人。如公足爲科名重。江外蒼茫對夕曛。千秋碧血剩孤墳。慟哭冬青遺記在。至今猶憶謝參軍。

述菴先生三泖漁莊圖

伏波銅柱標扶胥。鄉里憶乘下澤車。丈夫報國經綸舒。至樂終遜歸田廬。先生盛世稱璠璣。文筆久壓幹輿璩。復爛兵法窮穰苴。大軍西征翻旆旟。元戎借箸籌邊儲。燕歌慷慨草檄餘。陣左曰啓右曰肱。指畫了了髮就梳。黃茅黑箬途崎嶇。萬騎蹂躪陟彼阻。擊營擗掃臂擣虛。遂空賊巢擒魁渠。卽笮始得安耕鋤。師還迎勞降玉除。卿班累轉飄華裾。勛燁天壤文淵如。盤錯歷遍厭拮据。漁莊入夢清魂遽。舊家澱山湖上

屏。陂塘養就千頭魚。小築一徑通簾菸。九峯疊秀同環滁。雲氣滃出疑龍嘘。城荒白苧傳闔閭。楓涇夏日繁紅蕖。微波縹緲風來徐。釣竿落處深不淤。飛集鸚鵡兼鸚鵡。楠榴栝檜松杉櫛。四圍蒼翠粉扶疎。幽懷此間聊可據。晨昏況得侍板輿。春醪餉客斟浮蛆。飯炊香梗熟新畬。蓴絲突過長安菹。山拳之鄉樂只且。鏡湖許乞吾歸歟。觚稜回首心躊躇。雨露恩渥能忘諸。南臺方聞下除書。表率豸服封章臚。清霜乍飛走衆狙。馳馬步工無趲趨。願公莫亟賦遂初。廟堂獻替功難紓。追學丁卯耽樵漁。

華明府秋石門觀瀑圖

片颿憶過匡廬下。夢想銀河向天瀉。香爐峯高未及登。空見江濤疾於馬。名山聚處數浙東。括蒼天姥遙相通。石門瀑布更奇絕。懸溜欲並開先雄。詩人位置天原別。紆組偏教近巖穴。前身孫綽令章安。界道飛流賦能說。嗜奇暇日探靈區。小舟一棹穿菰蒲。迴巒疊嶂勢盤鬱。短笱欲度須筇扶。松杉擁處登孤樹。照眼寒光剛激射。白日驚聞雷雨聲。玉龍飛下蒼山罅。著書昔有青田劉。赤松黃石同遨遊。雄虹時吐氣千丈。相與噴薄山之幽。高人跡等浮雲散。洞壑依然猿鳥喚。一條直注似長川。颿母風來吹不斷。故園住近九龍山。慣看匹練懸林間。遊蹤得此窮壯觀。煩囂滌盡開塵顏。我生亦具泉石癖。畫裏品簾窺咫尺。山靈若肯相招邀。準擬明春蠟雙屐。

鄭編修西橋黃山觀雲圖

山頂安得洪濤春。雲海萬頃雲蓬蓬。卻立雲端視雲背。俯瞰塵世皆蟻封。盪胸何止如壁絮。軒轅煉丹傳會住。峯三十六洞十八。翁鬱迷濛不知處。倚天峭壁斗可捫。石上倒走長松根。疑是癡龍吐烟沫。遮翳白日蒼林昏。我生亦具看山癖。眼界未開負雙屨。對此茫茫欲振衣。便挽洪崖跨鸞翼。

武昌喜晤徐民部惕菴表兄賦贈長句

連旬苦雨陰雲堆。閉門不出生莓苔。輅車忽報故人至。廢卷起立心神開。此間會合非所料。握手入門先一笑。別期回首已七年。卻喜君顏猶壯少。憶昔長安居對牀。騷壇酒陣爭雄強。短檠伸紙共索句。不覺落月沈西牆。青雲退鷁予何有。君亦左官事奔走。中間消息兩茫然。傳得新詩滿人口。星郎出使多輝光。幕府贊畫需賢良。橫行闊視異流輩。意氣不減前清狂。索居兩載寡儔侶。奇氣因君思一吐。鐘鼎山林未可期。人生須各有千古。秋風蕭蕭黃鶴樓。要君同登最上頭。胸懷萬里瀉何處。拍檻快看長江流。

過周家水亭

一徑尋深竹。蕭然遠市園。閒花多落澗。細雨欲沈山。漁網平橋外。人家翠靄間。東頭士龍住。時復斂元關。

烟雨樓

輕烟漠漠雨濛濛。曲檻朱欄四面通。山色半浮津柳外。人家都在水雲中。珠簾捲處開歌板。漁笛吹來擢短篷。消暑無如此間好。鴛鴦湖上白蘋風。

# 馮集梧

字軒圃。號鸞庭。桐鄉人。乾隆四十六年進士。官編修。有貯雲居文稿詩稿。

蒲褐山房詩話。鸞庭爲養吾侍御三子。多藏書。精校刊。嘗刻元豐九域志。杜樊川詩注。嘉定字後漢書補注。盛唐三儀禮集編。又畢秋帆尚書續資治通鑑。刻未及半。賴鸞庭重校刻成之。

## 武城縣

漳與衛合流。厥性喜奔竄。沙水相排撈。取道倏變換。此場乃彼漲。往復如螺旋。舳舻行相銜。回頭成對面。張帆復卸帆。順逆日幾徧。自是水致曲。非關風善變。我昔鼓征棹。當春勢瀨瀚。怒濤聲喧豗。所鬪無堅岸。村落所當衝。頽毀存不半。彼民多顛連。客心頗驚憚。茲行值水縮。平進隨魚貫。秋柳尚依依。呼羣有鳧鴈。飽餐無餘事。篷窗可靜翫。絃歌指高臺。傳會聊一粲。汶口流湯湯。計程按昏旦。

## 哭劉給事謹之卽述湯夫人殉烈事

有夫爲良臣。有婦爲烈婦。人生熟無死。死亦稱嘉耦。結縭三十載。尸癘兼奉帚。早歲贊成名。瓊闥紆華綬。松柏有高枝。蔦蘿相結糾。雖非同根生。所願同白首。陰堂告惡夢。年僅四十九。良人忽見違。子焉無主後。茹淚視含綵。苞箝及翠柳。客散僕御倦。仰視月宿斗。重泉路幽幽。去者尙未久。安行應有待。相從宜急走。吾有朱絲繩。結以雙環紐。持向靈床前。畢命義不苟。身死名則存。誥朝傳萬口。至尊聞之嘆。謂此足深取。良臣誠可惜。乃婦更寡偶。下詔爲表揚。贈恤從優厚。詔贈給事爲鴻臚卿夫人得旌表我家本通家。風義又師友。名門標

盛事悲喜兩俱有。愧無如椽筆。闡發付巨手。金石或可渝。此事期不朽。

### 俞廷檢

字純植。號柱峯。餘杭人。乾隆四十六年進士。官至昭通知府。有柱峯遺詩。

將赴昭通陸行抵富陽途中回望天柱峯有作

峨峨天柱峯。佳氣籠碧落。其巔多白雲。雲移向南郭。近郭卽我家。慈親居索莫。我初還家時。侍母坐帷幕。母言萬里行。嚴裝宜踴躍。循聲遍南徼。所學期無作。一旦辭母行。母訓聽猶昨。迢迢富春道。僕夫勇氣作。去速首屢回。但見峯岬嶸。願將思母心。隨雲佈寥廓。望雲詎師古。離懷黨可託。

己亥初冬都門虎坊寓齋食寒具與宋文藻朗齋陸以誠和仲胡光龍雲川聯句

消寒候未肅。治具法久譜。食單供數九。文藻節物宜春三。宋人以寒具爲寒食之具餅無湯可飲。淘非冷耐噉。人油質彌

脆。以誠著鹽味不甘。想其登釜沸。不敢同湯探。數尋類撻玉。劉禹錫寒具詩。續手送來玉數尋。光龍一僮疑采藍。不教書畫近。

聊與餛釘參。正如恩膏沃。延具見霑濡覃。膩脣鼠方竊。爭餌魚同貪。絢絲比夜績。文藻食葉如春蠶。但聞聲

窻窻。不辨語喃喃。甜水淪苦茗。京師謂淡水曰甜水。以誠乾酒啓小窗。燒酒曰乾酒醉醒各隨量。飢渴任所耽。滑喉咀味

速。光染指攫取酣。高堆覺盤小。備濯催盆涵。稠疊不知飽。延煎熬倘能堪。來愁廚傳遠。賣聽街市儂。吾鄉

又名餼。文藻餽物常宜男。棗栗佐分果。彈酒爲伴肉。武林風俗。以此爲贈子生男之家。今茲偶饜餿。以何必

論北南屑餘戒暴殄。槃盡增惶慙。主賓各叉手。光僮僕空攜籃。一飽仍向火。再壓期傳柑。詩宜踵題字。廷

說豈嗤空談。文  
藻

### 沈景熊

字炳季。號嵩門。仁和人。乾隆四十九年進士。官印江知縣。有寄取軒詩鈔。

蒲易山房詩話。炳季爲余門下。叢書神說。雖不測覺。發爲詩。如入波斯之肆。木難母。往辭雜見。沙礫間。杭大宗編修稱之。余在武林。修四湖志。招以入局。因深知其學業。晚膺民社。旋即懸中。亦振奇好古之十也。

### 西江古鐘歌

維皇至治誰比蹤。聲教廣被協堯雍。德動天地大樂出。西江爰獻蒼姬鐘。徵祥已邁汾陽鼎。典寶不減東序鏞。齊盪周景不可見。對此厥象羅心胸。樂銑角甬雕刻巧。禮圖繪畫真僮儂。面各四乳乳四面。三十六乳如攢峯。寸挺夏擊乳乳異。春容穆轉聲丁冬。銘文可識籀史篆。結體古秀蟠蛟龍。正月乙亥誌造作。子孫世享何敬恭。至今相對猶鄭重。恍如入廟來朝宗。更愛完美剝蝕少。朱斑燦爛耀丹彤。百神呵護信不易。紫泥土碧光茸茸。我昔遨遊過淪水。幸覩此物誠歡欣。摩挲不釋加考核。摹寫鈎勒全委丰。爲綏爲雅未敢定。集古金石相追從。乃知真是三代器。一十二律殊聲容。非編非籟亦非特。依時大小無相重。此地舊爲墨莊宅。當年什襲恣清供。長留已及數千載。湮沒久被磚苔封。一朝應瑞現牛斗。鏗然出土驚三農。

九牧上貢天子喜。皇皇寶貴珍方琮。命付太常重審定。韶音復作慶遭逢。短章作頌且志遇。會見儀鳳來

邕邕。

謹按篆文其大鐘名似雅。小鐘名似綬。不敢妄議。恭聞御鑿定爲鐘鐘。并依制增置廟祀。作樂崇德。千古莫隆。歌以紀事。且志遇也。

途中

孤篷小泊碧山根。短竹疎籬古寺門。樹接殘陽紅有暈。水連芳草綠無痕。趁墟雲濕魚蝦市。喚渡人歸薜荔村。長望鄉關愁日暮。烟波江上與誰論。

邵培憲

字元憲。昭文人。乾隆四十九年進士。官麗水知縣。有避葵吟。

清江浦

橘產自南方。北踰淮化枳。鸚鵡不踰濟。貉鹵汶則死。山澤各有宜。物生苦轉徙。胡爲名利人。輕身去故里。客土無元氣。始謂殊不爾。頻年厭行役。斯言真信矣。今我至河干。景物劇可喜。泉甘土盡腴。風柔草爲靡。舳艫疑駕梁。軫輻不留軌。鄉音漸有情。水族更多旨。分明魚處陸。萬丈落清泚。江湖頓相忘。吹沫掉其尾。回頭人海中。兩載百日耳。浪跡每匆匆。歸興常嗶嗶。衣塵縑未化。不藉河流洗。但念何所爲。去來忽未已。嵇康倘詰責。鍾會齒難啓。用此良自悵。慷慨不可止。

瓜洲城



蘆荻叢中古戍樓。孤峯隱隱瞰江流。鐘聲遠雜潮聲落。山色平分樹色浮。絕岸風雲連鐵甕。遙村燈火隔揚州。賣瓜步上聞佳話。願得分甘到客舟。

宿高溪

古寺依山側。征夫此暫停。夕陽穿逕竹。流水約池萍。行旅慙攜鶴。風塵學戴星。明朝又前路。詎敢惜勞形。

李驥元

字鳧塘。綿州人。乾隆四十九年進士。官編修。有雲棧詩稿。

蒲錫山房詩話。鳧塘詩有奇氣。亦有逸氣。起句如東風吹早霧。豁然露朝陽。秋風捲地來。黃葉打聽。鴈山頂出天上。山根枕湖眠。龍山如龍頭。重胡飲江水。大江日下流。我沿江水上。天地爲大爐。煎此瀆川水。天雲送春去。山色青無邊。結交不結心。同室如異地。又如荒雞何與人。偏不穩棲宿。五更枕上鳴。唯愁客夢然。又河連天上。月沙聚雲中。雁人來鴻雁飛。河動月光亂。看山如飲酒。快意輒心醉。皆能自鑄偉辭。未經人道與兄墨莊。工力悉敵。可稱二難。但本要一變。臣飢欲死。未免流淚。江湖因人作計。故激昂慷慨中有危苦蕭颯之音。

天雄關

左排山萬峯。右包江一道。蟲蟲天雄關。衝霄崖未了。地據西南雄。天圍秦隴小。波濤碧油油。霜霰白皓皓。自經關道行。羣山入懷抱。及茲歷益高。如鶴凌蒼昊。但惜往來人。扳梯增懊惱。

飛仙閣

仙人耽白雲。不肯塵囂住。凌峯修一閣。高掛雲多處。門棲唐代烟。園種宋時樹。欹崖下接江。陡壁中開路。

雙雙白玉童。啓門四山顧。舉手忽招我。言駕鶴來馭。便當謝時流。追侍王喬去。

滴水崖

泉水山澗流。澗下山更險。積勢懸崖前。一落瀉坑坎。硤衝石有聲。瀕洞山俱撼。幸逢寒沍時。不雨波濤減。掣鷹駭越禽。見兔想秦獫。壑深風勢號。霜重楓枝染。水既碧無塵。山猶青未斂。何須桃花源。卽此供流覽。

七盤山

南棧七盤促。北棧七盤長。憑高瞰地底。曲折同羊腸。一盤訝天近。舉手捫日光。三四盤漸轉。如灘下舟航。五盤六盤上。山翠霑衣裳。樹垂萬年古。泉落千丈強。紆迴第七折。始得遵平康。江翻浪中雪。馬跡橋上霜。迴頭望山頂。烟霧空蒼茫。

壽陽縣宿

羣山隨我來。寸步不離側。蜿蜒到縣城。頗使遊人適。山鋪落日黃。水冒浮烟碧。細流入孤村。千峯圍一邑。停轍更流覽。尖沙吹絡繹。地寒草木枯。秋高鷹隼擊。人言苛政猛。前令新罷職。寄語後令來。蒼生宜愛惜。

駱駝灣

繫馬駱駝灣。曙色分行客。長江隱塞雲。遠地苗寒麥。犬吠野人籬。酒香遊子席。魚肥僕意歡。芻多馬聲悅。此間有岐途。西南劃阡陌。南連楚水烟。西接秦山雪。我家蜀江西。胡爲向南役。翹首望劍關。肝腸兩斷絕。

入峽

兩山峯欲合。幾無水行地。神禹鑿石開。江流初得意。汪洋雪浪來。河漢峽中墜。吼如秋夜潮。快如金埒驥。不知造化功。奇險何年置。鎖斷粵咽喉。舟度亦非易。篙師反歌笑。上峽若無事。嗟爾澤國人。終以水爲戲。

石門山

石門山有四。險惡惟塘窟。峯高天疑卑。壁峭石欲落。兩兩建崇墉。蓬蓬榮刺竹。虎嘯陰風生。泉飛白日浴。開闢無人徑。步崖卽顛覆。豈知我亦巧。輕舟破江綠。偕臆上急灘。飛語答空谷。側耳聽鷓鴣。倚舟看楓木。

白馬灘

下流望上灘。灘勢垂天半。噴欵幾千尺。如馬下高棧。舟進波欲攔。閔同鄒魯戰。畢竟人勝水。遲迴達灘岸。兩山又交壤。中嵌江一線。日月照不及。蓬蓬雲遮面。苗夫力牽纜。出山途始轉。迴望不見江。但覺林葱蒨。頻年江海行。風波歷亦慣。篙師翻畏意。泊舟猶喘汗。

雪山關

白日走青霄。夸父不能逐。一上雪山關。日疑手可掬。峻看達天門。雄訝折坤軸。亂山泣魑魅。一徑通黔蜀。樹欹上下崖。風簸西南谷。當關據一夫。萬馬應裹足。憶昔隴西行。劍門關駐目。謂擅天下險。烏知險非獨。俯視肩荷者。喘汗步難速。安得愚公移。蕩平路坑壑。

送友人回蜀何吉齋

誰遣春花伴客旋。聲聲祖悵咽離弦。月明燕市嘶征馬。雲暗巴山聽杜鵑。攬轡空懷齊物志。歸鄉且讀養心篇。相思莫謂書難寄。飛雁猶能到日邊。

甲寅春日送述菴先生南歸

氣節凌霜柏。聲華震地雷。七旬恩眷渥。千里嘯歌迴。召伯棠猶在。陶公菊又栽。公去秋曾告假南歸薊雲華蓋捲。吳月斗牛開。尚憶雕龍辯。真憐倚馬才。詩刊湖海集。酒醉聖賢杯。雨淚滋桃李。時祖帳都門多公門下士風情寄竹梅。故

鄉親友說。疏廣賦歸來。

潘奕藻

字思質。號畏堂。吳縣人。乾隆四十九年進士。官刑部郎中。有歸雲詩集。

游天平山遂宿白雲精舍

我非山中人。強就山中宿。松風扶杖兩液輕。野鳥迎人幽徑熟。山中老僧舊所識。扣門不厭聲剝啄。白雲封戶洞壑深。玉筍參庭衆峯矗。庭中方池清可鑑。圍以朱欄蔭修竹。游魚啖影花氣肥。垂楊蘸水波鱗蹙。雲泉古篆誰所銘。第一清流冠南服。石壁有白雲泉三字篆。又題曰吳中第一泉。石磴垂蘿辨茶竈。翠崖遺影留仙躅。山僧延客何所薦。斫取枯枝煮溪菽。飯餘小憩涉山亭。月黑惟看星燐煜。空林突兀竄鼯鼠。飛泉蕭瑟鳴琴筑。惜

然清冷不可往。閉門孤坐依殘燭。鋪牀拂枕少眠臥。鼻息雷鳴驚倦僕。人生百年坐飄忽。塵勞擾擾紛馳逐。榮枯得喪醉夢裏。孰以亡羊辨臧穀。共言小隱待功成。蝸鬪何時息蠻觸。我今暫結清淨緣。有似冰丸破炎燠。何當遂此永幽棲。青壁茆齋倘可卜。統如五鼓耿不寐。木魚旋起呼僧粥。

開笛

秋浦月初上。秋風雁獨飛。何人愁出塞。有客賦將歸。水落魚龍寂。霜清楊柳稀。徘徊聽人破。涼月冷侵衣。

確山古爲道國

叢爾春秋國。嗟哉黨錮名。世家遺舊史。故里重儒生。蝸沸涼移樹。山危翠壓城。此邦風土好。不讓首陽清。

死願葬首陽山側。范孟博語也。

七夕次小河汛

今夕是何夕。蕭然旅館清。風驅殘暑淨。月蕩一鉤明。瓜果天涯節。雲山客子程。前途烟水闊。好趁布帆輕。

呂星垣

字叔訥。武進人。貢生。官新陽縣訓導。有白雲草堂詩。

北窻曉起

北扉斜對玉山菴。鐘磬遙遙度碧曇。几近蔬園幽景曠。帳連豆架暗香含。半窻雁影秋河澹。一枕蟲聲夙

雨酣自覺精神生早起。寫經兩幅抵朝參。

### 邱思燕

字丙南。青浦人。諸生。有青山吟藁。

朱寅齋莊蓮谷。泖客飲裕光齋。

訪舊斜陽裏。歸雲嶺上收。主人孔北海。座客謝南樓。何幸邀青眼。多情易白頭。玉簫聽未得。明月照人愁。

### 六和塔

山僻疑無路。鈴聲樹杪聞。海天雙眼豁。吳越一江分。懷古臨流水。題詩對斷雲。六和憑眺迴。頭地覺超羣。

### 慧日寺觀梅

盈浦平添十里潮。尋芳好放木蘭橈。最憐旭日和風裏。剩有枝頭雪未消。

香雪海本名吾山。

湖海詩傳卷三十八

王復

字汝初。號秋陸。秀水人。監生。由四庫館議敘。官偃師知縣。有樹護堂詩。

蒲渴山房詩話。秋陸承其尊人穀原之學。禪見洽。聞詩才凌厲。少即與汪雲壑。祝西澗。蔣春雨。諸人聯吟。圖險。衆避其鋒。既而入京師。游秦中。從子及秋帆。撫軍最久。迨策仕中州。初任商邱令。又偕幕寮。彭受園等。流連鶻詠。尋調偃師。繼湯君毓。卓之後。湯君南皮人。乾隆壬午孝廉。搜羅金石。重輯志書。與武君虛谷交。君繼其後。風流彌劬。游龍門。砥柱極。山水之勝。作長卷以紀之。同安陽令趙君希璜。皆以仙吏稱。句如月明漁火全無影。夜靜江濤漸有聲。草色青迷沽酒處。杏花紅點渡江時。涼氣吳衫輕。易遠離愁。魯酒蒲難降。碧窗晨展泥金帖。紅燭宵浮藥玉船。吟來詩句清。呈佛老去容顏瘦。有神新詞。且共歌。驢角。舊醜。還來撥。蠶頭。燭花。送喜。春爭發。弓月流輝。夜未深。皆繪藻。相宜。宮商。叶應。

雨傘七疊前韻

削竹仿製笠。糊紙似蒙鼓。圓轉膏油塗。柱立圓影午。摺疊攜甚便。平開闔機莫杜。晴時任棄置。縈塵暗側戶。積陰忽兼旬。密雲如釀醕。出門愁霑濡。利用逮婢女。手重互易持。氣蒸變熱煦。大勝瓦爲之。亦便披簑侶。響疑篷厖聽。點滴頭上數。況資暑月宜。遮避炎曦苦。遙思紫蓋張。飛共落花嫵。繪畫雜綺羅。擁護盡文組。未若此便民。風雨占十五。蕭然破屋中。差免濕竈土。破屋常持傘。東坡句。

兩峰畫梅見贈詩以奉酬用東坡李公擇梅花詩韻即送其還揚州

北地寒色早。林木淒颯動。先生坐旅窗。筆硯自吟弄。腕厓回春風。繁枝破荒凍。香雪燦滿林。悞引蜂蝶閔。昨朝尺幅貽。隔巷走僊從。展挂玉丫叉。我懷忽孤縱。先子交君師。兩峰爲金壽門先生高弟壽門與先大夫交甚契每歲寫梅寄贈投契如伯仲。年年驛使來。遠道幽情貢。每當縑素開。勝比琳琅重。茅堂氣和盎。窺檐烏頻呀。時予髮甫束。立侍側清飆。迄今幸弄藏。感往餘嗟痛。茲復得此圖。好似割垣雍。遂訂冰雪期。稍醒塵土夢。修到定幾生。明月閒鋤種。師承有淵源。落筆自超羣。出藍千載真。浮白一宵共。君還羽騎鶴。我愧雞稱鳳。竹西千百株。春到舊巖洞。他時訪故人。更撥香泥甕。

正月八日曹種梅招同朱梓廬小飲同用東坡送曹子方韻

幽居傍水曲。凍解搖晴瀾。竹林倚翠袖。梅影欹黃冠。齋中蠟梅盛放近著帙益富。新書墨未乾。足音喜空谷。言泉瀉流灘。吟情未嫌苦。春味方宜酸。嘉魚薦丙穴。生菜登辛盤。我今困勞悴。君毋歎懷安。境閒心自適。宵短夢易闌。志在業千秋。情豈榮一官。擬尋山水勝。寧辭道路難。梓廬種梅約遊天台相期棄蝸角。長往持漁竿。磯頭舊鳴鷺。斯盟應不寒。

牆下小軒題壁

小築三間屋。幽居春事宜。林深知鳥樂。牆短愛梅欹。地占金陀里。禪參玉版師。軒後新栽竹經營真不易。誰寄

草堂貲。



日涉聊成趣。情懷與俗疏。課僮芟徑草。留客翦園蔬。靜卷彈碁局。閒繙種樹書。預期銷夏好。一枕北窗虛。

次韻答紅泉題予遊草之作

他鄉負米記年時。惜別懷人得句遲。繫馬垂楊邨店酒。落帆斜日女郎祠。心酸南浦江淹賦。腸斷東風賀鑄詞。不是天涯倦遊客。此中愁思更誰知。

百泉將往邗上。予以事阻未及同行。疊前韻送之。

渡口楊花亂拂衣。行騰檢點上船扉。去如海燕尋巢舊。到值江魚人饌肥。綺語徐陵欣共賞。時與秋淵偕行窮居  
干粲歎無依。紅橋流水滴囊碧。遲我風鷺接翅飛。

和介堂移居詩原韻

家具移來幾束書。愴然真覺愛吾廬。定教快意屠門肉。且免長歌客舍魚。添種花枝依逕曲。量栽蕉葉補  
窗虛。籬園小院情情靜。一榻熏風午夢初。

冬日晴暖農人望雪甚殷詩以催之用東坡雪後書北臺壁韻二首

歷尾駸駸暮影纖。披裘未覺氣凝嚴。人來舊苑懷詞賦。時到殘冬念米鹽。早有微陽烘麥隴。可無甘澤慰  
茅檐。陶家況味真清絕。待掃繁糞出素尖。

畢逋聲裏亂昏鴉。隔巷香聞過麴車。未見風流吟謝絮。先教火急試唐花。堂前白戰思詞客。江上青籬貯

釣家。棧乞碧翁陰。早合同雲延。望手頻叉。

和涪川寓感原韻卽以寄懷

郎官漫說應星辰。落拓方嫌衆裏身。暖氣欲吹鄒子律。狂飈偏惹庾公塵。悠悠閱遍三千界。錄錄容隨十九人。歲暮冰霜方歷盡。幾番芳信待回春。旅館宵談靜掩門。天寒惜別黯吟魂。銷愁且自傾三雅。溷俗何能淨六根。鴻雪浮蹤留不定。鶯花好夢去無痕。自緣力弱難酬報。怨李恩牛總莫論。年來物我漸相忘。得失紛紛詎足傷。涸轍終教窮鮒活。占巢空笑拙鳩忙。銅臺遺蹟尋香履。雪苑前遊憶詠觴。各有千秋傳業在。名山到處好收藏。

珠蘭十二韻

縛架支柔榦。移盆就畫檐。惜滋清露潤。不避暑風炎。名字湘潭襲。來程閩海淹。霏微肌粟綴。淺淡額黃添。開處猶疑蕊。繁時欲逗簾。貫思珠瑟瑟。摘想玉纖纖。小扇低承綺。清簷滿貯奩。浴餘蟬翅掠。妝罷鳳頭拈。粉助芙蓉豔。毬成茉莉兼。枕函嬌夜合。茗椀鬪春尖。軟語吹唇密。濃香入夢甜。經時常眷戀。腸斷莫相嫌。

一名斷腸花。見本草。

重陽後四日述菴先生招同朱笥河翁覃溪程魚門三先生暨趙少鈍陳竹厂徐蓀林黃仲則張

蓼樓諸君集經訓堂送錢獻之赴西安分體得五言排律二十韻

衆葉紛辭樹。相攜正黯然。驪駒方在路。萸菊復開筵。榮豈浮名慕。才應大雅憐。虛堂頻會合。畸士半連連。繼緒情何重。艱難道自全。幾年遲握手。匝月鎮隨肩。識字推揚子。通經擬鄭元。宮商精辨審。輪軾細參研。時以新刊詩音表及車制考見示言洽蘭同臭。交真石比堅。涼亭時挈榼。禪室屢分牋。題字羊裙濕。尋幽謝屐穿。暢懷當獻之有入關圖。書成市可懸。南州留舊榻。東閣重時賢。別語今宵永。遐音異日傳。臨岐回首處。淒絕各風烟。時予亦將南歸

述菴先生屬題三泖漁莊圖四首

一鏡碧搖檻外。千螺翠湧窗前。山水東南甲秀。波雲下上澄鮮。別墅謝公絲竹。小園庾信江關。何似筆牀茶竈。天隨子共往還。久別田廬無恙。繫情邱壑難忘。靜對生綃幾幅。兼葭秋色蒼蒼。事業富韓一代。文章燕許千秋。空憶烟波清興。閒眠讓與沙鷗。

九月杪將北行同人餞飲於晚晴齋聯句

倦歸息擔簞。人事瓠壺擾。良會日無多。理裝復秋杪。復王郎久衣褐。關津急征鳥。鬱鬱壯歲懷。扶搖望雲

表高詞場湖前輩。雛鳳清聲紹舊業。守青箱。珍材挺孤篠。龍我昨遊金臺。文苑窺宵篠。冠蓋萃羣英。魁

台耀葩瑤。汪上林體麗則原艸。句驚矯。遇合會有時。勿歎知音少。王十年識豫章。千里駕驥馭。直欲

鉛槧借。祇恐侏儒飽。汪大豈曰玉美燕。而思瑟倚趙。謀生免家食。弔古足登眺。汪朝來涼風逾。持袂形

神悄。騷騷落葉聲。役役飛鴻爪。復薦達有蕭朱。論交見管鮑。飄零竹林社。惜別意難了。焉於此且留連。騰

觚酌清醪。披綿肥疇村。斫雪健松柳。元砌插菊枝殘。窗鳴雨點小。相勸添盃壺。劇談判參朮。錄爛醉今夕

歡。離愁明日攪。抽帆江楓欵。並轡驛堠邊。尚衝寒入國門。毋使鄉信杳。紙閣鑪夜紅。天街雪晴皎。大觀面

先後期。蹇驢柳春曉。書屋借城南。鵠袍戰京兆。如

### 徐書受

字尚之。武進人。監生。由四庫館議敘。今官南台知縣。有教經堂集。

蒲謁山房詩話。尚之少而食貧。長而多故。彈缺依人。恒有四方之役。羈旅道塗。所作往往牢愁激楚。

大抵取法在孟東野。張文昌。問然才情。諧暢兼效元白。早年與仲則映微。輩出入門下甚久。各以古

道相期。詩格雖不同。其篤於性情一也。

### 無米

沒徑長蓬蒿。結廬背城郭。問何突不黔。怪豈鑪折腳。竈婢告瓶罄。菜色共寂寞。既缺太倉糴。詎效屠門嚼。庚空愁腐鼠。蝨竭噪飢雀。誰憐顏公乞。寧就仁祖索。吾將屏甘濃。息意事葵霍。世無監河侯。口腹竟奚托。

三旬遭九食。君子固窮約。指困未爲貧。餉新或堅却。碧韭炊黃粱。紅鹽裹青箸。粥糜已無餘。麥飯尙堪搯。養生娛性命。沽酒傾下若。高坐方浩然。時聞嘯歌作。一飽同何曾。毋嫌食單薄。

新嶺

振衣忽霄漢。峻絕已平視。一線上天宇。萬笏出地底。斜日在半崖。高鳥飛不起。豁然倚層空。盤旋徑迥迤。雲生乍籠袖。澗響復盈耳。何處烟林鐘。天風吹十里。躡景有羽翰。蒼蒼暮凝紫。

十八盤

朝行千礪山。暮宿萬山岳。嘆奇先舌橋。瞻顧笑目竭。盤陀況梯升。橫出更斗絕。攀躋分寸難。十步四五歇。下視愁懸猿。上陟怯飛鶴。力均連股尻。意動惕毛骨。輪摧機轉確。車簸海浮筏。虛烟沉翠壑。杳靄插遠笏。精藏白日駭。蛇蛻來徑滅。亭臯俯呀摩。人馬比蛩蟻。奔雷動地脉。素彩散天闕。崩崖猶見樹。陰洞未消雪。荒榛時罨罟。怪石屢桌兀。險應穿鳥道。幽恐近虎窟。雖復登陟勞。陋彼坂九折。

懷述菴先生贈莊明府烈成

近來弟子多著錄。海內無過王與朱。筠自從二老僅存一。如水注壑士益趨。我交明府歲丁酉。經訓堂中醉卮酒。張粵徐詹一輩並異才。詩成起爲先生壽。先生再登朝。請假一上章。松楸慕無已。諒益鬢鬢霜。我行四顧徒茫茫。近知明府在。感我故意長。明府何如廣文冷。絕異恆情發深省。次園由廣文驚舉然時時爲廣文日不可復得也。

爲政風流希古人。絃歌遺澤何其幸。

雨宿田家

瀟瀟雨。滑滑泥。泉淙淙。近前溪。車輪不轉用力齊。僕夫告瘁愁路迷。昏止樹林下。老馬同鳥棲。多謝野翁意。怪我顏色低。遙指草廬在。繞出溪前堤。前堤亦非遠。步步如登梯。全家細弱共一飽。勞君爲我具黍雞。野翁良不俗。室中尙有牛衣妻。妻餉餽。翁執犁。嗟予蹤跡苦無定。終歲道路常東西。來時纖草綠。去日寒風淒。野翁揮手且復別。我本途人信馬蹄。

濟縣登眺近山用岑嘉州留題縣南樓韻

一堆空翠如欲飛。黃葉滿林禽暮歸。嗟峨石碎馬蹄滑。徜徉有客風吹衣。太行隱隱環山縣。恍似荆關畫圖見。居人日在翠微中。問客徘徊何所羨。我思不若買小邱。規池養魚通澗流。庾公於此興不淺。月出更上城南樓。謂松園先生。

獻縣塗遇馮大百史訊知西河客遊長水

常年揖別判東華。消息憑傳故里賒。不覺輕塵同駐馬。可憐高樹已藏鴉。賦成明水年尤少。榜盡孫山事可嗟。今世子雲愁入俗。傾脂河畔醉堯花。

蘆溝道中

嵯峨石路一車輕。似在危灘駭浪行。霜柳未黃矜雨色。風蟬將老變秋聲。頻至寄跡才何用。幾處懷人夢不成。宛憶春塘冰乍泮。典衣沽酒話平生。去春借四河過此。

送董超然南歸卽寄錢大魯思楊三西河次用少陵夔府咏懷一百韻

跡久遠吳下。人頻會日邊。蹉跎淹壯志。哀樂萃中年。已刻無成鵠。聊同不繫船。撫膺惟莞爾。舉首孰憂然。物態應看慣。人情本重遷。厭題鸚鵡賦。半廢蓼莪篇。告瘁寧求息。矧方尙惡間。恰逢飛絮候。又負落花天。曩日遨遊數。茲邦習氣偏。西疇初餉饋。東路正防川。董相帷猶在。陳蕃榻自懸。莫攜磨鏡具。誰貸辦裝錢。異地空相顧。貧交轉共憐。三千齊上客。七十郡名泉。考古情逾澹。懷歸眼欲穿。童烏能學語。少弟並扶肩。爾去誠良策。吾留僅冗員。羈棲寒素約。合并隔塵緣。爲湖湖濱勝。會招畫舫便。小桃輕噴雨。弱柳暗藏烟。枚馬論遲疾。王盧較後前。長生拚似鶴。結友盡疑仙。景物都陳迹。詩章莫浪傳。好山供俯仰。流水送潺湲。以上敘戊戌春與錢董二君歸白湖上。一自離羣出。重教憂患煎。事同蟲食苦。形比蟻投羶。陋巷洵車騎。華堂避舞筵。種纒分菽麥。微敢托鵬鷗。未是無心失。終期怙過悛。徒薪愁曲突。浙米向霜鋌。呼吸生真寄。屯亨命有權。虞翻傷傲兀。杜篤免拘攣。夙願應將遂。沉疴頓令蠲。俗儒爭誚讓。豪族盛遊畋。不惜珠爲彈。從知瓦可全。賓僚輕許掾。雅意進彭宣。謬得羣公嘆。何求一士賢。紛紜存夏五。變幻悟秋千。鳩乃營巢拙。鶯還出谷先。長楊初薦達。短翮款聯翩。縱異生枯管。能知緩急絃。快方標鴈塔。悔早失魚竿。涉世誠疎矣。忘機盍泯焉。龍門

仍踉蹌。驥尾暫回旋。賦或嗤奇字。文甘味太元。幾人成誓墓。何事亟歸田。問夜槃同翦。嬉春鬱每連。病餘

慵買卜。食少費烹鮮。歲月無停軌。音書附去舩。涕痕猶滿袖。危語動盈箴。

以上辛丑楊君登第後。與余別於京師時事。

稍稍驚

魂集。時時遠夢牽。平生懷放曠。吾輩各連邇。易得浮蹤合。毋憂宿諾捐。贈綿悲寂寞。伐輻刺淪漣。幕府趨

關輔。

謂獻之淵如。

蕭齋傍澗壘。

謂緘若星額。漢章應尾。

題襟聞洛社。感舊緬秦阡。詎效孫登嘯。行加祖逖鞭。名流希結納。

靜女獨嬋娟。不謂辭鄉樹。還來聽暮蟬。相逢初換葛。小頓又裝綿。偶乞僧廚飯。常虛客舍氈。花時偕側帽。

陌上競遺鈿。底用區門戶。徒嗟仰屋椽。忍看紅葉謝。被喚海棠顛。腹稟乘酣脫。頭風及旦痊。句教千白傅。

才倘妬青蓮。挈侶商投足。登車信曲拳。孔庭陪對鯉。楊席見銜鱣。冒雨尋荒榭。衝泥沒錦韉。所欣蘇久旱。

非比潤微涓。

以下並君同寓都下。及後至清源。

此會皆天假。追談到海堧。不扶筇竹杖。定製布行纏。嶺勢劖霄立。灘聲挾

石眠。向來神頗王。孤往興尤堅。佳果經時熟。繁香彌望妍。菩提增陰鬱。蝴蝶弄翩翾。土俗如前否。登臨念

慎旃。聚糧俄北首。著集尙炎躔。

以上指所撰嶺海集。

旅寓依朱季。生徒侍鄭虔。細流源必匯。大冶人宜甄。臺尙風期

杳。潘張麗體駢。鞫通揮綠綺。粉蠹守青編。漫亢諸侯禮。休輕百雉專。新晴勤稼穡。缺月挂弓弦。憶昨如行

脚。於今學坐禪。第能安食指。何苦落言詮。二妙宵旋越。

秋陸粵樓賦。賦被放。

雙珠復滯燕。維存映川禮閣報罷。最難寬毳毳。笑

必慕騰鶩故里。諧談燕高軒。敞曼延。試燈低吐燄。逢麴飽流涎。贈別須丹棘。銷魂豈杜鵑。帆開揚婀娜。道

阻聽洞沿。過圮思黃石。還山訪偃僊。關心占勿藥。

魯思病活未愈。

拭目待高褰。

未得西河召試消息。

那作垂天翼。真慚跼水



爲左原遭見斥。伯玉解繩愆。求劍舟勞刻。凌雲字枉鐫。飄萍殊泛泛。芳草乍芊芊。嗜酒愁憑掃。耽吟體過孱。諒予非擇祿。未敢就曹詮。

代人有贈

五銖衣薄畫雲綃。硯匣琉璃解頰椒。爐煖翠縈心上篆。鏡瑩紅隕影中潮。脂香羅掩痕猶印。粉醉霞烘暈未消。配藥方依辰日合。照愁燈剩卯時挑。偶耽靜色風飄絮。時愛秋聲雨滴蕉。睡起錦書和月織。病慵螺黛割烟描。衫綠篋冷薰初透。絲爲桐枯韻轉遙。花苑霧迷渾是夢。湘簾波浸不勝嬌。偷翻曲譜頭頻側。閒攬丹青手自調。欲識惱公無限意。燭盤堆淚去迢迢。

入平原境曠如奧如土阜如山蒼烟四合令人有去此何之之嘆

坡陀百折樹千重。徑絕烟濃忽又通。兩兩仙禽語何處。人家盡日翠陰中。

何青

字數峰。歙縣人。監生。今官澄海知縣。有味餘樓初稿。

蒲褐山房詩話數峰天才英俊風雅宜人竹君爲安徽學使特加識拔既入京復來受業爲詩搖毫擲簡嘯傲滄洲而五言宗二謝七言宗韓愈又復左規右矩節族自然是以詩名益振然數奇不遇溷於韃筭近始鳴琴花縣世論惜之。

富春江

解纜錢塘江。停舟富春郭。海門夕汎平。嚴瀨迅湍落。曲渚隱林巒。斜垣繞巖壑。閭閻樹杪懸。雞犬人家托。漁父泛依依。水禽飛格格。古剎覆松杉。遙村橫略約。涵岫暮烟微。逗月晴霞薄。羈旅淡無惊。山川果宿諾。永懷沈家令。言念謝康樂。洵美未能留。眷茲暫淹泊。

月夜宿石碓嶺

晨策恣幽尋。日暮中途歇。未梯絕巘雲。先臥孤嶺月。林籟響喁于。山泉流滯汨。氣清空谷寒。露下高巖潔。週遭天宇淨。遙峰露翠嶺。安得凌絕頂。飛觴和玉屑。相看興不違。近阻情彌切。雖獲蕩喧囂。還令神超越。僧房危榻支。不寐遲明發。

發慈光寺過巢雲洞歷小心坡度斷凡橋人一線天達文殊院宿焉

凌晨度慈光。攀躋越數里。層巒當我前。欲往昧所指。給篲古洞通。驟入幽巖裏。慄慄小心坡。貼壁剛容趾。嵌空橫略約。下視不見底。一線穿鴻濛。諸天勞仰止。奇松解迎送。孕石參差倚。龍鱗勢欲飛。僵臥長不死。怪石作人立。兀兀爭奇偉。瞪目應接疲。側身忘險巖。罡風吹日斜。雲際暮鐘起。宛入蓬萊宮。文殊院有陸地蓬萊觀心向文殊禮。還當十日留。憑眺窮終始。

鍛奴歌爲蘇餐霞作

鍛奴論詩氣食牛。百城坐擁窮披搜。鍛奴作詩力縛虎。鬼愁膽破避險語。有才不遇嗟窮途。賣文爲活長

江湖襍被依人聊爾爾。萬里山川供足底。狂來欲剗仙霞峯。與酣吸盡西江水。一笑贈我黃山歌。勸我睡髮山之阿。但道富貴浮雲耳。不如高山流水供長哦。丈夫落拓理則那。鍛奴鍛奴奈爾何。

雨中過怡雲山館觀桃

人足烟霞癖。居隣鷗鷺家。天桃沿徑密。細雨掠谿斜。新碧添春水。殘紅散落花。古歡如可接。好逐釣魚槎。

自南昌之南康別從兄秋厓

南浦傷心地。逢君又別君。早年多作客。何處不離羣。彭蠡波浮岸。匡廬樹出雲。登樓勞遠夢。春草滿江濱。

天都峯

斧鑿何年闢。巍然冠此山。更無峯比峻。豈有路能攀。向背三州外。陰晴一息間。軒皇長不返。終古石苔斑。

元夕章江望月

春到天涯始欲愁。今宵又見月當頭。東湖清影水涵關。南浦芳塵人倚樓。浪迹關山經兩載。全家骨肉在三州。江城孤笛撩歸思。悔殺探奇處處留。

開封月夜有懷蘇餐霞在陳州

欸如衙鼓夜將分。萬里天無一縷雲。皓魄連宵看積素。羈魂異地怨離羣。樹高烏鵲當軒繞。城古荒雞隔巷聞。遙憶芳塵凝樹處。抽毫王粲最能文。

朱竹君先生齋消寒咏瓶中月季花

凋殘處處轉霜蓬。向晚芳苞孕小叢。薄植寧甘羣卉後。韶華却許四時同。瓶能續命何妨折。鑪可回溫欲借烘。丈席人來剛立雪。對花一似坐春風。

遊峽山寺

北出雲氣接南禺。殿宇巍然帝子趨。峽水縈迴三十里。山榕翁鬱一千株。扳藤覓徑危防足。憩石看泉冷浸膚。定是烟霞緣未了。一經初地一踟蹰。

晉繩武

字燕亭。鳳臺人。貢生。官萍鄉知縣。有晉普山房詩鈔。

陪謙山觀察查武定各邑災賑途次有作

油幕稱殘客。星軺載後車。此行當歲莫。何處不天涯。縱縫征裘薄。連程驛路賒。等閑塵轍裏。來往送年華。  
哀益權衡細。頻將凍管操。指揮定成格。臂使藉諸曹。勞獨教均被。恩施戒濫叨。寬嚴因地判。心識去哲人。  
勞。

有感

臥聽南來雁幾行。江城八月已飛霜。愁生舊夢家千里。病起新除藥一囊。破寂最憐風款戶。書空無復句

題牆浣花溪上飄蓬客。怪底猶能築草堂。

西風冷雨悵歸難。秋到詩人分外寒。四壁漸成懸磬室。幾年空作折腰官。向誰乞米書多拙。許我輸金法已寬。歌哭都非消遣計。欲圖狂飲接餘歡。

兩峰以清容居士自書詩冊見示題後

兩冊溪藤栗尾書。斯人何在欲長吁。更無白傅新詩本。此亦黃公舊酒壚。好句快心刀切玉。古香盈篋橫藏珠。六丁下取君須戒。留伴通靈畫幾廚。

### 劉大觀

字崧嵐。邱縣人。貢生。今官奉天寧州知州。有玉磬山房詩鈔。

蒲謁山房詩話。崧嵐始仕遼陽。仁聲懋著。方且游登牧守。奮蹟仕途。乃其詩蕭閒刻峭。卓然自立於塵埃之表。正如梁伯鸞滅蠶更炊。不因入熱。推其源似出於瀛奎律髓。足與四靈三拜分手。抗行不。僅爲五言。長城已也。

### 與郡人芳山種花

馴雲植嘉卉。聊復助大工。此土非吾有。分春與衆同。莫烟生遠水。樵唱散遙空。領得山中趣。橫琴坐晚風。

### 陳柳州見過榕樓客舍

長年著敝衣。攝郡有清威。每到無人處。孤琴還自揮。馬因行部瘦。民自下車肥。來共僧樓語。星河耿夜輝。

貧士詠

寒雞窮巷鳴。不見突烟生。書向鄰家借。詩多雪夜成。斷繩橫短榻。折足臥空籬。盡日無人語。時聞飢鼠聲。

江村偶步

江村泊舟早。問步獨行遙。乞藥尋山寺。聽泉過石橋。曉松雲際路。春蕨雨中苗。何處還招隱。名心已漸消。

東昌舟次寄兄

節候幾更移。多年嗟遠離。最難遣愁處。將欲到家時。問友多新稔。看花少故枝。祇餘江上月。猶爲照深卮。

晚泊滄州

晚風吹渡口。遙見起朱霞。蟬噪水邊樹。棗開邨後花。古城方落日。荒戍不鳴笳。知與市中近。隔船聞賣瓜。

送青城劉明府歸通州

行色少光輝。身貧馬不肥。宦囊貯吟卷。民淚濕征衣。落日歸程暮。寒山秋葉飛。到家應閉戶。接見世人稀。

送吳竹虛卜居石門山

居士安身處。石門秋氣清。祇聞松籟響。不見世人行。采藥身應健。看雲眼自明。遙知到山日。定有鶴來迎。

王初桐

字于陽。號廣仲。嘉定人。監生。官齊河縣丞。有海右集。

泰山觀磨崖碑作

七十二君輦道荒。云亭蹤跡俱微茫。祖龍之碑旣無字。金函玉檢疑荒唐。開元天子履全盛。意氣直欲無軒皇。東封自古稱大典。遂令下詔開明堂。勒銘大抵示符瑞。揮灑御墨輝天章。高文或出燕許手。長篇大幅何煌煌。當時海宇本殷富。發揚蹈厲窮鋪張。八分淋漓六百字。穹崖屹立三丈強。芝英鶴頭體製別。筆勢髣髴酸棗兼。中郎焦山鶴銘鼎。銘何足數。庶與朱陵洞天岫。樓銘相方。惜哉天寶末。諸楊亂其綱。風塵瀕洞一朝起。鞞鼓動地來。漁陽珠沉玉碎。銅狄燬。惟有此刻終古垂琳瑯。毋乃鬼神自有木甲護。不然安得風饕雨虐。依舊光芒長流傳。完本世間少。頗思椎拓充行裝。他時攜歸向吳會。什襲珍作蕭齋藏。奈何梯青躡翠必鉅費。而我羞澀垂空囊。聳肩仰面百遍讀。口角流沫神揚揚。信知俗宗大觀此第一。秦松漢柏皆枯僵。木甲漢武帝時泰山神也。見應劭漢官儀。

登蓬萊閣觀海風浪大作

蓬萊之山不可到。蓬萊閣中好登眺。閣前海闊天茫茫。萬里長風來遠嶠。大海小海浮杯中。珠宮貝闕吟魚龍。新羅朝鮮只咫尺。豆帆一雲成艤舫。我思釣鼈搏桑渚。白浪連山迷去所。白氣蒸爲駭岸雲。浪花灑作晴天雨。須臾風止煙霏霏。青銅一鏡磨斜暉。劃然長嘯驚鷗鷺。羣向田橫島上飛。

歲暮感懷

落拓江湖三十年。注名官簿倍堪憐。不辭南北東西路。直到冰霜雨雪天。脾肉消來添白髮。篋衣典去剩青氈。人言宦海藏身易。除是頭銜得酒泉。  
門徑深松灑翠濤。行廚煨葉太蕭騷。冬前舊著菹香盡。雪後新增酒價高。蟲解號寒聊得過。鳥能吐綬亦徒勞。街頭臘鼓鑿鑿響。歲晏關心首一搔。

新城訪王氏西城別墅

尙書池北營書庫。數十年間付渺冥。曉日雞豚屏提閣。秋風禾黍石帆亭。居人指點基空在。故老傳聞事忍聽。却憶銅坑銅井外。漁洋終古一峰青。

蒲褐山房詩話。西城別墅。阮亭先生所築。凡十二景。有石帆亭。樵唱軒。半偈閣。大椿軒。雙松書塢。小亭子。圃。小善卷。春草池。三峯嘯臺。石丈竹徑。綠蘿書屋。諸勝。一時名士皆有題咏。多清遠閒曠之作。公子啓。陳彙而刻之。共九十餘人。不分卷帙。予奉使青州。過新城。時得之。此書不見於漁洋全集。三十五種。恐久而遺佚。故著於此。

余鵬獅

字少雲。懷寧人。監生。早卒。有息六齋遺稿。

蒲褐山房詩話。少鵬年之弟。少有逸材。工水墨畫。竹君齋學皖桐。賞之。由是名譽日起。然依人爲活。往來燕晉。所遇名山水。輒以詩寫之。發其抑塞磊落。飢餓不平之氣。未幾卒。其詩舊存朱氏鵬年錄得三卷。名息六齋遺稿。

城隅曲水納涼



清渠散水氣。無月夜亦明。叢蘆弄疎陰。無風涼亦生。水禽不見人。深處惟聞聲。披襟得稱意。我影隨我行。凌波偶延佇。波去影自停。去者本無適。來亦何所營。未成江海歸。自具活潑情。遂令波上人。對影忘殘更。都城盡同夢。心跡此雙清。

送楊蓉裳之任甘肅兼簡楊慎齋刺史

楊侯短小姿。書卷充光腴。二十始過四。健筆追唐初。依然盈川令。不襲王略慮。先于晉宋間。飲液去其膚。停勻染漢綺。圓轉隨瓊珠。今年膺鸚薦。芳名填帝都。大匠持斧纒。飭材應時需。薰風引墨綬。出宰天西隅。祖帳春明門。朋故咸歛歔。作吏風塵中。此道成荒蕪。而我起相謂。君輩徒區區。士生功名遂。文章固其餘。古人苟得爲。空言應屏除。割雞契先聖。雕蟲羞壯夫。況茲敦厚源。足供循良模。百里勿云小。自邇微感符。甘涼落日外。我昔曾驅車。請具爲君陳。我言信非誣。山邑數十城。各擁千峯居。牛羊散岡隴。桑柘蔭街衢。居人半農圃。終歲操鎌鋤。板屋聞鳴機。高場積糧儲。巨室不治習。遊手尙畋漁。羌人分隙地。種麥供歲租。任負每先時。不敢煩省徒。俗醇宜簡政。水清戒驚魚。長官不自擾。民事自安舒。此時坐訟庭。雲嵐日扶疎。山澤有精蘊。性靈生機樞。仕優學亦固。心逸績已敷。去去慎所職。勿復相躊躇。故人和州牧。義氣今所無。自我來長安。三年未得書。君行會相見。爲問今何如。

奉贈約菴

李侯哦詩風撼檐。高格橫恣追蘇髯。窮冬燕市守蕭館。積雪照戶塵侵簾。花箋滲墨凍欲折。石硯炙火吁不炎。獨拋心力鬪冰勁。未放意思成膠黏。終朝握管待神會。物象時到秋毫尖。玉川搜腸五千卷。鄴侯過眼三萬籤。詞腴詎能濟身窮。吟貧未是妨官廉。曾經令尹三仕已。色無喜慍心無嫌。廿年遊宦半天下。初看兩鬢霜痕添。但借山水助吟嘯。不假甲令行苛嚴。歸程空歎客垂臺。舊邑誰聽民歌鐮。暫同鮫蜃屈注濕。肯與魴鱸爭喞險。擊柝爲貧聊爾爾。彈冠笑彼徒沾沾。我早聞名見恨晚。義氣安得常摩漸。愛君詩句化涼薄。知君襟抱藏熙恬。當今用材正求舊。湖洄寧舍械與兼。天涯獨咏非久淹。佇君試割安黎黔。

過三泖漁莊訪蘭泉先生不值

汀蒲漱葦紆徐遍。出港平波烟一片。漸看邨落似曾來。卻憶當年畫中見。舟行畫裏數前邨。水調農歌相問聞。帆偏斜日初過市。櫓起輕鳧忽到門。守門稚僕看行色。方音未解生疎客。門前一樹繫漁船。公家近事渠能說。指點橫橋敗柳邊。東西舍影漾溪烟。比隣舊近天隨里。走卒都知司馬園。前年歸自西江曲。稍覺荒茨事修築。未看餘地起樓臺。略飾微時舊花竹。舍後營齋度賜書。橋前割墅開家塾。范氏宗人並執經。韓家弟子常連屋。過門鷗鷺識嘉賓。借徑樵蘇護喬木。更傾餘俸買新菑。總屬官田不屬私。一廛自寄畊漁業。百畝都供膏火資。家事已清廬墓後。君恩未忍出山遲。明年終爲蒼生起。故國先增耆舊思。比聞海堰功初賦。翠華重幸杭州路。御集都須水部編。湖山正待仙翁注。文彥如雲要總持。高帆吹擁西泠去。

去時河坼正殘秋。歲宴應無幾日留。客今遠道來相訪。能爲天涯小待不停舟。聞語徘徊久。滿目昏鴉數回首。三年離索客何成。百歲從容公不朽。殘雁寒天更獨來。斷萍遠浦難相守。臨流轉柁思耿耿。近海雲霞晚更添。雪夜挈舟空訪戴。草堂卜築合依嚴。扣舷高咏伊人句。一水蒼蒼隱亂兼。

兩峰爲作蘭竹橫看賦此奉謝并乞新畫

寫竹不滿十數葉。能使葉葉生長風。蘭莖自弱筆自健。更爲風勢分西東。其旁太古一片石。不與凡塊爭玲瓏。兩峰老筆每獨造。意匠未許蘇文通。手敏何曾受迫促。五日十日渠何備。有時槎枒露肝膽。一掃百幅無雷同。近來京邑散真蹟。家家屏幃輝秋容。北中地性艱植此。培之不茂成枯叢。修篁新笋忽滿眼。能事乃濟天功窮。高齋霽色開初冬。北風卷幙庭陰空。兔毫肥勁墨色濃。醇醪爲君置千鍾。天涯相見盡已翁。我行儼裝別君去。天地闊遠何當逢。長箋廣幅拙行筒。矮紙未盡君之工。待君酒腸動芒角。放筆萬籀摩蒼穹。氣吞煙水看冥濛。要連雲夢輸君胸。

次韻與仲則作

關河歷遍敵行滕。略憶行藏歎鏤冰。半世狂名餘白眼。十年殘事有青燈。謀生誤作餐書蠹。行路窮于刺蝼。莫負一身能潦倒。邇來蕭瑟已難勝。

題雪帆圖

施君雪帆思歸未得。屬余作此以遺意。

載將書笈與吟膝。帆指黃雲水欲冰。重訪江湖傷旅鬢。幾年簑笠負漁燈。寫君鄉景休思膾。顧我生涯慣  
誤蠅。若許同舟明亦去。北中此景覺難勝。

渭城

三疊驪歌酒一尊。孤吟客舍近黃昏。滿城暮雨楊花白。不出陽關亦斷魂。

黎簡

字簡民。順德人。貢生。有五百四峯堂詩鈔。

蒲褐山房詩話。嶺南自三家後。風雅寥寥。比來余所知者。張庶常錦芳。馮戶部敏昌。溫編修汝廷。潘舍人有為。趙大令希璜。而簡民為之冠。性好山水。屢入朱明洞天。窮其幽勝。朋儕罕有當意者。惟與德清許宗彥。無錫孫爾準。為詩文交。其詩峻拔清峭。刻意新穎。言人所不能言。苦心孤詣。竟以是終。五言如香雲松葉蘊。青雪竹房燈。明瀾聞水鳥。暗葉定風蟬。林暗山亭夜。城光野水秋。海雨留魚氣。潮田起鳥羣。松露濃霑瓦。花源曲到門。潮送竹扉月。雨留花畝雲。七言如一枕春寒閣。鄉夢千家入。語入江聲。酒醒北郭。風花路夢斷。西林夜雨山。蒼涼日色沉。沙樹悲壯江。聲入水村。吳趨歌者誰相識。楚些魂兮不待招。揚柳西樓懷鬼曲。辭章南俗託神絃。排闥柳花吹酒店。飛空山影壓漁竿。霜粘雁背。撇蒲白村。少禽聲。權程黃溪雲。曲曲三篙水。浦樹沉沉一桁山。皆未經人道。語藥亭諸公見之。亦當退避三舍。

華首臺後至洗衲石井小

華首臺之路。四五里不見天日。葉翠滿衣。拂之不去。觀雨花橋之水。若積山怪雲。至臺臺平。至堂堂折。自香積廚沿甃得逕。為合掌巖。巖左側落為洗衲石。石故坦坦。飛泉照人。於是與同遊。

二子臥石上。時青天空寥。白雲未急。幽鳥一聲。山翠已落。

登頓倚靈跡。隱見覲神構。陰窺風雷蓄。陽林笙竽奏。鐵石積古寒。玉條媚今秀。造物視詎給。化跡信不謬。虛堂清螺睡。夜點誤崖溜。淪茗持露重。披衣擁雲皺。紀辭待後感。燭壁惑前鏤。凌晨續奇步。竟日索異觀。冥冥烟蘿嘯。至人詎能遯。

水簾洞

千百石聲迸。匯此一簾水。清寒先迎人。去此尙一里。懸雪薄不破。奮雷伏難起。靜極入山客。雲水勞未已。想見洪荒來。空湧遂至此。崖藤老盡力。石樹凍半死。棉裘凜稜鐵。骨戰及吾齒。投暄出陽阿。回顏有生理。

延祥寺至寶積寺

泉壑投延祥。松麓上寶積。俯窺無底雲。却立千丈壁。東峯忽深黑。雷霆迸虛石。雨來挾飛瀑。聲與萬松敵。長雲過人頂。急步脫我屐。山寺已閉門。叩關者何客。回顧所來處。漫漫不能識。老僧呼洗足。攤髻抱衣炙。旋尋池洗藥。復究泉卓錫。

題內子禪病圖小影

屏軀縱長心。深汲繹短綆。流光導青春。芳懷坐交警。與子同今世。電掣火光猛。命瀕數死在。貌以憂生請。倚瘦勿窺鑑。增寒不臨井。自云聰明薄。上咒昧無等。女子本柔弱。根塵轉強梗。豈如君身骨。仙種發眞省。

簾波落桐陰。窗日碎光炯。傾花積殘露。燃柳引恬穎。微譔傳常情。忍笑曳俄頃。通神語先和。防禮襟再整。減頤若爲惜。約範已自領。淡然山林姿。昭質含至靜。體安景與適。庭虛物皆屏。金仙上莊嚴。慈竹側幽冷。亭亭風露姿。寒意上鬢影。予惟病維摩。煉藥對石鼎。夙業以子故。安忍死割瘻。他時兩縑卷。佳話溢五嶺。我不離眷屬。而得清淨境。倘嫌梵天俗。何必佛摩頂。

秋江行寫別贈張秀才藥洲

日瑤

八月涼風素波起。歸心夜滿秋江水。江上離筵耐堅坐。筵上哀絲澀柔指。炎方暮節江漢青。畫船暖燭玻璃明。美人長歎起勸酒。廣袖押花條脫聲。酒行按歌淒以清。江山夜色遙含情。朝來人寂江水闊。上有曉雲行不停。茲來七旬住山城。朋輩不放一日醒。綺叢自有文字飲。淺櫂兼修鷗鷺盟。就中惜別不忍別。城東明星海西月。已傷哀樂向來多。且信風流一時歇。君不見廣州城下南北河。垂楊今較古來多。西風時候猶情態。一路送迎無奈何。

予嘗作羅浮觀日岡贈周道士今日忽欲復作此圖寄何徵士勤良爲先作詩寄之

羅浮欲雨天突兀。暮雲晚山辨不得。不知一夜雲化水。洗出東南半天碧。二樵山父黃葛衣。踏曉獨開山上扉。夢然冥海萬里黑。中有滄涼紅百圍。赤明道士亦好奇。獨愛此景請畫之。畫之別我向南去。衡岳洞庭行挈隨。此人今已雲水杳。此景恐爲人世知。我亦出山忘誓辭。畫亦彷彿不可追。可憐牛馬走塵土。更

復身心傷別離。何郎昔訪我。對我終日坐。歸去橘柚鄉。別我一載長。秋風幾日吹。綠草盡捲江。聲入懷抱。心尙波濤定。後驚身向朋儕最先老。榮名願及飢時貴。絕技原非死前寶。昔寄畫一紙。畫山不畫水。今乃更一端。畫水不畫山。要令碧海湧日。破爾粉壁青苔間。於陵先生夢葵食。夢亦傷廉心不安。何如對此飽亦得。不飽可質飽可還。苦心作詩乃無益。君不見杜陵野老不得食。

端州縣齋作

四天潑翠城郭濕。城頭窺人萬山立。城門朝開寒奔峭。勢欲與人爭出入。戕剝西極如綫來。至此擘地風濤開。羚羊咽吭不肯一吸盡。呃逆倒壅屯雲雷。山巖水猛兩不下。地弱往往蒙蒙厥災。居人不及對面語。腳下沙走長堤摧。盲風顛浪昧道路。非所去處偏擠排。入地塔影直於筆。浮天城堦膠如杯。下視東流峽山口。江水鬱作山崔嵬。我昔尋常此經過。水落山高石頭大。盤渦風雨神靈叫。景福祠下有盤渦聲如哀號。俗曰猪子渦。不常作。作則風雨晦冥。舟人畏言之。寒峽戰鬪龍鼉。帆檣疾轉指鳥飛。性命欹危等鷲墮。今來風水赫餘怒。猶恐乘桴到堅坐。縣齋蓮幕多故人。久別遭逢情話親。江光夜亂石頂月。山氣忽生衣上雲。樵天海上花作屋。出門白拾照青春。當筵起舞醉杳颯。百縷雲氣下花塵。酒闌袂冷夢江國。萬疊翠屏勞片魂。

小園

水影動深樹。山光窺知牆。秋村黃葉滿。一半人斜陽。幽竹如人靜。寒花爲我芳。小園宜小立。新月似新霜。

野堂

山海容歸興。波濤展野堂。潮增夜天白。樹合晚雲黃。殘芰騷人服。寒花飢客糧。頻年計衣食。無地話農桑。

清江

清江清不極。泯泯肅心魂。日驗魚龍氣。苔行蚌蛤痕。層寒動城影。平碧混村原。垂釣吾將往。虛舟寄海門。

雲隱續致水僊花

無雨亦春陰。春華不可尋。年過旬日淺。花見兩情深。峯勢空青割。盆光水碧沈。關門夢香草。行坐楚江吟。

春郊

水滿碧不動。春郊新雨晴。數行濃柳外。一桁曉山橫。日薄滄花氣。風恬軟鳥聲。病才蠲六七。虛白已全生。

望仙坡最高樓

在眼山川故國情。崑崙寒翠古邕城。短長道路供離別。少壯交游半死生。雲色黃茅秋瘴盡。沙光碧玉暮江清。平安郡邑南征後。偶問途人不說兵。

雨中作寄呂秀才石帆

不辨松聲接海聲。晝雲陰傍瓦簷平。夢迷上巳渾風雨。節感中年憶死生。游戲郢人須宋匠。窮愁遷史信虞卿。柴桑夙志疎人事。計爲身謀早課耕。



問藥樵遺詩

頻年哀輓最傷心。死別流年日以深。桓鳥析羣知善哭。巴猿刻意在哀吟。已將飢餓遺家事。未免朋儕負  
夙襟。直到畢生難塞責。不勝明義繫人琴。

錄別張大谷十二月廿五日

柴烟糞火題詩處。去馬來牛作別時。爲設維摩花雨榻。無煩高適草堂貲。身先夢去惟應戀。客並春來不  
肯遲。知爾看花還惜別。短蓬疎櫂費相思。張君爲設居停之所頗整潔云。

彭明府竹林書席上

隔城山翠動涼氛。時雨吹花益酒薰。東里歌辭傳太史。鄭文川時方爲南邨農事訪徵君。薄遊客館容稱  
病。如市臣門半課文。飲水已甘相見好。四年西夢峽山雲。予以乙巳識彭侯於端州。時令封川。

聽吳客作吳歌

千里東風長綠蕪。江南春似廣州無。一般冷雨蕭蕭夜。不獨傷心爲鷓鴣。

朱彭

字亦錢。號青湖。錢塘人。諸生。有抱山堂集。

蒲褐山房詩話。西冷自金江聲。厲樊榭。杭董浦。汪槐塘。諸公後。大雅將淪。青湖獨承其後。以詩法指  
示騷壇。故二三十年來。從遊甚衆。每言浙江明季多學鍾譚。漸乖於正。自雲間陳臥子先生。司李山

陸差知復古後如西冷十子皆奉司李之餘緒四河毛氏幼承賞識亦宗其旨即竹垞太史何時並效唐音百餘年來浙中詩派實本雲間至康熙中葉小變其格繼吳孟舉查初白出始競為山谷賦齋之習構李學者靡然從之而武林兼學唐宋無所取裁故青湖專以歸愚宗伯別裁諸集傳示學者於詩學自為有功今年已七十餘多識前言往行實為一時文獻著有吳越古蹟考若干卷南宋寓居錄若干卷不成于火為可惜也其詩古體矩矱從容今體聲情高遠餘句如桃花爭曉色湖水識春心江雲初過雨春水欲平帆秋林生澹月烟寺出寒鐘早烟浮岸草新綠入江船雲木浮春氣烟江聚晚愁遠岫明秋水殘峰戀夕陽霜摧翠木瘦秋放一峯高半山無夕照萬鳥共歸心白鷺豈知千古事蒼山猶帶六朝秋雲淨江天遙辨塔潮迴沙渚忽無田滿溪梅兩白連郭一路桑陰綠繞門灑灑花光遙映水濛濛嵐氣欲浮春春當三月原如客人過中年欲近僧病餘人比寒山瘦秋晚詩如落葉多人當晚節多憐菊天為重陽特放晴皆可入司空表聖摘句圖又錄其弟子李方湛將凋徐鉞諸人及其子械王等十二人詩為同岑詩選予為之序今行于世

澄江書院種花詩為盧抱經山長作

空曠何所有草長地亦閒買得涇口花種向軒楹前入春土膏潤樹杪浮晴烟玉茗早破萼細梅復解顏漸看桃與李亦欲矜使娟卉木詎有知不負暄和天灌溉苟無失各自爭春妍種花寓生意生徒願勉旃種植有良法聚土培其根根本倘能固著花亦自繁儒生首德行惟孝及弟昆經訓為菑畬當使故業溫立言既有本坐見風教敦翦綵以娛目生意何所存先生顧我笑謂我善講論春風藹然至相與開清鐸

題唐明皇鬪雞圖

旭日射堂人影動丹青黯澹烟光重高叉一幀鬪雞圖矯首相看使驚竦衣冠約略皆唐裝人物意態分毫芒賈昌率童抱雞至花冠上指神揚揚引開草色排春場明皇勒馬駐不發左右環觀顏色悅灑將芥

粉颯霜毛。薰得狸膏森戰骨。低昂怒目光不定。金距盤拏各馳突。一雞兀立峙上風。不虞失勢遭顛蹶。一雞佯俯旋聳身。意欲中人在倉卒。由來狡獪豈自雄。外假蠢懦藏其鋒。祿山雖伏定颺去。敗奚請斬王應從。優容翻使全羽翼。騎驃西狩傷飄蓬。上皇白髮歸來晚。空教蜀道驅長坂。鼙鼓喧聲動地來。綺羅香影隨烟散。爲問雞坊尙有無。曲江宮殿長青蒲。外作禽荒古有成。令我觀圖增歎呼。

### 趙松雪相馬圖

張公藐視四十萬匹馬。眼空方識權奇者。紛紛俗子尙皮相。遂使凡材盈冀野。頰也下筆存其真。精爽內蘊骨肉勻。四蹄矯健輕風塵。兀立紙上如有神。紅袍長官負高識。整鞍爲繫長林側。彼此俱憐知遇奇。居然顧盼生顏色。只今龍媒亦間生。越越恥與鶩駘行。馮誰拂拭寒郊外。一向秋風昂首鳴。

### 謝彬鍾馗嫁妹圖

畫人欲行獸欲走。謝老吾鄉得名久。何時縱筆寫荒幻。橫幅淋漓羅鬼醜。蒼茫落日山光昏。山神導前獸駭奔。於菟安尾不敢蹲。持者擔者行接跟。鬼僮力怯艱舉重。以首承之同戴盆。穿深林子徑繞繞。搗鼓吹簫出煙嶠。鍾家小妹坐羊車。半揭珠帷善窈窕。馗也頽唐策蹇驢。欲似乘船鞭影掉。在昔李龍眠。畫作嫁妹圖。十洲及叔寶。異代工臨摹。此圖匠心更獨出。羞與古本同規模。想當下筆氣概竊。方良膽裂眩賊呼。老屋動搖白晝暝。風雨颯沓煙模糊。乃能一一雕鏤造化窮。虛無不然安得紙上羣靈趨。

走索行

一夫道前鳴銅鉦。有婦結束肩隨行。三叉路口喚戲索。兒童拍手歡相迎。好事圍場斂錢急。堵牆觀者羣爭集。衆中側出掠雲鬢。勢欲騰空翻却立。回眸躍上神力超。兩傍齊駭聲喧囂。娉婷意態獨整暇。垂楊閒擺風中腰。高步堂堂一徑拓。此時眼底如無索。往來絡繹驚颯馳。失勢一蹶力不支。翻身倒垂猿挂樹。半寸脚尖鉤索住。旋空忽作轆轤轉。亂捲烟雲日爲眩。人羨精能伎倆無。我獨相看爲嘆呼。耕耘紡績棄不事。輕身重利寧良圖。答云尊官莫嘲讓。行乞由來非所尙。江川米少征稅無。衣食翻懸一繩上。頻年踏徧天涯路。泣下吞聲難盡訴。譁然擁隊人競呼。鳴鉦又向前村去。

登報恩寺塔

長千古塔高切雲。琉璃錯采光氤氳。琅璫風鐸晝夜響。十里五里遙相聞。我初見之心已壯。鼓勇先登神氣王。蓮花座畔試攀躋。宛轉梯空曲相向。九級真同上九天。置身頓在層霄上。秦淮水一線。牛首土一坯。三國及六朝。英傑歸蒿萊。何況前明燕王南。下一飛燕。飛來卻趁金川開。天位篡竊史肯恕。忠良屠戮人皆哀。卽此惡業已難懺。建塔那得消餘災。浪傳發願感舍利。白毫隱現銀濤堆。我思此理不可得。佛布慈雲蔭南國。愁慘偏逢好殺時。舍利雖存光必匿。得非殉難諸臣膏血流。燐火光騰出深黑。撞鐘伐鼓渡慈航。難免千人萬人泣。甄工創建總徒勞。留與今人駭雄特。老僧邀我看塔燈。弔古蒼茫淚霑臆。

元人阿爾裨熊虎圖

蟠螭寒外白草彫。平沙颯颯翻驚飈。山深無人日色淡。黃雲湧出如奔濤。下有猛虎相搏擊。一虎一熊真匹敵。怒氣咆哮奮爪牙。想見空中飛霹靂。虎也雄獨稱山君。衝突而出誰能羣。熊之制勝在善伏。埤雅熊之搏擊先伏而後動。動則能教虎殼棘。乍踏乍起交相持。施轉似挾陰風馳。槎枒老樹類奇鬼。霜葉禿盡惟枯枝。誰向荒崖摹此態。渲染迴殊吳下派。縱橫健筆出元人。題款猶存阿爾裨。秋來將軍獵邊城。搖搖旌旆相隨行。臂鷹牽犬來郊坰。曷不手縛熊虎歸闕廷。

樓居吟

吾友童鹿菴。少失怙。其母撫孤守節。不下樓者十有五年。會邵二雲太史來修府志。採其事以表苦節。余爲作樓居吟。

江干老屋樓三楹。以木支柱防欹傾。童母守節子未立。家無儲粟空瓶罍。鄰有老嫗亦早寡。惇惇都是孤寒者。爲言苦節當同貞。一居樓頭一樓下。牀前設靈帷。牀後然土竈。鎮日坐樓頭。樓下跡如掃。驕陽當窗欲燦金。我心如雪著不侵。北風中人欲砭骨。我身如松凍不折。夜來獨對青燈孤。呼兒攤書依坐隅。頻縫阿母手中線。爲憐兒體寒無襦。一女搥襟泣呱呱。中宵遺溺相叫呼。敲冰濯遺冰刺膚。十指龜坼血模糊。起視爐中宿火無。兒呻母吟聲淚俱。獨茹荼苦十五載。吾友始得爲通儒。嗚呼此節誰能如。嗚呼此節誰

能如。

早春山行

一徑入春陰。行行野趣深。早煙浮遠浦。殘雪秀疎林。問客少塵事。看山生隱心。何當結茆屋。長此寄清吟。

憶河洛舊游囑塾夫作畫

春山欲化煙。春浦雨綿綿。雲氣圍梅塢。香風引客船。湖澗猶入夢。招悵已經年。乞取徐熙筆。圖中結靜緣。

石頭城

鬼斧誰鑿削。雄城壓建康。江流經割據。山色閱興亡。謝傅亭空圮。征魯亭因謝安得名韓擒壘亦荒。惟餘危堞在。終古鬱蒼蒼。

靈谷寺和趙升之原韻

溼翠滴衣襟。人行松樹林。一峯看雨過。五里入雲深。古壇留禪跡。虛堂冷梵音。來尋功德水。趙叡有同心。

南山晚眺

散步日將夕。閒吟支短筇。偶看雲外寺。獨倚澗邊松。歸鳥有寒色。晚山無定容。何人共情話。喜與野樵逢。

山樓晚坐寄懷抱村客括蒼

寒林變風色。雪意鳥先知。感此歲云暮。登樓寄所思。亂山雲外客。孤棹道中詩。好赴圍爐約。茅堂共酒卮。

早秋山行

一雨滌殘暑。脩然郭外行。松涼人氣健。山霽鳥聲清。野老攜鋤返。樵童掃徑迎。自欣來往熟。到處愜幽情。  
秋晚獨游臺城取道至後湖作

閒訪臺城路未遙。荒原落葉正蕭蕭。華林馳道迷秋草。元圃游牆過野樵。齊惠文太子創元圃傍列修竹內施高障造游糈數百間 點晴嵐遙映郭。幾株踈柳曲通橋。誰知席帽青衫客。獨自騎驢弔六朝。

方正學祠

雄藩歸去釀兵氛。難發憑誰共解紛。決策俄驚南內火。守陴已納北來軍。一言草詔終難得。十族捐生古未聞。木末亭邊祠廟在。當時猶面孝陵雲。

景公祠

豸冠依舊入楓宸。後死空悲志未伸。斷索尙能凌輦蹕。衣緋先已動星辰。鈔連鄉里瓜多蔓。地近祠堂草不春。雨花臺側至今無草 千古方公堪並祀。要離漫說可爲鄰。

橫舟亭

孤亭突兀俯寒流。坡老名傳古渡頭。別去江南雙短鬢。歸來海外一扁舟。萍蓬遠道家無定。饘粥荒田願易酬。爭奈騎鯨留不得。枉教遺表乞常州。

宋望祭殿

江山半壁號中興，殿闕南屏最上層。淮北黃沙存舊壘，洛西衰草沒諸陵。玉魚金盃知何處，風馬雲車未可憑。一誦雪消春動句，君臣當日忍同登。雪消春動見放翁感憤詩。

消夏灣

湖面涼風漾綠蘋，吳王消夏橫舟頻。那知于越深宮裏，偏有炎天握火人。

垂虹橋秋望

楓葉蘆花徧遠灘，蕭蕭風露作新寒。秋光三萬六千頃，獨向垂虹橋上看。

曹秉鈞

字仲梅，嘉興人。貢生。今官山陰教諭。有藤花老屋詩鈔。

蒲褐山房詩話：仲梅棲遲山澤，隱約自甘，而彈見洽聞，搜奇汲古，凡墨經、畫品、書史、硯箋、金石之錄，古器之評，無不溯其津源，辨其真質。詩材清雋，在錢、郎、章、柳間，爲人冲和恬雅。在江西、主桂溪書院者數年，今雖司教一隅，而漸江人士莫不奉爲祭酒。

題朱山樽涼宵待月圖

靜夜生嫩涼，暝色橫碧霧。甘蔗風乍颭，叢桂香暗度。華星出雲間，銀河漾輕素。適我無非新，清暉豈殊故。坐看輪影遲，秋衣點秋露。長吟小山招，遙想希逸賦。飛鴻來遠音，停琴生妙悟。流光千里同，二分起幽慕。



秋日偕吳少陘李賓日泛舟歷南屏諸勝

涼意未歸樹。秋色紛在巘。芒鞋蹈輕莎。柳翳日色淺。平湖葑草叢。柔艣自搖演。沿緣十里隄。眼盼亦曠衍。晴雲不作雨。奇峰倏萬變。風吹紅藕花。殘暑一以洗。清絕南山隈。水竹恣吟緬。盟心鷗鷺間。緩步苔石踐。手摩懸崖碑。香啜龍井葍。佳游從此始。探奇豫結伴。好爲尋舊題。深巘剔蒼蘚。

偶憩東塔僧舍沈稚春錢訥齋王若農過訪留飲同觀元僧雪菴手書八大人覺經真跡

春陰愜幽思。調御室小住。獨語聽風鈴。曲徑恣緩步。青白池久涸。雷音額仍故。閔寂不逢人。松扉倩雲護。何來同心侶。意外此把晤。緬畦菜甲滋。巡簷花須吐。米汁還共斟。我佛亦不惡。僧彌雅好事。妙響出經庫。朱絲盼方闌。墨瀋垂秋露。健如神杵磨。勁比漏痕注。當年衣鉢傳。心印寄了悟。雪菴自書付弟子惠福款嗤哉逃虛子。天竺詳與付。頭銜署資善。佐命侈奇遇。枉受菩薩戒。心跡自牴牾。姚廣孝跋云。卷付下天竺慈靈菴主。自署受菩薩戒弟子資善大夫太子少師。何如紫柏翁。人品分覺寤。達觀跋語有云。覺則爲大人。不覺則爲小人矣。嵌壁石刻獨存此跋。羣思翠墨研。淡揚縈薄霧。短軸卷還僧。相將乞竹素。且飲缸面酒。鐘聲催日暮。

新秋寓居南屏僧舍

涼雲不出山。秋聲已在樹。長日無人行。閨寂此礪戶。宛然記昔游。只益巖蘚古。平池水華淨。倒影亦媚嫵。風定自在香。日落月初吐。

曉霧失層山。亭午倏漏照。密林森蒼翠。金碧相焜耀。驟雨從東來。雲烟互繚繞。斜陽一角明。微茫辨越嶠。恨無南宮筆。橫幅寫衆妙。

偕吳穀人太史幻居菴觀明人手書華嚴墨海

一昔雲葉涼。秋影淡於水。曲徑果幽尋。繙經凭竹几。吳侯金閨彥。妙墨香光似。淨眼照妍媸。精心度流峙。印籀辨籤題。展玩竟跋尾。了然乞書因。天花雨空裏。假茲翰墨緣。悟彼清淨旨。塵襟一以滌。同人大懽喜。離垢惜不能。散帙興未已。登閣期後遊。虛窗杉月俟。

題王小農學稼圖

煙柳暗平橋。杏花明屋角。宵來鷓鴣鳴。春雨一犁足。糾筮聚新畬。農功自茲俶。秧針綠映水。翼風更濯濯。卽事多所欣。呼童放黃犢。智慧已不勞。何處著寵辱。秫田慶有秋。明月酒新漉。力耕不我欺。課兒翫風讀。述菴先生招同諸公寒夜宴集承露堂分得此字

辛粲未借春。斗柄方指子。簾垂晷影移。歲占雲片俟。官閣唵興高。廣廈歡顏啟。寸莖發華鐘。雕蟲慙小技。先生偶休暇。琴尊交烏履。相於文字飲。真率唯尙齒。折節手杯罍。脫略到青紫。素心徵古權。清譔流妙徵。并無風月譚。只有金石企。江楫寒欲花。紅燭光映几。改席漏聲遲。冰丸銷階肥。醅酌陪山公。雅尙那有此。高會仰韓門。風流接芳軌。浩浩酒意得。湜籍敢竊比。

題朱山人畫魚

畫魚好手不可逢。近來其數楊維聰。惜聰形繪非神繪。魚鱗刻畫徒能工。山人體物有深意。未畫游魚先畫水。烟波澹澹湖水平。荇藻出沒如有情。大魚昂藏小魚戲。咬萍噴沫皆生趣。從知魚水樂相於。修鱗詎肯安沮洳。濠梁一碧殊清泚。樂意何須問莊子。

秋日過徐袖東通守新綠舫

使君家住湖山麓。慣狎鬻光與水淥。卅年作吏向風塵。一碧西冷清夢熟。雨餘水荇翠撲天。風定縠紋清比玉。故將小築仿烏篷。行館斜屏依水曲。泫泫枉渚接花洲。淇淇方塘鋪淨綠。筆床茶竈妙安排。作畫題詩媚幽獨。我來岸幘當中秋。亭午亂蟬喧灌木。軒窗四啟來長風。入牖清冷鮮可掬。邈然野色占秋光。離豆花深瓜蔓屋。使君憂國願年豐。盼望雲霓遠蒿目。應看銀竹澍甘霖。簷角天紳挂飛瀑。村畔泱泱頽栗垂。池沼盈盈鷗鷺浴。重過舫閣聽秋聲。宛泊定香橋外宿。

宿南屏精舍柬朱笠亭

佛火頻分夜。秋聲此乍逢。疎鐙茅屋雨。殘夢曉山鐘。涼思生清簟。愁吟有候蛩。朝來岩翠爽。好策一枝筇。寒食坐雨次張瓜田先生韻

潑火雨時雨。春風寒食寒。行愁芳草溼。坐惜好花殘。節物關心迴。人情洗眼看。最憐湖上柳。依舊暗平灘。

# 朱文藻

字映澗。號朗齋。仁和人。諸生。有碧溪草堂詩稿。

蒲褐山房詩話。朗齋漁獵百家。取材宏富。精六書。自說文繫傳。佩觿。汗簡。及鐘鼎款識。博古圖。諸書無不貫串。源流會其旨要。又能手親摩寫。非徒以形聲點畫自名。小學者可比韓城。相國督浙學時。訪而延之。至京師。佐校四庫全書。且於南齋奉敕攷校事宜。亦俱諳習。又通史學。凡合紀傳編年紀事通典諸書。輒能考其缺略。審其是非。先嘗助予修西湖志。後助予撰金石萃編。訂正之力最多。其詩在劉夢得張文昌之間。正如空山鼓琴。沉思獨往。

## 題邱至山墨錄

東河先生擅詞翰。文字光采雲霞鮮。平生甘苦與墨共。外物不足分其專。高齋檀藏形式古。爲珪爲璧殊方圓。同岑持贈悉著錄。豈謂得魚能忘筌。精神感通龍賓至。物聚所好成因緣。邵羅方程名品備。下逮諸家堪並傳。編排先後慎登選。百十二家名貫穿。墨本耐用壽於筆。數挺定足支十年。先生蓄之何時用。著書毋欲追彭錢。四明南來京雒返。紅梨匣滿奚囊懸。松林處晦夜半泣。收拾精爽隨行轡。先生著述不負汝。壽以汝德元之元。卽今藏弄未忍試。惟靜惟默全其天。有時黑蛟起霖雨。墨雲一噴萬井煙。不才好古見恨晚。將此異寶神愕然。題詞卷尾勉學步。上黨黃山魂夢牽。

## 題邱氏古樹

邱家巨室宋代基。堂前三樹蟠蛟螭。兩松一柏儼昆弟。手足腹心同扶持。棋局紛紛甬東路。不逐枯槎浮

煙霧雅人移植且不能。留遺子孫豈偶數。行都喬木思秋陰。萬松嶺上空蕭森。但有故宮桐井樹。西風銀杏飄無心。無心銀杏在萬松嶺。桐井旁傳是宋樹。東河先生重世澤。徧乞歌詩篇什積。我懷古姿慷慨吟。颯颯風濤赴几席。

### 龍井茶歌

采春茶。冒春雨。風篁嶺南龍井古。戴笠攜筐走山女。采茶忙。焙茶香。山泉到廚聲淙淙。新茶供客客滿堂。有餘時與家人嘗。君不見東村蠶娘勤采桑。絲成不得爲衣裳。

### 三老尋詩圖爲張若坻雨村蓀田昆季作用卷中孫二益韻

詩人之思一徑通。不尋則與榛莽同。尋之有易有不易。妙處每在艱難中。因苦得甘味始足。不知老至忘衰翁。若坻先生有詩癖。本無俗累櫻心胸。雨村蓀田兩昆弟。三翁嶰竹吹雌雄。所居卽是深山處。大雅可回末俗風。江干車馬跡不到。東城境僻詩不窮。詩情大好荆樹下。白首不分榮悴容。披圖瞥見尋詩苦。如關窈窕祛凡庸。或占片石或曳杖。或已得句求益工。不知詩從何處覓。刻意所到無不融。三翁聯榻歲不數。靈江遠溯滄溟東。此圖特寫聚首樂。傳詩更不煩郵筒。我爲題詩寓深意。興詩興行知所從。

### 湯鵬鐵畫歌

蕪湖物產有鐵畫。創造云是湯鵬監。湯鵬畫工兼金工。不以名位爭頭銜。乍看似墨潑絹素。山水人物皆空嵌。風飄秀色動蘭竹。雪摧老幹撐松杉。華軒逼人有寒氣。盛暑亦欲添衣衫。最宜樺燭燒春夜。千枝萬

蒸發翠巖。元明舊蹟共諦視。轉覺黯淡精神減。從來鐵質秉堅性。發土得鑛攜長鏡。以之作畫柔繞指。絲絲綉繹女手摻。深閨刺繡那足道。直欲筆研塵封函。流傳江南及江北。不脛而走爭飛帆。題詩畫上志歎賞。徧示坐客語亦成。

漢銅雁足鏡搨本趙晉齋索題卽次王述菴先生韻

述菴先生性嗜奇。海內金石蒐羅之。蒼存拓本兼題辭。先生纂輯金石萃編一書。屬藻分輯。凡古今金石文及諸家題跋皆錄之。關中舊蹟千年遺。轍迹所到咨諏爲。召伯分陝古所治。今見廉使修厥司。甘棠古木花垂垂。滇藩移節歲屢期。雁字萬里艱遠貽。雁足鏡字藏囊幃。長篇題冊資摹規。細辨響搨參毫釐。六十一字沙畫錐。篆隸筆法完無虧。在槃在趾兼胥皮。鑑銘共六十一字。述昭三年考工。工輔爲內者。造銅雁足。重三斤八兩。護建佐博。晉大福。掾光。圭。右丞。宮令。相。省。中。宮。內。者。弟。五。故。家。四。十五字。隸書在槃下。今陽平家畫一至三陽朔元年。賜十三字。篆書在趾下。前脣後大脣三字。書在趾下。六書俗學與古遠。東漢碑蝕疑轉滋。賴此古器出土遲。西京法物供分攜。碧暈想見然。蛻脂蓮花繡幕開堂闈。嘉賓各各伸雙眉。考文論古喜且悲。元成時事動繫思。可下濁酒增酣嬉。朱文蘭葉珍西陲。如捧綠圖授翠嬀。剏獲豈獨自悅怡。不脛而走來邈迤。晴窗頓下遶羽姿。不爲一粒謀餘貲。昂藏獨立一足支。氣勢千仞高崔巍。顧盼四座神愕貽。陽鳥正合隨朝曦。羈栖毋乃類繫維。制器尙象千鑪錘。考工工輔精于倕。博福光相名存宜。佐嚮承掾官參差。不朽勝似劓屨屨。楊文傳翫勞裝池。貯鏡綺回縈翠思。夜枕側聽涼秋颺。山岩霞簷扶淵壑。作詩者有少山星岩赤霞。贊山伯扶升淵壑齋諸君。龍蛇題字鱗之而。晉

齋好古逸興飛。網羅一册聯光輝。二千年事如何其。諸詩詳攷溯始基。其不備者事亦稀。搜奇過甚求乳  
羝。物有顯晦道坦夷。遷流歷劫波瀾瀾。一經考索生癡疾。證以樊榭詩增疑。半槎所藏迹未隱。詩題繫銘  
字可追。其文與此合。幾希。厲樊榭集載邗江馬半槎所藏雁足鐘銘云。竟寧元年。護爲內者。造銅雁足鐘。  
內者第廿五受內者。一例寶貴珣玕琪。彼此間隔歲丑寅。彼爲竟寧元年戊子作。此爲建昭三年辛卯作。中間隔已丑庚寅二歲。首尾四見香稻辭。一  
鐘再造紛拽捩。弟五廿五分榮暉。其餘凡幾數莫推。伊歲上章暨祝犁。爾雅太歲在庚曰上章。史記索隱  
二年庚寅俱無鐘可紀也。未見制作堪重持。大篆文字源庖羲。百品九沸官鼎鼎。沃淳嚙螭兕。鳳匣彰采雞。烏虎雌彝。  
仁威螭首雲雷卮。並具典重義可窺。此鐘僅予內者私。卽後大廚亦如斯。記斤載兩析珠璣。不共臺殿陳  
蚪螭。幾類短檠牆角欵。陽平元舅勢莫幾。賜鐘兩載生嗟咨。元舅陽平侯王鳳。陽朔元年心驚受寵性未  
漓。鄭重君賜傳銘詞。淮源世澤流勿衰。讀史浩歎漢祚移。殊非人事由天時。陽平侯受此鐘。卽刻銘以識。  
不敢忽如此。此時鳳之事。君恪盡臣節。已可概見。逾三十年而漢祚爲新莽所移。非獨人事積漸所致。殆亦天運默爲轉移。讀史者尙當原其初心。吾故於此爲表徵之論云。

題宗人漢槎所藏方艾山香筆畫蘭册子

漳州織紙蕪湖鐵。一炷名香又可藝。本朝藝事出愈奇。畫法迥與前代別。沉檀爲屑榆末和。其細視綫較  
寸多。霜毫元玉俱退讓。拂箋腕下烟雲過。點痕著紙成妙用。濃淡全憑指輕重。躁心鈍質兩無功。靜助相  
看去豪縱。崇明李氏畫出羣。會言並擅惟方君。不浮山水已妙絕。艾山此册符昔聞。蘭花高潔魍幽谷。顏

色豈宜澆清淑。以香畫出王者香。縱使香銷自芳馥。吾宗漢槎兼衆長。上書善射槩高張。偶遇寸枝便稱賞。題詩祇恐污鑿藏。

妝域歌 井序

余見樊榭山房手稿。曾有妝域聯句詩。謂是明神宗宮人兒嬉之具。於後鮑氏知不足齋見有求售者。是彫漆所製。上刻神宗年號。今來泐上黃司馬小松署齋。出眎所藏。乃琢象齒爲之。其體圓徑二寸五分。面平而底稍隆起。正中有臍。六稜突起。臍中卓一錐。長三分寸之一。麤如燈心而不銳。可使几上旋轉者。由此錐也。六稜周刻小楷字。自右而左順讀曰甲寅年七月二十四日造。李得仁。蓋萬歷四十二年也。六稜之外。雲氣繚繞於僊山樓閣琪花瑤艸之間。下有二鹿牝牡相倚。文顯而不深。其正面則樓館山樹人物。皆鏤空飛動。窪處大小二艇。酒罇舟子相待。老羽衣翩然攜槩。童子繼至。主人謂宜作詩紀之。遂爲此歌。時癸丑中秋後十日。

日月雙跳似丸轉。老大頭顱堆雪繭。書窗瞥見兒嬉物。少小情懷忽追緬。物名妝域始前明。神宗晚歲事遊宴。深宮晝闕寂不諱。宮人製此長日遣。切磋象齒三寸圓。中卓鐵錐五分淺。僊山樓閣雲樹重。二鹿馴行踏蒼蘚。一面深刻鑿藏舟。仙客攜琴方陟巘。甲寅七月二十四。李得仁造字可辨。此非鐘鼎及刀劍。歎識何須仿彝典。朝家製器小亦謹。不使良工沒其善。無如大事荒於嬉。玩弄江山任偃蹇。傳一二世乾坤



傾欲立雖無尺土踐。正如此器旋轉休。圓輪都付浮雲卷。百八十年物幸存。笑語疑聞聚婉孌。揚文紀事附金石。物不足多事須勉。腐儒不敢歲月荒。垂語兒曹戒游衍。

嘉慶壬戌重陽前一日松江太守張古餘敦仁同郡人陳太守桂堂廷慶錢唐吳祭酒穀人錫麒

嘉定錢州判獻之玷談讌於蘭泉書室述菴少寇有詩命和因成四律以紀事

岑寂珠溪館。喧傳五馬來。趁潮江路闊。觀稼隴雲堆。赤烏霑朝露。朱顏帶宿醅。不教驕入谷。簷雀未驚猜。

京雒追前事。古餘戊戌客京師時常得會詞壇步後塵。穀人文字締交者二十餘年裴黃傳治蹟。桂堂守辰州多善政歐趙契先民。獻之工篆隸嗜金石

桂晚榮詩徑。秋晴健酒人。司天占異瑞。德聚在江濱。

湖海尊耆德。煙霞養此身。朝章原尚齒。天性愛留賓。洛社開罇滿。龍門曳履頻。歡然裙屐會。韻事一番新。

樞機詞多拙。衰遲興尙酣。散材真不棄。末席每教參。古篋藏清闕。香光發錦函。是日出所藏漢銅雁足燈及宋槧說文禮書樂書示

賞心交令節。新菊勸分簞。

六月望日嚴古緣招同黃春帆張夢蘭家根石買舟汎月白曲院步至金沙港口與清浴上人茶

話時已夜分。上人方庭中澆花盆有佳菊及異種鳳仙紅白毳而綠心者留賞久之觀壁間遊客

留題多妙墨。因別製挂幅邀同人題詩其上以貽上人識一時佳興云

荷邊涼月柳邊風。此福閒僧享未窮。淪茗正宜人慰渴。澆花兩與露分功。萬家塵夢呼難起。一夕承天事

偶同走壁龍蛇看過客，爪痕吾亦慕飛鴻。

任城南池送別述菴先生

解維詔許待春融，戀闕行遲六月中。染髻齊烟連岱色，開襟泂水納荷風。香山此日成歸客，杜老當時感寓公。聞道珠街臨角里，珠家角屬青浦縣西門外為少寇所居角本用四皓有角里先生張大木進士移居珠街詞有地如用里之句角亦音用故詩與公族同叶今吳俗相沿皆以角為角惟嘉興用里街扁舟過訪乞鷗通猶不失舊音耳

圓津院清華閣訪慧照上人留題

圓津高閣敞清華，津逮圓通水四叉。閣下水名四叉港殿聳慈門鈴語近，港穿青浦布帆斜。談禪恰喜同開士，讀畫何曾讓米家。一帙詩傳增寓客，新題留待補遺加。時少寇以青浦詩傳見贈

清華閣送慧照赴金山受具

清溪水綠泊羣舟，高閣重登認舊遊。折葦期先春社定，上人擇十八日登舟是日春分打包帆向大江收。指揮去日天花落，滿願歸程隴麥秋。添得詩篇并畫軸，圓津小志待增修。

金德輿

字雲莊，號鄂巖，桐鄉人。監生，官刑部主事，有桐華館吟稿。

蒲褐山房詩話：雲莊能詩善畫，累世所藏法書名蹟，及宋刻書甚富。南廵時擇善本以進，有文綺之賜。又藏岳王銅爵，一時能詩者作歌以咏之，入賞為刑部主事，不久乞病歸。所居桐華館，擅圖書。

花木之勝與蔣君元龍方君薰等流連文酒四方名士過桐鄉者必造請盤桓而後去埭門投轄初無倦意予七十生辰雲莊以泥金書佛說五福德經賜予與汪雲壑所書妙法蓮華經並爲佳玩

### 晚步硤石宿紫微山莊

木末亂鴉歸。遙山夕陽落。攜筇踏崇岩。暝色暗山腳。上方起鐘魚。鏗鑄出林薄。罡風襲征衫。微霜溼芒屨。遠燈照歸人。荒墟警宵柝。山空天益高。萬象逼蕭索。境清難久居。山莊得暫託。同輩酌村醪。野蔬進藜藿。論詩譏袋并。談恐鬼神愕。襆被對匡牀。寒輝浸簾箔。明當挈侶行。遐情人寥廓。

### 過綠飲村居

豆花棚下結書堂。秋到窗前引興長。久住漸知耕鑿趣。愛閒翻爲校讐忙。偶烹野蔞如兼味。每借奇書潤薄裝。如此村居良不易。勸君何必羨衡湘。時君擬作楚游未果。

### 題錢同人策蹇訪碑圖

斷碣殘碑半草萊。零星隻字等瓊瑰。一鞭遙指斜陽裏。不爲尋梅得得來。搜奇嗜古本家風。雅興歐陽結習同。他日書成應自笑。十年辛苦萬山中。

### 金廷榮

字筠林。元和人。貢生。

蒲澗山房詩話筠林家。在虎阜山塘。居於青山綠水兩橋間。垂楊映戶。畫舫臨門。風景最爲清絕。生平善鑒別書畫鼎彝。經其估值。人無不信者。作詩無深造語。而風神俊雅。亦復可傳。

贈超塵上人

超公本夙慧。早歲入禪林。經卷參空相。湖山養道心。半龕花雨落。一徑竹烟深。愧我塵容對。焚香聽鼓琴。

慶似邨窗外植竹甚茂賦此

談深不倦忘歸程。簾影斜陽下短檠。絕妙主人邀看竹。碧紗窗外數竿清。年年滋長報平安。大有遭逢足古歡。憐爾性情耽雅靜。不教食肉客來看。

# 湖海詩傳卷三十九

黃易

字小松。錢唐人。監生。官至運河同知。有小蓬萊閣詩。

蒲褐山房詩話：小松字人松，石名樹穀，因以小松爲號。松石工隸書，嘗客于我郡張文敏公家，博通金石，故小松愛古亦如之。官濟寧，凡嘉祥金鄉魚臺間漢碑悉搜而出之，而武氏祠堂畫像尤多。所見漢石經及范式三公山諸碑，皆雙鈎以行于世。又工填詞，官雖不達，亦爲名流所重。小蓬萊閣者，其七世祖貞父先生讀書之所，在西湖雷峯之麓，今燬。

## 送郭十四南歸

踏雪送君去，江南笋正肥。花隨春雨密，帆逐亂雲飛。歸興濃於酒，波光綠上衣。官閒貧亦好，來往總忘機。

## 吳門夜雨

虛負吳閫六日留，殘冬衰柳繫行舟。獨聽一夜蕭蕭雨，也當春宵臥小樓。

## 登封九月十三夜作

雞唱蛩吟那得眠，高寒古縣早霜天。傷心卅八年前事，此日辭親上客船。

## 嵩陽舊館圖爲盧雨田作

唐盧顯然嵩山草堂，有榭館、倒景臺、枕烟庭、雲錦淙、期仙磴、滌煩磯、羃翠庭、洞元室、金碧潭諸

勝謝時臣手摹此圖。頗得幽深之趣。今藏姚制府家。雨田以素册索畫。為寫此奉報。烏倦知還。安居最樂。吾兩人志也。并系以詩。

廿年前見樗仙筆。羨煞唐賢舊草堂。何事河堤塵袞袞。半生辛苦飽風霜。與君把盞更看花。不管燈前兩鬢華。圖取嵩陽嵐翠好。無邊風月盧厨家。

羅聘

字兩峯。歙縣人。布衣。寓居揚州。

蒲芻山房詩話。兩峯為金壽門弟子。能畫尤工梅。生有異稟。目見鬼物。有所遇。輒寫以長卷。久之。成鬼趣圖。殊形異狀。宛然矣。道子地獄變相。又如談五王樓炭經也。其寫大阿羅漢。漢及摩訶薩。各像足與崔青蚨陳章侯上下。又能詩。好遊山。精通佛理。專向樂邦。撰起信錄釋禪淨兩家之惑。索余序之。游京師最久。垂老歸揚州。僅存登岱詩二卷。

登岱頂

石骨攢仙巖。紆迴盤磴窄。巍巍氣象尊。仰止高莫極。肩輿慰夙期。慙愧役人力。初登雲未生。移時問羈屨。忽焉出山腰。俄訝沒山脊。翛然天風吹。雲開見絕壁。一線天門通。巨靈何時闢。我欲披霓裳。排闥整巾幘。行行造其巔。將訪安期宅。孰知俯八埏。布密了無隙。不見九點烟。只愛山雲白。

雨中復上岱宗遇岳二飲歸簡朱大質

夜雨侵客枕。山雲宿官閣。起聽新瀑聲。遙從空澗落。因思凌屨顏。飄然出城郭。抱癖憐寡諧。不憚濕芒屨。

陟歷忽逢君。笑謂似宿諾。相與事躋攀。一一恣搜索。東崖疊壁壘。西嶺攢劍鏑。矚目千芙蓉。雲中辨隱約。萬松爲笙竽。寒風噫崖嶠。盤迴走玉龍。聯絡垂珠箔。大聲吼波濤。小聲繫鈴鐸。石凹水疑碓。笠斜風欺箬。墨汁看屢翻。雷雨復交作。飛來澗底龍。噴灑遍林壑。歸輿時恐傾。磴滑難停脚。未免俗士譏。亦任山鬼謔。靜悟造物心。所忌在極樂。不知雨便佳。茲游足凌轢。況有未來人。尙爲塵事縛。

投書澗

胡安定公讀書處。三年家書不開。盡投于此。

性拙寂爲樂。真意遂欣賞。入門花氣深。隔澗人語響。茶烟出樹間。山雲戀石上。前賢授經地。我來親嚮往。想見投書時。理愜道益廣。

御幃坪

爲宋眞宗駐蹕處

橋平便游屐。赤欄無巧斲。窺澗俯亂流。面壁仰飛瀑。或如雪作花。或如几鋪玉。或如大小珠。倒傾千萬斛。山靈慰勞人。娛耳復娛目。淹留坐陰磴。不獨洗煩溽。因歎祥符初。繁華逝水速。玉輅載天書。萬乘來空谷。辛苦獻芝人。於焉開御幄。遺跡問清流。高松聲謾謾。

鎖雲巖

綫路依巖根。行行一延佇。題字侵壁苔。剔抉借吟侶。窮搜遂幽懷。陰竇晴猶雨。不見崖下人。但聞崖下語。

汪履成

字素之。全椒人。貢生。

朱淇泉叱犢圖

兒寬苦帶經。李密勞挂角。當其未遇時。二子豈不卓。媚上佞文詞。竊據空倚摘。乃嘆功名士。往往學非學。君心謝塵鞅。華黍奏笙樂。隴首自耕耘。堂前供稻樵。螻屈非求伸。玉質何須琢。所以十畝間。觀書能卓犖。因知名山藏。道不離謹愨。志紛業必衰。性篤思愈邈。遠聽聲琅琅。遙問蹄跼跼。谷響人不知。日煖鳥偏覺。秋雲被良田。春酒塞慈幄。一笑捧檄愚。願貞介石確。牛後我欲從。努力買礪确。

金陵道中

一自傷離後。飄零未有家。石城新雨過。水閣夕陽斜。愁緒如芳草。春心畏落花。不堪思故劍。涕淚滿天涯。大姪上章自西江歸見於梁山旅次

去年正月上長安。爾已乘舟十八灘。南北迢迢相憶久。音書落落幾回看。勞身漸覺同心少。握手翻嗟見面難。風雨一尊聊永夕。他鄉骨肉愛團圓。

陳焯

字映之。號無軒。烏程人。貢生。官鎮海訓導。有湘管齋詩稿。

蒲藕山房詩話。映之。清才博學。所居湘管齋。具圖書彝鼎。竹木花藥之盛。又舉欽定三希堂法帖釋文。考其行草。偏旁印章名氏。以惠學者。所至採訪詞人逸事。綴其事蹟。益浙東之行秘書也。其詩采



采流水蓬蓬。澗春正如表聖所云。常游粵東。獲水坑上品。且慕懷仁聖教。內水華二。字刻銘硯背。以贈朱大令。笠亭笠亭轉贈於子。藏之文笥。每溪雨欲來。云然光潤。

安邑宋明經芝山爲寫湘管齋圖並題古風次韻以謝

當年關地構茅屋。偶種森森數竿竹。何期妙繪揮烟雲。更枉佳篇吐珠玉。吟高磊落見性情。畫致蕭疎謝青綠。君家本近中條山。游蹤應歷王官谷。味外得味忘酸醜。品入司空廿四目。餘事兼於六法精。一水一山必甄錄。詩中有畫畫中詩。如此襟懷迥邁俗。束手驚看王宰圖。庶吟歎絕陽春曲。他時歸去擁林於。清齋不厭食無肉。嘉話還增寓賞編。余所錄唐宋元明人書畫編名也。看取琳琅繼都穆。

海鹽朱笠亭進士見芝山所寫湘管齋圖爲更作素心閣圖卽次芝山詩韻題句三疊前韻爲謝

蕭齋僅是打頭屋。小閣重開傍湘竹。素心延賞臭如蘭。勝日披懷人似玉。高高直接弁峯蒼。渺渺遙看苕水綠。縱使城市多囂塵。閉戶何妨卽深谷。樊桐山人笠亭別號古誼深。十載追從見青目。前疏後疏爭輝光。前者

莫造湘管齋疏笠亭作也。今復撰添建素心閣疏云。一圖再圖成典錄。興來更和廣平詩。瓊瑋清雄真絕俗。我閣猶在廣漠野。我心已寄欄干曲。能令止渴遠林梅。實且快意屠門肉。他年締構可同登。再繼雅風歸渾穆。

紫陽別墅有周雲摩厓石刻詩因次其韻

泉石耽成癖。園亭借作家。捫蘿緣磴上。剔蘚見題斜。敢礙舟藏壑。寧同鏡映花。虎林傳吏隱。元人李衍號虎林吏隱。亦願老煙霞。

勞攘風塵後。稍安即是家。玲瓏山骨瘦。澹池水痕斜。風落猶聞葉。冬寒不見花。朝暉兼夕照。却愛望雲霞。  
細讀摩崖作。汝南識故家。昔即周氏所居筆峯排曲折。謂筆架峯釣石帶欹斜。謂垂釣磯儘可爐煨芋。還期雪作花。螺泉涓滴出。酌飲勝流霞。

書畫南宮舫。門庭北墅家。院舊有南宮舫而門與堂北向看潮石臺峻。謂看潮臺集翠草亭斜。謂集翠亭詩逕尋山腹。謂尋山詩逕春池聚

墨花。謂春草池攝官聊至止。逸興共飛霞。

### 吳 騫

字槿客。海寧人。諸生。有拜經樓詩集。

蒲褐山房詩話。槿客志在烟霞。情殷金石。少時所著國山碑考。極為詳核。又喜搜羅宋元刻本。如陶淵明謝元暉諸集。皆取而重刻之。學者珍為秘寶。

復偕諸子游審山過碧雲寺尋稚川丹井。

蒼莽紫破天。停午景猶晦。吟朋互牽攀。適與雲意會。遂扶巖中屐。小聽風前嘒。珠宮隱單椒。高標湧香界。其下選佛場。古碣味人代。摩挲綠鮮痕。一再丹泉溉。五濁儻可蠲。千劫理不壞。回頭見絕壁。竹影動瑣碎。驚然木末亭。勢壓孤鳥外。疎鐘引微徑。蛇行出其背。方知琪樹林。別有天然畫。山有天然圖畫閣層闌共徙倚。湖海渺襟帶。暮靄俄西來。松陰欲沈黛。平生志邱壑。意行隨所屆。奚必三山期。更把浮邱袂。

漢雁足鐙歌為述菴司寇作

君不見咸陽青玉銷沉久。七尺蟠螭希世有。先生眎我六寸鏡。清光徧照西湖柳。攷工制度窮形模。鶴脰高拳雙雁跗。注膏未見安、音樣。中規璧羨穿青蒲。攷古圖載、北蘇氏鏡盤中有、以注齊此鏡盤中穿如璧羨而無、制稍別。林華宮觀迷

華飾。恆滿蓮枝虹運熄。恆滿、即常滿。見西京雜記。鹿盧龍虎非其匹。黃鵠躑躅啜蘋食。甘泉蓮勺車宮槃。貢金不待

梁山錮。五鳳黃龍飛上天。誰歟更守宣王軒。得無巧匠菊與綏。護建惟憑奄寺選。漢書王莽傳、內者令爲傳太后張帳、內者主

供張奄人職也。籍文斯冢錐畫沙。蠶魚細瑣昆刀刻。炎精八葉承宴安。渭陵多藝史所傳。建昭乙酉三歲肇造。齋

夫承令星羅躔。駸駸陰氣盛沙鹿。懷月已符政君卜。賜予便番降內家。紀元乃復鉞陽朔。陽平行序爭驕

貴。何異鴻軒及麟次。大廚想照作美鯖。蛭脂怒挺芝蘭穗。鐘磬喧闐鄭舞催。土山漸臺高嶽危。家僮千指

競攜舉。壁帶金釭何有哉。鉅平京兆無憑藉。輕擲牛衣撼恩澤。身亡不待九囚呼。血化應先土花碧。十候

五將總傾朝。文母徒知守黑貂。彌天步障一朝散。詎有殘焰當風搖。孤鐙冷落二千載。泗水汾陰同顯晦。

內史風流獨見收。耿耿涼宵短檠對。檠光雁影兩差池。猶憶西京晚祚時。木門倉琅燕啄矢。啄破綠絺臍。

方底鴻冥夫豈避。雌伏警眼繁華同錠燭。知公雞足山頭禮佛還。宣和不錄傳燈錄。博古圖不載諸鏡。

奉次無軒二兄湘管聯吟元韻卽以爲壽

蝸壁新泥同殼屋。茆簷日日啼青竹。青竹、笋鳥名。見歐陽公詩。落窳村居過者誰。屈指故人惟伯玉。曾遊見訪廣文三絕吾

方愛。未許霜毫染眉綠。平生足跡半瀛壖。可但秦淮與燕谷。海昌權學昨年至。舉止風流照人目。崔嵬但

載玉川書賞析猶承直齋錄。宋陳直齋著書錄解題卽今瓊宮爲君壽。帶講鞠髓傳舊俗。齊眉況有齊年人。謝庭飛絮翻新曲。閑將玉稱佐衡才。暇事談諧歸割肉。似聞舉觴重祝君。久矣功名輕費穆。

寒食嚴陵道中遣興

老我一身輕。飄飄媿此生。分釵無婦寄。古墓有人耕。塔暝雲中寺。花飛瀨上城。轉憐漁父好。換酒過清明。

贈述菴司寇

當代無雙士。惟公第一流。籌邊嘗聚米。作賦擬登樓。氣挾三江闊。身兼五岳游。西冷奉顏色。恍挹列仙儔。著作心猶壯。披尋手不停。龍門偏握髮。虎觀屢談經。學統開三浙。詞源拱百靈。天台雙屐遠。謂次風先生洗眼

萬松青

海內存知己。天涯問草萊。善與先生素未謀面時蒙于知舊問詢及諸侯誰下士。夫子獨憐才。飄泊青陽晚。飛騰白髮來。何當

陪賀監日棹酒船迴

善卷水洞

翠壁排空勢欲傾。玉龍飛出更崢嶸。祇看樹色連雲色。不道風聲是水聲。淪茗聊資仙竈火。敲碁漫倚石牀枰。人生到此元忘世。何必滄浪始濯纓。

龍門山晚眺

百折丹梯鳥道旁。龍門落日迴蒼蒼。危峯石裂雲多變。幽壑年深樹有香。事往湖樓歌管歇。秋來野寺佛鐘長。還舒不盡登臨眼。直送江潮過禹航。

嚴先生祠題壁次汪小海韻

暫脫羊裘寄釣臺。先生歸後麗華來。雲峯總使高千尺。不及長門淚一堆。

方薰

字蘭坻。石門人。布衣。有山靜居稿。

蒲褐山房詩話：東南布衣能詩者，自李客山後，蘇州張崑南沙斗初，吾松翁石瓢而嘉禾爲方蘭坻，能畫尤工，蘭性情和雅，愉然自得，故稱其爲隱君子也。

十二里洋中流望兩岸遠山

陂塘水時澗。舟楫艱旅情。掀篷人混漾。天水相與明。掠波散鷗影。曳林起蟬聲。菱荷隔浦香。桑柘開茆衡。快此琉璃界。令我耳目清。中流山光來。爭欲褰裳迎。青浮雲表出。翠抹烟中平。雲烟一以散。遠近難爲名。惜哉縱櫂過。目斷修眉橫。

寒山訪趙凡夫故居

峯峯莽迴互。仄徑開林陰。空谷有高蹈。岩居阻幽尋。百年小宛堂。遺構留雲林。深知樂山者。獨抱考槃心。脫略世故累。痼疾烟霞深。矧得偕隱賢。能和邱中琴。江楫見風格。香滿寒山岑。

畫墨竹

山澤間。耀不知肉。從事毛錐頭已禿。硯池中有梅花泉。一竿兩竿寫蒼玉。纖風午夜搖空庭。鳴墻翠羽來湘靈。湘娥清怨入瑤瑟。二十五弦聲泠泠。散入深宵不成夢。影上闌干舞青鳳。酒醒香殘看未真。黑痕著處秋陰重。

過養真村舍

伯休耽市隱。思逸亦山耕。曉樹有花落。春原無客行。力農敦本務。用拙見高情。何處存吾道。長鑱竟此生。

和鮑綠飲簾鉤

鬱環懸處畫檐深。小挽湘波若不禁。燕蹴誤鳴雙曲玉。婢慵遲上一鉤金。輕撩雲髻釵聲溜。頻捻春羹粉膩侵。坐覺纖風吹不定。莫教捎起下花陰。

試燈漫成

招邀且復踏歌行。扶醉今宵快旅情。花底華燈懸夜市。笛中明月滿春城。貧偏仗減成豐稔。老合隨鄉樂太平。酒醒歸來初得句。拂階梅影已三更。

程君凝霞彈琴

人意水絃相與清。月華如水夜三更。誰知曲裏思歸引。多是天涯旅雁聲。

東湖卽景

張家林亭杉葉遮。李公橋外柳絲斜。不知九派東湖水。流出春城幾處花。

翁春

字澹生。號石瓠。江南華亭人。布衣。有賞雨茅屋詩鈔。

蒲褐山房詩話。石瓠遠性風疎。逸情雲上。蕭條孤寄。不與世俗相關。汪上舍大經序其詩云。嗜恬澹。甘寂寞。菽水奉母。耕讀教弟。年踰四十。不娶。不就。有司試。爲詩一唱三歎。如朱絃越疏。足以盡石瓠矣。集中佳句如。尊體入夢三。問屋風雨論。心一紙。書病起。自驚寒食雨。花開又負故園春。簾波嘆近。調策路。柳色寒欺側帽風。游跡重尋鴻爪外。故人半憶馬蹄間。人來山色蒼茫裏。春在梅花淺澗時。許用晦羅昭諫。不是過也。

游龍門寺

信屐破白雲。得逕遠塵闈。欣踐物外蹤。老鐵遺躅在。微風灑高杉。滿院落春黛。廉夫手植小憩佛香中。僧雛淡相對。疎磬時一聲。幽花弄餘態。空空雖未談。心心亦無礙。逍遙溯來途。欲蹴池光碎。叢篠搖夕陽。明滅歸禽背。

集飲學福齋花下。以吟情多在酒旗前。分韻得酒字。

揭來雨乍晴。鶯喚隔溪柳。一徑帶草柔。半尺春泥厚。高館敞暄風。庭花粉以糝。香散堆牀書。色弄盈尊酒。良會喜再續。名理互論剖。皦皦渥顏翁。玉麈揮座右。挾此六籍蘊。瀉之懸河口。嘉吾同志朋。才章俱無偶。

推激到風騷。追琢及瓊玖。繫余獨清放。烟江笠覆首。適從射鴨還。欣此醉銅斗。舞落簾前花。夕陽排闥久。

二如書塾坐月有懷

皎月澄秋霽。流光池北居。美人眇河漢。離憂消琴書。荷葉冷欲折。桂花香未疎。憑軒久延佇。暗露沾衣裾。

羅宿海將客蕪城詩以言別

憐君一揮手。千里莫雲遙。豈爲飢驅慣。頻煩勝引招。葉聲荒寺雨。秋色大江湖。又覺吟豪健。蒼茫感六朝。

南屏芟虛上人同沃田先生西溪觀梅先生倩陳君惠疇寫兩人照而上人爲之補圖賦詩歸示及門諸子余亦承命奉題

西溪有佳約。老不忘梅花。孤艇破澄綠。數邨明澹霞。相攜白足侶。來品紫茸茶。笑指板橋外。亂流疎影斜。

病中偶述

佞佛希蘇晉。鈔詩愛杜陵。葉深四壁雨。秋老一窗鐙。蕉鹿夢何有。純鱸興欲乘。揩磨圓鏡裏。生意自騰騰。

宿東山書屋

曠色起羅徑。高眠山館幽。松闌孤枕夢。蟲語一鐙秋。良友違多日。清醪凍半甌。疎櫺月東上。爲我更添愁。

王荔亭席上送別俞月樵時赴揚州張致齋總戎約

論別南村蟹正肥。交情風味兩依依。已酣尙勸鐙前酒。欲去深留月下扉。長谷濤生帆北度。廣陵鐘斷鴈



南飛元戎小隊江亭會。回首菰蘆隔翠微。

揚州春游奉懷沈沃田先生

竭來望古襟情勝。名士風流總不羣。官閣開尊何水部。蕪城作賦鮑參軍。疎弦夜鼓花前雨。細馬晨衝江上雲。半刺那知磨字滅。笑他殘客日紛紛。念無杜牧共清游。爛醉狂吟欲白頭。春雨楊花新酒肆。東風燕子舊歌樓。二分月影關山夢。一派濤聲今古愁。典卻鸕鶿歸計得。滿囊詩卷壓扁舟。

過亡友欽菴畦邨居

芳塘一曲水粼粼。重過晴邨欲愴神。長臥有人寧覺曉。落花無主可憐春。舟橫釣渚魚吹浪。窗掩琴臺鼠踟躕。顧影空慚子桑扈。夕陽芳草重逡巡。

夜過潭上

紫荷花老碧潭虛。一帶頽垣草不除。馬策再過沈醉後。雞壇重憶定交初。風淒柳岸空歸鍛。月冷松窗罷著書。剩有騷魂招未得。遠鐘聲裏獨欷歔。

研山自閩中來。飲予白龍潭舟次。卽送解維之漸江二首。

我友乘秋發半漳。輕帆昨夜過橫塘。論心獨歎家何在。握手先驚鬢已蒼。悔不短衣隨射虎。翻於岐路覺

亡羊據舷且醉龍潭月天放成名豈酒狂

少時烟墨鬪潭東繼犬抨弓也自雄命折飛騰雙翅場緣慳放達一尊同高田種麥歌方罷遠汶生潮夜

已中無那離情紛欲理又教吟夢繞江楓

### 慶蘭

字似邨姓章佳氏滿洲鑲黃旗人諸生文端公第六子有似村吟藁

蒲褐山房詩話似村兩世不津諸兄臚仕即姻婭亦皆貴盛當為筆帖式遵謝病家居居相府後冰漿局老屋數椽軒窗枯槁獨拓地數弓種竹數十竿並蓋西山沙土以植之愛蘭而北地無蘭取以自名常為水嘆早亡無嗣蓋其性情幽淡非軟紅所得久羈也

### 訂簡齋往過

清談相訂菊花期正慰幽懷入夢時空谷傳書鴻屢至閒庭掃徑僕先知關心尚憶他鄉客時以詩寄三兄因病

翻添數首詩聞道芒鞋將我過倚闌只恨月圓遲

余秋間重過白下適簡齋杭州未歸不獲再一握手別後却寄

返棹重停白下舟欲親笑語故遲留與君握手差三日子九月一日過白門開簡齋不能再晤為我還山負九秋不

晤爭如相見好來札有相見爭如不相見之語重離難補十年愁此情竟被風吹斷淚似江流那肯收

### 奉和蘭泉先生寄懷原韻

遙分清俸度新年。薪水無愁樂自然。更買梅花供硯北。春融香滿屋三椽。  
鏡中髻影帶霜華。詩渴全憑一盞茶。縱是無兒書尚在。竹窗課女作生涯。  
秦關百二擁旌旄。十樣詩箋問薛濤。不是通家情誼重。敲門誰肯訪蓬蒿。  
七載相思喚奈何。纏綿語是故人多。盼將尺素傳雙鯉。戴笠持竿釣潞河。

### 吳鈞

字陶宰。華亭人。布衣。有獨樹園詩。

#### 十二古銅鈎歌爲鄭三雲使君作

慈溪使君示我銅鈎十有二。紫斑繡澀青花膩。錦包綿裏捧鞠躬。甲乙參差雁行比。去聲或云三代禮服帶  
用鈎。夏后鳥書傳款識。薛尚功鐘鼎款識首載夏鈎帶或云小戎纓甲相綰連。葵拜軍容此遺制。一鈎體長腹大堅不磷。  
度以周尺將八寸。蛟胎皮蹙碍手文。想像考工牲血釁。其次九苞彩細頭角獍。或刻睡鳳雕龍形。黃河沙  
岸神物出。千年猶帶波涎腥。龍鈎鳳鈎各一自餘兩鈎長且瘦。兩鈎短小樸不鏤。楚晉盟壇陪莒許。蒼老盤筵雜  
童幼。辟邪大鈎縮困蝨。四脚爬沙口哆吻。八分小字填水銀。筆法曹全意差近。辟邪大鈎背銘辟邪二字八分許雲鈎鑄  
作尤瑰奇。蓮瓣細花凸而隱。虎頭出土同光精。剝盡黃金中不損。雲葉蓮瓣虎頭各一鈎更有一鈎範作鯁鯉形。兩  
手握之勢逾緊。銘云抱魚丙午鈎。余識篆體知爲周。使君得此占作識。指日袞袞登公侯。丙午鈎狀如二  
手捧魚銘云丙

午鈞手捧魚位嘗考宣和圖錄獨遺夏鈞帶呂氏三條亦僅載呂氏考古圖祇載三鈞使君好古入骨髓真賞寧同  
葉龍愛我來醉臥菊花傍夜夜巾箱見光怪

晚興

新沐葛衫輕閑尋絡緯聲嫩涼葵葉扇暗綠豆花棚雨歇雷還激潮來月欲生前村危吠急燈火有人行

次韻王孟公湖涇一曲道興御涇一曲錢文通公所築別業舊額

金字誰家屋臨流印數間露花紅點岸風柳綠侵灣客羨池魚樂人分水鳥閑江干多苦竹我欲概從刪

水閣偶集

小軒突兀大池旁三面闌干一面床垂釣不妨聯客座看山何碍缺隣牆杯分柳色霑唇綠水帶蘋花入  
硯香記得手鉏礪礪種芙蓉幹已及肩長

集醉白池

咬咬嘎嘎水禽啼寒食籬根紙滿蹊句裏豔情揜芍藥酒邊春夢滯棠梨大名宇宙諸家集謂顧黃兩先生清氣  
乾坤四壁題休道主人無長物空廊貯得種花泥

蔣元龍

字春雨秀水人貢生

菜花鱸

亦擬持竿學釣翁。湖天連日雨濛濛。菜花開後魚方上。竹筍香時信早通。不識鄉音呼吐捕。何須歸計說秋風。年來枉作吳淞夢。又悞春帆一片東。

秋燕

烏衣巷口冷斜陽。爭說當年王謝堂。一自梧桐飛藻井。漸無魂夢到雕梁。可堪別後星河隔。不省來時歲月長。只是將雛憐計拙。依栖還繞九迴腸。西風促別暮烟交。枉被銜泥附熱嘲。何限春心隨絮影。強存軟語在花梢。天邊詎少曾留爪。日後難忘已定巢。回首繫殘紅一縷。主人恩重忍輕拋。

酒旗和吳西林先生

東風搖颺一行斜。獵取春光爛不遮。幾處題詩誇竹葉。有人扶杖趁梨花。小橋流水情無限。野店荒村夢愈賒。最是殷勤留盼意。白公集裏認仇家。

王開沃

字子良。號半菴。鎮洋人。諸生。

蒲褐山房詩話。子良疎節闊目。意致翛然。尤工於長短句。寓關中。修藍田縣志。能盡山水之勝。既而主醴泉書院。凡十餘載。客死于秦。

秋杪游中峯

秋色淨天地。砌蟲寒獨吟。客懷亦閑曠。策杖窮幽尋。古寺少塵跡。日斜珠殿陰。纔經薛磴滑。復轉筠廊深。山鳥不避客。翻然下高林。清風吹梵唄。泠泠有餘音。

蝦蟆

爾雅注魚蟲。條析到微族。蠢茲黽與蛙。蠕動遍水陸。陸處近蟲類。水居混魚屬。爾雅蟹蟻在釋。水鼃在釋魚。要從科斗生。或並蟾蜍育。雌雄罕能辨。青紫徒見嚮。三冬方沍寒。錦襖苦不煖。泥中謹潛藏。竈下守縮朒。兩兩抱背眠。紛紛盪股宿。一逢啓蟄候。裸袒日相逐。前行尚蹒跚。後跳轉彳亍。草際每持頤。人前輒怒目。胖體多排癩。隆顛半蠶簇。久蹲促其眉。暫仰蟠厥腹。口闊如篋張。項短若鯁縮。無腸偏納汗。酉陽雜俎。反舌易汗俗。蝦蟆無腸。李時珍本草。反舌捕蚤固渺功。噉哉彌腊毒。聲音托安漢。尊大儼帝蜀。憑軾構越兵。給廩糜管祿。罵坐非無聲。指蝦蟆也。灌夫胡爲興謗譟。誑地非張儀。胡爲肆根觸。再耕歌芣苢。詩疏芣苢。蝦蟆衣也。年命緣爾促。新臺傷醜蠶。床第增爾辱。有時現金眚。禍招武牝酷。有時蝕玉輪。忍令決鼻衄。決鼻。月。在官復在私。爾罪總莫贖。吾廬枕荒江。春水漾澄綠。別圃生蕪菜。餘町藝穰種。此曹窟其中。國族聚歌哭。幻作僧伽形。妄稱鼓吹曲。獨吠破禪心。羣噪妨夜讀。禁咒乏奇方。豐凶厭頻卜。終當付蠹氏。辟除焚牡鞠。

同盧廣文月船登寶林寺梵天閣

傑閣倚峻嶒。危闌客共憑。磬聲寒出竹。山色淨宜僧。外道嗟無想。壇經緬惠能。相傳爲六祖道場萬緣何處寂。風壁閃秋燈。

送張約齋之秦

約齋平陽人。北關下第。薄游滁濠間。秋仲始歸。余適學龍河書院。遂定交焉。未幾復應隴西記室之聘。以詩贈之。

惜別在初會。況逢搖落辰。白蘋寒野渡。黃葉送詩人。冀北方垂翼。淮南少縱鱗。知君西笑意。行探隴頭春。百二函關道。崎嶇賦載馳。大河流禹蹟。明月見秦時。書記雖云樂。秋懷亦易悲。可還憑雁羽。尺素慰相思。

王翰青

字鄂舟。德清人。諸生。

小寒食述菴先生招同游東湖。拜蘇雲卿祠分韻。

東湖春可游。草樹潑螺黛。流觴補修禊。冷節明已逮。騶從絕喧闐。賓客待公退。隱居有專祠。路出茅屋背。到門黃蝶飛。依舊一畦菜。採蘋薦馨芬。掃葉去荒穢。緬懷嘉遜人。此間寄韜晦。于時小朝廷。國步見窘艱。如何天下士。經濟軼流輩。見而不能舉。管樂讓前代。伐檀節彌厲。清人師用潰。使早得先生。方略定無對。才空張浚知。享合徐穉配。我來已後期。聞言太息再。何當肅振衣。清吹接警歎。

趙汝霖

字惠蒼。青浦人。諸生。

蒲褐山房詩話。惠蒼四世皆以文章學行著名。峯、泖、其、尊、人、伯、期、先、生、由、名、進、士、爲、江、西、循、吏、宜、黃、人。至、今、尸、祝、之、惠、蒼、賦、才、英、敏、有、詞、以、達、其、才、有、調、以、顯、其、氣、所、作、多、多、益、善、不、自、珍、惜、故、多、散、佚、予、中、歲、以、來、海、內、賢、士、大、夫、以、詩、投、贈、者、多、如、束、筭、而、今、庶、常、全、椒、汪、君、庚、主、事、長、洲、陳、君、鍾、麟、獨、用、七、言、排、律、百、韻、同、知、吳、縣、孔、君、傳、金、貢、生、錢、唐、項、君、壙、諸、生、昆、明、陸、君、藻、吳、縣、張、君、鏞、江、寧、黃、君、文、之、紀、嘉、定、張、君、彥、曾、婁、縣、楊、君、之、灝、皆、用、五、言、排、律、百、韻、又、儀、徵、汪、君、光、燾、光、烜、重、集、千、字、文、皆、體、大、思、精、文、繁、理、富、而、惠、蒼、是、作、清、新、工、整、聲、調、鏗、鏘、故、采、錄、于、此、其、餘、不、能、備、載。

謁忠義祠

祠在學宮。創於王廣文希伊。祀明給事中陳子龍孫訥及子深州知州贈太僕卿士美。

人生少建樹。零落等百卉。俯仰生民來。代謝一何駛。是惟正氣存。千載常不毀。上可光邦家。下可式閭里。廟食垂無窮。聞風足興起。青溪清且深。柳澗迭交匯。原隰既迴互。峯巒復邈迤。地當華上交。偏隅稱都鄙。境僻無浮夸。民良恥譎詭。先朝神廟初。縣治實初徙。循良勞撫字。先後克濟美。遂使百里間。醇風布遐邇。王澤未衰遲。膠庠樂佑啓。惟時青衿士。周道式如砥。出則履卷阿。明廷列金紫。處則安澗槃。空山蕝蘭芷。時窮節乃見。遯荒甘沒齒。或懷踐土悲。或抱食粟恥。徵文而考獻。約略可屈指。誰歟誓捐軀。大節炳國史。曰惟孫與陳。屹然成鼎峙。孫公本孝廉。忠愛夙自矢。小試爲廣文。舒城始策仕。適當流賊亂。郊原屯蜂蟻。令以他事出。孤城危卵累。公無民社寄。職不任鞭弭。愛國在愛民。何暇分人己。馳驅七十日。四郊獲寧救。褒擢旌功庸。姓名達宸扆。天兵從東來。烽烟接河濟。聲撼太行山。風馳滹沱水。深州彈丸地。風鶴驚喪七。公時爲刺史。國事更如燬。軍伍乏丁壯。倉儲無芻米。力窮勢不支。士卒悉解體。登樓望京華。愁雲凝鬢鬢。俯仰感生成。冠裳肅拜稽。上念國士恩。腹心備驅使。下念鞠子哀。恩勤無涯涘。平生子臣義。報稱曾有幾。



城亡親亦殉。啣哀哭不偃。一死亦何裨。九原尙心痍。哀哉十三人。瞬息分人鬼。破巢問完卵。惟聞兄與弟。廉吏有子孫。躬耕安耘耔。黃門大雅材。偉哉天下士。抱負侔長沙。經術擬中壘。餘事成詞章。秋旻散霞綺。敦盤羅羣雄。騷壇執牛耳。雲間號文藪。海內遵遺軌。力挽文風頽。淵然還正始。聲華馳京輦。公卿咸倒屣。奇才不世出。適丁國運否。枳棘棲鸞皇。乃爲越州李。是時浙阻飢。黎民半凍餒。中澤哀鴈鴻。深山盤蛇虺。歷事五六年。賢勞無寧晷。彌縫力已殫。保障功亦偉。守令盡若公。禍亂庶有豸。無何神州陷。擁戴導福邸。天子號無愁。政柄歸宰髻。桁楊北寺獄。苞苴西園賄。外鎮咸魚魚。內廷耽淫侈。江表王氣終。天塹方倚恃。惟公職諫垣。感懷日撫髀。傷心三十疏。痛哭復流涕。忠謀適不用。危亡伊何底。鎖斷長江炬。組繫軹道壘。填海誠有心。何憂波瀾瀾。移山誠有志。何憂石嶠嶠。報劉旣已遂。甘從邱壑委。至今廣陵潮。哀音同湘漣。王師行弔伐。望風悉披靡。臣僕遍海壖。元黃奉筐篚。豈無股肱臣。乞哀拜階陛。豈無干城將。偷生戀戟棨。螳臂亦區區。思向車轍抵。一蹶不復振。是亦徒爲爾。人臣矢報國。忠孝無二理。親病縱莫治。勿藥竟奚俟。利合害卽去。則將焉用彼。賣國與捐軀。其究何者是。太息百年來。故居沒遺址。荒坟與斷碣。多半蒙棘杞。徒令有心人。望古增歎歎。我皇崇教化。亘古誠莫比。于以植天經。于以篤人紀。眷懷勝國臣。忠貞敦素履。靖難鼎革時。先後同一揆。桀犬曾吠堯。帝堯不爲罪。滌瑕蕩厥垢。普天雨露洗。爰錫易名典。哀榮軼銘誄。爰建忠義祠。春秋陳篋盥。詔書所經行。扶桑及滌汜。野老何所知。感泣空山裏。國典卽民彝。淪肌復浹髓。

英靈常不滅。天門騎箕尾。耿耿日月旁。寰瀛共翹企。而況我鄉人。是爲桑與梓。何爲歷數年。祀典若有待。邑素無專祠。因循未暇此。惟師名世裔。紹聞恆聲。塵心性窮淵。源學術固根。抵一爲秦川。令秦民樂愷悌。困阨尅瘡痍。彝倫錫繁祉。只今棠陰間。父母歌樂只。年來絳帳懸。春風得廣被。詩書陳鱣堂。衣冠集槐市。尙論嚴醇疵。持衡慎臧否。相期師古人。俗慮簾糠秕。式瞻講舍旁。有堂平不圯。蛛網集蒼楹。苔痕沒階甍。云何博士齋。瀆奉亭侯祀。浮圖老子宮。雜陳同鄙俚。國家崇廟享。二仲薦牢醴。奉神歸其宮。乃以肅典禮。庭除誅苜蓿。奧漏勤糞灑。遂令湫隘居。頓爾成爽塏。德意宣朝廷。寅恭協寮案。諷吉祀三公。典型儼如在。于焉采蘋蘩。于焉酌沼沚。敬從師儒後。再拜肅筵几。師先得我心。私心竊自喜。懷古獨徬徨。空庭閒徙倚。憶昔燔臺禍。衛難靡有止。亂邦不可居。高賢悞投趾。食焉不避難。結纓心靡悔。緬懷古哲人。祝予痛未已。復醢中庭中。心傷由也死。三公殉國難。食茶甘如薺。大義炳日星。灑然泥不滓。先師如可作。感嘆復何似。廟食鬯宮旁。于義亦可矣。屈賈傳可同。張許廟堪擬。視彼機與雲。奚啻相倍蓰。允矣百世師。鄉拜植模楷。鳳山石嵯峨。龍江水清泚。千秋萬歲還。吾鄉多君子。

呈王述菴先生一百韻

峯泖鍾靈傑。華戎識姓名。經綸坤軸奠。黼黻泰階平。東觀羅羣籍。南皮擗駿聲。淵源宗漢魏。派別溯姬嬴。蘭譜聯冠蓋。賓筵聽瑟笙。簪花遊閬苑。獻賦達蓬瀛。紫殿晴光迴。彤廷瑞靄綏。清吟傳謝朓。內詔重韓琚。

日暖翻階芍。秋高澗露莖。薇垣工吐鳳。玉署看遷鶯。執法水爲鑑。掄才玉作衡。青箱承絕業。絳帳彙羣英。  
傲外俄傳箭。朝端早請纓。指揮飛騎擁。迢遞亂山行。鐵壁蠻雲合。金沙瘴霧橫。鳴笳晨出塞。搗扇夜談兵。  
劫盡滇池戰。烽傳蜀郡驚。層磯巒嶂。編笮浪瀟泮。零雨三年客。寒水萬里程。雄材司馬檄。上將亞夫營。  
地險憑封豕。天威戮巨鯨。磨崖銘劍閣。奏凱達神京。杜預驅馳久。楊雄著述精。岷峨新石室。江灌築詩城。  
廟算恢王業。輿圖闢帝紘。雅歌周北伐。頌紀漢西征。麟閣勳庸盛。鑾坡寵錫榮。柏臺真御史。棘寺舊清卿。  
彭蠡移仙棹。匡廬拂使旌。祥刑崇令甲。弼教布先庚。邊抱蒿莪戚。應虛葵藿傾。松楸依故土。桑梓動遐情。  
志乘垂開國。以下叙修志之布規模自有明。祚承三聖永。世閱百年贏。墟壑疏兼築。華雖析更并。獨租超漢詔。望  
幸慰吳氓。黨族繁丁戶。萊田徧秬秠。人文頻代謝。曹署幾遷更。苦蕪前朝碣。荆榛異代塋。名藍餘杞棘。古  
宅竄鼯鼯。聞見拘吳下。風謠雜楚僮。殘編多漫漶。俗論總譁譁。文獻留耆碩。規模屬老成。詞壇推獨步。雅  
道仗孤撐。信史春秋筆。羣倫月旦評。秦邦羅杞梓。楚澤採蘭蘅。豈謂芻蕘獻。還憑肺腑呈。一經慚似續。四  
葉溯祧枋。膠序聲華早。邱園道義貞。小朝危累卵。大勢悟空枰。迹絕鷓鴣侶。心隨鷗鷺盟。高蹤傾沈范。蕝  
苑重關荆。先高祖希遠公諱洞少爲華亭諸生有聲膠序間晚年卜居辰山之麓絕意進取以翰墨自娛家徒四壁宴如也革宗伯王太常諸公高其雅尚皆折節下之西蜀楊龍友爲郡學博時服公之才雅相結納迨福王南渡楊以馬士英懿戚權勢烜赫作書招公謂富貴可立致公曰國家之危比于累卵而君若相惟耽樂是從此所謂冰山不可倚也爲書謝之逾年而金陵失守矣詳吳日干沈貞圖續錄珪諸公所作趙母殷孺人壽序中公著有盟鷗惺惺詩草及題畫錄行世名見續圖繪寶鑑中沈先生浩然題公遺像云不見希遠二十餘年道風篤行在心目間有涯之生遺之以畫幽貞之占得全于天

曾我方少，鵲詠流連。今我老矣，雀鬢蒼顏。潛德音徽，香清芬篋。筥盈前賢，留慨嘆。至性本純誠，老共姜肱。

求如希遠，孰與比肩。翰墨在世，高山大川。機忘海上，蜻於陵抱甕。灌遼水荷鋤，耕先會祖。城

被貧餘，穎考癸。樗材甘自棄，鹿網漫相撓。隱愛山中豹，機忘海上蜻。於陵抱甕灌，遼水荷鋤耕。先會祖城

延天性純孝，與曾伯祖。隕字公友愛，最篤。茲樂陶先生，輓詩云：世間無孝子，我輩失良朋。沈獅峯先生題

遺像詩云：養親日脆足，飯客菜根稀。益實錄也。著有緘菴遺草上下卷、樗材二語。即公詠懷之句。於陵灌

圓叟，遼海荷鋤翁。托契千秋上，冥學術師前。輩儀型，啓後生。元亭奇共賞，白社韻同賡。太素辭丹壘，繁音

冥天際。鴻西亭先生題像詩也。

洗笛筭表，閭民望集。賜秩主恩宏。嗣祖橋香公諱太機，窮經力學，不求仕進。少年時即以學行見重于四

之訛，手錄經史古文，不下數十種。形擊訓詁考據，嚴確用為家塾課本。及門之士，亦多達者。與先伯祖盈

缶公及陸臨潭、唐竹塢、孫雪隱諸先生結詩社。亦有素心集、行世、邑侯戴公重公行誼下車時，即造廬延

訪顏所居室曰老成懿範，用志矜式。公壽至九十，恩饗頂帶，著有橋鄉詩鈔。橋鄉老詩人，霜雪遂幽鑿。牛

生不苟作，高蒼判卑濕，不着粉墨，自異茅竹。葦潭西集寄懷詩也。曾伯祖盟字公諱禹，先伯祖盈缶公

諱太質，見袁心友先生見開廳記。陸臨潭唐竹江左科名舊，鈴陽吏治清。歸舟曾載石，餘蔭尚垂楹。士類

鵬諸公集及孔宅志、學菴類稿、素心集諸書。

依宗主人情托父兄，神明潛鬼蜮。感泣迨管鮑，輿輪碑三尺。臣心水一泓，循良崇郡邑。俎豆傍庠爨，先君

公諱頤，生而穎異，至性過人。年五歲時遭祖母之喪，即能拜跪成禮。絕嬉遊者累月。嗣祖授以經史之學

寓目不忘。凡史漢駢選諸書，咸能成誦。年未成童，以背誦十三經受知于魚門鄭公。嗣後督學諸公均有

文行兼優之日，平居勸名節，勵交游，讀書講學而外，無他好也。號書甲子，中本省鄉試。乙丑成進士，攝江西安

高縣令。上高俗素強悍，先君繩之法，境內肅然。有神君之號。書甲子，中本省鄉試。乙丑成進士，攝江西安

分宜縣令。事載袁州府志。名宦傳。屢中丞一齋，書移書所知曰：趙公為政，明如鏡，堅如鋼。有古強項吏風

至其視民如子，愛才如命，薄于自奉，不改寒士之素。則古稱循吏，無以過之。不得僅以強項目之也。先君

為寓公時，節于袁氏，誓手植垂柳數株。數年之後，其居已再易主。而樹尚存。士人目為趙公樹。嚴秀才乘

遇趙孝廉，絳張秀才炳文，皆有趙公樹詩。歸舟載石，亦當時實事也。祛五顯神事，見府志。軼事舊竊從良

感恩流涕。見末學墮先業，家聲隕舊籟。顯揚愁髮短，纂述憾心盲。時事憐長缺，生涯寄短檠。荒原悲馬鬣，

張君德政詩。

廢寢缺魚牲。身世同朝露。情懷類宿醒。撫衷憂耿耿。望遠意忡忡。北斗瞻人瑞。南山仰國禎。絲藏繡趙勝。輾慕執齊嬰。淺見嗤捫籥。蕪詞陋覆罍。因思隨驥尾。聊爾效蠅鳴。採擇憑權度。評量繫重輕。片言榮賜袞。一字感投瓊。巨浸容川滄。羣材彙桷桁。人推大手筆。公類小鮮烹。薄海思屏翰。盈朝重棟莖。許身原稷契。致治比顛閔。夢卜王猷煥。庶颺帝道亨。屯雷蘇蠢動。解澤達勾萌。疆啓殷周甸。春頒虞夏正。明堂圖職貢。雅樂繼韶箴。望重三峯峙。助高八柱擎。河山蒙上賞。桓鬯賜嘉盛。已自銘彝鼎。還教勒鉞鉦。平泉風月待。綠野管弦迎。蟲鳥占時序。桑麻問雨晴。鐵崖吹笛浦。白石種花坪。放鶴臨烟渚。烹茶記雪甌。高懷尋竹院。逸事話松棚。歌擅商山皓。書傳柱下彭。江湖思浩蕩。華嶽想崢嶸。天錫榮鳩杖。嵩生祝兕觥。德功言不朽。奕葉頌周楨。

送述菴司寇重游泮宮

童年鼓篋等前塵。綺席重開四坐春。髣髴幔亭明月夜。雲璈瑤瑟會鄉人。昔曾游處暫裴徊。傑閣臨風面面開。遙望頻宮宮畔水。分明前度認蓬萊。蓋代才名擅鳳池。雞林爭誦白公詩。鄉人偏憶垂髫日。早插瑤華第一枝。先生第一名入學。四國旬宣徧頌聲。中朝人說舊清卿。多緣自任由來重。廊廟江湖萬古情。坐擁圖書擬百城。依然逢掖老諸生。那知鐵壁金沙外。羽扇曾揮十萬兵。

凌雲才筆擬相如。著作頻聞典石渠。此日鬻宮留寶笈。頒來已是卅年餘。先生嘗奉勅修一統志通鑑輯覽諸書。丁丑召試詩賦。卽載南

巡盛典久已頒發學宮。

鈞天樂奏九如歌。國老承恩雨露多。攜得尙方靈壽杖。少年場裏更婆娑。嘉慶元年召與千叟宴。

林下逍遙近十年。鑑湖一曲主恩偏。若教從此登雲路。及第還居梁灝先。

京雒浮塵十丈紅。斷燿人笑舊家風。銅山金穴須臾事。卻羨蕭疎一畝宮。先生書塾聯語嘗引用范文正公斷燿畫粥事。

衡才自昔佐昌辰。閱歷名場六十春。閒把文章溯流派。仙源一棹指迷津。先生六次爲鄉會試考官。

遙峯環抱水縈紆。二百餘年毓秀區。爲問看花上苑客。幾人曾到舊元都。

巋然人望魯靈光。頻水今歌第二章。正似寒梅留老榦。一枝瓊萼領羣芳。

南皮游讌舊時同。此日文壇望並崇。兩地膠庠添盛事。流傳佳話徧江東。聞嘉定錢竹汀嘗亦重游頻宮。

常向丹青認故吾。雪泥鴻爪未模糊。何當更倩僧繇筆。旂影鸞聲盡人圖。先生自少壯以來閱歷之境皆曾繪圖題爲雪鴻紀蹟。

桂苑花開接杏園。仙都寧復羨桃源。從今次第重游徧。屈指春風十四番。計將來重宴瓊林亦祇一紀有餘。

大椿知歷幾千秋。嘯傲湖山等十洲。應爲早年弦誦地。一逢周甲一來游。

### 莊師洛

字蕓川。婁縣人。諸生。

月夜懷人

虛館含清風。早涼生高樹。散髮滌煩襟。微吟愜幽步。月色淡如此。佳人渺何處。仰視銀漢橫。迢迢西南路。

寄山曉眺

不信九峯外。茲峯景絕佳。我來乘夕照。極目散愁懷。橫柳風帆駛。茸城雲樹埋。欲尋雨華洞。于此結茆齋。

金陵懷古

寄奴伐狄起新洲。運去彭城國祚休。落木臺空看戲馬。寒雲城壞聽符鳩。典籤裁抑傷同氣。斂板鋒稜蓄異謀。繭綬敕收循故例。淵生粲死古今愁。

憶破雲龍木德非。紛紛稗販尙依稀。解圍已恃迎靈帝。沽酒何妨倩貴妃。苑擬建章銷劫火。堂虛閱武淡斜暉。故應落葉悲吟客。遙望家山淚滴衣。

蕭寺捨身國亦傾。淒迷烟柳古臺城。重雲殿裏環僧衆。朱雀航前駐敵兵。建業金甌愁易缺。江陵玉軸嘆空盈。閒來讀罷蘭成賦。回首南朝倍愴情。

地如手掌逼強隣。狎客相誇玉樹新。未見烟花歸大業。只聞歌舞屬臨春。哀鳴可恠山頭鳥。羞泣偏憐井底人。寄語阿麼看覆轍。錦帆何事遂亡陳。

黃花漲淺敵兵過。可念家山破奈何。醉舞有珠懸照夜。軍容無綵給淩波。收將天水看仍碧。失却春風惜

已多。一自倉皇辭廟社。傷心揮淚對宮娥。  
寶鼎曾移靖難年。又聞南渡此圖全。文孫已失分藩地。殘局難支半壁天。妙選蛾眉忘故劍。巧翻玉樹譜新箋。王師忽下宮車出。依舊當頭見月圓。

### 徐文錫

字竹所。吳縣人。諸生。有竹所遺稿。

#### 夜宿天平兼山閣

春游澹忘歸。夜與雲俱宿。新月蕩客懷。松窗恣遙矚。山暝泉逾喧。竹霏露如玉。僧雛梵唱傳。野寺踈鐘續。子影寄巖巒。孤衾夢幽獨。

#### 冬晚訪施雲崖不值

貧居無客到。歲晚愜幽尋。一過南邨路。每多塵外心。山禽流夕響。寒日下疎林。之子渺何處。白雲吟望深。

#### 遲暮

遲暮悲生事。蹉跎未有涯。一甞空老大。雙鬢送年華。匏繫難爲食。萍飄到是家。依人當歲晚。獨立羨歸鴉。

### 孫魯

初名煒。字嘯甫。嘉善人。貢生。



蒲褐山房詩話。嘯甫以歲貢生依人萬里外。余在雲南識之。氣宇溫醇。老而彌粹。詩如其人。句如日烘岸草。穿沙嫩烟。寫籬花帶露寒。過從三徑。多對友。點勘千秋。有異書水浮小艇。波紋滑。山帶平林翠。簾勻回首。獨憐同輩少。斷腸翻爲結交多。故園月色歸篷底。永夜江聲撼枕邊。一路橋林山影亂。千村烏柏夕陽多。皆春容。啾緩之音也。

嚶城王定山以其師陳宏猷先生所著四書就正錄。暨故友殷元爽先生詩稿見眎。並將壽之梨棗。此古誼也。作此以贈。

青山白屋閒。抱質愿且賢。足跡半寰宇。碑版暢幽悁。師友陳與殷。零落遺殘編。或闌發孔孟。或吟咏蘭荃。皮藏行笈笥。讎勘窮歲年。云是後死責。剗剛待流傳。以茲敦薄俗。餘事良無愆。士不願窮餓。訓詁而漁販。一朝長已矣。楮墨隨雲烟。守之俾勿失。感泣徹重泉。

皖江道中題吳蓋臣所贈畫卷

讀畫論詩幾往還。無端祖道出江關。宜城渡口春殘後。烟柳濃於郭外山。

丁未臈月廿一夜宿五華山寓齋懷朱林一

夢醒鴻爪忽西東。楫柁煨殘數點紅。一枕松濤風又斷。梅花香細月玲瓏。

鍾駕鰲

字繩祖。嘉興人。貢生。有海六詩鈔。

入夏以後綿雨不休。卽事咏懷。偶成四首。

負米歸來息舊林。竹西回首客愁侵。世無知我休彈鋏。壯不如人敢碎琴。門外烟波濃淡畫。燈前風雨短長吟。夢消永日頻移枕。無復飛騰志士心。

白笑生涯任轉蓬。悠悠殘夢雨聲中。病多大類霜前鶴。老去誰憐鬢後桐。早識文章終覆瓿。虛糜歲月事雕蟲。平生知己縈懷甚。譽擅無雙感謝公。謂舒燕堂先生。

堤柳蕭疎竹樹清。三年留滯廣陵城。千家樓閣珠簾卷。十里笙歌畫舫明。水部新詩同兌句。謂李仰齋州守。樊川舊夢最關情。回思暮雨瀟瀟夜。腸斷江南玉笛聲。

精藍冒雨近登臨。何必游蹤似向禽。忙裏尋閒聽念佛。鳥名。空中有色見塗林。龍牙茶熟初飛雪。虎掌瓜寒好鎮心。清磬一聲塵外遠。三乘參罷對榕陰。

### 汪大經

字書年。號秋白。嘉興人。貢生。有借秋山居詩鈔。

蒲褐山房詩話。秋白籍居秀水。爲錢茸城。生平往來吳越間。雨輟風檣。筆林茶竈。所至輒訪其名勝。及與朝人俊士交。能書善散體文。又從沈沃田。詩。清新峻拔。純尺自然。羣謂表村樓之後勁也。

### 紫雲洞

曉起斷檐溜。微陽漏耿耿。因逐樵人蹤。來過湖西嶺。曲磴羸殼旋。仄徑龜背亘。人從樹杪上。百折乃至頂。筥筩開古洞。吞吐濕雲影。崖傾光難留。壁立勢何猛。局脊類入甕。坎窞比坐井。山深古木寒。澗細流泉靜。

欲學阮公嘯。恐驚蛟龍醒。窸窸陰風生。逼我毛髮冷。拾級梯而登。出險衣迺整。疎林出磬聲。吟策思更聘。  
談箋三十韻

國書重白麻。法書尙白練。古人用各宜。貴素弗貴絢。有明談仲和。製箋共稱善。乃祖侍郎公。入直邀主眷。內府多祕藏。攜歸自別殿。當時祕不洩。遺法授後彥。仲和其從孫。斯技妙獨擅。選材竹縞良。蠹密百番揀。拓背膏細勻。側理漿暗澱。疊以雲舒舒。研之雪片片。鋪槽淡日烘。縣桁嫩風扇。薄洒金熨帖。淺搨花隱見。稍煩黃蠟揩。略經碧礪鍊。層層淨玉膚。溶溶澄鏡面。既殊剡川藤。亦勝鷲溪絹。其妙在本色。無取朱粉碾。愛茲質瑩潤。恰稱筆老健。捆載致遠可。束裝攜餽便。攸往占易卦。利幾中夏徧。豈止充藝林。亦且備宸院。如何法失傳。紛紛造都賈。誇奇貨競居。增華價反賤。譬彼噉名客。實去名尙戀。吾也生已晚。真者未獲見。考古識遺製。乃知今製變。年來寓茸城。生計惟筆硯。手曾十樣披。目慣五色炫。草草供塗抹。何暇致深辨。蠅頭苦細書。埋首日常晏。打門者誰子。又聞索題卷。

靈巖山

朝曦射初枕。影落峯際塔。舍輿步仄徑。粒粒露珠踏。寺門面湖開。湖光互歎歎。想見烟暝時。濕翠萬頃納。琴臺眇何處。導我來破衲。躡屐躋其巔。拂袖松風颯。雲外一聲鐘。響聽四山答。

野泊

三月春風顛落花雜飛絮。舟行閣淺沙。野宿不知處。夜半暗潮生。孤篷載夢去。

風雨不寐有感

尖風射罅作鬼嘯。短鐵燈檠閃殘照。蕭蕭落葉打寒牕。僵木怪鴟挾雨叫。風聲雨聲戰葉聲。萬聲力與萬竅爭。使我聽之不得寐。夜半起舞思劉生。匣中劍亦錚錚鳴。

楊吳大安寺鐵香爐歌

楊吳太和偽改元。世亂妄竊帝號尊。江山半角侈雄據。專事福利崇沙門。洪爐鑄供大安寺。風輪鼓橐雷車奔。蓮莖作頂葉作蓋。如峯突兀逼朝暾。重萬二千高切五。工監特誌內監孫。聚六州鐵鑄此錯。緣化下括村夫村。霸圖誕冀佛力護。詎識煬竈先徐溫。虛堂博山熒暗燄。祕謀籌畫灰無痕。彼火則活此火死。哀哉旋泣釜底魂。有其舉之莫或廢。代更物換爐猶存。摩挲每邀過客訪。銷歇無復沈檀歎。吾鄉竹垞稱博古。銘文惜未全討論。茲看頑鈍泯香色。苔蘚剝蝕蒼烟昏。汴京香井此豈類。出門一笑吟髯掀。

過淨慈寺憶芟虛上人明中

偶然塵夢醒。來聽雨餘鐘。暝色歸深樹。秋陰染一峯。自從齊已去。難更德雲逢。舊日論詩地。蒼涼徑蘚封。

客裏

客裏重爲客。煙橈溯斷津。挑燈坐深夜。聽雨送殘春。性拙難諧俗。才疎不救貧。此行還自笑。誰爲念勞人。

石門灣

煖火石門灣。孤城早閉關。西風夜市靜。小雨客舟閒。野宿生秋思。邨醅暖醉顏。陵晨挂帆去。一髮瞰青山。

陶然亭

四圍濃翠滴。愛此草亭幽。風葉晴疑雨。冰泉夏亦秋。時來河朔飲。興發郢中謳。一事增惆悵。斜陽隱渡頭。

述庵先生取宋漫堂中丞廬山僧寺所藏小像重摹。供于北蘭寺綿津詩屋。偕同人往祀之。祀畢小飲。卽用中丞韻二律。

前賢棲止處。爾室亦如蘭。選勝留初地。流光等急湍。庭空花破寂。林密鳥投安。不盡臨風感。遐心託翠巒。及茲春未去。撰杖侍雲亭。醜酒杯浮白。鐫詩竹削青。舉頭延素月。僂指賦晨星。時述庵先生已有大雅思。誰繼箏琶本倦聽。

抵松江後作

卜得菰蘆鄉外居。尊鱸招我賦歸歟。江湖頗悔輕橫櫂。風雨難忘舊敝廬。慰藉聊憑三勺酒。平安先報一緘書。故園朋好如相問。爲道疎狂習未除。

九日病中作

無分林巒結伴嬉。兼旬頽臥夢迷離。健騰雙屐雄心在。寒逼重衾病骨知。牕葉撲驚秋淅淅。爐香焚送晝

遲遲紫團白墮俱愁我。換得酸辛藥一扨。

鬪蟋蟀聯句用韓孟鬪雞句韻

候蛩感秋生。大經狎客聚族待。居壁善養銳。翁春登壇競博彩。石產體乃剛。大經葦化病則殆。辨名陸疏詳。春

品類賈經在。雌伏斂丁斧。大經雄遇張甲斂。紛紛列廣場。春各各踞高壇。圭竇權頻頻。大經丸泥封磊磊。朝剪

夕始食。春有約無肯改。圓睽雙睛青。大經堅奮兩牙齧。聲先偶一鳴。春氣特增十倍。六跪助相搏。大經一心甘

付醢。深喜獨勝勇。春竊恥交綏餒。拱立持且僵。大經倏竄逝非給。急追賸鹵中。春暗擊鄙逢亥。碎首真何辜。

大經強項竟加罪。裂齒腦髓迸。春傷股血腥洩。用酬一飯恩。大經重託千金賄。環賭屹成林。春誼呼沸翻海。剋

期再礪能。大經計日中休息。策勳爾徒爲。春不積孰嘉乃。藏之盆三花。大經裹以囊五綵。賈餘常矜豪。春迎歸

捷報凱。罷豈秦貶恬。大經榮若燕拜隗。流風狙吳俗。春游戲怪宋宰。庶幾良十篇。大經足爲稗官采。春

周厚堉

字仲育。婁縣人。諸生。

蒲謁山房詩話。仲育居婁縣于山。其先世與趙松雪諸名人交好。自元及明。藏書至萬卷。父忠倚工。錄書。是時詔求天下遺書。周氏經進者多。上賜以御製文韻府。又以御製石刻賜之。又題其所進。宋本漢書。皆異數也。辛丑仲育從子遊。遊子過山中。因得拜而誦之。仲育取詩中來雨字。以名其書樓。屬子作記。當爲吾松他日嘉話云。

小檀園續修禊得賢字

高會移中濟。開成紀昔年。纔過上巳節。總值莫春天。宴續東堂約。裙仍南澗漣。卻援重九例。非礙曲江筵。  
唐文宗開成元年歸融爲京兆尹時逼近曲江賜宴奏改十三日爲展上巳見天中記 十日期初展。千秋制尙沿。檀園糾雅集。綺席壁蠻戩。跡尙交

游。遍心寧。仕宦牽。菖湖榮衣錦。淝水謝烹鮮。招隱柴桑里。歸耕陽羨田。林巒疑谷口。竹木狎平泉。折柬尋  
相約。呼朋每共延。欣依白傅社。屢泛米家船。座接金閨彥。名齊玉局仙。冲懷流藹藹。丰度致翩翩。夙仰人  
如玉。同誇筆似椽。治春司理句。修禊右軍篇。舊雨聯裘屐。薰風醉管絃。形骸須脫略。文字慣留連。鑪檢名  
香爇。鑪停活火煎。都籃茶具足。列鼎食單全。侏飯長腰米。侯鯖縮項鱸。蕈鱸兼別味。櫻笋飫加籩。杓捧羽  
觴進。花催羯鼓傳。興酣嫌燭短。酒罷聽歌妍。婪尾葩應吐。鼠姑色未蔫。圍場排蹋踘。索架罽鞦韆。柳撲晴  
檐絮。荷翻淺沼錢。池塘風款款。樓榭月娟娟。鶯翠奇峯湧。捫蘿仄徑穿。嬌鶯窺葉底。馴鶴下松顛。放浪忘  
形役。幽棲習地偏。迹陳情更戀。事過境隨遷。曩夕鈎方掛。今宵鏡漸圓。浹句儲美景。練日聚羣賢。時喜冠  
裳萃。門看車馬闐。上賓吳季札。列坐李龍眠。濯濯王恭柳。亭亭庾杲蓮。何人能顧曲。有客愛逃禪。氣誼羊  
求合。聲華顧陸先。俗情憎襍蘂。仙骨羨編禪。不速占紛若。相逢儘偶然。珠璣生欬唾。藻采落雲烟。體葉短  
長什。詩成倡和編。分鬪翻韻譜。擊鉢助吟聯。競病誰工押。妃豨漫解填。猥慚覆瓿作。就正運斤前。暢聚殊  
難繼。重來洵有緣。琴尊多跌宕。壇坫獲周旋。鬪捷頻叉手。爭先敢着鞭。三三遲再問。還擬與隨肩。

## 張雅宗

字習之青浦人。諸生。梁孫。早卒。有操縵居詩鈔。

晚秋漫興

金風蕭瑟颺湘簾。寒氣依稀人短檐。濁酒肯辭連夜醉。新詩且喜一秋添。爐邊烟裊炊黃獨。枕畔鐘鳴破黑甜。病起未甘疎卷帙。菊花香裏整牙籤。  
屏跡幽棲寡所諧。悽悽蛩語喚吟懷。山當秋老容偏瘦。菊到霜濃色漸佳。一局楸枰藏犄角。三杯醪醕外形骸。倦來乍覺添岑寂。月弄疎陰逗小齋。

雨窗得青字

顛風送雨人疎檣。簷溜淙淙怕獨聽。水漲小橋浮鴨綠。烟凝遠岫失螺青。苔痕斑駁盈階屺。草色萋迷遶戶庭。漠漠愁雲終不散。未容乳燕試梳翎。

萬一福

字近蓬。鄞縣人。諸生。有玉倉詩鈔。

周亦庵明府招同顧諫園余松岩松屏蔡臥雲曹仙樞作展重九之會分得光字

灑溪家有好林塘。迤邐城東並女牆。壁上廬山屏九折。案頭海岳字千行。菊因霜冷遲猶艷。桂趁風微晚愈香。爲展重陽開美醞。如君真不負秋光。



# 石渠

字午橋。婁縣人。監生。有石田子詩鈔。

和廖屺堂刺史石雲寺韻

匹馬尋春走石巔。綠藏紅寺夕陽邊。瀑過佛頂驚僧定。葉落花臺醒鶴眠。嶺樹雲移青到地。松巒石破碧摩天。每從險處逢佳境。萬壑千巖又滿前。



# 湖海詩傳卷四十

徐鏞慶

原名嵩，字朗齋，崑山籍。金匱人。乾隆五十一年舉人。湖北試用知縣。加知州銜。

卽事

把卷臥疎雨。雨斷夢亦斷。不知簾外風。吹我卷帙亂。濕雲互明滅。庭柯夕陽半。屋角一帶山。晴翠落几案。忽聽幽鳥嘯。餘花捲書幔。

九龍山晚歸

行行出翠微。一徑入斜暉。黃葉有時落。白雲何處飛。溪長虹暈斷。稻熟蟹匡肥。欲采芙蓉晚。烟波隱釣磯。

塞月聞歌

塞月照羈客。影連青海流。人間嘗對酒。樓小不藏秋。畫燭銀箏豔。行雲鐵嶺愁。誰家怨遙夜。重唱古涼州。

秋思

小扇綠窗紗。重重綺樹遮。新涼半牀月。殘醉一簾花。睡鴨噴香細。驚鸞起草斜。紅牆阻幽夢。對面已天涯。

花朝夜雨陪東閣讌集示雲峰

吳江官舍柳如煙。餵鶴修琴費俸錢。東閣懸簾一尊酒。春鐙飄雨百花天。醉來世事關心事。人入中年憶少年。他日定知追此會。封題應寄薛濤牋。

落葉

一夜微霜下碧林。年華荏苒暗相侵。幽衾酒醒重簾遠。孤館鐙昏細雨深。身世飄零遷客路。江關搖落故園心。何須更製哀蟬曲。祇恐天涯思不禁。

余鵬年

原名鵬飛。字伯扶。懷寧人。乾隆五十一年舉人。有枳六齋詩稿。

硤石

硤石何崢嶸。鬱此積鐵色。占艮外隆背。習坎中限闕。烈風人呼號。短樹出劣節。懸車向遙空。取道若引纏。石隙苟齟齬。下臨大壑黑。未省造化功。設此何偏仄。終古阨行人。百兩幾馬蹄。解鞍卽平岡。咄咄炎歊逼。

漢銅鴈足鐙歌蘭泉先生席上作

鴈足鐙。短續鼻。長截鶴。益陸鑿髻土花剝。其技巧尙象。其銘妙用鑿。有紙蟬翼輕。麝煤試響拓。工輔造。佐者博。齋夫掾。勒名各。曰有省。承其爵。中宮內者誰。建昭三年作。一一隸在槃。蠅頭復蚊腳。蜿蜒小篆當。前紀元。又到陽朔年。曰賜陽平敬謹鐙。後廚今至三。故家昔第五。無復蒲反首山之祝釐。卻有青莎廳夜。

之歌舞。戚畹尹邢降。賓客田竇數。卯酒酌香螺。甲煎燒雲母。何以報君進樂府。飛燕雙棲花月午。花月午。燕還飛。飛咏王孫君。那知此時爾。鐙棄用昌黎短不滴君前淚。千枝帝火暉。一夕漆燈閉。爾從侯家翔人間。不逐金蠶玉鳧游。墓田得遇歐陽子。集古有補箋。墨花日拂拭。拔之銅與鉛。爲是如讀倉頡凡將篇。兔梳毫。繭裝帖。我有鸚鵡活眼硯。在匣臨池乞爾撥鐙法。

寶慈書屋觀文徵明山水橫眉子。因成長句呈蘭泉先生。

游絲一縷搖筆顛。尺幅春影相迴旋。春山澹漾水娟秀。春樹濃抹邨鈎連。山開樹斷見茅屋。屋畔高下皆春田。夜來已作一犁雨。青葱寸寸生芳妍。小童羣戲不驚雉。老叟獨行還聽泉。桃花李花兩明媚。前川疑有春無邊。卻嫌添着水楊柳。一白早晚愁飛綿。衡山作畫如作字。總使鋒穎含飄翩。豈廢烘染佐生韻。自有朗潤捐塵緣。嗟我擾擾墜泥滓。雅負家山春可憐。何當橫圖側身入。乞公題句生雲烟。

### 孫星衍

字淵如。號季逵。陽湖人。乾隆五十二年殿試第二人。及第。官山東糧道。有雨粟樓詩集。

蒲褐山房詩話。畢秋帆撫軍在西安刊刻惠徵君易漢學九經古義。禘說。明堂大道錄。古文尙書攷。諸書皆淵如爲之校定。而秋帆撰山海經校正。亦藉其蒐討之力。故其學豈以漢魏詁訓爲宗。鉤深致遠。探頤索奧。孫穀董悅所弗能逮。作詩不多。亦能自抒所見。秋帆嘗以方正澍洪亮吉黃景仁王復徐書授高文照楊倫楊芳燦顧敏恆陳夔及淵如詩合選之。爲吳會英才集。不足十人之數。乃取淵如配王采薇詩以足之。寓才難之意。曾索予爲序。然古人無此例。不能應其求也。

宿元符宮

林宮鎮山坳。高下飛軒櫺。征鞍上盤盤。日暝客始停。遵途百勞忘。尋異千念盈。徑微已三折。屋暗仍重扃。獨上怯曳衣。孤行危建瓴。道士然炬來。開門道前行。靜覺鼠齧松。微同鳥梳翎。林空虎氣逼。草滑蛇涎腥。山頭白濛濛。寒氣生夜明。猶被露華涼。遠聽風笛橫。悄然步初還。遊侶見自驚。幽房感仙蹤。客夢冷易醒。

入蓬壺洞

一途走山腰。一徑入地腹。華陽名洞已參阻。玉柱名洞復洄洑。茲遊稍通人。所歷亦娛目。奇鋒訝孤豎。密理看斜蟲。冬溫蒸厚地。溜響滴虛谷。初驚石粼粼。始見沙漉漉。捫蹤走妖怪。穴竅散蝙蝠。垂乳甘可餐。流膏滑難觸。心疑轉仙徑。曠蕩見平陸。居氓雜義皇。邛舍散花竹。道人見纔訝。謂此足蛇虺。微微濕氣腥。慘慘毒霧蓄。朋行勇蹴踏。我興恥瑟縮。惜哉萬丈窟。不乞一寸燭。山靈厭披覽。居客怪剗剗。莫附杞人憂。甘貽謝公辱。

鬱岡

尋幽轉巖隈。攜杖行數里。離崖樹歷歷。轟地石齒齒。羣峰已低環。茲岡復孤起。山棲寡俗駕。客至道人喜。開門響叢竹。繫馬落松子。檐澀挂薜蘿。堦荒合榛杞。蕉心冷逾碧。茗味苦遠美。星燈禮金仙。雷火合石理。遐搜已折屐。促坐況陳簋。念沉鐘聲前。影閉草花裏。耽奇悵將去。臥靜想無始。遵路何茫茫。霜林亂紅委。

桑天監井牀殘字詩

出門一鋪隨一丁。錯認乘醉埋劉伶。井牀古字待我發。城根徒步來始辨。誅鉏草土辨摹刻。如讀怪牒搜  
仙經。文云天監丙申歲。作亭與井因書銘。蕭梁天子初佞佛。冀以方便延千齡。是年淮堰起復壞。飢鴻四  
野哀飄零。豈知皇帝愍渴乏。欲借一勺詒生靈。周田八家共一井。漢制十里置一亭。濟人興廢有司事。何  
用天語煩丁寧。黃河之潤泰山雨。澤及天下由朝廷。楊枝甘露詎足恃。金仙入夢呼不醒。異時臨渴更誰  
懲。荷荷口苦無人聽。悲歌弔古亦多事。但愛照影波清冷。千年萬古汲不竭。知有地脉通滄溟。摩挲苔蘚  
剔圭角。急印墨本懸中庭。此文埋沒分終古。日近汲綆堆長瓶。其前牧馬肆蹴踏。行客縱至誰畱停。歛然  
遇我自天幸。若獲知己雙眸青。王郎朱子好風調。予見是井文。以王蔭可言。見葛府君碑。以朱膺谷言。告我如試終軍甕。歸途把臂  
又欲醉。便恐一別如晨星。

揚州集方立堂齋中。同汪劍潭金畹芳諸君作。

黃菊清尊夜漏微。貧交相聚尙依稀。何能奉倩生猶樂。只認秦嘉客未歸。紅燭照顏年少去。碧山回首昔  
游非。多因添作他時恨。小雨泥深夢款扉。

試香

辟寒簾底漸氤氳。石葉拈來取次焚。銀燭暗隨灰一寸。繡衾虛借暖三分。離愁似此都成縷。幽夢從誰欲

化雲曾爲如蘭人坐對錦榻幾日罷重薰。

月影次韻

隔簾當戶最含情。半掩燈明半鏡明。一度落如人小別。暫時圓比夢難成。霜來玉宇寒無迹。風過金波靜有聲。惆悵尊前邀不得。關山如此又孤行。

楊夢符

字西躔。號與岑。山陰人。乾隆五十二年進士。官刑部員外郎。

題戴嵩畫鬪牛

羊性狠。狗性險。見南史。惟牛其馴。氣頗斂。畫工若恐牛不武。畫作鬪牛觀者堵。牛不好鬪。胡不平。兩童驅之。牛怒生。既不使竭爾力。耕爾田。麾爾以肱。橫加鞭。復不及陳家青。王家烏。輕車快足誇當塗。兩者一傷戚爾牧。西鄰禴祭茲其福。烏乎。人生萬事如牛毛。毋以餘勇誇爾曹。今學割者皆操刀。

九日

風雨成佳節。秋林萬木哀。有家頻作客。非病倦登臺。夢入秦雲迴。心隨朔鴈迴。何時伴松竹。三徑共銜杯。

重至東昌書院

閱世成華髮。惟餘作客工。懷人花影後。得句鳥聲中。湖海半知己。雲蘿隔幾重。庭前有枯樹。便是主人翁。



殘荷

盪舟曾記擘新妝。零落秋波易感霜。初日依然臨畫檻。驚颺何事到銀塘。早知解語心原苦。但有餘芬夢亦涼。太華峯頭明月在。如船藕欲爲誰長。

何道生

字立之。號蘭士。靈石人。乾隆五十二年進士。官九江知府。有方雪齋集。

蒲褐山房詩話。予曩在京師。與蘭士比鄰而居。尊人編修君思鈞朝夕過從。故自小識之。乾隆己酉。予由江西入京。始見其詩。風骨清蒼。如千金戰馬。騰溪注。問無所不宜。山西自澤州相國以來。若蓮洋居士。清妙則有餘。排纂則不及也。十年來。與法侍講式善。張檢討問陶楊農曹芳燦。諸君互相唱和。而才鋒之峻。則皆歛手避之。蘇侍御出守九江。旋以病歸。匡廬彭蠡山水名區。惜未得盡供其刻畫。

寄沈帶湖叔埏同年時寓杭州

修士恆厭俗。介士恆苦貧。北風振林薄。念我同袍人。之子抱高節。遐蹈江之濱。上堂奉甘旨。顏歡心苦辛。棄祿而就養。曷以供吾親。仍歌乞食篇。翻然辭鄉鄰。書來語重疊。情話款款陳。自言力經史。著述希先民。勗我意良厚。爲學戒因循。嗟我簿書吏。署諾惟算緡。十指拙懸椎。百骸役勞薪。豈不念淨業。垢膩叢心身。豈不念千古。犇走窮冬春。松柏植深谷。勢與荆棘均。抱奇豈敢洩。衆中祇逡巡。望君不可卽。短詠聊自申。

青石梁

萬古此頑石。橫亙青鴻濛。誰能役五丁。鑿取風雲通。千萬億石骨。蜿蜒爲臥龍。龍尾竟垂地。龍頭稍昂空。龍脊聳百仞。突兀撐蒼穹。古苔厚盈尺。一一鱗甲封。輪蹄所來往。滑碧摩青銅。馬力鬪石勢。步步彎強弓。攀躋倏到頂。萬里來長風。欲下勢轉陡。羈勒無全功。魚貫疊踐蹟。尺地攢萬蹤。一落到平地。快若鶴出籠。塞外足奇觀。吁此尤魁雄。過嶺投旅店。落日土壁紅。猶覺所歷境。磊塊填心胸。

廣仁嶺

昨過青石梁。今登廣仁嶺。坡陀夾峭壁。倏若墮智井。巨石積鐵色。陰厓襲虛冷。萬車爭一隙。如喉苦魚鯁。欲上不得上。顛危濟俄頃。陰盡忽開曠。蓄極得馳騁。疎林八九株。微風弄清影。前望縱遐矚。後顧抱虛警。想當開鑿時。萬夫力齊併。磊塊塞大地。千椎破其整。雷礮擺天垠。電劃坼頑礦。

青石梁觀瀑

石壁插天起。何處來飛泉。噴薄下百仞。匯爲蛟龍淵。水勢欲攔石。石避水怒濺。氣力兩相搏。終古無周旋。練影倏分裂。珠顆跳輕圓。殷雷吼晝壑。急雨飛晴煙。匡廬我未到。見此喜欲顛。駐馬久仰視。一洗塵慮蠲。銀河倘可溯。乘槎擬洄沿。

法時帆招集詩餽用東坡焦山韻

伊誰大廈雄。耽耽清歌妙。舞傾東南。伊誰解作文字飲。竹籬花徑開三三。長安宦海一俗耳。大都束縛如

眼蠶。梧門先生今作者。儼古賢達真無慙。詩如春雲淡高嶺。心如秋月澄寒潭。書齋四壁亦何有。千詩墨瀟淋漓酣。時當三伏正苦熱。招我竟日爲清談。我來最早客踵至。車聲轆轤趨詩龕。花木位置秀而野。壺尊羅列芳且甘。二難四美一朝并。造物應怪吾徒貪。詩人畫手各快意。畫吾不解詩猶堪。輿酣日落不知暮。吾欲借此爲行菴。

重九後一日。張瘦銅填招集記珠軒。約同王葑亭侍御友亮。胡雲蕉同年次日載酒長椿寺看菊。雨阻不果。瘦銅用東坡九日黃樓韻作詩見示。次韻。

長安城中秋色老。詩人賞秋高興發。招朋共作小重陽。歲時記重九後一珍珠紅滴金盃滑。公性直須酒漉巾。我才短如綫折韉。雙螯輪困許共持。大白淋漓試一呷。戶小幾困吏部響。醉極擬荷參軍鋪。忽思黃菊正敷腴。不比白草畏肅殺。提壺更謀一日飲。命駕須訪城西刹。天宮何事妬勝遊。雨師作意相磨軋。淺巷獨漉深泥埋。日腳黯淡雲頭壓。良辰過眼祇轉瞬。欲補如齒已成齧。隨公願效雲與龍。比鄰莫惱鵝共鴨。度銅寓齋同巷而近他年卜築仿東籬。溪山何地非茗雪。

壺盧學士歌同雪蕉作。觀音寺街酒家作一標子。冠巾頭面如學士狀。自項以下壺盧也。瘦銅先生以爲大白作壺盧學士歌。雪蕉因邀余同作。

謫仙騎驢歸仙都。手摘酒星天一隅。忽覺肉身太癡重。蓬壺乞得壺公壺。以壺作身輕而腴。壺口拂拂飄長須。上帝怒之降玉符。曰汝故態猶狂奴。飄然復謫長安衢。長安酒家特狡獪。范以水土塗以朱。細腰大

腹堪絕倒。旁蹲二鬼如擲榆。吁嗟白也。其何辜。既非五石之瓠。大無當。亦非依樣而畫。觚不觚。酒觴輪困。去芒角。繁而不食。胡爲乎。吾欲衣之以雲霞。佩之以瓊瑤。送之以清風。導之以靈輿。青龍素鶴。前後驅。適然而上。達帝居。天漿一吸。千秋餘。恆與北斗相益虛。不然以身濟斯世。中流賴爾爲舟楫。嗚呼。中流賴爾爲舟楫。爾其善保千金軀。

道上望大防諸山

橫雲截山。山入天。雲行山亦行。蜿蜒山青雲白。兩嫵媚。此中定有飛空仙。我無垂天之翼。躡雲屐。何由一舉登其巔。平生未識山面目。茲行所遇俱清妍。應接常虞有不暇。左顧右盼勞周旋。十年塵土一朝洗。愛之如有前生緣。竊途登頓何足計。佳處翻願馬不前。行行邨落出林際。青帘招我投炊煙。

崇效寺舊名棗花寺

我尋棗花寺。不見棗花開。一徑亂蟬響。數聲清磬來。碑殘藤絡字。地古石生苔。坐對蓮池淨。翛然絕點埃。

秋夕

孤寺鐘聲歇。蒼然碧宇空。峯高遲得月。樹老易知風。客思千山外。秋聲一院中。此時還獨醉。倚枕向疎櫳。

晚景

幽居無一事。飯罷看斜暉。嶺月忽已上。山僧猶未歸。烟深溪路迴。天遠寺鐘微。古佛靜無語。相看坐石磯。

龍泉寺

初地何年構。柴門徑欲蕪。樹同山太古。僧共佛清臞。靈穴潛龍子。名花豔鼠姑。此中無一事。且自禮文殊。

雨望

蒼莽盧龍塞。奔騰拒馬湖。雲憑山勢厚。風挾樹聲多。原野神靈會。江湖氣象俄。炎歊欣一洗。遠近聽田歌。

讀梅村詩集

白衣宜至爲浮名。便署頭銜誤一生。洛下風騷徐騎省。江南哀怨庾蘭成。歌殘金粉繁華地。寫出琵琶慷慨聲。應是婁東壇坫在。不教元美擅前明。

楊六士比部夢符移居巷南詩以賀之

失喜西南竟得朋。綠楊春擬兩家分。卜鄰久幸邀王翰。謂楊甫問字今欣近子雲。室有異書容借我。詩無凡語最憐君。從茲下直頻來往。緩步當車趁夕曛。

試燈夕招同年謝蕃銘汪彥博小飲

宦況蕭條感歲華。上燈時節正天涯。尊前鄭重同年話。雪後精神昨夜花。臘有酒狂容我輩。不知詩思落誰家。鼇山火樹尋常事。卻笑兒童一倍譁。

觀音菴儲舍

石徑苔階草不除。翛然此處得吾廬。牆堆磊砢山三面。門對潺湲水一渠。居士清齋數聲磬。幽人行李半肩書。跣趺便是維摩詰。何必隨僧叩木魚。

閒倚

閒倚山僧白版扉。沉沉西嶺下斜暉。溪頭煙暝客爭渡。樹杪月明鴉亂飛。百八聲鐘空籟寂。兩三點翠遠峯微。誰家燈火搖籬落。照見牛羊得得歸。

暮春雨雪交作遣興

晝長風物鎮淒迷。漠漠重陰四面低。柳覺絲寒愁脫絮。燕防衣濕懶銜泥。情懷惡似酒初中。天色常如日欲西。上巳清明都過卻。小園桃李未成蹊。薄醉心情聽喚鳩。輕寒未許下簾鉤。花光膩似人初浴。我意懶於雲不流。天地無情飛野馬。江湖永憶泛扁舟。玉壺買得春常在。且可尊前自勸酬。

汪彥博

字厚夫。號文軒。鎮洋人。學金子。乾隆五十二年進士。官刑部員外郎。有養泉齋詩鈔。

和陸魯望茶具

雌雌一寸尖。戢戢數叢短。柔如竹脫綳。脆若蘆抽管。穿林美樾清。得氣陽崖暖。南山昨夜雷。已報頭番滿。

茶筍。

東嶼兩三畦。西嶼數間屋。似閑還似忙。盡日在澗曲。語兼藥草香。隱借杉蘿宿。戶戶祀茶神。先喜細雨足。茶舍。

鑿石起新煙。團泥趁朝旭。山童隔竹呼。白磨搬運熟。樵爨餘松柴。野庖雜杞菊。拾得火前芽。一杯春露足。茶庵。

煎烹厭銅腥。膨脝訝石醜。呼起老彌明。安排佇吟友。傍似鐘折足。上爲瓶守口。竹爐聽風煖。任我持當酒。茶鼎。

定州小花蕊。佳樣出雕飾。蟹眼翻雲映。兔褐濺霜色。靜攜都籃具。好闢晴窻側。睡足日高時。此意君未識。茶甌。

花乳夜飛泉。松聲午鳴雪。鷄蘇與胡麻。論品抑已未。但得兩腋清。坐使萬想滅。誰扣玉川門。春風送瑤札。煮茶。

將至荻岡舟中和存塘舅祖韻。

晚程喜說近何山。未落帆時夕照殷。一路樵風潮上下。千家漁火市迴環。犬知迎客花源熟。鶴解看丹藥竈閑。三宿何妨寄桑下。再來亦欲扣雲關。舅祖已三至荻岡。余亦兩度矣。

### 梁履繩

字處素。號夫庵。錢塘人。敦書子。乾隆五十三年舉人。

#### 安化道中

貪程隨落日。樹影漸依稀。人語空山應。泉鳴古洞微。怪松連石長。歸鳥雜雲飛。何處尋茅店。遙烟出板扉。

#### 西湖冶春詞

不攜游伴笑疎頑。畫舸停橈何處灣。怪底今朝容易醉。春風吹綠酒中山。新晴芳草輒於茵。油壁香車動暗塵。十里東風簾不閉。看花兼爲看游人。

### 朱文治

字詩南。餘姚人。乾隆五十三年舉人。

#### 潤州旅次

何處獨招涼。江樓倚夕陽。一聲秋在樹。千里客思鄉。小病詩猶健。多愁酒自香。西風莫吹急。新鴈未成行。

#### 南沙河題壁

北沙河畔柳凋零。路轉南沙幾樹青。最是歸心撩亂處。琵琶一曲泥人聽。楚楚衣裳照眼新。到門留得十分春。東風不種雙紅豆。一夜燈花笑美人。



# 王芑孫

字念豐。號惕甫。長洲人。乾隆五十三年召試舉人。候補國子監博士。有淵雅堂詩稿。

蒲褐山房詩話：惕甫詩，灑然以瘦，憂然以清，亦縝密以栗。蓋上溯杜韓，而實出入於郊島間，十餘年來，老成凋謝，惕甫在京師，與法時帆、式善、何蘭士、道生、張船山、問陶、楊蓉裳、芳燦諸君，琴歌酒賦，故爲南北時望所推。又工書，仿劉石菴、相國具體而微，配曹貞秀，亦以翰墨聞。徐子門人曹指揮銳之女，殆管仲姬文端容流亞也。

冬夜爲法時帆學士式善點定所著存素堂集奉柬

朔風竟終日，積雪快始晴。夜讀梧門詩，見跋燭煥整。精想出生瘦，別構勞經營。如游松檜林，孤鶴時一鳴。霜鐘和松吹，流作空際聲。此聲從何來，窅自性地生。求詩莫於詩，稱性開奧閤。公當觀其大，鯨駕滄海橫。公當觀其變，虎帥戶牖驚。想思歲云久，一見肝膈傾。爲公致商權，公亦披中誠。刪存事粗了，街樓打四更。不勝徂年悲，迫此歲暮情。賈島倘祭詩，薦以寒泉清。

李介夫編修如筠見示所著蛾術齋集，並承惠詩，次韻奉荅一首。

人生但飲食，何異蟲有蠹。好文不好學，吾儕病亦痼。此心如穀種，直養要糞護。當其勃然興，自覺撥爾怒。風霜剝浮僞，雲夢恣吞吐。俗疲氣節銷，儒懦趨嚮誤。君子甘瓦全，小人幸塗附。工將揣摩心，輒作媿媿具。得時相鬻賣，失意互嫉妬。薦寵忽驕矜，困窮多遜懼。道衰文不章，無所載之故。吁嗟往聖徂，志士入夢寤。可憐韓歐生，不抵衛霍遇。不遇良可悲，而竟誓不顧。詞句今流傳，譬效儼接晤。譬諸雷出地，晦暝不能鏞。

士欲爲文章。職先崇志趣。鄙人蛙蹶泥。妄思追虎步。鄭重尊昔聞。孤危闕時務。金盡一甌存。鐵錯九州鑄。汗漬學爲海。羣流勢不赴。行年三十九。蹉跎容色暮。讀君一卷詩。見志妙託賦。警拔如有神。橫鶩皆式度。縑山露厓竅。摩霄豁雲霧。屈指天下才。嶽瀆自有數。傳觀顏高弓。著手竊驚怖。誤蒙就商榷。問盲疑管輅。驂騑萬里心。規諸氣深固。能從性靈求。猶傾河漢注。堂堂古賢遠。將子共登路。

何蘭士工部道生枉詩見贈出示所著方雪齋集奉酬四首

文章一微塵。萬古悲淚海。詩緣發憤作。易有憂患在。神聽轉和平。胸中非硯礪。士以文載心。於中寓真宰。見心不見字。字字獻神采。古今旦暮耳。緜渺若相待。

自非讀書多。何以實其腹。妙處不關書。無書苦磽确。典墳丐津潤。糞養出嘉穀。心苗時怒生。百怪困役服。鴻通破拘攣。精神見雄獨。獨者衆所歸。九流貫一轂。

言中苟無物。憍氣非堅蒼。絃外苟無音。虛響寧久長。詩爲六藝一。騷雅相翱翔。巍巍千載客。炯炯十目張。務將觀其裏。底蘊森可量。小心事古人。倘規工弗良。

君詩不著紙。清雄更超逸。不謂太行西。落此一枝筆。贈言極網繆。獎與過其實。倒篋出嘉篇。相要作評騭。敢不誦所聞。臚陳學師乙。我好攻君瑕。君宜指我失。

送洪稚存亮吉出督黔學兼寄石琢堂玉楚中

一代作家無數公。天下健者方推洪。平生讀書萬萬卷。怪眼嵌月星羅胸。三軍背水旗幟赤。九牧鑄金鑪。韜紅漢唐宋明無不有。百川灌河一洗空。文心如龍氣如虎。牙鬚角甲光熊熊。開寶精神建安骨。創格自起今乾隆。廿年流宕不得意。一朝唱第蓬萊宮。受恩不次非故事。遂畀督學黔西東。黔風僑儂士疎樸。江山入手偏倚雄。君昔好游如好學。題名歷紀箠髀蹤。往來岱華看不足。高歌嵩嶽天當中。以譚天口注釋地。三國補志置橫縱。篋中方草九域志。此行履勘證異同。果然萬卷走萬里。成就此學皆遭逢。皇天生才不擇地。炎荒分野連祝融。火房南離文所會。士有莫測惟靈鐘。牂牁蠱戾盛惡浪。玉屏秀蟲霧雨蒙。安知萬古閤不發。非待子手開鴻濛。子往誨之勿菲薄。袖攜春雷醒頑冬。暇時課士若課兒。士亦視之如家翁。花苗銅鼓峒苗箴。視子始視鼓鏞鏞。餘事驚人謝家句。筆情飛上飛雲峰。須防佳侶熟傳誦。弓衣繡入蠻女寶。書生快事那有此。一詩一朵青芙蓉。所愁按部寡酬和。懷人北望嗟飛鴻。忽聞郵騎登有喜。曼卿醉墨米皮同。因君卻念郢中雪。衡湘九疑道所從。故人同時把旄去。我此瓠落將安窮。雖然公等參錯在。豈憂餓死埋蒿蓬。二君努力慎自愛。去去與國充瓊琮。文章報主諒不易。我后遇爾亦已豐。半生辛苦艱一飯。無忘在莒搗謙沖。瘴鄉加餐篤行李。勿以吾故傷離悰。吾儕窮達蓋有命。萬古一息悲迴風。作詩送君兼寄石。不覺腕底奔流虹。

家秋勝大令復以嘉慶元年九月與黃小松易武虛谷德爲嵩少伊闕之遊尋碑選勝作圖紀事。

其年十二月求孫淵如星衍篆題其首。明年五月以書抵余華亭官所求詩。

生平濟勝苦無具。僵臥甕牖如蠶眠。九峯三泖衣帶物。坐隔霧雨如天邊。忽漫打門有題寄。龍門伊闕來吾前。吾家令尹老箠屨。部下山水雄且妍。腳絆手板了不困。能致二客寧非賢。高崖長谷勢開闔。瓊花瑤草光新鮮。昆侖水黃界地。古陸渾火紅燒天。奇懷正逐秋興發。秣馬逕往聯鞍韉。仙局森沉蓄靈閼。從儻包襄攜椎甓。瓦棺篆鼎遍搜索。斷鉤蝕畫爭摹填。攸緒早存邱壑志。虛谷魯直慣注蟲魚篇。小洛下迦藍補前記。嵩陽石刻增餘編。倅來以圖要著句。不遠千里馳封箋。我無薄領自蹙縮。君宰緊劇翻清使。何須較量問才地。只論胸次區霄淵。側聞秦蜀頗有事。羽書旁午從三川。楚氛沿江飛礮石。豫州錯壤橫戈鋌。雖經勦殺鳥獸散。尙爾團結蜂蟻纏。嗟予季爲國殤哭。歸魂血面瓜透拳。三塗太室古阨塞。公等那得心飄然。詩成火急遣來使。引領北望空雲烟。

馬蘭口

天劃中原盡。山隨絕界分。壯心懸落日。邊氣結孤雲。此地連三輔。前朝頓萬軍。車書今一統。守將總能文。

登平山頂

平山望不極。山背畫陰陽。斷礪穿雲黑。長城界樹黃。地懸惟鳥道。天盡卽龍荒。一眺無中外。空烟點點蒼。

鮎魚關

山壓孤城斷。關臨大漠開。列屏高礙日。陰壑自生雷。古隘魚靈守。秋空虎氣來。繼光曾轉戰。鎖鑰想邊才。  
題述庵先生柳波雲舫圖

寫將螺墨當驪歌。更有珠璣壓載多。舫底新潮三四尺。玉橫流潤作春波。  
潞河南下接星津。垂柳陰陰已過春。一路自開橫卷看。今朝果作畫中人。

公還我亦到華亭。一舍煙波隔幾汀。正好瀉波駕輕舫。相從柳上注漁經。

余以丙辰買一舟將妻子就官南下曲阜桂未谷觀分書三字

謂行曰瀉波舫懸之舟中

人生容易說歸田。況是歸來五六年。聖壽九旬公八十。又乘雲舫到天邊。

### 那彥成

字詔九。號釋堂。章佳氏。文成公孫。滿洲正白旗人。乾隆五十四年進士。今官禮部尙書。

蠡濤識子時。予猶總角。別幾三十年。相見於鷺城。樽酒相對。因出其稿細讀。予將北還。因和始興舟行十六韻。

自笑同飄泊。何曾定止行。三秋月氏國。萬里尉佗城。瀕海連鋒燹。蚩氓震鼓鉦。一朝絲禁亂。百事棘縱橫。襪線才難績。朋簪屢倒迎。經綸藉老手。謠頌聽新聲。政以艱辛最。身因寵遇輕。姓名經特敕。黔庶喜更生。歎我常羈旅。輸君難弟兄。漫辭燕市酒。徒飯惠州秬。白眼逢今雨。青燈感舊情。冰心原似朗。水鑑許同明。

民乍安茅屋。兵方散柳營。莫愁神況瘁。要使海澄泓。衡量通權濟。邊隅付老成。語餘杯未盡。檐月促鐘鳴。

昭君曲

秋草黃雲冷夕曛。那堪回首漢宮春。龍城飛將今猶在。卻使蛾眉靖塞塵。  
胭脂零落倍銷魂。急雪嚴霜泣暗吞。敢向琵琶傳怨語。祇今青塚亦君恩。

阮元

字伯元。號芸臺。儀徵人。乾隆五十四年進士。今官浙江巡撫。

蒲褐山房詩話昔人謂荀爽爲中興方伯。未有若此年少者。又謂崔暹爲中書令。其位可及其年。不可及。今芸臺中丞以己酉登第。不及十年。督學三齊。兩浙。遂躋開府。蓋早受主知。近來所罕。詩賦而外。精窮經道。校讎攷訂。一本爾雅說文。愛才好士。凡挾一藝之長者。皆蒞蒞歸之。相與搜採篇章。鈎稽典故。輯淮海英靈集。兩浙輶軒錄。及經籍纂訪諸書。又嗜算術。撰時人傳集。推步之繩法。以盡句股割圓之妙。尤近日名儒所未有。年華甚盛。器用方殷。擴之以開物成務之功。進之以正心誠意之學。洵卓然一代偉人也。

約同里諸子爲經籍纂詁

六經麗中天。大義轉相注。周文監夏殷。先聖導其路。詮法及序卦。始有解與詁。葦籥發笙簧。椎輪創大輅。木鐸奮萬世。爾雅衍其祚。秦焰如螢燐。簡編自完具。書傳孔伏學。詩分齊魯故。西京迄東京。師儒以百數。揚許勒專書。鄭高博箋註。方言旁可通。古語遠能泝。典午斯風微。隋唐漸虛驚。宋代聞性天。雅訓飽蟬蠹。國家右文德。復旦鳴發煦。學士立如林。人具九經庫。文字識考老。音釋起沈痼。千聖百王言。精辨匪皮傳。

惟以古訓辭萬卷各分寓。散者未克貫。渙者鮮能聚。弱冠讀遺經。於茲略通悟。丁未遊燕京。儒生接席遇。慨然念茲業。衆力乃齊赴。余於丁未晤大興朱錫庚陽湖孫星衍桐城馬宗燾乃共約斯舉歆移博士文。雄具輶軒素。分韻借劉臻。集字鄙丁度。平地一簣慙。棄井九仞懼。拜手吾鄉賢。共爲將伯助。決擇遍義訓。披覽窮章句。始焉括經史。終亦及子賦。易詩二經及諸子小學數萬言。疇以是爲務。說文廣雅上林倉頡等亦須人任之搖搖動心旌。千里馳遐慕。苟能藏成事。功若禹鼎鑄。

白禹登山白雲峯東三里至佛峪

茲山何岩嶢。神禹之所登。東行人虛谷。泉石媚情激。側徑臨深谿。馬足猶兢兢。午嶂屯春陽。陰崖積素冰。石無土附樹。壁有隙走藤。雲護岩上佛。泉養廚中僧。何當看秋瀑。漫落山三層。大者懸如紳。小者垂如繩。靈臺出其上。衆勢歸馮凌。而我亦遐舉。振翻隨花鷹。

白雲峯西北至錦屏岩憩壽聖院

靈湫住天龍。談禪闢初地。但見元豐碑。破屋已古意。繞階激清冷。壓簷積蒼翠。泉急石丸轉。雲過松花墜。前峯升重巖。高鳥偃其翅。誰爲造孤壇。中使金仙睡。後峯獨離立。與嶺擘成二。誰爲架飛梁。鑄以摩崖字。古人具精力。恥作尋常事。否則寧如僧。碌碌老荒寺。

聖壽院西南石壁上有龍洞出入里許

神龍抉壁入。破壁復飛去。龍去壁已穿。介然用成路。當門立大佛。乍見心疑怖。石立面如削。曾向夢中遇。過此入深隧。秉燭始暗度。俯行頂接踵。相呼不相顧。一隙忽生明。如夜忽嚮曙。不知出何山。奇險更難步。手中得葛蘿。足下生松樹。蜿蜒攫爪痕。是我題名處。

曉過四十九盤嶺至能仁寺

曉程將何之。四十九盤嶺。嶺高盤愈仄。曲折緣修綆。肩輿未及上。相顧色已警。凌緬惑回棧。心怯息尤屏。平生磊落懷。到此不敢聘。既登丹嶂高。坐見海天永。白雲湧潮聲。初陽生樹影。越嶺山西谷。倏忽闢靈境。奇變出恆情。震蕩不自省。行行至招提。幽籟泛虛靜。中懷既已平。嵐重衣裳冷。

馬鞍山

林薄無疎景。川谷莽回互。崖轉得新蹊。境深忘舊路。延緣入東谷。修嶺詎可度。盤磴引高情。飛泉入危步。沈雲散靈風。萬石盡豁露。停策聊憩息。于焉陰嘉樹。宿心既申寫。景物相招遇。徘徊下層巒。嶺脊難久住。

登靈峯望五老靈芝諸峯

雲外日已頽。游者殊未倦。複谷窅以深。羣峯闐然見。參差各離立。戍削盡成片。負岫忽中空。直罅裂如綫。凌厲出林表。蟠逕將升顛。三休始及上。九折石猶旋。當門飛冷泉。入腹抗高殿。奇觀意已驚。靈迹情彌熾。靈芝若可採。吾將問佞羨。



登州聽海濤聲

海雨濕土春初晴。癡雲自北趨南行。風來渤海暮轉急。吹落萬派驚濤聲。初疑驅車來遠道。輪雷欲動遲而輕。後如閉閣伏虛枕。檐前凍雨千條傾。或是汝南馬旋磨。不則試院茶煎鎗。相視不語共欬耳。出戶仰首巡南榮。天空晝靜日將落。頗有鹵氣來山城。城頭雉列屋鱗次。其中直作波浪鳴。丹崖田戍近三里。長流迴湫聞縱橫。日行北陸海底暖。潛陽蒸起蛟龍鯨。謹聲騰沸島嶼振。夕汐淘汰沙石清。洋洋一洗耳底淨。心體虛豁無凡情。人生不俗卽仙骨。豈有大藥真長生。更待夏仲望岱嶽。遠收青色歸雙睛。奇情至此歎觀止。或令聳曠開聰明。

題錢可慮蕉牕注雅圖

錢君磊落古丈夫。治經亦復兼蟲魚。解字九千分部居。字字剖出光明珠。更肆精力及其餘。稚讓廣雅釋且疏。唐宋以後此學粗。有如蹊逕生榛蕪。吳氏棗板猶模糊。坐令文宅多齟齬。錢君一一爲爬梳。旁達衆說通經郛。此學吾見王石臚。與君同歸而殊途。蕉牕在屋西北隅。是卽錢君之可慮。臨風把卷吾愛吾。曩然一笑何軒渠。周君吮筆爲此圖。綠天曾與錢君俱。玲石一卷蕉三株。中有須鬢蒼且腴。蕉之爲物雅所無。稚讓所學在漢書。列傳嘗解馬相如。埤蒼傳至曹江都。選學欲問曹公徒。李善乃曹憲弟子。試注子虛之巴苴。芭蕉始見子虛賦。

邀同人游皋亭山看桃花

皋亭山下多春風。千樹萬樹桃花紅。江城愁雨二十日。放晴小舸來花中。三篙新漲紅到底。一片絳雲飛不起。仙子霞裳住赤城。麗人靚服臨春水。蘭槳搖搖行復回。橫塘香霧轉輕雷。薄寒小雨燕支濕。留住濃艸緩緩開。兩年我爲行春去。每到花時不相遇。崔護重來似去年。劉郎又到成前度。詩裏情懷畫裏身。坐中慘綠盡詞人。若非才子樽前筆。辜負臨平二月春。

謁會稽大禹陵

會稽巨鎮東南雄。宛委巒嶂摩青空。文命之陵據呂墨。朝衣九拜揚春風。典謨有字邊有紀。豈假弱筆陳豐功。惟思禹德在于儉。無間再歎世折衷。山川主名遍天下。此山不載禹貢中。揚州城廣漸海表。刊定未紀夷與戎。東教躬勞遂道死。參耕壟畝封葛桐。陵者葬陵澤葬澤。蒼梧之野將毋同。豈如後人詭且侈。沙邱還至咸陽宮。道元誕妄太白陋。亂引汲竹疑重瞳。夏家天下子亦聖。曷爲薄葬于越東。試以吾言問二子。無稽之說將立窮。我拜既畢題窆石。白雲滿穴春陽紅。帝之瑞應氣郁郁。神所出入光熊熊。重黎受命地天絕。惟有陵鎮猶相通。

游古永嘉石門觀瀑布用歐蘇禁體

永嘉謝守弄奇譎。康樂石門詩在江西以青田當之自太白始手擘石門山壁裂。侵晨直上青雲梯。一派寒泉迸龍穴。崖頭百

丈直如削。逼冷泉飛出其缺。當其欲落未落時。衝擊紛披忽三折。坐教破碎飄輕清。不使渾淪成注泄。偶  
經宿雨更爭來。少得迴風便旁掣。橫拖雲氣孤將亂。影漏初陽眼尤瞥。沾衣濕意詫沈陰。撲面清光仰霏  
屑。澄潭半頃綠最淨。石柱千年洗真潔。老僧新焙春中茶。燒松煮水快一啜。櫻桃蔗漿漫相勝。誰復此時  
猶內熱。著天風日諒不到。寒想冰絲半空結。安得誅茆四時住。坐對天紳自怡悅。出山一步一迴顧。隔斷  
青林始忍別。試看鴈薄大龍湫。與此相衡孰奇絕。

大龍湫歌用禁體

山迴路斷谿谷窮。靈湫陰闕龍所宮。眼前無石不竝立。天上有水皆飛空。飛空直落一千尺。鬼神不在疎  
鑿功。絕壁古色剝爾破。山腹元氣沖然通。涓涓靜注絕不動。羲輪下照神和融。有時飛舞漸作態。已知圓  
嶙生微風。一甌春茗啜已盡。水花猶復搖玲瓏。颯然乘颺更揮霍。隨意所向無西東。不向尋常落處落。或  
五十步百步皆濛濛。豈料仙境在人事。誰作妙戲惟天公。雲煙雨雪銀河虹。玉塵冰縠珠簾櫳。世間變幻  
那足比。若涉擬議皆非工。石門飛瀑已奇絕。到此始歎無能同。惟有天柱矗立龍。湫中突兀萬古爭雌雄。

晉磚詩和謝蘇潭方伯

蓬巒軒外三春天。物色廢甃得八甄。八甄日影古所傳。先生本是瀛洲僊。永平永興皆漢年。以楛定之屬  
晉焉。三楊改號國本顛。東南民物猶殷闐。永平元乃楊文長專政時所改太康皇子相比肩。宴封吳郡藩應遷。或者就國

避內權。閱歷唐宋留殘堦。

武帝太康末立皇子寰爲吳王。晉吳郡。不則吳郡族望賢。范氏褚氏居相連。水

永興時吳郡范平三子輿成泉並以儒學至大官褚陶亦至中尉此磚或是諸族第中舊物。

所喜八軛數符前。字不薛暴餘精墜。扶別土繡敵苔錢。空

齋拓拓鳴槌毘。琢以爲硯開池田。紛綸經史裁鴻篇。浙水晉石無一拳。古軛屢見東海壘。

浙江碑石絕無晉刻而數獨多。

如蜀師徐奉戴氏元康太康建元皆藏海鹽張苞堂家永和藏海寧誰園家成和藏秀水寶澤堂錢氏。

吾藏成和軛字全。永嘉續得相磨研。元藏成和先生永嘉二軛。

延客開詩筵。鬪此何異壁與瑄。摩挲共詠花陰邊。軒階古甃斜陽躔。

### 華頂茅蓬

華頂茅蓬底。枯僧忘世情。披雲采春茗。剗雪得黃精。虎蹟穿林見。龍腥帶雨生。此中五百輩。疑有應真名。

茅蓬最小皆苦行僧棲止處。巖窮谷計一百五十餘所。

### 月夜過趙北口

碧天殘暑淡星河。爲避秋炎此夜過。露草清香蟲語細。水楊疎影馬蹄多。三更蟹舍明簾火。十里虹橋壓鏡波。豈有公孫能避世。只留風月滿滹沱。

### 鄒縣謁孟廟晚宿孟博士第

霸王代謝百年間。夫子風塵又轍環。若使靈臺開晉國。豈能秦石上鄒山。遺書賴有邪卿較。古廟惟餘博士閒。今夜斷機堂外住。主人鐙火照松關。

試鴈蕩山茶

嫩晴時候焙茶天。來試天台鴈蕩泉。十里午風添暝渴。一甌春色鬪清圓。最宜蔬筍香廚後。況是松篁細石邊。玉茗遺編須記取。我家多種此山田。湯顯祖云：鴈蕩山種茶人多。姓阮。

雨後泛舟登匯波樓

急雨才過水上樓。門前爭解木蘭舟。垂楊小屋菰蒲岸。不聽涼蟬已覺秋。湖裏荷花百頃田。濕香如霧綠如天。會須盡翦青蘆葉。頓放花光上客船。

補題宗室瑤華主人畫柳波雲舫圖。送述庵少司寇。予告南還長卷。卷後幅系以詩云：春風煙柳

十年來鴻雪蹟。三千里外樹雲思。薦新櫻筍梅時雨。感舊賓朋畫裏詩。桃李成陰身恰退。名臣名士兩無虧。海天霜鶴指前程。吳會雲間結隱盟。髮白早因經百戰。心閒久不動三彭。影能無祖錢。傷離別。有幾林泉荷寵榮。豔說葛山堪繼美。此情那復憶尊羹。

烟波是處許垂綸。更有湖灣便采莼。不為名山傳世計。也應月色促歸人。馬上弓刀絕塞寒。凱歌聲裏路盤盤。書生骨相非凡甚。頭白歸來照鏡看。柳絲綰得綠雲涼。一舸隨風入水鄉。鄉路不愁三泖闊。蓼花深處舊漁莊。時司寇還南後。來主敷文書院。今復以病辭歸。故寓挽留之意。

伊秉綬

字組似號墨卿寧化人乾隆五十四年進士官惠州知府有留春草堂詩草

擬建安七子詩有序

仲冬廿三日集賓谷農部寓齋時同志七人各賦七人故事分得擬建安七子考典論著七子之稱靈運有八人之擬然鄴中魏也義專公讜故遺北海增二曹茲如蕭選類以七名於地於時義無取焉遂迺綜其生平規其音響譬之巴歌里諺奉清夜娛衣冠互易筆墨一色未遑嗤爾

孔文舉

泱泱東海波天地爲左顧巍巍岱宗尊亦日培壤護國步雖播遷及此延洪祚高視展鷹揚勇氣雄虎步先公志東周焉得嗟遲暮憤切中州蝸用恥屈穀瓠無以都昌厥有酒不我酤管仲彼何人九合功勳樹

陳孔璋

炎運遘陽九萬里風塵昏關西旣淪董河北乃擁袁奕奕輻輳士跂跂狐兔奔觚撰狂瀾翻矢發七札穿豈不念忠厚各爲其所天獲宥幸寬政敢望肉骨恩朝游椒蘭室夕集芙蓉園華賞歎未已絃絲聽彌繁夙懷徑寸心竊比璵與璠持觴酌吳鉤忠義我所敦

王仲宣

伊昔歌式微竄身適蠻荆峩峩沮漳雲薄暮愁殺人江漢盡日流猿猱終夜鳴登高望長安但見烽烟新

勁風撥元霧。頃刻瞻太清。何期芳譙娛。及此清漳濱。犀筋有餘飫。金壘無停傾。絲聲感人情。痛定還復驚。  
徐偉長

人生各有志。窮達惟所適。宛洛誠非喧。箕濮豈云寂。幽默悟淵元。往者如有覲。媿乏濟世才。著書掃一室。  
阮元瑜

黃雲起西北。飄飄連河洲。今夕知何夕。復此河曲游。白馬黃金羈。彩雉紅錦裘。公子鼓秦瑟。下走揚齊謳。  
日斜更秉燭。月落明星稠。莫辭盈樽酒。可以消緜憂。南皮追昔歡。已作清漳流。

應德璉

征鴈從塞北。流影湘江湄。嗷嗷鳴聲哀。羈客獨見之。本懷稻粱謀。而復恆苦飢。雲羅雖云免。羽毛日夜摧。  
塞北還避寒。寒盡還復歸。借問歸何處。將由許京飛。託身在華沼。顧影鸞鳳姿。恭承君子意。幸與嘉賓期。  
暢以琴瑟好。惠以瓊琚辭。愛客誠古人。何以副我知。

劉公幹

薄帷鑿積雪。有若明秋月。攬衣起徘徊。漏斷百蟲絕。仰觀衆星列。俯視層冰結。一臥歲遂晚。生理安可說。  
沉吟縮寒衾。憂思亂我心。

同未谷夜訪笠帆小酌

晚涼同盼雨。疎磬落蒼烟。忽報月初上。因知人未眠。燈光深竹裏。露氣小山前。洗盞留斟酌。閒論種樹篇。

送同年達梅岑檢討奉使西域

涼州西去萬重山。鴻鵠高飛雉子斑。珥筆詞臣秋出塞。囊弓都護夜臨關。風吹白草霜千里。天接黃沙月一彎。羌管未妨聽野戍。班生三十好容顏。

張錦芳

字粲夫。號葯房。順德人。乾隆五十四年進士。官編修。

喜李藝園歸自河南

美玉不隱璞。志士慙邱園。壯遊萬人海。鼓篋趨橋門。鍾鏞與瑟笙。涵養皆粹溫。似聞別舍中。諸生閉何蕃。一朝單車出。鷗鷺凌風騫。平生國士知。感激在梁園。結束渡大河。水氣何奔渾。一從北岸決。萬衆爲蛟鼉。漂流曹宋墟。蕩汨豐沛原。漕渠洗汶來。坐受洪濤吞。引河度地急。萬落連千邨。勢如車北馳。挽之使南轅。畚鍤不難具。貴在無愁怨。薪芻內府出。度支日以繁。要令螟蠹除。閭閻盡知恩。堂堂太原公。中州寄屏藩。君來下馬揖。意氣排鯨鯢。疏淪日有程。可以資討論。月黑大隄火。風雷鬱飛翻。晦冥壓圓穹。震蕩裂厚坤。往來輕險絕。對案不及殮。誰能借箸籌。不惜筋力煩。功多匪簿領。退黜初無言。三年緩歸期。世識儒術尊。歸來拂衣袂。尙帶埃壙痕。九枝蟠胸臆。指畫委與源。我昔八插行。濁浪連朝昏。一爲瓠子歌。至今有驚魂。



喜聞濟時略。頓釋心煩冤。君才在用急。葉茂由深根。他時鱣堂開。官冷吾道存。襟期同野客。醉倒歌義軒。  
貫休咒鉢羅漢歌

香雲一縷垂盤陀。坐具敷設平不頗。火宅清涼道場現。天然真相開禪那。手中鈴杵石上鉢。口出神咒聲  
嚶囉。波旬億衆在何許。想見降伏心無他。四大海水入毛孔。何況一盞容江河。凡夫眎此寸涔比。豈知瀕  
洞陽侯波。悅怩神龍內蟠屈。鱗鬣未現先翻渦。老熊千歲具佛性。擁錫立似阿修羅。鬚髻髮束合兩掌。宛  
爾秘怪煩搗訶。當空寶月正圓滿。遍照大地窮透迤。悠悠花香無隱爾。金粟吹落秋雲多。當時寫此第幾  
軸。渡海面壁殊白科。訶林舊物龍象惜。流轉俗手誰摩抄。神光何自入齋壁。應喜丈室陪維摩。斷縑零落  
色黯淡。神理未遽同消磨。亦如香根終不壞。入眼詎止雲烟過。便思永結香火社。俗緣未盡眞蹉跎。空齋  
得句試呈佛。要憑法力驚詩魔。

### 王廷蘭

原名史。字晚香。青浦人。乾隆五十四年進士。官浙川知縣。有水竹居詩。

### 綠家浜曉發

碧宇耿疎星。衰楊漏殘月。蕭晨獨叩舷。光景紛奇絕。水波正遙裔。雲霞乍明滅。市寒鐙半明。橋斷石將沒。  
棹謳隨回風。餘音散林樾。沙邊人語遠。烟際漁舟失。川行方自今。洄沿無暫歇。何處協幽期。邈然寄瀛汜。

支硎

疾風颺輕舟。蒼翠忽在眼。弭棹循廣途。層崖肆凌緬。是時當仲春。風物正暄燠。雜花旣繽紛。修樹亦婉孌。紺宇出林端。岡巒翫迴轉。盜孽互虧蔽。雲霞遞幽顯。辰良興故超。津逮思彌遠。邱壑平生心。霧塵自茲遣。

送邵餐霞之桂陽兼呈西樵先生

江南三月鶯亂飛。垂楊芳草凝春暉。忽唱驪歌送行客。欲別未別心依依。夫君跌宕真足慕。風格依然黃叔度。常將浩氣干青雲。獨以深心托毫素。憶昨共張文戰軍。羨君顧盼卓不羣。龍鸞之音奮奇節。世間俗學徒紛紛。春風步履追陪久。攬環結佩情彌厚。習家池上舊同遊。黃公壇畔時沾酒。竭來欲向湘南去。頻行示我銷魂句。鄉心惻惻繞吳雲。旅蹟遙遙瞻楚樹。君留別詩有楚樹吳雲酒一甌句我昔夢想岳陽樓。洞庭波浪連天浮。男兒墮地志四海。安能鬱鬱終樊邱。萬里征途從此始。繫汰楊舸興何已。莫雨颿檣雲夢林。春風蘭茝瀟湘渚。自憐泥滓久畱滯。雌伏雄飛各異勢。岐路空懸南浦愁。窮鱗未遂天池計。西樵夫子別歲餘。前年寄我湘中書。君去相逢一相訊。蓮花幕下今如何。

登北固山放歌

大江秋月澄波濤。奔流一夜飛輕舠。京口驛前卸帆席。曠曠曉日明蘭皋。蒜山霧景一登眺。超岸古寺浮金鼇。探奇選勝興未盡。鐵甕城北來登高。江山第一甘露寺。寺有天下第一江山扁額宋吳琚書米蘇千載風神超。研山易

庵事終古。海嶽遺址留山椒。長廊古殿極登頓。風旛搖動鐘魚敲。山僧導我陟巔頂。孤亭俯瞰窮秋毫。岷江萬里瀉一氣。尾閘洩漭連雲霄。曲江濤頭甲天下。疾雷百里窮昏朝。虬龍無聲老蛟舞。鯨魚歧浪鼉鼉騷。荆門郢樹在眼底。矧乃咫尺浮金焦。夙齡登覽興所托。茲遊奇絕平生遭。海天遼闊豁胸臆。醜雞不識良可嘲。結廬擬傍淨名側。米芾齊名江光山色相招要。登臚揮手不得住。明朝練水鳴輕橈。

題孫陞玉挹翠山莊

最愛吳淞水。周遭十畝居。鳥聲新霽後。松影晚涼餘。竹屋朝看畫。繩牀夜讀書。蕭然山澤裏。隨意狎樵漁。

細林山

辰峯一峯石。紺宇愜幽尋。偶造仙靈窟。因諧山水心。松風飄夕梵。花霧淡春陰。坐憶真人跡。謂彭素雲蒼蒼修竹林。

渡江

海天斜日麗金焦。飽挂征帆趁暮潮。北固樓臺秋色冷。西津雲樹晚烟消。無邊白浪連三楚。一髮青山認六朝。陳迹空懷天塹險。沙汀荻葦自蕭蕭。

洪亮吉

字稚存。陽湖人。乾隆五十五年殿試第二人。及第。官編修。有卷施閣集。

蒲謁山房詩話：雜存少孤失怙，爲母夫人守節教養而成。是以刻意厲行，確苦自持，每當絲竹長筵，輒徐引退，而於取與尤嚴。蓋古之狷者也。性好奇山水，如天都華嶽，皆登其巔，必結幽歷險而後已。作文具體，魏晉作詩，五言古仿康樂，次仿杜陵，七言古仿太白，然嘔心鑠腎，總不欲襲前人牙慧，至於經史註疏，說文地里，靡不參稽鈎貫，蓋非僅以詞章名世者。

由車箱谷經十八盤諸險

一松扶升天，一石絕人地。信哉雲門塹，巨石上鑿雲門天塹四大字。奇險難久閉。坡陀半日上，直下復里計。飛騰挂枝

猿，曲折旋磨蟻，非徒鑄錢工。迥出神鬼意，坤靈信難戴。天意恍立異，排空刺日月。巖巖試鋒利，仙人萬間廈。破碎忽被棄，巖東不開關。拓以巨靈臂，十折復八折。草路入雲細，回瞻足幾失。直視神乃悸，籃輿尙徐行。仙路誠匪易。

天梯升日月巖

峯危殊難飛，路斷鐵索在。高瞻誠堪驚，欲往寧有待。思隨天風升，值此雲氣變。千尋無寸曲，百上不一逮。足勢久已虛，腕力忽欲怠。先登倘一墮，直下無地載。誰云心胸奇，驟覺志氣餒。遵峯意猶掉，履險志不悔。乾坤分層梯，日月絢壘采。巉巖升甫半，突覺觀頓改。腰平終南山，目直大瀛海。

日昃經蒼龍嶺

先登夫何難，欲往恃所執。瞻茲雲路駛，揮此雨汗濕。途危氣偏降，退九進乃一。峯崎誰人開，空處陡置級。蹤疲欲暫駐，石石倏起立。山腰衝風來，忽攬頭上笠。中途一驚望，呼出不得吸。前行盡頽偃，垂鐵苦繡澀。

危均騎虎勢。過趁老龍蟄。因堅向禽志。差免阮生泣。身輕既出險。始覺百憂集。前望金鎖關。慊從喜生入。  
入蓬壺洞行二里許。以燭盡不得入。

探奇愜幽尋。百步得數洞。巉巖束穴口。已復拒徒衆。泱暝持一鏡。幽光破苔縫。遲回歎游侶。賈勇得予仲。  
孫大暨及門霞浦鄭聯華同入。足跣踏伏流。身輕擬飛鞚。仙扁怯靈響。鬼壁愴虛哄。百步不一申。稍寬復思縱。頗欣露巖  
竇已復出。盤甕去脈始及泉。回塗漸成術。猙獠閃身入。岌嶮壓頂重。惜此燭炬消。誰持蠟鏡送。蝸涎入衣  
綻。蝠嘯補壁空。堅此獨往心。危辭阻羣從。厓昏杳無覩。地暖已消凍。石乳嗅復馨。壁書捫可頌。靈蹤此疑  
聚。深處列屋棟。應有太古人。莓苔閉幽夢。

### 金天宮夜宿

雙闕兀立峯。西東斜陽欲落已。動鐘齋心正。盟碧潭水。香炷乍謁金天宮。天衣颯爽垂坐上。神斧廓落交  
庭中。三重門閉鳥雀絕。山果自落靈旗風。宮中道士張巨儼。自說七十顏如童。向求軒闥事偃仰。遠指樓  
閣穿青空。虛廊暝色下無際。歸寢更借神燈紅。關窗四面且勿臥。星若僉盞懸當中。作書下寄訝流輩。與  
鶴共宿南高峯。

### 滎陽城

滎陽城。高百尺。因阜築城如鐵色。漢王夜出城西門。滎陽以東屬楚人。惜哉一鹿抵死爭。食肉不足思分

羹。當時若翁幸不烹。乃火紀信燔周生。嗟嗟兩烈士。殉主亦殉名。我行天下歷州七。奇險莫若滎陽城。君不見滎陽城。值太平。排百雉。無一兵。關人午臥門掩扇。百戰古城今下縣。

董宣祠

東京六酷吏。五翟政足觀。王孫非其流。類合附宦官。名儒歐歛首。尹京威聲始。傳董少平。乾坤初平天子武。徑直寧知長公主。赫然盛怒乃可撻。九重幸識小吏名。殿頭東西排赤棒。百轉安能回令項。吁嗟乎。臣賢主聖誠難得。卻霽主威成令直。君不見祠西半里府所治。道旁百碑名去思。叢碑雖高復誰記。只向道旁思酷吏。

函谷關

車行摧輪馬傷骨。一綫路中盤八日。今晨始及關北門。月黑望關關欲崩。新關高插天。舊關深入地。赤沙濛濛白日翳。一日一夕車帷蔽。樹根石脚露土窰。穴土一尺經旬勞。居人生世稀見日。面黑映戶疑山魘。君不見。秦人虎狼據谷口。百二遂爲虎狼有。寧知天險不屬人。六國敗後終無秦。豈如蕩平天險失。前車後車行接轍。人生快意亦有時。馬上詩成車入穴。

潼關

出險復入險。別山仍上山。河流五夜色昏黑。一片日紅先射關。壯哉龍門濤。至此始一折。驚流無風舟尙

失。大魚如龍欲迎日。風陵津北起黑波。重舸徑向中流過。河聲漸遠坡愈迴。卻控馬首看全河。君不見。哥舒拒祿山。魏武破孟起。門開如雲列千騎。喧聲動天箭灑地。時平雲氣亦卷舒。戽卒立門司啓閉。關頭飯罷客亦閒。早有太華開心顏。

### 張問陶

字樂祖。號船山。遂寧人。文端元孫。乾隆五十五年進士。官檢討。

#### 上人橋道中

隴水將愁遠。春流百道分。雪明箕口樹。風亂沓中雲。麥壠平無際。漁榔靜不聞。遙憐沙上鴈。歲晚重離羣。

黃沙驛

武侯所開。又青城道士於此仙去。故又名仙留。

大道連三輔。荒屯控百牢。市廛如壁壘。野水入城濠。遊戲仙蹤幻。經營相業勞。沙平征馬健。天敝雪風高。

#### 興平城樓

乘輿危樓試一凭。天風浩蕩劇飛騰。人間野色耕秦時。雁背斜陽下茂陵。幾輔雲烟新郡縣。閭閻規矩舊高曾。故山西望愁無際。隴樹蒼蒼已萬層。

#### 送述庵先生予告南還

高軒過我氣如虹。雪髮霜髯顧盼雄。曾閱雲山遊戒外。尙驚笳鼓夢軍中。東南名士推前輩。輦轂詞人拜

下風莫訝江湖歸棹緩。君恩留許待春融。

離亭舉酒故交稀。話舊還攜老布衣。謂兩峯望闕情懷原戀戀。憐才心事最依依。四筵名字停盃問。二月風

花拂面飛。笑指春明門外路。公卿頭白幾人歸。

詠懷舊遊

蟻蝨生來亦帝臣。陶山常恐是前身。予生館陶署中曾從莊嶽通齊語。昔擬乖厓是魯人。風景至今猶可念。模糊

入夢苦難真。幾時重作東平客。馬頰河干訪舊隣。山東

貧賤依人不敢狂。差能脫略少年場。洞庭惡浪君山碧。樊口輕車我馬黃。如古布衣悲楚漢。無真名手畫

瀟湘。淹留八載傷心處。春宅遙遙對武昌。楚中

驚沙撲面馬蹄遲。風近黃流總倒吹。鄴下墳穿才鬼賤。洛中珠碎富兒奇。樵居王屋無塵到。人上樊樓易

酒悲。保曜全年真妙喻。孫登識火是吾師。中州

記曾孤艇送殘秋。潞水盈盈繞郭流。十里魚鹽新澤國。二分烟月小揚州。衣冠誰醒繁華夢。江海遙通汗

漫遊。欲指三山揮手去。只愁風力引飛舟。津門

皖口雲山壓短篷。先臣廟食至今同。宋四賢祠後有祠祀先文端通政二公嘗謁拜功名立後田園盡。恩怨銷時俎豆公。兩世碑

銘餘手澤。一年伏臘聚村翁。殘衫破帽憑君笑。廉吏兒孫不諱窮。安慶



莫訪秦淮半里橋。江南能使客魂銷。帆檣歷亂迷三楚。金粉零星送六朝。篷底醉眠瓜步雨。雲中夜看海門潮。年來車馬疲筋骨。猶爲烟波想畫橈。江南

風流淘盡大江空。終日匡廬在望中。蹤跡易隨彭蠡雁。文章難藉馬當風。柳邊松菊功名澹。水面琵琶際遇窮。回首潯陽餘夢影。木蘭角上月融融。江州

秦棧縈紆鳥路長。三年三度客陳倉。詩因虎豹驅除險。身爲峯巒應接忙。鴈響夜棲幽谷雨。柳枝秋老灞陵霜。美人名士英雄墓。一槩纍纍古道旁。秦中

## 桂 複

字未谷。曲阜人。乾隆五十五年進士。今官雲南永平知縣。

### 跋漢燉煌太守碑

古來邊患無時無。羈縻守禦徒區區。中國有土不能守。乃與荒服爭鎗鏃。漢家永初罷都護。專制西域北匈奴。玉門陽關日夜閉。索班兒戲屯伊吾。張瑞三策善攻守。陳忠一疏豈腐迂。長史已下廷尉獄。呼衍但願加特奴。兵臨車師重圍急。帝視六國猶版圖。傳檄四郡救後部。燉煌太守馳兵符。勒山一戰漢軍走。呼衍聲振伊吾廬。永和改元岑來至。誰其版者吾當誅。克敵羣兵三千耳。紀功大書而特書。吾聞兵機貴神速。君命不受言非誣。朝廷日掣將帥肘。兩人牽羊躓路衢。用當其才一已足。司馬都尉空奔趨。任尙段禧

不曉事。邊隙一開十年餘。中原疲敝白骨朽。縱收其地屋一隅。安得岑也守嚴微。瘡痍休息長無虞。

歸里三載。瓠落無成。異我詞丈獨尋舊好。今將遠別。情見乎詞。

閑來相對說荒唐。翦燭垂簾醉不妨。羣季趨庭爭看客。樓頭聞喚取茶囊。

王城東所罕唯楊大年。至則取茶囊具茶。他客莫與。子弟但聞

取茶囊。卽知大年至矣。

一病憐君歎索居。坐穿木榻六年餘。從今老眼橫秋水。且把神農夾注書。贈水。晶眼鏡。

題陸璞堂先生適園灌畦圖

文定園林綠水濱。百年猶見菜畦春。昇輿自有門生在。且作忘機抱甕人。

偶從野老說風流。七業俱從畫卷收。畦壟閒來牕下課。屋東頭與屋西頭。

李賡芸

字書田。嘉定人。乾隆五十五年進士。今官乍浦同知。

金昌寓齋述庵中丞枉顧謹賦四律

星宿羅胸氣吐虹。騷壇早歲冠羣雄。蜚聲茂苑才無敵。奏賦甘泉句最工。鳳沼演綸天語重。烏臺秉憲國

恩隆。他時定叶金甌卜。玉鼎梅羹贊聖功。

太乙靈旗靖寇氛。蠶叢絕徼舊從軍。運籌密贊中樞策。磨盾飛馳露布文。日月旂常書駿烈。雲雷鐘鼎紀

鴻勛笑他定遠封侯相。投筆何曾事典墳。  
讀禮歸來夜著書。烟波谷水暫閒居。鄴侯架上瑤函滿。曹氏倉中金薤儲。細究遺經宗漢說。廣搜逸事注唐餘。輪扶大正文章伯。門外時時問字車。  
末學荒唐攤鼻吟。抱經探索漢儒林。紅蟬粉籍相如壁。黃葉痕飄子憲衿。幸得光暉瞻北斗。可能聲價長南金。感公趨士多高誼。願奉巴歛待賞音。

題述庵先生三泖漁莊圖

木蘭橈子撥魚鱗。穩趁樵風到澗瀕。已識襟期同月朗。更從圖畫見天真。逸情自寄烟霞外。勝地常留水木新。南北垞深曾繞夢。東西泖近詎迷津。把茅恰縛三間屋。汎宅還攜七尺綸。非市非城當僻地。有書有酒伴吟身。此間頗樂堪遺世。且住爲佳試結鄰。香餌沈浮都不問。銀鈎曲直總元因。訂交不乏邨夫子。扣戶應來農丈人。笠雨篝煙供獻傲。菱紅蕩白采昏晨。補籬笆缺絲絲柳。插緯蕭連點點蘋。潮落鴨頭青不斷。雨餘螺髻翠無垠。千花塔影登樓見。九耳鐘聲到枕頻。遠火星星明午夜。清譚隱隱起蕭辰。五湖豈必思餒菜。千里還教淪雉莚。巷憶烏衣嫌尙俗。居同鹿柴弗沾塵。聊如甫里攜茶竈。那向湘陰借釣輪。笠澤叢書應繼作。茗谿漁隱定相親。清風明月真無價。老鶴閒螭亦覺馴。只恐鑑湖難便乞。濟川舟楫重絲緡。

張若采

字谷漪。號子白。婁縣人。乾隆五十五年進士。今官鎮番知縣。有梅屋詩鈔。

如意菴曉起

月落城西隅。鄰鷄叫屋角。蟲吟徹曙闌。客夢先秋覺。曉風竹徑行。空翠眉間撲。已有趁墟人。遙山行犖确。

黃龍隘

朝發永康城。午達黃龍隘。山程五十里。應接頗不暇。峯迴學螺旋。礪峭畫媛界。雲日互蔽虧。榛莽發荒怪。時有風泉墮。溼翠襲衣袂。緋衣滑行履。登頓互相戒。蓋輿蝨其間。點破春山畫。

黃龍不可攀。白雲猶可贈。盎盎山中春。繁花垂古磴。重關昔據險。龍戰幾決勝。明初耿再成敗元總管石抹宜係于此。可憐

笳鼓音。曾辱山靈聽。今看石戶農。布穀啼春醒。閒閒鷄犬家。鬱鬱松篁徑。何限看山人。愛此靈區孕。

福成菴訪王伴梅

一徑堆黃葉。蕭蕭客閉關。佛鐙沉話雨。僧磬答秋山。名蹟哀媛吊。壁間多家幻花先生及一泉上人詩畫。心情老鶴閒。卜鄰

吾有願。待結屋三間。

洪坤煊

字載厚。臨海人。乾隆五十七年舉人。早卒。有地齋詩草。

王南陔困學說文圖

昔聞昌黎言。讀書貴識字。頗嫌楊子奇。肯趁羲之媚。六書掌保氏。建受各殊類。形聲屬相益。子母巧乳孳。中間籀篆更。鉗赭佐徒吏。引斷法律紛。掇拾詩書棄。卓犖祭酒君。虎觀首諮議。遺文搜篆刻。破體別真僞。譬彼日月懸。手攬羲娥轡。陋儒趨簡捷。此語魏晉記。法創鍾氏八。聲因隱侯四。龍蛇競飛舞。意象轉凌次。空迷菽麥分。強校蛙蛤異。殷勤戴魏徒。踣駁抵一戲。知君老蠹淫。寢饋幾何醉。野王篇已訛。徐鍇傳猶繁。是惟文字本。豈直小學識。何人擅畫手。省釋天和意。圖編倚春風。竹木鬱蒼翠。想當研究餘。萬象森構備。髣髴浚儀翁。家學此未墜。菁華洩元苞。疏鑿發深邃。金石坐刻畫。蕝苑騰鼓吹。我今纔識丁。墨汁飲猶媿。他年載酒訪。膏馥乞溉漬。

食菜作

我行來京師。不了藜藿債。夙聞白菜佳。飽食凌葱薤。離離露下苗。濯濯莧陸夫。寒威日欺壓。霜雪不可殺。初爲龍頭縮。稍褪鷲黃曬。水肌傲姑射。玉骨挺衛玠。椒鹽沸初下。齋飯學禪派。濃甘愜軟美。清氣激沆瀣。勢侔玉版翁。坐割燕吳界。丰標兩不讓。夷惠各和介。生菹味尤絕。香色漬不壞。劇如茂陵渴。大嚼哀梨快。平生食肉腸。羔乳祇腐敗。天教洗葷濁。底事數羹芥。幸無團泥貴。正值連車賣。猗嗟萬錢下。寧止一樹嘍。江瑤吾鄉物。舉念不須掛。他日學圃歸。臥看素壁畫。余家有畫白菜一幅。頗妙。

白牛居士跨犢歌

一村莎草平蕪色。江南十里春如織。青楓涇畔夕陽時。跨上烏韃人不識。水田漠漠烟濛濛。輕箬短笠嬉涼風。東郊雨晴泥路滑。四蹄踏破花蹊紅。萬言獻罷歸來早。熙寧新法太草草。遠傳風教憶河汾。桑麻自占溪流好。南山白石清水寒。何人長夜歌漫漫。黃昏飯牛飼轅下。明日橫經角上看。

射虎石

將軍射虎如射石。氣涌神飛鳴霹靂。將軍射石如射虎。貫胸洞脅骨飲羽。是虎是石兩不知。驚電陡掣流星馳。層崖疊巘夜崩裂。山鬼拳縮潛潛噉。射鵬壯兒響欲死。數奇歸報動天子。高牙大纛竟何人。蔡也爲人下中耳。陰山刁斗靜不聞。虎頭食肉徒紛紛。酒酣卻遇霸陵尉。夜行呵止故將軍。

華陽臺

風蕭蕭。易水寒。壯士怒髮衝上冠。白衣涕泣何沈瀾。將軍頭血濡未乾。入關上殿刺天子。鈎陳森衛肅星紀。舞陽健兒額汗泚。督亢圖窮匕首起。手縛祖龍若豪豕。藥囊倒擲天所使。怒酣嘻笑庭柱倚。目眦上裂。驚電紫。白虹貫日壯士死。博浪之椎毋乃似。長安大索幸免耳。我登華陽臺。重憶馬角時。惜哉魯勾踐。欲講劍術將奚爲。男兒成敗要莫論。擊筑還悲高漸離。

卯兮城

徐福將樓船。海上求仙山。荒唐縱欺誕。一去不復還。仙山茫茫海水立。鯨魚潑浪長風急。天陰雨濕鳴鳴。

泣牽衣頓足何嗟及。歲深長大遂成家。雲樹迷離隔鄉邑。我聞生男惡。此語悲已然。人生骨肉豈長保。武陵何必非神仙。縱勿鷄犬共拔宅。海外粗足桑麻田。君不見長城征戍更南粵。驪山深隧閉幽卒。送徒夜半大澤發。咸陽一火連三月。四海何人收白骨。

李陵臺

隴西降將家聲絕。荒臺愁臥陰山雪。河梁落日暮何之。地慘天昏不成別。依依越鳥悲南風。漢家城闕斜陽中。生還自羨典屬國。論救誰憐太史公。

送黃潤川補官江右

先生矯矯人中師。下筆疾掃風雨馳。南宮作賦久無敵。爲政風流今在茲。我昨訪君古寺裏。兀坐一卷鬚眉垂。人皆竊指向我笑。如此作吏寧非癡。我謂使君故不癡。詩書之腹中怡怡。往年人蜀攜琴鶴。三載牧民如牧兒。吏民不知官長貴。禾黍自覺春風慈。西江江水清且瀾。百花洲畔滄浪池。善政豈煩易俗理。坐嘯況是吾儒宜。嗚呼龔黃古有作。君看武健勝者誰。他時報最膺首選。請煩示我清風碑。

余燈

字月文。號板桐。錢塘人。乾隆五十七年舉人。

懷陳雨田

昔別在南郊，悲感一何深。徘徊溪路側，撫景愴我心。亦知當久離，不意忽至今。至今遂所懷，索居已三春。別易會面難，未知更何辰。修竹多悲風，幽澗多浮雲。人生能幾時，奈何輒離羣。願得十日飲，敘此平生親。

詹肇堂

字石琴，儀徵人。乾隆五十七年舉人。

康山

山擁滄江出，闌圍雉堞平。千秋存俠氣，一簣得詩名。宮錦丁年賜，檀槽子夜聲。未知何李輩，誰此共齊盟。

送退庵之粵西

三年束閣聯牀數，兩月春明下第同。豪氣難消摧折後，傷心已慣別離中。枕榔葉暗吟官廨，邏迤聲低唱梵童。此去蠻鄉五千里，更無書附北來鴻。

吳本

字秀文，太倉人。乾隆五十七年舉人。有篁韻軒詩草。

過閘

漕河水急流，險處互堤堰。洪濤一束縛，激石蒼波濺。大木中斷折，奔騰搖石扇。數里聞雷聲，倒瀉黃河噴。上閘百倍難，巨絙施輪轉。白浪高篷竿，併死爭一線。千夫聲喊呀，絳進不盈寸。攫擊偶失手，一落如奔電。



下閘驚墜淵。舟子心膽顫。船頭入水底。船尾離水面。欵從水底迴。躍出如急箭。或恐觸旋渦。勢與鼉鼉戰。我來觀此情。足縮銀海眩。嗟哉轉粟勞。性命反輕賤。寄語畿輔人。慎勿廢耕佃。

維揚道中

一棹橫江去。山光四望收。夕陽瓜步樹。細雨廣陵舟。柳色依官渡。濤聲逼郡樓。鄉關何處是。回首暮雲愁。

建平道中

策馬荒郊路。寒風向古原。亂山衝落日。高樹抱孤邨。地僻宵無犬。人間晝閉門。今年田事稔。處處賽鷄豚。

泊舟廣陵

一路垂楊學舞腰。飛花點點落紅橋。不知今夜揚州月。曾照何人按玉簫。

英和

字樹棐。索綽絡氏。滿洲正白旗人。德保子。乾隆五十八年進士。今官戶部侍郎。

神木行並序

東便門外黃木廠。有巨木。長六十尺。相傳永樂建北京時。自南方輦致。因不中規矩。故棄置於此。癸亥戊寅。兩邀御製詩章。近又置祠歲祭。余偶道經。土人指以告曰。此黃木也。因作神木行。

城東神木堅如石。辨之非松亦非柏。風霜已歷四百年。砂礫猶橫六十尺。傳自明初建北京。千夫輦致供

選擇工師繩墨不可施。一朝棄置村荒僻。亭亭芝蓋省東方。俯覽神木考其詳。容藻兩頰碑並勒。遣官致祭。牲醪香。聖主推恩及枯朽。此木頓覺生榮光。將軍大樹根何在。曲轅社櫟枝空揚。一木有靈尙如此。何況人材勝杞梓。深谷栽培世未知。旁求勝任工方使。雖朱審曲班雕文。慘淡經營盡乎技。斲成樑棟獻天家。堂哉皇哉共仰視。

與百菊溪侍御夜語

把酒深杯冷。圍爐笑語并。不聞羣籟響。相對一燈明。往事增惆悵。新詩費品評。談餘涼月入。心與鏡俱清。

夏夜聞蛩

萬籟寂無聲。俄聞斷續鳴。微風穿竹徑。淡月掛松棚。一枕夢初破。中宵心最清。苦吟予亦好。與爾結詩盟。

種松書屋圖爲初頤園給諫題

偶著尋山屐。閒鈔種樹書。烟霞招勝友。霜雪倚蓬廬。共識喬柯古。誰云節目疎。故園三徑裏。手植廿年餘。好向圖前想。何須澗底看。種成千丈勢。耐得十分寒。地僻林泉勝。人過歲月闌。孤松思共撫。開卷日盤桓。爲王伴梅秀才題乘風破浪圖

一片風帆影。篷牕面面開。水隨天共遠。春與客俱來。落筆無涯涘。披圖每溯洄。壯游誰得似。挾策上金臺。

伊春臺齋壁畫梅索題

貌得南枝又北枝。橫斜滿壁影參差。空山月冷無人問。半夜香清有夢知。衡品不輸松竹逸。盟心還與雪霜期。退朝花底春光好。想見巡檐索笑時。

### 葉紹楨

字琴柯。歸安人。乾隆五十八年進士。今官監察御史。

### 出古北口

畫角冷邊霜。霜濃野草黃。人家淡秋色。客路下殘陽。寺古松鱗老。山晴石髮香。停驂成小憩。禪院得清涼。

### 贈袁香亭太守。卽送其之南粵。

音塵初接意猶驚。不道相逢未識名。秋水鱸香疑昔夢。春泥鴻爪感離情。朱輪宦迹殊消長。紅豆詩篇羨老成。鄭重西牕重握手。燕臺風雨又清明。

入官莫嘆鬢眉蒼。老圃爭傳晚節香。始信文章關利濟。莫因山水悔行藏。江鄉不種千頭橘。海甸曾留滿路棠。贈我瑤編應及早。碧天南鴈已成行。索香亭詩集

### 喜晤王秋塍明府賦贈

詩章夙已羨瓊瑤。兩世交情更久要。薄宦生涯疎酒盞。離人情緒又花朝。年華似水匆匆逝。豪氣如雲漸漸消。莫使臨風促征騎。萬條新柳拂河橋。

客贛陽三句。得沁園春詞一卷。錄寄許竹嶼大令。綴以二絕句。

枇杷庭院長莓苔。小閣輕陰燕子來。吟遍江南花落處。斷腸人是賀方回。  
新愁多付沁園春。儘說粗豪亦愴神。不敢尊前歌子夜。知君同是未歸人。

唐仲冕

字□□號陶山。善化人。乾隆五十八年進士。今官海州知州。

客院小筍甚繁率賦

性雅好此君。每樂共晨夕。故鄉多質鷲。卻苦事塵陌。或如叔孫館。手植傍所宅。或逢辟疆園。徑造恣快適。  
嶽祠得小筍。幾箇倚古栢。解榻疎井橫。擁鋤灌莽闕。相對幾何時。落芽迸牆隙。恰經微雨滋。已分新籜碧。  
三五漸成行。長短可計尺。側盆佐涵濡。疊垣倍護惜。憶我泰山阿。移栽趁露烏。半隨叢薄翳。辜負平安驛。  
解后接檀欒。攢生慰幽僻。好待長且成。招雲入苔席。得此堪低徊。知君不倦客。

桃溪勘山舟中得詩

傍溪溪欲盡。樵徑入雲深。薄霧巖腰斷。淺流石齒侵。村春當旭日。葉颭滿寒林。不許馬蹄疾。驚飛宿樹禽。  
便返桃溪渡。仍迴楓澗船。荻聲喧落日。鴉影破寒烟。地憶銅官渚。人懷玉局仙。漁燈泝湫闊。知有雪簑眠。

游徂來山

嶂疊峯仍斷。溪泉出谷幽。亂雲投小徑。積翠引吟眸。過澗輕塵隔。憑欄薄霧收。丹黃紛滿樹。不道是深秋。

小酌聞竹間雨聲

孤檠對客寮。小飲度清宵。忽訝竹聲急。方知雨意饒。銜杯聽浙瀝。欹枕覺聊蕭。明日春膏發。循階覓筍苗。

菊花

別有清芬耐晚寒。不妨疎落與君看。一邱一壑人攜酒。秋雨秋風客倚欄。琴罷惟聞香淡淡。竹披斜裏露團團。飽經霜後英初落。猶護荒籬賞未闌。

罨畫溪晚舟

綠樹清溪畫幾層。夕陽歸棹一波澄。村中擊鼓秋祈穀。澗外傳歌夜采菱。叢竹深深藏雁齒。流螢點點亂漁燈。欲尋坡老田安在。牒訴裝懷惜未能。

卽事舟中絕句

短檠出烟汀。寂歷無人語。鴻雁叫孤雲。蓼花紅半渚。

題松陵圖

翦取吳淞水。裁成楚澤圖。故園昨入夢。好挂一帆蒲。

章嵩生

字松樵。德清人。乾隆五十九年舉人。

宿遷端午和人原韻

淹留不計日。客緒轉紛然。去鳥斜陽外。停舟綠樹邊。風涼燒燭夜。雨急熟梅天。何物酬佳節。蒼蒲似往年。

夜雨

小霽無三日。簷聲入夜沉。衾寒難索夢。蛩濕不成吟。踈柝連鐘斷。新苔抱砌深。芭蕉三兩葉。葉葉故園心。

孫爾準

字平叔。金匱人。乾隆六十年舉人。

晚晴登環翠亭

日脚溜晚晴。庭樹孤影直。草溼宜筇屨。危亭快登陟。浹旬人到稀。檐前蛛網織。久苦跼繩牀。登臨散結轡。周遭瞰城郭。縱目天際極。前山溼黛濃。冷翠未可拭。雲寒落遠汀。蒼然起秋色。臨風增莫寒。顧影帽欲側。暝色催人歸。草徑蟲唧唧。

十一月廿六日見雪喜賦

殘夢逼朝寒。披衣犯清曉。不知雪已深。重門閉猶悄。戶外竹無聲。垂綠見折篠。冰條綴枯枝。鑑影映曲沼。對此神魂清。凜然俗氛少。登樓拓寒牕。皓如月出皦。遠近辨微茫。頗覺眸子瞭。千里雲色同。長天絕飛鳥。

粟起玉樓寒。擁爐召朋好。共和尖叉詩。湘醪泛深縹。

爲顧卞聲題龍隱山圖

遠山曉霽雲模糊。望中黛色半有無。是何下筆風雨快。浮雲掃盡青峯孤。榻來幾載到嶺嶠。閉關應被山靈笑。瞥見高堂五尺圖。點染青蒼得真貌。孤舟一葉泊遠汀。篋簪影裏風冷冷。漁竿擲處發清嘯。雨絲灑面宿酒醒。空堂臥對忘晝永。翠色蒼然撲衣冷。可能借作三日游。一洗從前俗塵疑。去聲

早春聞鴈

客散忽疎雨。空齋聞雁聲。蕭蕭孤影過。瑟瑟莫寒生。怨別情方切。懷人歲已更。相思江水上。煩爾再南征。

月夜登北樓有懷

共此青天月。高樓思不堪。故人渺天末。春色老湘南。鴻雁九霄斷。山河一氣涵。不知留賞久。更鼓聽搗三。

北樓

招客憑闌暮鶴收。蝦鬚八尺卷雙鉤。斜陽樹影千家晚。過雨蟬聲五月秋。涼氣已疎陶侃柳。濤聲直到庾公樓。更聞前渚紅蓮褪。好上瓜皮一葉舟。

顧張思

字懷祖。太倉人。諸生。有越游小草。

蒲褐山房詩話。願行人陳好以博學能文爲同鄉。諸老所服。懷祖纂成家業。涉獵羣書。所著有七經訓詁。并同土風錄。識字略。陳檢討四六補註。諸書類。歲依人往來楚粵。故其詩音多蕭屑。

夜宿斑竹嶺

草行不厭疲。廿里一小住。晨爲冒雨遊。歸途忽已暮。陰濃竹木深。知是舊宿處。欣然含輿入。曠焉發心悟。桑下戒三宿。榻來空兩度。登高日夕佳。好景慚莫賦。惟聞水潺湲。終夜風濤怒。

莘園主人招飲松山下

性頗愛林泉。邂逅如夙好。商飈送殘炎。白雲動遠抱。忽聞季膺招。褰裳涉修道。園花引遊屐。石臺飢遐眺。青山與白紵。一一可辨了。松風時一來。塵懷淨如掃。況逢二稽秀。主人二子。學生兒相似。故以張伯稽兄弟擬之。清芬出羣表。殷勤酌百花。酒名。秋風翦蓴苳。那惜醉如泥。相逢恨不蚤。月影滿松顛。歸途踏霜草。

己酉元旦和石君先生

鹿鹿風塵道。春禽乍惜閒。殘年如小劫。少住卽深山。興共新梅發。愁同舊草刪。獨憐北堂上。寂寞減懽顏。

王文潞

字介人。太倉人。諸生。有義亭詩鈔。

蒲褐山房詩話。介人明兵部尙書。在晉之後。性曠穎。風度閑雅。予主婁東書院。授以詩法。五五七言古詩。頗得門徑。詞以姜張爲宗。年二十餘。得急疾而卒。友朋無不愍惜者。

題友人雲山紀遊圖



人說遠行苦。誰解遠行樂。君遊逮萬里。意氣尙磊落。甲乙誌所經。瑤篇富囊橐。示我一幅圖。結構在雲壑。林深徑欲迷。山遠泉空落。萬籟此俱寂。紅塵淨寥廓。倘遇青邱子。爲君歌憶昨。

畫山水歌贈陳孝廉詩庭和陸孝廉學欽

陳畫生風格超逸才嶢嶢。竭來婁江地。意氣高同盟。平生好詩復好畫。揜袖落筆風雲生。昔嘗爲余作小幀。就中巖壑紛嶒嶮。涼陰脩脩潤琴硯。落翠冉冉霏柴荆。恍惚別有小天地。坐移勝境來書檣。我婁烟翁及湘碧。得其萃者惟茂京。近來畫法半榛莽。如君妙手得未曾。江山千里腕底赴。圖書萬卷腸中撐。淋漓元氣拗奇特。人巧直與天工爭。河南季子雅好事。手持一卷光剡藤。作詩題贈播佳話。聞者四座皆心傾。畫中有詩詩有畫。觀詩讀畫神飛騰。繼聲之詠我何讓。歌成山月松梢明。

送春詞

花如殘夢柳如烟。回首光陰一惘然。擬向東風買春色。枝頭榆莢已無錢。

何錦

字尙之。吳縣人。有篋中草。

聽鐵師鼓琴

抱琴來幾年。孤寺夕陽邊。永日唯高坐。閑心托古弦。未秋先落葉。無澗忽鳴泉。彈罷靜相對。庭松起暮烟。

青蓮庵看梅

到此心如水。梅花尙未殘。  
幽禽先客在。蒼蘚隔窻寒。  
經雪數枝亞。向陽一徑看。  
誰云銅井外。無地駐吟鞍。

# 湖海詩傳卷四十一

朱宗大

字直方。寶應人。諸生。嘉慶元年舉孝廉方正。有壽藤軒吟稿。

蒲褐山房詩話。予於乾隆丙子丁丑間與直方定交。讀其詩而愛之。沈文愨公亦謂其絕類。大歷十子。尙神味不尙才情。取意趣不取學問。蓋珠湖諸君子如喬慕韓輩。造詣皆如此人。亦蕭閒真淡有道之容。溢於咳吐。

遲王澹泉不至

掃逕碧蕪淺。捲簾清晝遲。知君有幽興。肯負茅齋期。喧鳥茂林集。雜花微雨滋。云胡不我顧。永望空相思。

泛舟至長午寺宿

落日明半壁。溪流澹迴風。翫舟愜清景。緣源杳無窮。岸篠自叢媚。浦樹亦青葱。前峰條已轉。花界空冥中。雲木聳森秀。彩翠環玲瓏。捨檝展孤興。攝衣踐幽蹤。繚繞林壑暝。透迤臺砌重。軒開蘿月皎。夕永槐露濃。蕭條鐘梵靜。紺宇秋華空。不涉妙靈趣。焉與名理通。明發復惆悵。迴爐煙雨濛。

夜坐

秋聲截微雨。月色開踈林。颯爾夕涼至。當塔橫素琴。天空獨鳥過。砌冷孤蛩吟。不見幽期者。悄悄勞我心。

下攝山最高峯

孤雲眷游侶。相從下危峯。却顧千仞巔。暝色蒼茫中。背山歷紆折。歸路穿蒙籠。就夷石勢廣。絡險溪流通。遙見上峴月。松際光玲瓏。行吟意靡倦。卽事趣彌重。已覽巖壑勝。未遠高尙蹤。明末張白雲先生隱此地塵網有時釋。嘉遯當來同。

山中歸作

曳杖亂峰下。歸雲亦徐徐。風來榛莽間。樵聲與之俱。行吟意悠然。返我林中居。月色滿階屺。花氣彌空虛。徘徊永今夕。物外自怡如。

送客

離緒已淒涼。離樽猶在御。依依語後期。望望懷前路。前路迴悠悠。君行那可留。千峰凝翠晚。一雁渡江秋。江秋饒興致。江帆日容裔。采采汀渚花。吟情亦何麗。吟好寄無忘。居間憶正長。兩情如不隔。那復怨分張。

秋夕懷劉又徐

窮巷少來轍。索居惟掩扉。涼生幽院早。葉墜暝烟微。芳序倏已暮。故人猶未歸。無因展良覲。惻惻佇音徽。

送王少林

歲月慣行役。風波忘苦辛。殘年江上路。孤艇雪中人。相見亦無幾。歡忱多未申。離亭一樽酒。悄悄各傷神。

姑蘇送趙明府赴震澤

寥落江天晚。西風慘別歌。人隨孤棹遠。秋入五湖多。水驛楓初冷。山城雁正過。遙知訟庭靜。琴韻出煙蘿。

### 張燕昌

字芭堂。海鹽人。貢生。嘉慶元年舉孝廉方正。

蒲褐山房詩話。芭堂屏居。孤介爲懷。夙嗜金石。尤愛小品。搜奇采辭。凡藝缺零星。都爲一集。名金石契。予所藏。西漢雁足。覆亦并著焉。又撰古來飛白。書考。常往寧波。入范氏天一閣。在藏書中。搜北宋石鼓文。搨本。事勅以歸。重刻之。因撰石鼓文釋存。證以篆籀考。其偏旁。點畫。較薛楊潘董諸家。更爲精審。

### 鴛鴦湖權歌

通越門邊烏夜棲。馬嘶隱隱雜鳴鷄。五更聽得隣船語。一道斜風到水西。  
竹莊花發滿沙汀。桂楫蘭橈幾度經。猶記武塘傳十詠。藕花香到水心亭。  
池邊乳鴨半雙栖。遠樹參差望裏低。爲愛枇杷多結子。園東載酒到園西。  
湖天風雪逼輕裘。酒滿深杯月滿樓。羨煞黃門添冷趣。芳洲雪夜有歸舟。  
夜泛輕航買女桑。三春鄉市各紛忙。儂家接得石門種。十畝閒閒蔽草堂。

### 邵志純

字懷粹。仁和人。諸生。嘉慶元年舉孝廉方正。有右菴詩文集。

蒲謁山房詩話右菴懷文抱質有儒者恂恂氣象然高瞻遠視己所傾慕者無多嘉慶丁巳余至錢唐右菴同項金門塘來謁執弟子禮甚恭因得閱其所作古文駢雅有黃文肅柳待制之風詩稍次之未幾以孝廉方正被薦賜六品頂帶同時薦者海寧陳仲魚體海鹽張芑堂燕昌慈谿鄭簡香勳鄞縣袁秉毅鈞皆敦篤之士詩非所長今與芑堂略存梗概而陳鄭袁諸君則無可錄者

妾入門有序

海昌吳丈槎客年六十一因妻病買婢媒者疑其欲置妾輒舁良家女來吳一見卽認爲義女時吳有女已適人矣亟呼歸使同臥處越數月以禮嫁於武原魏氏相待一如舅甥時在乾隆五十八年

妾入門淚如雨生長本良家家貧難自主拚作先生妾敢望先生女先生見妾不肯覩自言衰老當爲父呼女歸來相伴居殷勤姊妹鏡前敍此際猶疑夢不真此身恩遇勝生身枯楊竟斷生稊夢絡秀翻同詠絮人來朝使爲尋佳婿嫁衣一一從頭製臘月初旬婚禮成彷彿鍾離當日事君不見滄海潮平有長時人生榮瘁任推移去時兒女來時妾膝下依依難別離還愁世上公瑜少不盡紅顏薄命悲

由靈隱至弢光

入寺復尋寺穿林上白雲竹窮清磬出磴轉暗泉聞仙佛山頭共江湖樹杪分振衣發長嘯空翠落紛紛

登淨慈寺無量壽懺堂

古寺南屏勝虛堂傍翠微竹光團佛座花影繡僧衣簾捲湖一角窗明山四圍茶瓜畱小憩竟日憺忘歸

# 余慶遠

字璟度。安陸人。貢生。嘉慶元年舉孝廉方正。

## 箐口

我行久入雲。豈必愛澤藪。高風吹我衣。乘雲入箐口。乍臨深無底。黝竈漏清湫。徬徨不可陷。箕踞一搔首。日升射氤氳。循環容如甑。箐外勢建瓴。箐口留開牖。木棧俯鵲巢。高峯等培塿。循壁下繩梯。狼狽攜僕手。側身辭呈陬。盤辟轉層岫。人擬投渚鶴。馬同窺穴鷗。得勢忽輕逸。如墜拂垂柳。飄搖到山陴。奇情得未有。惆悵亦何爲。此游將不朽。

## 錢大昭

字晦之。嘉定人。監生。嘉慶元年舉孝廉方正。有尊聞齋稿。

## 秋窗卽事

寒風瑟瑟渺愁余。暮雨蕭蕭感索居。鄉思不隨飛雁斷。客心時並曉雲舒。已知縱飲情初減。漫喜狂歌興未除。一榻最宜消永晝。從知化蝶自蘧蘧。

## 後蜀宮詞

踏青三月草初齊。御輦過來碧柳低。十字水中看島嶼。小樓亭榭浣花溪。

畫屏七十勅高張。小殿凌波納晚涼。一自月明清似水。六洲三島照琳瑯。  
百寶燈前不夜天。露臺歌舞愛嬋娟。豔娘一曲聲聲麗。博得天家十萬錢。

陳燮

字理堂。秦州人。嘉慶三年舉人。官泰興訓導。有半芥山房詩鈔。

平山堂秋望

岷峨八千里。地脉通蕪城。岡巒出其上。接構煩雕甍。寒雅散疎木。復此虛堂清。登臨亦偶爾。俯仰難爲情。  
秣陵諸名山。隱與茲堂平。羣峰雜嵐翠。一一羅前楹。江空夕照下。鳥去天冥冥。不知瓜步遠。但覺寒潮增。  
回首莽寥廓。雉堞何崢嶸。隋隄萬楊柳。併作秋蟬聲。悲風動地來。哀響無端生。豈伊異窮達。懷土心常驚。  
愴然念古昔。涕泗何縱橫。

黃樓懷古

黃樓竝立城之隅。下瞰汴泗東南趨。使君遺址足登眺。保障勢與宣房俱。憶昔洪流下瀆魏。遠注鉅野吞  
淮徐。彭門三版作屏障。呂梁千仞來斯須。高浪駕天水皆立。支祁斷鎖爲先驅。吏民盡走使君泣。投白馬  
誓捐微軀。歲寒水落急版築。躬親榘檄安羣居。伐蘆折柳恣束縛。辦竹壓土歌嘯于。功成不日勢鞏固。河  
伯受職瘡痍舒。蕭條小市見雞黍。零星野老歸田廬。餘功作樓鎮茲土。不獨觀開耽雄都。南山巖巖石華



角。遠水漠漠沙模糊。使君登樓一長嘯。政成物理心則娛。勝遊遠繼三百載。此樂豈與青蓮殊。雄詞照耀淮海賦。凌躒屈宋餘。子無茲樓閱歷近千載。河勢遷變需良圖。至今好事謁公像。謂微公結吾其魚。我來正逢豆花水。目擊駭浪心瞿瞿。登樓再拜一灑淚。醉公卮酒公知乎。

安宜道中同仲雲澗

水國城偏小。湖天日易斜。荒邨連雁鷺。生計仰魚蝦。送客迴帆鼓。驚心下澤車。海雲三百里。東望一長嗟。

題陸得岑明府畫紅梅

一笑相逢竹外枝。斷霞殘照欲開時。珊瑚筆格桃花昏。細寫官齋雪後詩。

許宗彥

字精卿。號周生。德清人。嘉慶四年進士。官兵部主事。

蒲褐山房詩話。周生年方就傅。穎悟非常。讀外日數行下。稍長。遂博通墳典。自經史詩詞而外。如小學算術醫方。梵筌靡不涉獵。尤深於古文。本於宋之南豐。明之蓮巖。理實而氣空。學充而辭達。同時與戴金溪。敦元。均以神童稱。而金溪。樸學。專工注疏。至於兼擅詞章。其所不逮也。嘗從其尊人方伯君。徧歷演點。東粵山水之勝。故瀏覽之作。亦多超越。

望廬山

名山如佳人。莊雅羞自薦。容光若易近。意態與人遠。秀中而樸外。可敬不可玩。斌媚出天然。妝飾謝綵綯。斜陽故相惱。纔許露半面。雲綃護窈窕。全身終未見。應有素心人。相對共晨宴。

自萬安陸行。晚宿玉振寺。次日至烏兜驛。緣山行得小道。至轅山。徑縈曲。巖澗幽塊。仿佛黔中林木。特富蒼翠。四滴乃更勝之。

水漲畏途遙。山程理輕策。驚波辭潺湲。織路入深僻。林巒窈窕延。堆阜縱橫隔。溪鳥鳴鉤輅。野花映紅白。烟際聞鐘聲。招提傍崖隙。放梵趁莫齋。僧牀一宵借。薜蘿織月挂。竹影參差積。清夢逗禪關。明發憩山驛。輿人耽捷徑。一線穿峯峇。瀑泉隨地流。石滑小橋窄。拂袖柏葉香。罥杖藤梢碧。立久雲滿衣。當午風生液。迤邐峯爭高。去天不盈尺。空翠四垂圓。濛濛落巾舄。中央忽平曠。田舍儼區畫。雞犬雜猿狖。童稚詫生客。桃源路庶近。仇池穴疑闢。山靈巧位置。勝境深秘惜。前行尋去途。迴望窮來迹。孤絕難重游。幽興轉增劇。高城島縣旌。暮氣罷將夕。仿佛憶黔南。茲行儻更適。寧嫌簞笠勞。賞懷自怡懌。

詠懷

單柯植春林。弱實依密蔭。清芬貽弦誦。結髮事丹蘄。義方辛早承。構穫凜勿任。蘭暉永昕照。小草舒薄豔。學海浩波瀾。密爾勉涵浸。不因溫飽安。敢忘身名忝。粲粲咏白華。磨錯結深念。至靜蘊生初。哀樂因物移。有懷誰能已。發言乃爲詩。比興或殊趣。風雅寧異辭。要於情有感。各自義所施。寄託邈爾遠。文采斐然宜。端憑寸心寫。足使萬象隨。真意苟不存。奇語終支離。良工矜雕琢。大樸無還期。頽波孰能挽。椎輪尙可思。聲音本自然。悟者自得之。寧爲後人棄。勿使前民嗤。

中宿峽用少陵集鐵堂峽韻

連峯蔽空來。勢阻江路絕。非岨非崖巍。太古立積鍊。翠重陰崖肥。雲透石根裂。細溜停空凹。皎若化殘雪。此地實奇險。過客色無悅。峭帆掠懸巖。屢作之字折。飛雨忽灑人。曦景互明滅。天風颯以寒。盡燭肝肺熱。大廟峽用少陵寒峽韻

昨暮泊中宿。秋氣感百端。晨入大廟峽。崖險風愈寒。日澹草木瘦。路細行人單。魚龍逼沸鬱。咫尺銀濤翻。奮權就沙嘴。怖止未敢餐。此生長行路。畏說行路難。

滇陽峽用少陵青陽峽韻

綿延太尉山。十峯九不惡。切漢高龍嵒。摩天翠崔錯。森如佛座嚴。靈胡不敢削。白猿渺孤騰。清泉忽雙落。屏張九疊深。江轉一帆弱。日色覆虛陰。烟光斂空漠。層巖人逕窮。冥寄傲五岳。鬱鬱蛟龍宮。千年氣旁薄。太造矜神奇。太始隱寥廓。俯仰惟生平。生理耽寂寞。

墨龍潭古梅

天龍聽法耽空綺。歸來偃臥空山裏。千年鱗甲古苔封。片片白雲吹不起。幽人衝雪戴圓笠。足繭蟾吐拾危級。盎然春意溢冬襟。習習微聞暗香裊。黯淡龍祠抗風榭。拗屈疎枝壓簷亞。啄花凍雀瘖無聲。潭水清空玉光瀉。寂歷荒壇少人跡。絕世芳姿誰得惜。色相超超不離塵。相視無言兩莫逆。晚來霧冥山如醉。瘦

影浮空點輕翠。神清骨冷絕閒愁。鐵石心腸轉斌媚。花前臥聽清商弄。翩翩化作棲花鳳。一聽清磬梵天來。月落參橫破幽夢。

鮑桂星

字覺生。歙縣人。嘉慶四年進士。官編修。有覺生初稿。

題松月鳴琴圖

華月出銀河。松風洒然至。攜琴坐松根。脉脉寫遐思。美人今不來。黃鶴渺天際。泉流白石響。雲沈遠山翠。浩歌忘夜闌。露下霑羅袂。

己酉歲杪客吳門訪黃雪香得見林子遠峯因畱度歲爲長歌贈之

我生蹇拙寡所諧。疲驢破帽淹江淮。孤鴻彳亍唳寥廓。隻翼何足凌天街。間逢奇人一青眼。屈指落落晨星排。榻來吳會偶頓轡。爲訪叔度敲荆柴。豈知主人固豪士。邂逅一見傾心懷。鍵扉投轄不令去。爲我下榻開西齋。庭前老樹靜兀兀。門外流水鳴潛潛。陳編插架畫駢蠹。古壁題句晴篆蝸。是時臘盡朔風吼。白日西遁生雲霾。居人僵以紇干雀。逋客閔若井底蛙。男呻女歎四鄰滿。愁緒那免縈吾儕。主人于此興轉烈。蒼龍躍出腰間馱。投杖忽思逐夸父。振衣便欲牽洪厓。紅塵唾盡底須浼。青冥直上不用階。疾呼兒童召賓客。謂我且住誠爲佳。堆盆滿抑瓊頭鮓。佐飲徧割園中蛙。藏鉤置覆百不厭。顛倒箸帽兼棕鞋。酒酣

狂叫吐奇氣。噴薄騷雅祛。搖哇胸羅甲。兵敵孫呂。筆補造化窮。庖媧詩成光。閃百鍊鐵。書罷勢折千股斂。男兒窮達固有命。豈恤餓死溝中埋。臬夔伊周企不及。屈宋賈馬期與偕。千秋萬歲有述作。白璧安可辭。摩挲況逢知音二三輩。攻錯不力毋乃乖。眼前聚散亦偶耳。同心所貴獨形骸。歌闌重與主人別。櫓聲呀啞來吳娃。

露筋祠題壁

細雨踏成泥。楊花暮繞隄。人家春水北。客棹古祠西。岸草綠階短。湖雲覆檻低。貞魂風露裏。終古夜烏啼。

寄鶴舫江西

鳳城春柳碧扶疎。客舍銜杯歎索居。落日雲沙愁正馬。高樓風雨夢雙魚。匡廬峰好容支枕。郭隗臺空少傳車。安得甘泉陪翠輦。早將詞賦薦相如。

秋雁

荻花吹雪晚冥冥。塞北江南幾度經。千點月涵汾水白。一行天斷楚峯青。蛾眉舊恨絃中識。馬首新愁笛裏聽。我亦十年湖海客。秋風君莫怨飄零。

殘臘將治北遊之裝與家人話別

十載吳山越水湄。漂零此日更何之。江湖淚滿窮途後。雨雪魂銷遠別時。燕市風塵空駿足。漢宮金粉自

蛾眉。茲行豈有干時策。聊展平生捧檄思。

吳 霽

字山尊。全椒人。嘉慶四年進士。官編修。有夕葵書屋疊韻詩。

蒲褐山房詩話。山尊胸藏二酉。力富五丁。所作駢體。沉博絕麗。少爲石君司農激賞。而詩才亦以韓孟皮陸爲宗。門險盤空。句奇語重。五言長古。尤足以推倒一世。

放生招同志。用東坡先生岐亭韻。

羣命畢杯羹。一飽求多汁。奚翅草菅人。酷吏方東溼。春風回枯荑。生理須臾得。請充不忍心。延此殘喘急。命畜鄭國魚。看放唐亭鴨。方乳矢勿發。已漏網不羈。亦有姥好善。食報龜眼赤。亦有雀受飼。來獻白環白。臨池浴鷺衣。開牕對雞幘。時悟濠濮樂。罔聞芒碭泣。蕪兒芥有孫。足補給鮮缺。好善誰不如。廣告大羅客。朝入功德林。謝者夕已集。用曾魯公放生事。

題張丈雪鴻畫册。並贈用前韻。

霜鐘氣感聲。月鑑光生汁。窮谷吹管溫。晴天雨花溼。君蕪疑鬼神。君心忘失得。遠志去官輕。閒情涉園急。階除飲鳥雀。鄰舍習鷺鴨。賓筵寒無種。吟屋風不羈。發興青林青。著色赤岸赤。俯視楊契丹。尙友陶貞白。擲筆傾百壺。伸紙岸孤幘。喜作溪桃笑。悲寫江竹泣。乞君墨戲妙。資我筆陣缺。卻惜臥遊圖。乃贈遠行客。無緣感蘇髯。不歸笑虞集。

詠明趙忠毅公鐵如意倒叶前韻

公仕衆正從。公黜羣邪集。秉憲失楊左。舉國授魏客。太阿或可倒。干將那冑缺。遺此百鍊剛。傳之萬世泣。初操選郎印。繼冠尙書幘。臣志在澄清。吏私拒關白。入手七星寒。頸銀款剖心一寸赤。請劍動漢廷。揮樂去魯羈。共聽啾啾鳳。冑若泛泛鴨。如意良復難。求治詎嫌急。聚鐵錯已成。荷戈死亦得。一歌胡風悲。再舞塞雲溼。逆案已如山。毅魄不鎔汁。

不灰木爐

西海陰火燃。太行六月雪。地氣實資之。不沃亦不滅。偉哉純陽精。德盛流金鐵。何物質幹固。頓使汝力竭。蕭邱木重煢。已灼非奇絕。獨數徐吾產。靈根一種別。惜未辭斧斤。干霄已折泄。剝中鑲其外。致用意良屑。薪材木同林。忽憂剝膚切。那知性難鑠。氣焰徒爾烈。燧人古神人。值此肘應掣。想當焚如初。真氣自搏結。我聞至人者。入火能無蒸。飲以玉池肥。溉我初生蘖。君子處富貴。炙手中不熱。堅白惟自完。百試不磨涅。高齋積霰晴。雄談茗鑪設。卽物悟真性。詎患干將缺。何必火中蓮。更從我佛說。

銅鼓一百韻

南荒製作奇。冶銅乃可搗。韞人法不守。吳造鼓知千鄒。瀕海病潮濕。曾煥夾江愁瘴窳。撥桴或多暗。唐肇胃革且易瑕。變例揀印都。蔣知取精渴若耶。樂府配鐘鏞。陳雙武庫銷銜鍛。稍殺蒙黃膜。胡森最上騰赤霞。鳩材

徐鍊剛。吳嵩獸炭急生煨。雷公自呵護。郭祝融暗咄嗟。風火初囊籥。黃郁丙庚相齟齬。久之地瀉銀。俞國

煥乎林升殿。存液候已到。蕭依模式不差。三尺徑勻圓。煥四垂中給衍。臍肥小作凸。筆面平全不窪。周坐

六銀蟾。知間疊雙金蟆。無當敵卮美。雙有耳較鼎加。腹隆股仍縮。森唇淺口不哆。文身紛陸離。嵩雕題細

鬚。十九暈周遭。莖廿六重整斜。乍視目替眩。郁細數口聲齟。或如鏡啟奩。國或如輻在車。或如老榆莢。

或如新荷蕞。或如圖負龜。煥或如篆吐蝸。或如玉有璽。筆或如戟交叉。或如芝九秀。知或如參五極。或

如斬陰木。雙或如吐陽葩。或如簞細織。森或如螭紛拏。或如鳧在涇。嵩或如鳳在笈。青黑四氣竭。莖黃赤

七寶塗。燦若注瓔珞。郁美若飾笄珈。大小質偶殺。國雌雄聲俱遐。當其不鳴時。蕭有如雷蟄注。偶然一考

擊。煥淵響風颯颯。苗民畏鬼怪。筆淫祀貴繁多。不需瞽播鼗。知那用巫傳芭。琴瑟非孤竹。雙笙簧非聖媧。

極西摻都疊。森扶南舞袈裟。邊人習嘈雜。嵩洞壘喧淫哇。大器陳廣庭。莖諸獠奔豪家。淋淋酒如澠。郁濟

濟人如麻。獠童與獠女。國舊俗延妖表。赤脚錦全刺。蕭披髮髻不丫。言聲聚伊嗚。煥姿態矜妍姘。其笙材

用蘆。筆其鑼名曰沙。紫膽作桐魚。知朱提當鐵搗。奮袖出十指。雙納釵集羣娃。都老義奚取。森相襲名以

嘉。喜則歌且舞。嵩殷雷如金琶。怒則成殺聲。莖應者如雲茶。一奏哢熊熊。郁萬戟來秋枿。輕生殉利刃。國

赴響駢短鈍。倉卒破俘馘。蕭弱者多自剄。強者幸逃誅。煥神物猶謾誇。跪陳聲磴磴。筆價值千頭假。諸史

文可徵。知此物用頗奢。其在東謝蠻。雙宜殺人肯畚。勞功兼牛馬。森賞勤先耕耒。其在永順夷。嵩鳴之逐

讓



厲痕僉云鏗<sub>作</sub>。鬼物不敢殘。土風固陳陳。<sub>部</sub>小說徒呀呀。數典求權輿。<sub>國</sub>紀載非傾顛。偉哉馬文淵。  
 卓識棄井蛙。遇主提勝旅。<sub>燠</sub>破羞於允吾。再礪征武漢。<sub>梁</sub>擊鼙呼爪牙。奮槌聲不揚。<sub>知</sub>銅鼓始萌芽。堅  
 却霖潦滲。<sub>變</sub>高破瘴霧遮。淵淵厲虓虎。<sub>森</sub>闔闔逐奔躩。頗好滕侯馳。<sub>高</sub>能識周王驂。收材自越略。<sub>楚</sub>鑄式  
 品厥駟。山陽葬禪陵。<sub>章</sub>漢宮植兩銀。南陽起臥龍。<sub>國</sub>赤手扶赤蛇。豈肯忘中原。<sub>蘇</sub>未暇出漢巴。南征盛羽  
 葆。<sub>煨</sub>寶蓋承曲筵。獨惜大星落。<sub>堂</sub>竟使蜀婦髮。<sub>坡</sub>千鈞鎔冶存。<sub>知</sub>萬祀供奉賒。埋以厭蠻獠。<sub>變</sub>傳聞近詖  
 邪。公自多材藝。<sub>森</sub>石陣深窅容。驅蠱運特。<sub>梁</sub>弄狢流駟馱。釜冷水驚沸。<sub>煨</sub>弩連車呼划。却想出師初。<sub>章</sub>  
 中軍手自抓。大聲動巖壑。<sub>國</sub>萬騎不敢譁。南人共膜頌。佛指醒阿闍。劫灰閱兵燹。<sub>燠</sub>劍氣辭卑汗。或出  
 叢冢中。<sub>堂</sub>或見流波涯。水土姿剝蝕。<sub>知</sub>苔蘚俟梳肥。黯淡雲掩星。<sub>變</sub>朦朧霧籠紗。鷓斑閒綠珠。<sub>森</sub>猩唇隱  
 硃砂。缺畫疑斧斤。<sub>嵩</sub>駁痕成癡痂。大名垂宇宙。<sub>煨</sub>遺製留此些。又聞歐陽頤。<sub>部</sub>干城歌免置。征南得銅材。  
 國<sub>鑑</sub>作貢獻京華。晉乘稱寶貴。<sub>真</sub>夷俗豪且夸。赫連費莊嚴。<sub>燠</sub>光怪額迨膺。唐典冠軍樂。<sub>梁</sub>兩行列嶮呀。詩  
 人善賦物。<sub>讓</sub>江上迎神鴉。有銘不可認。<sub>變</sub>摩挲徒長蹉。乾德與景德。<sub>森</sub>來獻同賓幪。代遠不淪沒。<sub>嵩</sub>渤海  
 存枯槎。古器驚過眼。<sub>煨</sub>高吟逢退衙。詠史誰抗行。<sub>章</sub>命酒兼催花。擊鉞方琮琤。持布慚嘔啞。<sub>國</sub>

樂鈞

字蓮裳。臨川人。嘉慶五年舉人。

羊蹠嶺

絕險吾未經。世傳羊腸坂。茲來羊蹠嶺。嶄巖畏欲返。雲氣已中劈。地軸更旁鑿。懸猿臂莫舒。健鳥翼難展。肩輿勞十夫。并力事推挽。愁隨崩石墮。陡躡迴峯轉。來徑如堵牆。前路見疆畎。建瓴下深麓。飄瓦落平行。駛足仰脅息。平頭坐噴喘。此地扼山海。東路資管鍵。樓櫓凌層霄。雉堞跨絕巘。勢比殺函固。形爭劍閣險。守關用一夫。萬騎空假蹇。時平虛地利。斥堠上苔蘚。汛卒迎長官。旌旗半空捲。嶺樹生暮嵐。髣髴萬里遠。餘勢猶嶙峋。征夫足已繭。

謁潮州韓文公祠

鳳翔佛骨存不存。公像巍巍山岳尊。聖賢俎豆享崇報。精藍香火羞同論。公居潮陽八月耳。手搜櫟莽開蒙昏。佛示降灾天護佑。匹馬旋入長安門。何充蕭瑀世不乏。燭火豈敵扶桑暎。生能佞佛沒則已。餒鬼乞食隨諸髡。潮人感公永勿替。庶下歲歲陳羔豚。魂魄戀此理或有。騎龍冉冉來帝關。紹聖遷客亦人傑。身宮磨蝎同遼遠。狂瀾砥柱百川障。非公孰能當此言。我來肅拜後千載。若探積石通昆命。白鸚鵡碑傳刻在。蛟龍鬱律不敢捫。大賢餘事尙如此。況乃道德凝胚渾。夢中丹篆誰會得。長與元氣相氤氳。海國斯文未墜地。韓江泯泯猶東奔。

壽述菴先生八十

先生講學西湖時。賤子走謁當炎曦。萬松翳日火雲斷。一鶴守門仙翮垂。橫簾晝入華胥譜。麾扇早賞亭臯詩。廿年引領望風采。一見挽袖軒霜眉。面色凍黎壽者相。目光閃電人倫師。公言聞聲欲識久。我恨問字從遊遲。使旌昔駐章貢上。儒巾始著臨汝涖。金臺萬里旣北客。鑑湖一曲先南歸。雲泥判隔星霜錯。葵蓂傾向萍蓬遠。羊欣曾被望蔡禮。王粲特荷中郎知。古賢款接豈偶爾。當時遇合真榮施。社樸薪樽外匠石。丹砂玉札歸神醫。青雲舊多才峻附。絳帳尚有生徒隨。門前泖水洗丹筆。座右嶧桐鳴素絲。百城坐擁老益壯。萬閒廣廈貧猶支。手握星辰布朝列。胸羅兵甲清邊陲。勛名耀今那暇述。風義抗古疇能齊。神仙儒者所唾棄。壽考君子當娛嬉。大海瀾光照玉樹。細林山影浮金卮。頌禱敢爲衆人語。因緣儻訂千秋期。

## 錢林

字東生。錢塘人。琦子。嘉慶五年舉人。有竹醉亭吟稿。

### 李代國刷馬岡歌

續

四十佩銀印。與作開國公。垂鞭陰山還。顧盼生長風。卽看未遇身在下。亦是縱橫不羈者。百金腰下青脊劍。一匹階頭紫駟馬。曹家白鶴非我儔。刷取毛片橫雙眸。虬髯當時正在坐。四面山色凜若秋。固知愛馬如愛士。要令低頭聽驅使。嗚呼。太原李公子。拂拭英雄亦如此。

### 韓蘄王策蹇圖

將軍少日爲走卒。豈料刻印封公侯。荷戈碌碌在人下。得飯一飽死卽休。忽然騰蹕青雲起。麒麟殿前拜天子。十戰五戰皆先鋒。冠軍將軍無乃是。姿何颯爽褒鄂同。慧直又有前人風。曾聞坐法辛慶忌。肯學徒邊陳子公。拂衣竟爾還鄉土。甘向田間作野父。杖策今朝自跨驢。射生當日能擒虎。君不見北平太守豪且賢。年年手弓常在邊。一言偶失動貴意。對簿自到無人憐。以茲老住江湖上。落落長歌益踈放。父老能談京口兵。朝廷竟棄山西將。畫工作意何太深。手拊髀肉如沈吟。請看韝上蒼鷹意。常有雲霄待用心。

### 陸學欽

字子若。太倉人。嘉慶五年舉人。有蘊真居吟草。

### 丹中望虞山

看月不厭闕。看山不厭遙。闕月光轉媚。遙山景逾饒。我行指海虞。秋老風蕭蕭。皎日照寒水。一葉隨飄飄。同心有二子。跛脚時長謠。推篷落空翠。失喜聲喧嘈。初視若堆阜。影混雲天交。須臾見凹凸。雉堞圍山腰。再行逐岸曲。橫側看雲椒。迤邐似龍臥。誰能辨林阜。嵐容杳無定。到眼信所遭。反恐倏而至。遠景難重描。回頭謝長年。鼓枻毋爾勞。

### 吾谷看楓葉

金風吹山淨如沐。青女行霜掃寒綠。仙人昨夜勾漏來。亂灑丹砂徧吾谷。西川合號丹邱生。能使佳城變

赤城風流文彩久銷歇。墓田丙舍猶嵒嶭。我來却下維摩寺。暝色蒼茫千里至。巖曳餘霞暈轉明。山銜落日看逾媚。歸來跂脚短篷欹。坐覺雲霞繫我思。好將設色癡翁筆。寫入停車小杜詩。

石梅澗曉坐

尋幽憩古澗。澗水流涓涓。竹色綠無際。鳥聲清可憐。青山向秋靜。紅樹得霜妍。冥坐不知返。臨風懷古賢。  
前爲巫公祠

劍門

此豈梁州險。何爲號劍門。兩崖撐鐵色。一罅豁雲根。特立形偏壯。排空氣自尊。勒銘吾敢效。不用掃蕪痕。  
偕吳竹筠木錢許田宗穎同遊虞山放舟西關作

秋山如靜女。婉孌繫人思。快友欣相約。登臨共賦詩。江皋下黃葉。一棹破璉漪。後夜昆湖月。殷勤照酒卮。  
過曇陽觀故址時刺史韞公方議修復

曾聞仙魄闕幽宮。月佩霞裳想像中。跨鳳不隨秦弄玉。乘雲真見李騰空。百年琳宇埋殘碣。當日琅函拜鉅公。重向荒原問香火。霓旌何處捲靈風。

沈端

字方立。鎮洋人。嘉慶五年舉人。有滄洲吟稿。

蒲褐山房詩話方立與弟安成爲敬亭光祿文孫光祿精研道學身體力行於詩取法杜陵務歸質實端確其詩云以性靈爲本卷軸爲輔實之擊響之間辨之神味之外而方立志和節雅中矩中規安成則氣猛才雄多多益善

轍迹雖殊要皆不愧其家學

游山

索居寡儔侶杖策登遙岑烟江靜暝色碧嶂含夕陰迴眺巖樹密俯聆泉溜音嵐氣拂衣袖涼風響空林  
久坐契靜旨展眺空置忱忽忽感時序悠悠懷所欽孤賞發遙思慨焉撫瑤琴

送弟安成之山左

念我寡兄弟飢驅奈爾何秋風吹木葉孤棹渡黃河門戶資親健艱難仗友多青雲須努力少壯莫蹉跎  
弧矢平生志風塵亦壯遊白雲泰岱色明月大江流湖海身如寄文章食易謀同行感知己稍爲解離愁

輿畢硯山別駕同行

家貧無舊業所至輒依人難得故鄉聚況兼多病身薄游增意氣行路飽艱辛老輩吹噓力還期汨沒伸  
出門送子去策馬卽長驅遠道親朋隔天涯形影孤離情懸落日清興自吾徒我祖曾遊地還存故舊無

先大父掌教澗源書院從游甚衆

臨別不能語離魂黯自傷持家無健婦眷問弟悼亡掩涕爲高堂骨肉偏分散關河正渺茫殷勤囑杜宇催汝

早還鄉

游憇清涼寺

此地真堪住。置身屋半間。泉飛常見雨。雲合不知山。幽鳥啼還靜。道人心自閒。一聲清磬響。寂寞掩松關。

讀史記偶題

隧道魚燈冷未灰。望夷回首接平臺。庭前有鹿何人識。天下紛紛逐得來。太息咸陽焚突如。文章都付劫灰餘。六經諸子元何用。一卷亡秦黃石書。

繼昌

字 氏。滿洲正白旗人。嘉慶五年舉人。今官戶部主事。

片石居步家大人韻

俯仰真空闊。欣看物候新。禪心原似鏡。勝境迥無塵。雲映山橫黛。風來水感鱗。松關長好在。足寄此吟身。

龍井

開境超諸勝。肩輿此暫停。竹深迷礪戶。花密拂雲亭。遠水沿隄碧。重山隔樹青。泉甘茶復嫩。飲能有餘馨。

由龍井至淨慈寺

選勝從初地。尋幽到上方。山連雲氣濕。風過竹陰涼。我輩探春數。山僧應客忙。歸來天欲暮。一路野梅香。





# 湖海詩傳卷四十二

吳嵩梁

字子山。號蘭雪。東鄉人。嘉慶五年舉人。候補國子監博士。有香蘇山館詩集。

蒲芻山房詩話。西江自明以來。稱詩者衆。而無卓然傑出。號大家者。予嘗以語蘭雪。蘭雪深以爲然。今自蔣茗生後。二十餘年。蘭雪繼之。予兩至南昌。故才人多在門下。如雲衣。照南。修之。三矣。咸以詩名。當世而蘭雪實爲巨擘。詩如天風海濤。蒼蒼浪浪。足以推到一世豪傑。每閱數年。輒來三泖。漁莊省視。故錄其詩較多。

九鳥灘

長河走驚濤。巨灘橫砥柱。驟觸勢暫迴。力戰氣逾怒。雪花噴作山。蛟涎吐爲霧。九鳥不得飛。諺云九鳥灘飛不得。一葦敢輕渡。連朝狎清淺。俄頃變憂怖。全力爭半篙。微命託孤注。浮生足波瀾。此水疑豔瀕。不知涉險難。豈悔虛名誤。

弋陽溪

微雨釀初寒。輕橈漾新霏。漲落沙岸高。風定石灘沸。苔髮淨可梳。波紋蹙可細。拍拍水禽過。策策遊魚逝。數峯開夕陽。遙天接空翠。稍參雲淡濃。未辨山向背。臨水或有邨。靄蔬不成市。炊烟裊若絲。浦樹平於薺。塵勞惜暫閒。清景恐難繼。佳節負黃菊。故園隔青桂。蓼花旣疎散。楓葉況明媚。試展輞川圖。欲補愚溪記。

禮烈親王勒克馬歌二首有序

國初禮烈親王有良馬曰克勒。猶漢言騫驄也。順治朝汪編修疏爲作傳。今禮王子汲修主人。屬張檢討問陶爲補圖。馬高七尺。長丈有咫。耳際肉骨寸許。腹下旋毛若鱗甲。然在軍中每聞鼓聲。奮迅欲出。嘗乘至安平。適病蹄。自跑土出泉洗其創而癒。今有聖水泉。王薨。馬聞哭聲。哀鳴不已。未幾遂斃。比奉天歲取馬至。王世子猶問孰爲克勒馬種。必善飼之。嵩梁嘉其有古烈士之風。因作是詩。附書圖後。

長白山高江水黑。天遣神駒歸貝勒。諸將遂巡不敢騎。渾身血汗桃花色。頭角嶄然鱗甲動。始信天龍有異種。生立功名死報恩。畫中見汝猶神勇。吉林岡連薩爾濟。巨礮驚雷箭如雨。霜蹄奮蹴陣雲飛。二十萬兵殲一鼓。辛苦身經百戰場。自跑泉水洗金瘡。路人今日尋靈蹟。一掬春波映夕陽。

烈王勳德史有傳。天馬今從畫中見。百戰歸來汗血流。論功馬亦當封侯。王師破陣如破竹。王來騎馬如騎龍。四蹄雷電雙耳風。但聞戰鼓先騰空。跨山驀礮若平地。豈知身在重圍中。箭傷刀斫不能死。得意騰躑日千里。王歸天上馬人閒。矯首蒼雲淚如水。功成身殞爲酬恩。刻石昭陵未足論。遼海年年千騎出。千孫猶問舊龍孫。

康山草堂歌

康山一拳石。寄託城市閒。得姓乃以狀元誤。盛名遂壓揚州山。當年流竄猶英氣。傅粉簪花恣遊戲。若果尋秋到草堂。名山便是埋憂地。山上危樓倚夕陽。風帆葉葉度雲檣。隔江遙見萬峯揖。白鷗影盡連空蒼。山下不知何代墓。王侯草木今同腐。夜半衣冠尙出游。神燈吹入青楓樹。吳生年少來揚州。第一華筵開此樓。燭花萬朵照狂醉。天河倒入銀槎流。琵琶仙語復鬼語。一曲聽殘淚如雨。人海飄零又十年。素心賴有山靈許。昨夜秋風隨雁來。主人招我傾新醅。桂花三日落成雪。飲酒不痛徒心哀。君不見康對山歌且舞。救友汚名心獨苦。烏紗一擲能千古。英雄才子亦黃土。碌碌狀元何足數。

歐陽公南唐官硯追次居士集中和劉原父澄心堂紙韻

少微製硯多良才。眞賞未遘蒙蒼埃。此硯幸入醉翁手。所寶惟德非瓊瑰。手澤摩挲七百歲。古香拂拂生麝煤。羅紋山下選工處。雲根闢破青崔嵬。王家舍人棄如土。江南故老心先摧。龍尾銷沉石魚死。三十六峯安在哉。區區片石感興廢。鸚鵡淚滴松風哀。往時監造給官俸。後賢寶惜逾金轉。相隨廿載老居士。手記一一煩心裁。平生石友最清鯁。豈以玩好供嘲談。朋黨論成痛至骨。青天終掃浮雲開。一角小缺亦何憾。乾坤正氣留中臺。夷陵洗硯峽水碧。錦雲所覆疑蓬萊。平山亦翁舊遊地。當時賓從皆郗枚。殘雅如墨點江樹。東都觴屐羣公陪。澄心堂紙尙可覓。乞寫硬句盤空來。

秦良玉錦袍歌

五花戰馬千金鞍。馬上紅妝能殺賊。健兒羅拜秦將軍。氣蓋西川貌傾國。平臺召見詩寵行。天子臨軒賜顏色。宮袍歸來換戰袍。鏤金錯繡皆天澤。崇正之季軍政荒。本兵獨倚楊嗣昌。盡驅流賊入巴蜀。斬刈黔首如牛羊。白桿縱橫三十萬。將軍掃境來酣戰。旌旗五色陣雲高。帳下女兒亦饒悍。烽火連天笳震地。殺賊逾多氣逾厲。賊中望見錦袍來。百萬瑠戈同日棄。雪花如席天漫漫。錦袍雖煖邊風酸。寄衣一千五百襲。將軍愛士同飢寒。張令軍前鼓聲死。本兵不恤將軍恥。峒兵二萬請分廩。妾家甘爲朝廷毀。巡按巡撫嗟何人。劉之勃與邵捷春。按圖扼要十三處。奇策不用徒因循。此時錦袍慘無色。半污蠻血霑征塵。沙場百戰蛾眉老。畫像敢望登麒麟。成都一破金甌裂。石砧孤城堅似鐵。巾幗蒙恩四十年。耿耿丹心照邊月。左家良玉非英雄。一敗終教慚晚節。思陵身殉福王走。南渡衣冠復何有。六宮紈綺燒成灰。秦氏錦袍猶世守。海內承平二百年。岷江劍閣無烽烟。匹婦何敢奮螳臂。窮寇乃與相鈎連。計日王師大斬獲。擲汝鼎鑊供炮煎。攻心有術當革面。內地戡亂殊籌邊。宣恩一檄定感泣。各習井臼投戈鋌。請爲將軍崇廟祀。祠宮奉職春秋虔。忠義所招魍魎化。一矢不用三軍旋。錦袍樂府蠻女唱。弓衣合繡都官篇。

鶯脰湖

平生愛說鶯脰湖。扁舟未放神先徂。前年過此夜已半。蕭蕭寒夢依菰蒲。今年端午客吳下。綵船百棹笙歌俱。傳聞此地更繁盛。萬花如海龍所都。我來江郭值秋首。但看湖影涵清虛。韓紋細蹙晚風定。練光橫

捲餘霞鋪布帆。葉葉送歸客。畫槳枝枝搖晚漁。紅蓼叢邊沙漱出。白鷗沒處遙山無。水天如此極幽賞。管絃底用矜吳歎。徑思手築一茅舍。特來補種千芙蓉。人間俯仰足憂患。眼前清境留須臾。秋風一櫂踏雲浪。釣竿去拂青珊瑚。

銀槎盃

元人朱碧山製。實谷運使得於江氏屬賦。

前宵酌我對山樓。銀河倒入青樽流。我詩有識果奇中。康山詩有句云。倒捲銀河瀉盃底。舉盃一笑逢張侯。斗大黃金印懸肘。探源萬里窮星宿。現身忽化酒中仙。一朵白雲墮清晝。科頭兀坐槎中央。輕裾直欲凌風翔。支機片石傳星渚。枯樹何年臥雪霜。銀鈎洗出元朝字。妙絕碧山誇手製。四百年來任拍浮。我笑此翁應骨醉。虞揭介壽張華筵。當時主客皆神仙。此盃雙舉銀燭前。桃花一放三千年。白雁聲中換滄海。塵土銷沉舊光采。一爵曾開內府收。三釵却憶江邨買。高灣人。草堂名。後先拂拭羣公手。神物流傳信非偶。江湖隻影豈飄零。天上人間同不朽。月華秋浸馮夷宮。平湖萬頃玻璃風。美人濃笑持碧筒。酒波滿瀉真珠紅。浩歌手把雙芙蓉。竟疑跳入僊槎中。吾儕得酒且快意。富貴長生總游戲。蒲萄一斛換涼州。如此胸襟定奴隸。誦君長句追昔賢。痛飲爲君歌此篇。醉鄉佳話從今補。壓倒錢唐藥玉船。

登岱詩和覃溪先生

日披岱史坐山巖。百讀不及身一登。連宵快雨天驟霽。筍輿出郭邀禪僧。磴道盤旋到林杪。老樹怪石森

蒼稜壺天一開跨空立。徂徠俯視非岡陵。雷霆百戰怒龍出。擘開山骨青峻嶒。懸流忽斷萬松舞。孫枝亦縛千年藤。天門直上接翔鳳。絕磴欲下愁飢鷹。七十二家古封禪。芝泥玉檢神依憑。翠華所蒞羣岳拜。至今鶴嘯猿歡騰。是時山中日亭午。蔚藍鋪遍雲層層。長風萬里捲不去。破碎乃似春江冰。重陰蕩漾覆齊魯。彈丸隱約開田塍。全收滄海入盃底。混茫一氣晴嵐蒸。平生局促厭塵市。如鶻閉籠蛟。罾此間放眼九州隘。變化勢可襄鯤鵬。頗聞峯頂夜方半。海霞已擁朱輪升。金支翠旗白銀闕。蓬萊恨不仙槎乘。山氣蒼然滿城郭。斜陽斂盡天澄澄。入門未轉北斗柄。覓句急翦南臆鏡。但將游覽豁胸臆。興酣落筆吾何能。公詩雄秀冠當代。墨妙況兼貽百朋。車塵十丈拂鞭去。山川奇勝歸行騰。名岳有緣許再陟。撰杖喜說今年會。

七月四日由淨慈寺放舟西湖徧覽諸勝夜泊荷花中獨飲至醉

我與杭州別三載。夢魂苦爲西湖牽。昨夜蒲帆卸江口。喜如道渴逢山泉。侵晨欲出苦未暇。買舟直待驕陽偏。淨慈寺外水拍岸。垂楊幾樹飄殘蟬。葛衫芒屨扇如雪。湖光一照俱翩翩。畫橋曲折導幽嶼。危樓窈窕臨平川。荷花開滿五千頃。葉大如蓋高枝駢。浮萍破處倒雙影。紅妝浸澈玻璃天。花光欲斷碧嵐出。北山遙與南屏連。峯巒到此盡縹緲。蒼虬棹尾青鸞鳶。疎鐘迢遞度林末。破空新月來娟娟。映花着水態逾妙。蛾眉一笑流清妍。打門沽酒邀月飲。香風吹我湖亭邊。移舟更入萬花裏。鴛鴦鸚鵡皆酣眠。自臨江水

翦銀燭。但欠女手調冰絃。暗螢結陣風點亂。驚魚擲影波紋圓。中流回望好臺榭。珠欄碧瓦吹成烟。却憶前年繫歌舫。振衣直上孤山巔。寒梅未花月正滿。鶴聲夜半招逋仙。美人禁寒倚篷檻。玉簫入破山雲穿。再來便有今昔感。一行暫結湖山緣。手折花枝揖明月。浩歌起舞青樽前。不辭痛飲便達曙。此別俊遊當隔年。會約故人共幽絕。且覓新句書蠻箋。明朝單櫂沂潮去。富春青到嚴州船。

溪行遇雨

竹密青連樹。谿寒碧映沙。獨來因避雨。深處忽逢花。濕濕雲初散。荒荒日又斜。却尋前路出。沽酒問漁家。

舟中自訂癸丑甲寅詩卷感懷

燕市蹉跎百感侵。歡場未散已沾襟。吹笙易醒游仙夢。擊筑難銷壯士心。海氣青蒼連碣石。岱雲浩蕩接淮陰。支離病鶴籠初放。隻影江湖瘦不禁。

盛名何敢匹鄒枚。一代公卿盡愛才。幕府高秋張宴出。元戎小隊送詩來。座中跌宕揮金戟。花裏沉酣倒玉盃。午夜軍門猶未掩。記從湖上櫂歌回。

平生襟抱托青霞。鳳拍鸞飄亦可嗟。十載論文交海內。羣公傾蓋慰天涯。放翁團扇摹詩社。賀監金龜擲酒家。曾許俊遊陪杖履。山陰夜雪鏡湖花。

建業始蘇又廣陵。當筵綵筆最飛騰。樓臺春晚頻移棹。絲管宵闌獨翦燈。年少風懷花正綺。天寒離緒酒

初水誰知縱飲酣歌地。中有唐衢淚數升。  
寶幄鈿車白玉驄。瓊花璧月錦帆風。山橫北固斜陽裏。寺在南朝細雨中。越水浣紗誰絕豔。吳門乞食有英雄。登臨莫抱千秋感。身世茫茫亦斷蓬。  
履印衫痕翠未銷。湖山入望又迢遙。西泠花信遲三載。南渡風流訪六朝。疊雪樓頭春漠漠。湧金門外柳蕭蕭。錦袍鐵弩今安在。請爲錢王賦射潮。

瞻園月夜

林塘幽絕似山家。臨水闌干臥影斜。仙鶴一雙都睡着。冷香吹遍綠梅花。

陳文述

字雲伯。錢唐人。嘉慶五年舉人。

仿宋畫院畫製團扇

江南三月春風歇。櫻桃花底鶯聲滑。合歡團扇翦輕紈。分明採得天邊月。南渡丹青待詔多。傳聞舊譜出宣和。人懷休說班姬怨。羞見曾憐晉女歌。班姬晉女今何有。攜來合付纖纖手。闌前撲蝶影香遲。花開障面徘徊久。樓臺花鳥院中春。馬畫楊題竟逼真。歌得合歡詞一曲。祇應留贈合歡人。

鐵笛



梅花飛出仙雲黑。不鑄鐵簫鑄鐵笛。元水一握朱唇寒。青天吹作芙蓉色。螺文百結螺花鋪。秋星歷歷排明珠。昆吾夜斷瘦蛟脊。誰與作者來南圖。笛上我聞中郎舊截柯亭竹。寧王醉弄唐宮玉。秦庫招華不可尋。唐家玳瑁今誰屬。尺八何如鐵鑄成。水仙夜舞雌鳳鳴。江城楊柳不堪折。倚樓愁聽關山聲。草堂夜雨開金粟。淚痕洗盡湘江綠。鐵厓曾賦冶師行。玉山誰奏花游曲。八月秋風下洞庭。魚龍夜伏暮山青。鐵心譜出梅花弄。吹與羣仙月下聽。

李廣銅印歌

嗚呼飛將軍。數奇不封侯。結髮大小七十戰。惟餘一印千秋留。將軍起家良家子。得士能令士心死。無雙才氣泣公孫。刁斗行軍安足比。雁門秋老生邊塵。將軍此印應隨身。篆文劃斷瀚海雪。虹光透出天山雲。紅沫稜稜土花暈。定爲將兵作符信。謝罪曾鈐幕府書。酬功誰授梁王印。我思漢文恭儉稱賢主。禁中頗牧慕良輔。賈生不相廣不封。縱遇高皇亦何補。又聞武帝恢雄圖。丁零鄯善開邊隅。但以私親封衛霍。不使名將當單于。老去藍田甘棄置。東道行師復何意。一代威名右北平。但留虎鈕旁邊字。銅花不覺摩挲久。當年曾綰英雄手。志士成功自古難。庸夫獲福從來有。君不見李蔡爲人居下中。肘後黃金大如斗。

京口

江流萬里海天長。門戶金焦鎖建康。北去雲帆通楚越。南來戰壘贖齊梁。重重樹色開秋霽。袞袞潮聲走

夕陽獨倚篷牕。酌杯酒。隔江燈火認維揚。

郭堃

字厚庵。丹徒人。嘉慶五年舉人。

題周文矩明皇擊梧桐圖

明皇奏伎先諸伶。宮商之精絲竹靈。有時打鼓飛白雨。有時擊梧花滿庭。梧高百尺清陰接。響應琴心奏三疊。商聲一動六宮愁。颯颯涼風下秋葉。寧王玉笛相和廣。一擊再擊雲不行。女官數輩侍左右。玉顏如花珠珮鳴。我聞楚宮之材中琴瑟。多少興亡彈不出。朝陽鳳去豬龍來。蜀道崎嶇誰扈蹕。慘絕漁陽動鼙鼓。阿環寂寞成黃土。悲莫悲兮桐樹心。秋階滴碎霖鈴雨。

聽雪

寒飈一夜紙窻鳴。側耳蕭騷夢不成。布被却宜高士臥。匏尊深話故人情。微飄陋巷驚鷹吠。密灑孤篷大蟹行。永硯有誰誇白戰。當筵鷺鶴總無聲。

葉紹本

字歸安人。嘉慶六年進士。官編修。

津門道中

礪石雲山擁薊東。寒蘆蕭瑟水連空。臨河燈火千家市。橫海樓船萬里風。左輔星辰環紫極。高秋霜露老丹楓。扁舟笑我身如寄。一片歸心伴渚鴻。

悼亡詩

芳簾塵侵寶瑟橫。畫簾著地少人行。只餘玳瑁窗前鳥。學得紅閨喚茗聲。  
碧海青天不可招。廣寒人去夜迢迢。從今腸斷傳柑節。鏡破偏當壁月宵。  
孺人歿於上元前二日。

汪庚

字上章。全椒人。嘉慶六年進士。官編修。

別蔣璘齋

將爲十日飲。忽作三秋別。君懷不可期。我心誠如結。文章信有真。此事向誰說。念我同心人。山水音清絕。明日掛帆行。西風孤雁咽。

題山樓眺月圖

獨有高樓月。愁人不忍看。亂雲千里隔。孤雁一聲寒。未減登臨興。翻嗟去住難。多君棲息好。酌酒自相寬。  
有感

十里河陽散晚霞。春風歲歲逐芳華。多情一種蛾眉月。猶照牆東半落花。

張興鏞

字金冶。華亭人。嘉慶六年舉人。夢喈子。有紅椒山館詩。

秋日侍家大人坐岸舫齋時桂花盛開分韻同賦

小榭枕秋水。日夕延清霽。言從杖履游。四山引遙睇。地僻神自怡。埽石共閒憇。斜照澹疎林。白雲渺天際。盃茗佐清談。落英點苔砌。好鳥時一鳴。曲廊風細細。鼻觀參妙香。笑結無言契。

秋日家園小集

僻處憐岑寞。經旬鵲噪稀。誰攜花外屐。同叩竹邊扉。齋迴延清霽。巖秋淨夕暉。桂林香正好。留賞未容歸。

寄金蓬春上舍

忽動懷人興。層樓試獨登。溪風涼似水。林月遠疑鏡。碧碗煎茶共。紅牙顧曲曾。索居勞悵望。得句寫溪藤。

抵雄縣

無數垂楊拂玉驄。迢迢驛路亘西東。消磨春色征塵裏。撩亂鄉愁旅店中。生計總輸巢燕穩。家書難得尺鱗通。南雲瞻望成依切。幾度停鞭向夕風。

顧純

字希翰。長洲人。嘉慶七年進士。改庶吉士。有南雅詩鈔。

送陳稽亭<sup>鶴</sup>之京師

入秋積陰雨。草蟲夜鳴砌。廬居無好懷。兼之雜離思。之子宰云邇。往來親臭味。浮雲厭世情。古道相砥礪。讀書識名節。所難在處事。素立苟自堅。行藏無二致。昔子攻古文。不欲苟悅世。道重名自輕。生平葆此志。別我將之官。河堤同一醉。堤外種芙蓉。餘花含爽氣。折此聊贈君。清芳常襲袂。

酬鈕斐石<sup>樹玉</sup>

余日坐空齋。憧擾如亂絲。君日游市中。淡然脫塵羈。一卷許氏書。研慮聊自怡。興來弄翰墨。藻繪安所施。春風扇羣物。止水無淪漪。坐看月輪上。流影涵清輝。漫求安心法。相對可息機。

秋樹有感

孤幹貞心迥出塵。不隨凡木共沉淪。還期鸞鶴重留跡。無奈風霜老此身。大廈於今望梁棟。空山到處是荆榛。漢家大將思馮異。不爲江潭淚滿巾。時阿文成公初薨。

王世錦

字再陸。吳縣人。監生。官嘉峪關巡檢。有藝芸館詩鈔。

蒲褐山房詩話再陸爲文恪公裔孫。少日能詩。屢試不遇。因爲佐貳官。發往甘肅。屢歷照磨典史。又爲嘉峪關巡檢。關古之燉煌玉門。番稱羊巴喀爾。邇爲極邊苦寒之地。杜工部詩云。不作河西尉。嗚呼。

涼怕折腰。岑嘉州詩云：自憐無舊業，不敢恥微官。蓋古今同慨也。居十七年竟卒于任。故詩多嘯殺抑鬱之音。從孫芭孫稱其刻苦挺拔。而楊蓉裳在蘭州時亦相推許。

通渭書感

五月九日賊破通渭。知縣王樓走匿倉內。典史溫模自經署中。教諭劉某投魁。星聞折足。紳士李元暉率子任與賊鬥俱被害。

城不必深與高。守之有法堅難搖。官不論尊與卑。命所當授無游移。藁爾通渭縣。賊巢距不遠。民社伊誰司。致使賊滋蔓。校官只乘鐸。縣尉惟典囹。投閣足遭折。懸梁義自經。紳士李公更憤烈。率屬巷戰俱殉節。常山罵賊氣吐虹。睢陽禦寇心如鐵。男兒各自死忠貞。那同一死鴻毛輕。何爲縣令昧此理。臨難偷生人不齒。往來過客弔忠魂。指點孤城說溫李。

安定巡夜

角聲催落日。古戍起更籌。伏莽戎猶在。焚杆事可憂。終宵嚴暴客。比戶賦同仇。借問專城吏。誰知曲突謀。

官川逆回未發之先。有馬姓回民赴縣出首。邑令未卽往捕。致賊肆逸。

遣鼎伯回家詩以慰之

官途三載共艱辛。遣汝旋歸淚滿巾。萬里寧家兒有母。百年飲恨我無親。函關落日催投宿。洛水停車好問津。行到豫楊鄉路近。渡江彈指太湖濱。

宿蓮花城軍營

軍營暫宿不成眠。萬幕垂垂盡枕鐃。臥聽鐵衣傳半夜。起看玉帳自中堅。掃氛好藉徵兵力。決勝誰司大

將權聞說姦回宵已遁。星飛追襲莫遷延。

自嘲

覺句言懷當解嘲。猿驚鶴怨浸喧嘩。一官乍去蟬遺蛻。萬里將歸燕顧巢。擊柝無才安逆旅。買山有贈累知交。四安李刺史敦煌影明府玉門嚴明府高臺汪明府俱遠道餽臨林泉志遂尋何樂。課能兒孫讀易爻。

渡錢塘江

雨漲春潮江勢平。乘風飛度一帆輕。好山無數迎船出。水到桐廬分外清。

王尙珏

字若農。嘉興人。監生。以四庫館議敘。今官西林知縣。

蒲褐山房詩話。若農。字元啓。通經術。兼擅古文。而日久叢雜。尙無定本。若農從予南昌。盡發所藏。編次而收錄之。爲祗平居士集若干卷。頗完善。後從書館議叙。發粵西以才名爲巡旗。謝蘊山所知。招入廣西志局。薦陞今官。所存詩數首。猶是二十年前所作也。

重九日同人遊七星巖入棲霞洞分賦得色字

桂嶺森七峯。如斗拱南極。偉茲巖壑奇。不讓端溪特。肇慶亦有七星巖令節盍朋簪。于焉暢登陟。木落山骨瘦。野曠寬目力。攀藤捷升猿。排空矯輕翼。次第入雲表。直與象緯逼。折徑窮坎窞。列炬破深黑。蟻行穿屈曲。魚貫循偃仄。或廣廈崇樓。或重關疊闕。此中別有天。如入化人域。謂可通九疑。靈怪杳莫測。巖乳結鱗峒。肖

形謝鏤刻若鼎鑄神姦照眼生惶惑緣象以著名僧難導我識亘古積陰氣當有蛟螭匿急行問前路祇恐燭火熄扣石發鐘聲洞有石鐘仙樂欣可卽二客不我逢唐鄭冠卿遇二客飲酒樂出晤負芻曰碧空延之樂知之乎乃日華月華君也見鄭露赤雅佇仙源側晨光一線來恍如日已墜出洞乃亭午相顧各喜色歲歲賦登高此境豈易得卽事豁奇懷淋漓灑醉墨

陽朔山

陽朔富奇山厥狀失常律無草木與土峻嶒撐瘦骨不作蜿蜒勢歷亂爭地出凌霄建牙纛摩空搖健筆或銳如劍鉞或妥如繭栗高騰若鸞翔羣奔若獸逸或莊嚴若神環向作輔弼或傲岸自喜爭長不受屈或如朝玉京千行拱象笏或如臨太液萬柄芙蓉發聚合偏兩陣頽散戰潰卒縹緲結蜃樓玲瓏構仙闕神光幻離宮靈氣紛蟠鬱凡茲險怪形一一難盡述縱比雁宕山奇麗詎能匹山谷詩懷嶺環城如雁宕我來乍見之眩惑而自失大地如文章格局良不一生面此獨開窠臼真盡脫造物何狡獪惜哉此西粵

棕亭教授以新正九日招客泛湖會者四十餘人分體賦詩予不及與卽次原韻

往日邗江盛主賓而今宏獎有何人春風猶見開文讌旅迹還欣與德鄰狼籍詩篇憑甲乙時以拙稿就商蒼涼舊雨話丁辛先伯父丁辛老人與棕亭先生交善眼前大雅如君少好爲詞場護此身

年光節物並鮮新索笑簷前負手巡蜀井烹茶餘逸興紅橋修禊記芳塵儘輸風月歸名士常與湖山作



主人貴酒典衣勤。愛客鬚眉奕奕動丰神。

重過萊州留宿海山書院諸生攜酒話舊

諸子殷殷道義交。經年風雨咏雞膠。雪鴻去後迷陳迹。社燕歸時感舊巢。再到有緣留信宿。多情豈忍遽分拋。應知未了三生願。又聽羅更隔院敲。

不信今朝此盞簪。前燈款語兩情深。林花已換春風面。庭草猶含舊雨心。良會休忘宜入畫。清尊莫負且同斟。蓬山萊海無多路。有意還期策蹇尋。

馮金伯

字墨香。南匯人。貢生。官句容訓導。有墨香居詩鈔。

鄭礪南棟題礪南漁隱圖圖爲雪樵筆

雪中樵夫得樵趣。礪南漁者無漁具。形神相得衡字連。托迹漁樵久爲侶。我先識樵繼識漁。樵兄漁弟常相於。不樵不漁非善策。爲樵爲漁未定居。涼雲篩空秋暑薄。肴核口盤勸深酌。酒間示我一幅圖。綠蓑青箸元真徒。雪樵妙筆山樵比。兼多題句同璠瑒。洞口迷津誰所記。山中柯爛事尤異。闌入漁樵隊裏游。始信神仙在。人世飲君旨酒爲君吟。人生不患寡同岑。試將江渚漁樵曲。譜作雲山韶濩音。

端午後五日楊仁山招同人集春水船分韻得船字

小閣憑欄意渺然。蒲觴泛後更開筵。竭來風雨譚心地。如上江湖載酒船。七里溪光浮檻外。一奩山翠落尊前。依稀李郭芳蹤在。岸幘微吟卽是仙。

慧上人別後寄懷一詩次韵奉答

雲構翛然水一灣。息機誰似遠公閒。去時預約來時候。興在涼秋淡鶴閒。

### 史善長

字誦芬。號赤厓。吳江人。諸生。有秋樹讀書樓集。

蒲褐山房詩話誦芬從其尊人客遊秦隴。其詩鏗鏘激楚。殊有北地之風。既而從秋帆制軍於湖廣。苗民未靖。楚寇旋興。誦芬來往荆襄。日親焚突之慘。故形之篇什者。雖一哭六太息。不是過也。體材似本杜陵。而諫詞琢句。得之謝康樂。鮑明遠者居多。

抵武昌節署項大喈風諸君招集獲秋帆制軍手問詰旦卽行賦此爲別

夕陰亂人煙。曉色辨江郭。言尋漢上春。隔歲梅破萼。相攜昔雨諾。未背晨風約。流連繼昏朝。瞬息越晦朔。念我閒關至。鉅險事戎幕。對花眼暫明。燒燭酒互酌。忽指高樹影。初月挂樓角。三春去堂堂。萬馬走濯濯。泱泱戰良苦。彌望氛甚惡。楚鋒本慍狡。盛化久耕鑿。胡然作瘦狗。毋乃類毆爵。亂絲須亟斬。厝火竟自灼。舉烽徧荆襄。帶甲及關洛。廓清仗公才。戡定表王略。却思西南徼。巴漢接笱笱。龍蛇之所藏。山野遠包絡。是非扼其隘。牽合勢相薄。頗懷杞人憂。敢附魯叟諾。尺書昨催赴。袴褶亦易着。周旋惜朋簪。忼慨聞戍析。

愧無箸借籌。恐致手傷斲。夜闌不成醉。起舞亂雞喔。

馬鍾灘

半陂純浸山。水落不到土。連綿石角齊。戢戢盡南俯。平流曲猶紆。瀉影粲可數。絢知丹翠開。潤得金碧聚。螺旋一厓束。偈仄斷鬼斧。雙磯截層瀾。巖巖鷗吻吐。東西望轉賊。所過僅垂縷。松梢遞清磬。遠出蕭寺古。瓢笠計亦佳。風波意增慄。

募鄉兵

朝募兵。夜募兵。府帖火急無留停。排門比戶抽強丁。一丁百錢米一升。官爲支給以日程。宜施鄖介山嶸嶸。下游黃漢上襄荆。水陸攔截繁于星。追逐逋寇絕亂萌。費帑百萬不得贏。要使曠野皆堅城。椎埋惡少多竄名。磨刀霍霍喧相爭。十里五里險隘憑。路難澀棘敢漫行。殺人爲功官所令。手毒漸覺軀命輕。肉肥酒大羅羶腥。飽食且贍妻兒生。一賊不獲官不刑。有時斬馘羣矜能。告身百道飛如蠅。羊頭狗尾影長纓。一笑目已無公卿。昨者大將方南征。瓜期未代烽煙橫。爾曹擊賊吾亦懲。借力終恐違師貞。何當彎弧射檣槍。銷甲散伍歸春耕。勿忘軒轅歌承平。

樊城火

白銅鞮曲歌未火。黃龍墻內賊已藏。收召黨與數踰萬。徧掠丁壯搜資糧。所過村落半焦土。徑欲直北窺。

南陽將軍持重不輕戰。留屯樊口爲民坊。彈丸呂堰地扼要。斷頭一尉甘國殤。王巡檢凶徒得勢大充斥。百里素積三秋霜。樊侯遺築蔽江滸。直以一面當全襄。誰司戎柄撤兵衛。退保不復完封疆。可憐煙火十萬戶。一炬頓逐灰飛揚。投鞭南岸水倒立。郭門雖閉憂唇亡。登陴守死太守責。親率羸弱重裹創。怒雷晴空出樓角。陣雲黑壓如頽牆。將軍拊手賊圍潰。危城安堵謀其賊。吁嗟乎。危城安堵謀其賊。君看千載舟車會。猶有星星徹夜光。

聞述庵先生予告歸籍率成長句奉寄

行年七十階二品。更有文章燦於錦。書生奇福古難兼。公備享之疑太甚。登朝晚晚四十秋。銜命作伯半九州。持衡北冀多名馬。執法西曹重爽鳩。掉頭只願尋松澗。休沐經年勞帝眷。此去能忘戀闕情。重來尙致臨淵羨。聖主殷勤念老臣。扣墀封事再三陳。賦歸田似張平子。乞鑑湖應賀季真。詔許還山猶未忍。潞河風春淺淒緊。三月桃花煖浪融。一帆柳絮輕舟引。聞道郊居晚計成。江干遙指德星明。錢少詹事大昕王祿光鳴無恙袁太史盧文弼健詩酒相於意氣傾。舊築漁莊臨泖口。泖外青青煙點九。屢因圖畫借人看。果有綸竿落公手。蒲褐房通鄭學齋。禪宗儒術公能該。著書十萬嫺娘記。繞屋三百羅浮梅。門生多少監鞞側。獨我羈栖歸不得。前度常憐爨後桐。近來似著裘中棘。暫託江湘亦偶然。蹉跎攬鏡惜華顛。向人自負凌雲氣。知己難爲流水絃。苦求榮利今何補。一霎飛光疾於弩。低頭只合拜名經。舉足眞如避阿堵。戒裘粗

就待殘年仍擬讀書秋樹邊。雲亭重到非生客。頭白侯芭問太元。

### 當陽紀事

楚客頻遊處。年來却厭兵。依劉直失計。薦禰況虛名。落日隨飛鞚。翔風卷急旌。四郊多戰壘。何地置蒼生。  
聽說襄陽路。窮黎實健丁。詐侔衷楚甲。狠比毒秦涇。此輩能輕賁。惟宜用重刑。鈎聯及關洛。要處仗牢局。  
郎賊冒良民。詣官營輒身。懷利刃。乘間殺掠。以去。襄賊又混入雞民。謀以毒藥分投各城市。井水中俾斃飲者。及被獲始悉其狡。

斬關纔得勢。堅壁敢偷生。執任龍驤責。翻教兔窟成。斷虹開映影。驟雨挾潮聲。困鬪知難久。諸君速蕩平。  
既破東南二門。賊堅守西北。中巨寨。檣凡樓檣。皆爲細孔。施放鎗箭。我兵累攻不克。是日大雨。

### 襄陽紀事

竊上真如戲。枋頭悔已遲。裹糧煩轉戰。卷甲費窮追。漫礪王孫劍。虛摹鄭伯旗。莫膺焦爛賞。史筆有徵詞。  
恒將軍水都統並督官保銜。賜雙眼翎。水公總統湖北軍務。比日官軍屢失利。

太息花都督。青溪掃賊屯。直窮九折險。暝入萬山昏。竟落魚門冑。難歸白狄元。死綏更巴蜀。誰與賦招魂。  
貴州青溪賊起。提督花公連布既戰勝。乘夜追襲。路迷被害。近接四川文報。兩總戎亦同日陣亡。

今日傳中旨。祥雲爛九霄。檻車徵鄧艾。節鉞付班超。兆卜金甌固。疆連玉斧遙。酬恩公等事。協力贊熙朝。  
水總統被逮入獄。詔以惠公保齡代之。秋帆制軍銜命南行。綜理苗疆善後。蓋撤兵之奏。至是始驗。

過述庵先生經訓堂及所剏祠塾有作奉寄

如對春風貽宕人。悠然幽築遠囂塵。求插架貽羣從。欲待歸田謝雜賓。花木幾時邀拄笏。煙波終擬伴抽綸。謝公無限東山致。珍重蒼生萬里身。

諸葛武侯草廬二十韻

豈料烽烟暗。飄零至漢濱。濟時思俊傑。多難惜經綸。郡古傳耆舊。才高托隱淪。幾能生並世。不復見斯人。蜿蜿岡龍偃。飛飛瓦雀馴。後來無管樂。此地卽礪莘。少日容堅臥。衰朝肯致身。三分留宇宙。一德冠君臣。委任知何忝。籌紆若有神。虎賁嚴北伐。鑾輅肅西巡。絕魏名難假。連吳誼自親。惟當誅國賊。先在睦強鄰。歐血愚忠竭。攻心智略醇。旄頭星慘澹。陣角石嶙峋。盡瘁言終踐。歸耕志未伸。乞閒重抱鄰。矢死益沾巾。遺貌丹青永。虛堂結構新。大名懸日月。正氣鬱松筠。孰任登壇寄。常淹鬪將辰。微吟作梁父。天地正風塵。

王 灼

字子乘。上海人。諸生。有吳淞草堂詩稿。

蒲褐山房詩話。予乘少學溫李。多繁縟語。既而學宋人詩。故吳編修雲。謂其如秋山木落。刻露嶙峋。信然。生平好飲。得臍疾。以終。大江南北知名士。競相感悼。蔣立匡。張子白。徐縵雲。汪太章。裏其詩選之。

西嶺山九峰草廬

東辭光福墟。西陟銅陀嶺。綠山委蛇行。復得幽邃境。草廬何年闢。老木已生瘿。九峰羅戶庭。日夕異光景。登臺發長嘯。坐攬三萬頃。遠岫浮若沉。去帆動如靜。湖山最高處。俛仰塵虛屏。試酌白魚泉。松風送清冷。

筠莊圖爲孫緯蒼賦

我家淞水南。繞村種修竹。捐雲十萬個。日色變寒綠。風來疑笙竽。雨過若膏沐。恍泛瀟湘舟。如坐箕筍谷。今來客吳下。日飽花豬肉。胸中無千畝。那不令人俗。羨君居竹中。山環水回復。清琴對客理。素書置酒讀。何當肩輿來。經就茅堂宿。

同子白客門泛舟石湖卽送子白東歸用坡翁題郭熙畫秋山韻

湖平如鏡山如環。山侵湖影湖吞山。山光水色兩潏漾。詩人一葉居其閒。菰蒲獵獵西風遠。蓼白蘋香送秋晚。美人別去我欲愁。嘹唳飛鴻度雲巘。白門楊柳烏啼霜。青溪之陰淮水陽。犀簪繡袴燈火夜。何似越來秋水光。上方高處看落日。七十二峰青一髮。後游有約君當來。貫取橫塘酒千石。

伊道人於劉崧嵐嵐便面寫焦山圖爲題長句時六月晦日

大江昔放八月舟。恨未一上焦山遊。眼明忽覩此素筵。白銀深裏青螺浮。吾聞焦先昔居此。飢拾橡栗渴漱流。林深祗與猿鶴侶。谷遠或恐蛟龍求。隱淪逃名名愈著。青山難免人窮搜。好奇昔已詫玉局。冒險今復來髯劉。孤筇峻嶒俯滄海。一氣呼吸通瀛洲。虛堂晝靜對此畫。江風六月寒如秋。尻車神馬吾徑往。雲

峰佳處應有茅庵留。

清涼山寺

石頭古禪院。高踞石城岡。竹柏滿山翠。烟雲一徑涼。秋晴開遠岫。江色入殘陽。曠覽久趺坐。虛空聞妙香。

蒲葦塘候潮題村寺壁

柳破東風綠未能。客貪春釀醉難勝。繞籬看竹驚眠犬。入寺尋梅起定僧。蒲葦潮來船解纜。龍華鍾動塔懸燈。雪泥偶著飛鴻迹。到處題詩記我曾。

邵步瀛

字梓風。常熟人。諸生。有光音詩草。

答素容

正是思君切。俄傳有報書。綠楊人去後。黃葉雁來初。絮語憐多病。柔情恨索居。迴環看尺素。神往賦歸歎。

寄酬永昌太守佛容齋先生

息影蓬門宴始開。更無屐齒破蒼苔。天涯蹤跡三年隔。夜半音書萬里來。不是黃堂能愛客。可知青眼解憐才。蹉跎久負春明約。慚愧清時伏草萊。

新秋東蓮溪



新秋爽氣逼簾櫳。習靜人來旅泊中。雲樓精舍  
顏曰旅泊鳥夢乍驚梧葉雨。蛩吟先怯蓼花風。閒心此日清如水。浪跡當年轉似蓬。不爲逃禪聊息影。漫勞豎拂說空空。

赴黎陽過新嶺恍在永昌道中感賦一律

山行無日不崔嵬。今更崎嶇一線開。澗底水從危石轉。嶺頭人踏亂雲來。舊時險阻心還怯。薄莫攀援首重回。浪跡半生成底事。艱難空嘆馬虺隤。

夜雨

閑理殘編對短檠。靜聽簷溜落階聲。愁心恰比階前草。春雨廉纖逐漸生。

王汝翰

字西林。江寧人。諸生。

春雨

常窻不斷雨絲斜。引得苔痕上碧紗。入夜最宜新種竹。捲簾可惜早開花。關關鳥語林閒滑。閣閣蛙聲水際譁。擬辦元真青箬笠。濕雲踏遍伴漁家。  
濯遍長堤柳萬枝。潺潺恰與好春期。寒侵幽夢重衾覺。水長平橋畫舸知。芳草色濃歸路遠。啼鶯意倦出花遲。只愁綠葉從今滿。又誤尋春杜牧之。



# 湖海詩傳卷四十三

張輿載

字坤厚。江南華亭人。貢生。候補訓導。有寶稷軒詩存。

蒲芻山房詩話。坤厚性情靜穆。而體氣清羸。無心於科舉。雖例選廣文。非其素尚也。詩不多作。而中  
矩中規。無乖風雅。能操著本于尊人。玉壘玉壘本之從叔。幻花先生。蓋易道參天兩地。而倚數。故後  
來數術如太乙。下行九宮。風角。壬遁之術。無所不包。而孟喜卦氣。康成爻神。虞翻納甲。荀爽升降。京  
房飛伏。皆可袖擇而推之。然孔子獨取大衍之數。入于繫辭。因易以出贊神明。非此無以通陰陽之  
機。造化之微。而周禮太卜掌三易。皆以著爲用。其占動者。既玩本爻之辭。兼變爻之辭。六爻不變。則  
取大象之辭。左傳所載十餘條。其辭不同。周易者。則爲連山。坤乾其云。以周易筮者。則爲文王所繫  
之辭。此古來著法之大凡也。易學衰微。號通經者。亦復不知著筮。予數十年來。惟見兗州太守黃岡  
張君鳳鳴。雲南總兵錢唐華君封善。用其術。所占無不驗者。著法京房而後。改爲父母兄弟妻財官  
鬼游魂歸魂之說。及六朝以十有八變爲煩。改用金錢。而操著益失其傳。坤厚大  
抵本之易學。啓蒙而古法具在。予故命孫紹書往受其業。庶以廣聖賢之數學也。

唐六如村居圖卷歌爲姚芳激賦

吳興公子嗜好殊。愛客出示村居圖。自云此圖六如筆。珍襲不啻青珊瑚。我恨六如多贗本。魚目慣以明  
珠呼。欣然展視明兩眼。毫端神秀難描摹。煙巒一碧秋遠近。江樹十里雲模糊。天光水色浩無際。涼風仿  
佛生菰蒲。就中一人擁書坐。風流瀟灑清而癯。硯田活計不足恃。可憐紡績勞妻孥。吾聞先生生落拓。偶  
世但解絃管醉紅裙。鉛華十載南國夢。解首猶復矜區區。觀茲畫意與願左。得毋老大懷吳都。太平日月

容嘯傲。思歸耕鑿。隨農夫。世外桃源。覺荒幻。海中蓬島。知虛誣。卷圖一笑。謂公子。臥遊今日。其仙乎。

吳嵩田齋中敬觀先文敏公白描大士像

吾家從父筆奇矯。書畫出手天然好。御評八法繼羲之。十萬麻箋流布早。臨池餘技及梅花。鐵榦斜斜

皎皎。吾生已晚不識公。媿乏囊錢收法寶。法寶二字本御題天瓶齋帖一朝忽瞻滿月容。癡雲居士舊祈禱。瑞像知仿

十洲仇。心經兼摹松雪趙。款云仿仇英畫相臨趙孟頫書經送癡雲居士供養莊嚴瓔珞鬢髮髻。衣摺無多澹墨埽。得未曾有珍重

看。歡喜贊嘆熱龍腦。底須更圖紫竹林。恍疑身在普陀島。吾聞從父悟三乘。慈雲妙相由心造。是幀臨寫

更絕倫。人書到此俱已老。相見明窗下筆時。海波無聲佛日杲。留傳宛有神護持。篋衍適逢我探討。敢嗤

故友葛蓀田。屢鼎示人太草草。蓀田名沐善摹文敏公書畫

岳祠銅爵

爵高五寸六分。中容四合。重四百八十九銖。中鑄精忠報國四字。左側有小印曰岳珂建造。今

藏桐川金鄂巖家

半角山河不復存。靈祠宗器照乾坤。孤臣地下歆家祭。異代人間識酒樽。碧血長埋三字獄。黃封想紀九

重恩。珂有紀恩詩繡旗涅背墓文在。一奠南枝一愴魂。

太息紅羅輟岳旗。背嵬痛飲竟無期。君王繼統旌忠孝。名將生孫奉鼎彝。綠醕百分澆墓日。丹心一寸勒

銘時憐他魏國鎔金怨。賞與三軍世不知。張俊鎔金盤飲兵將。將官即以予之。見四朝聞見錄。

## 沈靖

字安成。鎮洋人。諸生。早卒。有葯園詩鈔。

### 游千佛山

步出城南隅。風日弄晴態。青山迎面來。婉孌靜可愛。雲霞倏興沒。林木互掩護。拾級躋層巔。聳身出塵界。冰洞竇以深。凍泉落珠琲。雪消石磴淨。苔古佛髻戴。琳宮夢響沈。諸天花雨灑。振衣千仞高。憑闌萬景會。鶴華舞烟鬢。娟然妙相對。間以蓮子湖。湖波激清籟。勝情虛十年。放眼始一快。斜陽促我歸。臨風發長慨。

### 銅陵舟中望九華山

昨過五松下。置酒恣瞻眺。扁舟任超越。奇景迭縈繞。市岸紛蒼霞。沿江媚幽篠。推篷揖九華。奇秀入襟抱。連峯旣婉孌。單椒復窈窕。木落黛更清。雲動氣逾悄。陰厓垂古藤。夕霏潤衰草。行役信悠悠。鞿愁正渺渺。濠梁莊子樂。青山謝公老。遠游豈所歡。聞道苦不早。何時弄烟霞。貞素常自保。

### 正月十九日大雪。同家兄赴吳趨。卽送其計偕北上

鬧蛾節初過。氣候益凜烈。紙窗朔風鳴。曲澗凍泉咽。晨起眎庭柯。院宇皓以潔。初疑現空花。旋訝霏玉屑。所嗟負米游。年年怨離別。阿兄上長安。病羽思振刷。辦裝本無資。內顧更憂懼。短衣不掩蹠。布被冷如鐵。

衝寒涉長途。行李致蕭瑟。眠食祝高堂。相對兩難說。同舟一夜心。輾轉夢恍惚。行矣慎羈旅。雲路白空闊。平安早寄書。屈指在三月。惘惘送遠行。依依瞻魏闕。好待東風和。冰花散林樾。

簇蠶詞

南山桑葉春萋萋。大婦中婦相扶攜。手執籠繩上山去。采桑飢蠶蠶欲齊。蠶簇編成蒿草細。密室無風紙窗閉。三眠四眠蠶長成。焚香更向蠶神祭。蠶娘辛苦蠶不知。但願今歲多新絲。不織流黃不織錦。將絲換米療我飢。誰家豔服光耀日。皆自寒閨手中出。

雨中渡清江橋

急流束縛怒不平。十里五里先有聲。峭帆無力不可上。兩岸衝激方匉匉。飛廉惡劇送雨至。打頭逆浪如雷轟。船頭高下船尾橫。榜人股慄目盡瞠。我身託舟舟託水。性命直與洪濤爭。長繩百尺當頭縈。如魚登木蟻磨行。道旁擊鼓兼鳴鉦。千夫踴躍心力并。須臾出險雨亦晴。一輪紅日將西傾。急呼杯酒坐斟酌。篷牕掩映波光明。舟行逆水總如此。風波小試何須驚。

題十八羅漢渡海圖

海天莽莽吹怒濤。騰波掣匉驚回颺。百靈雜遝蜃樓現。黎衣金縷來飄飄。寶纓梵相盡奇古。妙光照耀三山椒。一人攜杖驅馬驕。一人執拂鞭神鼈。驪龍天矯奮長鬣。猛虎馴伏無雄虓。一人合掌坐奇獸。非貓非

隸非歇。猶枯槎七尺四人立。便衣埽塔長眉飄。鯤鱗螺蚌各浮渡。蓮花蕉葉輕乘潮。是時月上風怒號。沈雲黯黯星辰高。天吳前導罔象攝。呵噉萬怪皆潛逃。神珠熠熠海童立。天琛隱隱雲旗捎。自從象教入中國。抽衣解髻元言超。阿難化身幾萬萬。玉書一册愁烟消。窮溟跣踵古所歎。亦有挂臂悲岑叟。踏流飛過著奇蹟。笑彼勺水浮堂坳。吁嗟衆生那得渡。徒示幻相愚童髻。大千世界盡極樂。何必托鉢松花挑。幾時晨風送爾去。各返靈鷲間逍遙。畫師傳神筆倦僂。無諸廚鬪窮纖毫。黠丹黠粉細點染。奔雲屑雨紛蕭騷。紙窗展玩嘆奇絕。但覺耳畔聞颼颼。夜深放歌愁老蛟。一笑辯舌豐干饒。

靈芝歌爲述庵先生賦

許慎作解字。芝也稱獨神。春風飄搖吹不起。要待和氣培靈根。我公家住九峯側。流傳世澤高名門。先人丙舍鬱佳氣。百弓地占秧田濱。惟春二月歲辛亥。墓田百草爭懷新。挺然一本最奇異。重英連葉房初分。乍疑蓬萊山頂墜。下丹鳳腦。又疑珊瑚海底現。出蒼龍鱗。不然九光七明盤。椀石崖上。松枝百丈何時卻吐凝脂痕。經時不凋亦不萎。堅貞之質同雙麟。寶光夜射七寸鏡。毋乃種自句曲三茅君。採之展玩洵可寶。藏以錦匣流清芬。傳觀四座盡色動。異瑞可以垂千春。我聞芝草本是月精化。玲瓏幻出神功存。瓊田瑤島衆仙宅。中有靈氣交氤氳。玉胎墮地色溫潤。鹿銜鳳吐各各全其真。銅池宛宛九莖耀。玉殿肅肅三花尊。王者偶獲見奇產。猶然作咏來儒臣。佳城葱蘢乃得此。遂令遠近爭傳聞。是時先生位通顯。席上一

一羅奇珍。芝生乃是得人瑞。惟家之慶實國禎。竭來歸田返初服。漁莊春水方粼粼。摩挲此芝意不厭。寶蓋熠熠含精純。入山靈寶那用佩。笑彼博戲鋤崑崙。願公沃以淇淇之甘露。覆以縵縵之祥雲。奇英世所貴。常保德潤身。金容玉華互映發。山中歲月仙中人。長歌紀瑞詞不文。傳之足與齋房露寢同芳塵。

畫山水歌贈嘉定陳進士詩庭

平生具勝情。蹤跡困株守。竭來看畫嘆神奇。大好江山落君手。吾婁畫手推三王。流傳尺幅珍玲瓏。咫尺千里縱遠目。晴天風雨生虛堂。陳侯愛畫入骨髓。論畫真能得畫理。解衣盤礴工揣摩。山真山兮水真水。當其作畫凌清晨。險糜一斗松烟新。觀者屏息不敢議。待君揮灑驅煙雲。陳侯對此雙眸定。旁人呼之曾不應。須臾落紙墨花飛。神致如生氣雄橫。乃知此事非苟成。用志定者神斯凝。包鼎畫虎作虎勢。子昂畫馬作馬形。君也胸中置邱壑。遂令下筆烟霞生。豈惟丹青擅奇絕。陳侯才調真超越。風月俱歸濯錦腸。咏歌自掉生花舌。錯被人間喚畫生。畫生名字人爭說。陳五自號畫生今年握手常相於。知君學古良非誣。好將餘事寫縑素。經營亦自開榛蕪。乞君更試淋漓筆。爲補西窗剪燭圖。

大風渡黃天蕩

橋頭五兩晨飄飄。熹微旭影涵山椒。舟行難得好風日。江平似鏡晴烟捎。十幅蒲帆疾於鳥。篷窗盡拓波光搖。金焦兩點忽明滅。鍾阜天闕紛相招。須臾逆浪如山高。沈雲黯黯風怒號。江豚搖尾作人拜。巨魚奮



鬣乘波驕奔騰。澎湃不可睹。船頭白雨如珠拋。長年色沮我獨喜。中流擊汰心神豪。陟險安能恃忠信。賦命本薄輕波濤。詩成擲筆驅靈潮。狂歌拍手驚老蛟。如斯壯遊亦不惡。笑彼蹤跡淹蓬菲。石城明日更回首。一江奇境煩鈞描。

舟中聞雁

篷窗寂寂悄寒生。嘹唳霜天幾雁聲。似爾迢遙方北鄉。有人憔悴尙東征。夢回鄉國風初厲。水落沙灘月自明。一紙家書何處寄。暮雲千里不勝情。

蕪湖江行

一棹纔過捉月亭。魯明江口復揚舲。磯頭雲氣封祠樹。山外禽聲和塔鈴。客路尙憐吳岫碧。波光遙接楚天青。行人莫唱湖陰曲。樂府淒涼不忍聽。

壽述庵先生八十

優游杖履澱湖濱。綠野堂中樂事真。南極星辰原拱斗。東山歲月自長春。名高四海尊耆宿。身歷三朝重老臣。投絨歸來俄十載。夢魂猶自戀楓宸。胸藏萬卷氣如虹。早歲聲華達九重。掌制樞庭常僂直。紆籌幕府又參戎。馬卿喻蜀文偏重。韓愈平淮筆最雄。麟閣曾聞同錫宴。書生奇遇幾人同。

常持英蕩走駢騷。帝眷良臣命屢覃。觀象乍傳虛貫索。量才又喜盡榘楠。胸襟何止容卿百。事業真兼不朽三。十畝漁莊歸去穩。杏花春雨滿江南。鬚眉如雪劇清臞。賜杖行春手自扶。白傅早編長慶集。伏生還有授經圖。皈依馬帳皆名士。聲價龍門仰大儒。玉筍班中諸侍從。從游多半是門徒。選樓高迥與雲連。盟主騷壇六十年。鐵網論才羣彥集。弓衣繡句百蠻傳。案排綈槩陰逾惜。筆吐滂葩老更妍。海內文章歸月旦。篋中行卷手親編。校讐攷訂互喧譁。正業誰人建斗杓。經術源流兼漢宋。詞章根抵溯風騷。學通今古才猷富。養到身心氣象超。更向行藏徵定力。歲寒松柏信難凋。

### 徐熊飛

字涓揚。武康人。貢生。有白鶴山房詩鈔。

蒲謁山房詩話涓揚生長吳興得山水之勝故詩多清峭風骨超然與王柳村石遠梅吳楚諸詩人絃詩門酒江湖名士未能或先阮芸臺中丞開話經精舍于西湖上招集浙中文士三十餘人而春華秋實兼攝其長者亦當以涓揚爲翹楚。

### 白蘋洲懷柳文暘

山椒激微風。陵茗媚芳澤。遙瞻隴首雲。忽憶瀟湘客。汀洲澹容與。一鳥破寒碧。波影霽澄輝。蘋花吐微白。

何處蕩舟人。漁歌遠天夕。

宿竹林庵懷邵童溪漱

僧房竹樹青。雲影在空翠。無風花自香。寂歷得禪意。山空天早寒。鐘定月西墜。風泉度遙嶺。石髮冷平地。荒徑百蟲喧。圓蒲一僧睡。入山君有期。采藥我先至。飛夢落遙天。涼秋千里思。

石遠梅釣招同邵子雨樹金雪槎學潮自支硎山抵天平兼尋下白雲洞

繫纜青楓根。看山白石路。人家交爨煙。雞聲竹中度。林巒媚秋爽。節序感新故。溪雲淡不流。籬花寒未吐。崇岡引西嶺。樹色莽迴互。飛蘿裊空巖。山鬼睇寒霧。行行就遙岑。尋途日將暮。白雲釀泉源。秋響滴巖洞。下有金光草。神仙帶雲種。入門石氣青。松鼠竄梁棟。臆隨竹籟繁。庭暗蘿陰重。空香從何來。冥心與之共。天花不著我。無勞梵聲諷。

南山四皓博奕圖

商山四老人。高帝不能致。太子在青宮。招之等兒戲。我疑留侯出奇計。優孟衣冠定其事。不然四皓已鴻。蹇與人家國。復何意。風吹長陵一坏土。商山如龍欲飛舞。英雄遺叟兩寂寥。畫圖彷彿鬚眉古。泉聲潺潺溪路長。遶山曲折通石梁。上有幽竹羅平岡。四人圍碁坐相對。耳邊寂歷松風香。浮雲隨風去不息。石上靈芝光五色。在山不奉明主詔。豈肯爲人作羽翼。黃石素書精入神。董公奇策叩馬陳。漢家舉事多老人。

姓名一種垂千春。人宮天子駭顏色。何人能辨僞與真。君不見赤松仙人不問世。意態自是無懷民。何必出而圖吾君。

仙人篇贈王柳村隱

仙人意氣凌滄洲。振衣天末之飛樓。大江西來數千里。煙波日夜窻中流。乘雲追風結遐想。落日倒景空巖幽。素琴彈清商。石上風颼颼。明月出江水。白鶴聲相求。碧桃參差已成實。一開一落三千秋。飄然從風下。吳會有時倒鞢黃金虬。太湖三萬六千頃。化爲美酒浮糟邱。仰攀斗柄對天酌。醉來不脫青貂裘。笑謂安期生。爲我彈箜篌。飛泉無聲紫霞夕。西風落葉驚梧桐。翩如征鴻不可留。臨行贈我珊瑚鈎。手無蒼藤綠玉杖。安得萬里從之游。芙蓉落青天。白雲無時休。搖草一以秀。糜鹿呼其儔。我欲揚舡弄秋色。風塵不上沙棠舟。三山二水倘相待。與君浩蕩隨輕鷗。

唐睢帶劍上殿圖

虎狼之秦誰敢撓。布衣一怒天子驚。彼何人者唐先生。干將出匣搖秋星。攬衣上殿辭不屈。叱咤萬乘如孩嬰。畫圖兀突森勇氣。劍光上逼秦皇帝。堂高九尺北風寒。貫日長虹色凌厲。先生受命安陵君。獨持大義摧狂秦。不然彤庭盛環衛。玉具那敢批龍麟。安陵之地五十里。危哉賴有先生耳。從來大勇由義立。白髮盈頭皆上指。乃知生劫非良謀。匹夫之勇誠堪羞。荊軻匕首擿銅柱。自此秦王并九州。

偕耕南先生訪金山人編

鳩鳩逐婦林梢啼。雨無其極風淒淒。鶯花一半到寒食。穠桃亂點春郊泥。今朝霽色滿平野。鴨頭水長青  
玻璃。過橋曲折苔徑滑。兔葵燕麥連荒畦。江邨自古足魚蟹。五里十里循沙隄。人家高下掩松竹。茅屋向  
背忘東西。暖風昨夜破萌芽。門前楊柳青絲齊。辛夷百尺花照眼。破籬掩映紅棠梨。孫登祠屋綠蘿擁。歲  
久寂寥成招提。粥魚齊鼓動清晝。石臺人靜風幡低。松聲一屋醒午夢。山人睡起扶青藜。我從束髮客滄  
海。好求遺逸尋巖扉。相逢何物可持贈。門前香草生清溪。影堂相對悟禪寂。吾無隱爾花成蹊。歸來步步  
踏明月。浩歌驚起雙鳧鷖。

楊蓉裳吳瘦夫石遠梅邵子雨金山王柳村同集金閭亭送蔡芷衫先生元春歸金陵

太湖秋水生。輕帆疾於箭。蔡侯渡江來。手持白羽扇。金閭門邊一相見。華髮盈頭目如電。飄然引我離風  
塵。芒屨同踏青山雲。興來題詩滿僧屋。長虹破壁搖星辰。大江西來裂地走。昔日曾攀武昌柳。招呼白鶴  
登峴首。氣吞雲夢有八九。歸來坐嘯碧山月。天下詩名滿人口。卽今七十身尙強。上山下山衣履香。西風  
鴻雁去不息。目極萬里天蒼涼。天平山中白雲洞。菖蒲花發清風送。叔夜常隨麋鹿羣。景純不斷游仙夢。  
坡前倒拖綠玉筇。濯足飛瀑摩青松。文章知已古來少。今日之日俱相逢。酒闌握手斜陽暮。笛聲吹出長  
亭樹。湖山秋色正蕭爽。草莽交情肝膽露。一夜鄉心向秣陵。復持羽扇橫江去。

同子雨宿山寺觀燒

木葉落盡山蒼然。風晴鷓鴣盤青天。江鄉十月罷農事。村舍遠近鳴烏鳶。故人招我入林去。荒徑百折東皋田。遶山行歌足不倦。松柏十丈流飛泉。岡頭佛屋壓山破。紅牆綠柱紛相連。入門洗足深夜臥。星斗爛漫臨窻前。道人忽報山燒發。攬衣同上青山巔。長虹怒飛幽谷底。一片騰出空林烟。迴飈亂捲赤龍立。電光疾掃朱蛇懸。紅輪燄鳥互出沒。影入空翠爭盤旋。雷公長驅爆山骨。丁女振彩行珠軒。燔毛燎血舞零亂。千尺遙見紅雲旂。狐狸跳跟木客遁。黃蘆苦竹空芊綿。迴岡斷壑不可阻。餘燒化作空中蓮。吾生奇氣頗自許。對此便欲成高騫。天風吹人立不定。山頭笑拍洪厓肩。歸來一枕北窻夢。鐘聲敲斷人閒緣。

訪柏谷上人

維舟訪導師。蹤跡白鷗知。水遶一村竹。花明何處籬。香臺尋舊跡。禪意入新詩。縹緲聞鐘磬。斜陽客到時。

吳梅村先生墓

靈巖山色暮雲開。高塚荒涼積翠苔。感遇自憐青史在。思鄉要乞白衣回。茂陵玉椀初明恨。江左牙旗庾信哀。依舊東風吹秀麥。牧童驅犢上琴臺。

題顧晴沙先生光旭響泉集

輪臺西北路漫漫。戀闕思親去住難。雲外蛾眉筇杖老。塞門風雪佩刀寒。文翁治化通羌部。充國聲名重

漢官歸臥九龍山下月。飄然烟水一漁竿。

寄顧晴沙先生

賀蘭西去鼓鼙聲。轉粟當年正用兵。玉塞橫刀家萬里。鐵衣磨盾夜三更。論功絕域風吹角。投老荒江月照城。絲竹登臨多感慨。未能高臥爲蒼生。

金棊

字誦清。錢塘人。監生。候補員外郎。早卒。

蒲謁山房詩話誦清生長綺羅性耽書畫嘗集明人法書刻之名清嘯閣帖尤愛潭南田筆墨搜藏獨寓所至山水勝處輒有題名詩才輕倚如幽居秋晚云蒼苔猶有色黃葉欲舞聲疎簾云隔院深疑霧齊檐不礙風寒食雨中泛湖云灑墨欲遮山寺塔殘花半露酒家樓理安寺云藏經樓抱千重樹法雨泉飛四面山亦堪諷詠年三十餘而歿西泠同學皆爲嘆惋

葛嶺

鳴泉落幽澗。始與澄湖通。葉葉釣魚艇。搖漾空烟中。沙禽白於雪。深映葭葦叢。幽尋行徑紆。忽欲迷西東。遠見江外山。螺髻紛青葱。

蔣莘

字覺夫。號于野。元和人。諸生。有水竹莊詩鈔。

林屋洞

靈山據湖濱。石路苦紆曲。筍輿自南來。遠遠度層麓。壁立千丈峰。誰人剝其腹。山根盡倒懸。仰視不敢觸。剪草除蛇虺。取經問童僕。鼓勇着先鞭。側身入窮谷。斷碣掃莓苔。鳴泉散珠玉。舉步歎泥滓。屢欲蹶雙足。隔凡別有天。不夜須秉燭。靈威尙可逢。奇字渺難讀。六書恐未通。欲往慙縮朒。

山行

山行無遠近。好景若爲招。寺古藤當瓦。溪幽樹作橋。酒帘晴撲絮。錫市晚吹簫。指點西林去。言逢谷口樵。  
曉起

疎柳剛新沐。空庭宿雨過。鳴蟲催曉急。病葉到秋多。苔老階猶滑。池平水不波。閑窻續殘夢。清境落巖阿。

蔣徵蔚

字應質。元和人。諸生。有經學齋詩集。

蒲褐山房詩話于野兄弟時號三珠。應質之名尤著。應質賦才穎異。年未二十。已能讀羣經。註疏。又通周髀說文之學。阮伯元開學。視學浙中。稱爲小友。延之入幕。編歷。浙東山水奇勝。其詩或清新。微妙。或揮霍紛紜。靡所不有。與子同至揚州。曾運使寶谷亦愛重之。在竹西歲餘。得風疾。三載未痊。恐邱鱗早還。江花已謝。不能復唱渭城也。

山居漫題

芳草有古意。白雲多逸姿。何須不得志。始臥南山陲。朝食竹閒笋。夕剪園中葵。偶然步谿上。林影吹參差。君看巖石下。谿流無盡時。



春山

春風來幾日。吹綠門前山。白雲如識我。挂在高松閒。我欲采芝去。獨行積翠灣。紫芝不可得。日暮荷筐還。月下有懷

明月照我幃。廣庭宿霧濕。空閨自生寒。不爲西風入。天高木葉下。夜永砧聲急。望望隔秋河。露涼空佇立。南峯寺

斜陽下招提。雲霧不沒嶺。隔離清磬聲。山色涵虛景。晞髮投石門。蘿雨濕衣冷。空龕下落葉。古木翳深井。高僧一以去。留此清絕境。觀泉體心涼。撫琴來鶴聽。待叩棲禪關。我識支公影。

山中晚歸

白雲生莫陰。飛度高峯嶺。但覺松風涼。不知歸路暝。循谿過蘭若。山僧入禪定。新月煙中流。微茫辨蘿徑。石公山

驚波不肯斷。斗絕數峯矗。山石備萬象。溟泮轉地軸。長風駕高浪。落葉號古木。秋色湖上來。蒼然瀉寒谷。巖乳垂離離。嵐氣森肅肅。洞擢古龍蟠。石怒猛虎伏。歸雲字罅漏。孤松一頂禿。岌巖竄麋鼠。空明飛蝙蝠。石琴與石梁。勢似鬼工築。劍樓聳天畔。雲梯架山麓。造化供彫錢。取象一何獨。是時秋雨餘。朔夜月當胸。絕頂望煙螺。卷霧波中綠。居人傍巖坳。霜清橘櫟熟。長嘯來鶴巔。試伴猿猱宿。

雨宿包山寺

雨過衆山昏。湖光尙餘景。殘鐘度谿水。言人招提境。落花滿蘭若。面佛得所請。山僧四五人。導客煮清茗。遠響振寒葉。莫鷲散凶嶺。雨止松色深。寒潭照人影。濕翠牕戶寒。坐覺秋衣冷。夜久寂聲聞。禪心半偈永。何待鐘魚清。夢覺發深省。

縹緲峯

七十有二峯。縹緲此獨尊。直上勢無地。半嶺風煙昏。罡風吹古木。天闕手可捫。驚波流足下。倒插虛無根。絕頂俯吳越。窮髮留青痕。煙驪馬蹟出。森擊東溟奔。萬山泄尾閭。蒼然歸海門。龜鼉自拜舞。烏兔爲吐吞。嗟此左神居。金庭至今存。青鸞不可騖。何由眺重關。倒景俯長嘯。壯觀誰與論。

跋萬氏石經考後

漆書定蘭臺。偉哉議郎力。張駟水經注作訓悉誤與日碑。當時固名德。皇皇闕堂門。落落深鐫刻。碑成萬手模。車

兩自填塞。雖喜聖籍尊。可惜漢運亟。洛陽旣淪陷。銅駝盡荆棘。四十有六枚。存毀固非一。正始紀衛恆。延

昌傳江式。師法無差譌。水濡而火熄。誰遣爨風馱。荷此大手筆。遭阨遇石虎。陝津痛沉蝕。兵燹之所餘。金

寒水能泐。自此下唐宋。各見樹劣則。要夫尊經功。陳留其首特。道元論碑數。紀載不可及。黃伯思趙明誠董

道洪適諸家辯無忒。寧人及太沖。踵事最詳悉。善哉萬先生。繼起奮補緝。力洗齟齬辭。論一常得十。我思

古經存。乖倍勢孔岌。苟非立碑石。參謬孰能識。亥豕帝虎文。賢聖同一泣。書僞易禮淆。此事足於邑。再拜告學人。識字本所急。

永樂二十年古刺水歌

上鑊云永樂二十年熬造古刺水一鑊淨重三斤鑊重四兩

孟養之酋吾洞南。擺古濱海種所貪。哀牢山連九隆地。暹羅大甸交戈鏖。忽哥子死沐英鎮。荒徼革面紅牌函。永樂四載始入貢。潑地那浪譯所諧。宣慰司一長官。一分疆直到茶山巘。芬陀水制厥包貢。得無遠汲蘭滄潭。深宮密合黃封署。熬成細字鑄金盃。是時南交正深入。鬼方遠克三年三。揚威查里張撻伐。土酋膽落羈靡甘。此水自隨戎幕進。甲煎沈速花香含。一甌擎至宮娃遞。氛氳願似君恩覃。御衣小炷清殿闕。船回取寶洋彝趨。北征歌凱獻捷罷。四方無事戎馬戢。以後方物計歲入。洪熙宣德蠻荒妣。土木難興失遠略。達賴蠶食何能堪。木邦孟密互吞據。六宮遂絕香篝醢。流傳小物亦非偶。控馭殷鑒知誰儻。前朝事往遽增慨。銅僊鉛淚將無愁。

崔道母伏生授經圖

入闕未除挾書律。六經燼餘紛補殘。齊南博士抱脫簡。二十有九數不刊。穎川掌故朝家令。奉詔往授智則嫻。老不能言女傳教。衛宏序語來無端。惟生壁藏有明據。正史遷固文難刪。歐陽夏侯親著錄。再傳尙得聞。兒寬堂堂漆書豈不貴。何必咿啞煩雙鬢。登來貨化語言異。後儒穿鑿與波瀾。當時實事本非是。師

古引用難詰盤。航頭僞誓太康末。古文孔壁巧索瘢。一手力掩萬耳目。出奴入主晉宋還。紛綸割限界。今古枚隨劉焯膚。無完顧此傳聞事。非一畫師今得觀崖丹。丹也。嘯張節介士。窟室餓棗廿飢寒。獨解尊聖愧浮雲。落筆深意存其閒。智囊刻削激國變。尙古與誼高難攀。弟子流傳失師說。事或可信非等閒。紛紛疑竇特障我。讀畫直作擊經觀。

謁王文成公祠

良知學始文成公。左顏右孟相離容。心齋語固出莊叟。尼山一貫將毋同。初歷曹郎見風節。龍場謫豈吾道窮。苗獠化道居非陋。蠻貊行矣本諸躬。督師電埽淨橫澗。寧藩南翰空言功。爾時讒佞惑簧鼓。九華宴坐君心通。程朱正學公豈背。後儒自作長城攻。鄉賢有派足興起。公非於陸無折中。白沙定山雜儒釋。況公並未稱禪宗。人生之蔽在無恥。赤子心足開昏蒙。庭杖旣開士習廢。闔門奔走斯頹風。公倡是學挽末俗。狂瀾復障歸諸東。試觀後來士習卑。三案與國持其終。念臺清修世所尙。系出公學追公蹤。東林高顧亦私淑。九死必不附進忠。實學之效乃若此。有明一代昭發矇。我過公里謁祠宇。真才治世豐趺隆。龍谿德洪皆嫡嗣。猖狂止一顏山農。大書壁間洗公謗。在天正氣如長虹。

海忠介公瓦章

其介可擊貪吏。其忠可以方比干。三楊死後一疏上。滿朝動色嗟心寒。市棺訣死誠如此。海瑞之言無

不是小臣犯上果何爲。談笑原思付西市。諫書紙紙飛血痕。此瓦豈是連城珍。職司風憲亦何事。不隨玉石崑岡焚。臣言是否臣不顧。再起田間清節固。瓦全玉碎豈容心。鉛刀不折名如故。稜稜圭角風霜多。有如公節不可磨。紅泥鈴處色黯淡。當時手澤今如何。觸邪不少懷中笏。可惜讒言終猖獗。休從地下說孤臣。此卽錚錚御史骨。

向友人處借崔鴻十六國春秋長歌簡之

典午之末羣盜起。七王骨肉爭相殘。鹵河豪傑盡光落。元海首事開兵端。先業奄有復五部。聰驩更代謀中原。洛陽再陷懷閔北。風塵從此干戈昏。潼關以東石虎起。曰宏曰勒開其先。是時流氏立李特。成蜀五世據劍門。趙顛燕熾孰也武。苻秦崛起都長安。五涼蠶食畢撲滅。鮮卑乃見姚襄尊。鄴城二燕繼餘閭。馮氏不守來烏丸。乞伏赫連互雄長。遂使元魏定五源。縱橫割據百五載。私書記事繁哉繁。鴻也條貫統其次。一十六國實錄存。序例既分立年表。終于馮跋始劉淵。正光之末更史筆。行世乃在宋以前。吳說之稱司馬溫公

所考已非鴻全書。知亡在宋初。崇文總目不著錄。此書自是無流傳。唐志所表百二卷。紀年乃紀江左年。今本紀年用茫散失誰復補。諸家采摭非其全。錄略別本顧先出。例以卷數稍殊懸。嘉禾屠氏創緣起。琳繼作著述。媿本之正史著其槩。參之册府究其煩。今本乃明屬遷之與其友人姚上舜及琳輩取晉書載紀北史加府元龜等書爲之者。聯貫排比亦勤苦。百卷之舊還大觀。能事直足代刊著。戰國興廢可略言。年表失傳序例闕。校以魏史然乎然。我生信書斷前

古祕籍約略能攢研。敢云傳經角嶽嶽。頗善讀史腹便便。一瓿許借感至意。傳鈔不待羅丹鉛。其書同異具可核。有其作者垂不刊。何人更補年表一。繼以序例書乃完。長歌敢用告之世。孰克勝任無愧旃。

題董香光臨趙榮祿鵲華秋色圖

明湖秋水明如練。我在江南不能見。鵲華山色鬱蒼寒。我向吳興畫裏看。此圖本是鷗波筆。點染生綃誇第一。癸辛街破草牕寒。流傳更到香光室。香光妙筆擬鷗波。平遠青山擁髻螺。無端描出單椒影。相見毫端秋氣多。雙峯秀澤橫雲表。莫徵朝嵐青未了。練帶頻將附注躡。天容畫出眉痕小。有時著意作深秋。樹杪千尋紫翠浮。兩點空蒼留不得。風烟早已徧齊州。三間屋近依山住。本是齊州棲隱處。可憐四水老潛夫。苦憶當年山下路。作圖聊復慰思鄉。一段風流未可量。只今讀畫多生趣。想見丹青各擅場。搗來我訪鷗波屋。菡萏霜清殘竹木。鵲華深惜不親游。欲乞弁陽成小築。

甲天下漢瓦歌

上有二鹿形考定爲衆鹿觀瓦

衆鹿之觀事有無。團沙鑄此形模殊。秦代山河漢家土。甲先天下徒區區。石泐金洩何爲者。可憐野火荒原下。二殺風雨暗諸陵。安用當年一片瓦。惜哉此鹿抵死爭。鴻溝以東交楚兵。三章約法漢業定。失鹿得鹿皆虛名。土石之餘存古氣。壞瓦猶留天下字。離宮百四盡寒烟。太息功臣恩掃地。函關雙峙雄哉雄。天教隆準王漢中。宮成燒瓦代刻石。以耀萬世威無窮。炎精墮地蒼鷲死。屈指黃巾蛾賊起。玉魚金盃劇悲

涼。陵谷滄桑嗟已矣。嗚呼魚鱗斑剝空。團團阿房之築開其先。倘求碎礫盟鐘鼎。我向梁閒拆一甎。

翠微菴

不識香林路。前峯積翠重。清泉迴別澗。白日淡寒松。看菊蠟山屐。隔谿尋寺鐘。空巖無俗駕。老衲自支筇。

人家

人家邨落古。修竹護深廬。小圃花苗長。荒園菜甲疏。清泉通暗井。細雨入春耬。莫問閉門客。機心未有餘。

橫山晚歸

秋氣與愁生。秋山入望清。晚鐘沈雨氣。落□□聲。渚雁思羣侶。陵苕哀故榮。歸來掩關臥。蟋蟀已宵征。

姜萊陽祠四首

伏闕臣言戇。端門拜杖時。孤忠存諫草。毅魄有生祠。折檻心原苦。銜刀命若絲。如何國卹恨。垂老獨餘悲。幾載圓扉繫。生全付杳冥。一朝寬桎梏。九死感雷霆。國步悲江左。家緣問敬亭。鬚眉如可見。冷落舊丹青。遙想批鱗日。淋漓血肉飛。生毋忘故國。死尙著戎衣。草莽終何補。銅駝不可歸。猶傳清節在。未愧北山薇。多難餘生劇。完貞事苦辛。寓公同令弟。戍卒慟孤臣。糞土傳遺命。殘碑說黨人。精靈應不作。山鬼護蕭晨。

秋月

秋月如秋女。蛾眉見一鈎。含情託斜漢。和恨在高樓。玉露盈盈淚。金波脈脈愁。自憐惆悵慣。爲爾怨牽牛。

題費處士密遺像

蠻洞歸來客。滄桑劫後身。江湖寒布褐。心史老遺民。虎口人猶怖。蠶叢句猶神。淒涼懷故里。愁絕草堂貧。  
賣藥師盧扁。平生信有之。上書辭漢日。折節治經時。亡命祗爲寇。傷懷不廢詩。如何談汐社。山鬼只空祠。  
當日蘇門老。高風邈羽翰。自從師北面。終不脫南冠。五嶽支筇過。千言給札難。等身道著在。留與後人看。  
到眼丹青古。深衣作像殊。半枯猶拄策。獨立豈名儒。展卷懷風義。焚香禮畫圖。蒼茫心事在。吾道莫窮途。

無錫高忠憲公祠

弁冕東林海內推。驅除奄豎似風雷。殿廷慷慨持清議。洛蜀縱橫奉黨魁。國體尙留垂死日。末流空屈濟  
時才。沉淵幸不同楊左。地下龜山笑口開。  
故里猶聞廟像真。遺書終在表傳人。九卿審諤爭封事。三案銀鐙禍縉紳。講學敢存希聖志。成仁纔見致  
君身。一池清水澄千古。漫說湘纍恨未伸。

蔣夔

字希甫。元和人。諸生。有青荃詩集。

夏夜泛舟石湖

暮雨洗炎蒸。涼意愜幽賞。忽生鼓楫思。渡頭理雙槳。絲絲柳垂陰。蒼蒼月初上。微風靜不波。綠水平於掌。



天空絕衆籟。神虛細萬象。遠望烟靄中。山色楞伽爽。繫纜秋槐根。明日支筇往。

倚欄

木葉下汀洲。蕭蕭逐水流。江城三日雨。塞雁一聲秋。苔合澗逾碧。竹深樓更幽。倚欄無限意。原不爲多愁。

新蟬

自汲寒泉洗宿醒。風來還向北窻迎。翠簾宰地桐陰午。臥聽新蟬第一聲。

張彥曾

字蜚文。嘉定人。貢生。

桃花嶺

繞麓幾千轉。泉聲杳不聞。衆山迎面合。一逕到關分。天遠愁飛鳥。風高散暮雲。幽懷尋古洞。修竹掩斜曛。

阮芸臺閣學招同錢可廬丈家子白江墨君攜尊過楊梅嶺至理安寺小飲

晴嵐屨屨指吟鞭。一帶松杉影接天。疎磬出雲穿梵徑。微風隔竹颺茶烟。閒攜山榼歡遊最。共叩禪關勝地偏。莫道重城歸路遠。尋詩還倚曲檻邊。



# 湖海詩傳卷四十四

郭麐

字祥伯。吳江人。諸生。有近游探梅會吟移家諸集。

蒲褐山房詩話。祥伯詩初效李長吉。沈下賢稍變而入於蘇黃。予隨行卷云。攬其詞旨。哀怨爲宗。玩厥風華。清新是尙。如見衛叔寶。許元度一流人物。不患其過清而寒。過瘦而枯。過新而穢。如姬傳儀部所云也。

九月十四日同鐵門。瘦生由六和塢放舟至范邨。游雲栖寺。畱宿僧樓。遲明下山。循九溪十八澗。至南山尋水樂石屋諸洞。喚渡西湖以歸。得詩四首。

青山初論交。見我猶偃蹇。漸行徑漸深。一曲峯一轉。夕照遠忽明。層疊出諸巘。丹黃互虧蔽。楓榭間隱顯。到此始畢呈。自悔測山淺。投寺已曛黑。麕糲勸餐飯。微行更幽尋。月上門未鍵。萬竹圍森森。羣綠不可剗。月影或中穿。下見人影短。夜深烏聲怪。山好虎心善。歸來臥聞鐘。星星一樓滿。

雲臥夜不瞑。山心曉先寤。木魚苦喚人。已具朝餐故。豈知居士心。於法了無住。老松沐朝暎。瘦竹泫宿露。竹杠一兜輕。輿丁兩僧付。褻裋意猶戀。曲折頭屢顧。蒼蒼五雲山。揮手墮烟霧。江光盪我前。上下天水素。羣山如羣龍。氣盛欲竟渡。到此忽然止。拘急有餘怒。偉哉此壯觀。橫絕見奇處。過江山不來。隔江山不去。

夙聞幽絕處。十八澗九溪。昨行所未經。逶迤尋其蹊。稍稍遠邨落。稜稜分田畦。泱泱腳底泉。清徹無沙泥。泉流自東注。少折反向西。偶逢亂石疊。嗚咽聲酸嘶。一澗有一橋。縱橫使人迷。其上烏柏楓。碧綠青紅齊。垂藤結瓊碎。甘酸同櫛梨。我僕走流汗。我行裘還披。豈云變氣候。對面分暄淒。路轉山忽高。仰面驚我低。松陰得小坐。角角噉午雞。

歸塗遵南山。欲上西湖舟。南山多洞壑。因以窮冥搜。煙霞在道旁。已過猶回頭。水樂洵清越。鏗鏘戛琳球。或云此海眼。深黑蟠蛟蚪。惜無好事人。蛇行入其喉。石屋乃呀狀。鑿佛如摩睺。其旁竟題壁。斑剝成瘡疣。山骨不自保。汝名安能留。夕陽漸催人。松風何颼颼。黃頭急歸榜。喚渡橫中流。一夕理宿夢。合眼羣山秋。作詩如追逋。但勿劓巖幽。

寄鐵門武林

山雲草莽早雲火。赤日如繩繫難墮。鳴蜩抱葉聲愈嘶。野鳥闕園口尙哆。樹杪寂無一葉搖。草頭時見數花妥。茶瓜不甘聊入脣。几榻如焚屢遷坐。倦鋪枕簟苦沾濡。怒及蚊蠅亦么麼。得時看逞炎官炎。失咲眞成裸蟲裸。高臥北窗病未能。夢想西湖近尤頗。一方明鏡滑琉璃。萬柄蕩花紅髮蛾。縱無涼月照嬋娟。尙有明星燦嫋嫋。故人欲去我欲來。前約未忘今未果。襍穢應知觸熱難。招邀試待新涼可。免目雖黃未要忙。鷗波已白且遲我。

七月十三日西湖夜泛作

去年七月西湖住。賓從風流盛詞賦。今年又復來西湖。滿眼青山故人去。青山不比故人好。笑我今年去年老。白傅堤邊漫溯洄。黃公壇畔能潦倒。湖船小小如缺瓜。亦有二八吳姬划水風。微波急打槳。涼露已溼紅荷華。游船外湖裏湖過。眼中之人無一箇。船頭獨酌仍獨謠。仰看白月如槃大。

錢武肅王小像。前有開寶二年四月初七日追封制書。後有岳忠武紹興八年讚。

錢王何人熊豹姿。奮臂一呼去如雲馳。羅平妖鳥奈何帝。縛此自取真王爲。宮中漏下龍不睡。江上潮來犀弩利。指揮畫斷十四州。三世開門節度使。譎諫能容羅隱狂。豐碑尙得蘇公製。想見英雄顧盼殊。山頭石鏡凜髯須。至今孫子雖爲庶。猶抱丹青舊畫圖。玉帶錦袍神颯爽。隆準豐頤更廣顙。璽書傳自開寶年。上有芝泥大於掌。更有雄詞讚者誰。淋漓大筆蟠蛟螭。諦觀姓氏紛涕淚。細讀詞意悽肝脾。當時南渡倉黃極。名將中興首鄂國。百戰肯令牧馬南。十年定擣黃龍北。一朝和議紆邪蠱。生縛將軍如縛虎。埋冤三字死風波。格天一德從歌舞。誰言夢裏索錢唐。再世遺留戀故鄉。稱臣不惜朝廷小。帶水依然吳越王。此說荒唐我無取。如此雄姿肯低首。當年倘復得將軍。朱三爾是何雞狗。一卷分明見興廢。兩朝南北須臾事。龍節虎符蓋世才。握拳透爪忠臣氣。好語諸孫須世守。會與世家垂不朽。君不見鐵券文殘金墮荒。金陀巷陌亦蒼涼。錢王祠廟岳王墓。士女年年弔夕陽。

詠史

威弧弦矢直天狼。逆命公然敢跳踉。都尉自誇羊胃爛。文成人說馬肝亡。軍前星墜秋如雨。幕上烏啼夜  
月霜。聞道鬪雞諸惡少。爭攜刀劍事戎行。  
干戈蠻觸漫紛紜。伊洛縱橫雜蟻羣。惑衆王郎元卜者。報仇呂母號將軍。矛頭日漸輸邊米。盾鼻先傳露  
布文。肘後明年印如斗。不知若箇策殊勛。

仰蘇樓卽事和湘濂

雨後看山分外清。斜陽不分作新晴。樹搖殘滴有時響。雲與暮煙相間生。偶愛綠陰成久坐。何來橫竹有  
奇聲。老僧笑指蹒跚客。偏向石頭滑處行。

歷亭丈招同奚鐵生朱鐵門同集待菘軒次歷亭丈韻

江湖牢落總麇才。到處難逢笑口開。滿眼青山秋士老。打頭黃葉酒人來。深杯百罰何辭醉。此事千秋莫  
便推。聊作歌行歌主客。黑雲堆墨又相催。

積雨

三句未有幾朝晴。稱體綿衣尙覺輕。湖上小桃三百樹。一齊彈淚過清明。  
卷幔縈窗暗斷魂。小樓長日似黃昏。一春生恐忽忽過。政要焚香與閉門。

徐 葵

字佩雲。蘇州人。諸生。有澹如近草。

戊午三月十一日陪王述菴錢竹汀兩先生潘農部蔣司馬段明府方臺山金雪槎王价人戈小蓮集袁君綬階漁隱小圃賞牡丹分韻得朗字。

嘉客乘輿過。名花得雨長。良會隨景光。高懷藉跌宕。小亭登頓高。仄徑延緣上。裴褻俯清池。屈曲過書幌。霞光蒸曲欄。花叢謝塵埃。枝枝麗于錦。朵朵大如盃。看花明老眼。賦詩共吾黨。雅韻蘭亭拈。吟社月泉傲。卽景寫性情。豈止愜幽賞。撰杖春風和。縱目天宇朗。名園幸追陪。鄙懷異疇曩。

喜雨詞

麥喜晴。禾喜雨。三麥收。秧針吐。一雨十日苦爛麥。十日不雨愁枯禾。麥田雨少秧田多。太平時雨無差訛。或歌天雨金。或歌天雨玉。不用呼人同踏車。好向茅簷穩睡足。

馬將軍歌

將軍諱定國。官福建南路營守備。康熙五十四年朱一貴之亂。力戰殉難。其孫鳳池述將軍遺事。爰作長歌記之。

朝呼鴨。莫呼鴨。鴨與妖。賊擐甲。一貴本農家子。幼養鴨爲業。每叱鴨。鴨皆成伍。愚民異之。遂擁之作亂。臺灣城中將軍守。臺灣城頭墮天狗。

海水起立飛妖氛。將軍開城揮三軍。跳刀走戟何紛紛。十盪十決莽如雲。何事城頭鼓聲死。守陴軍爲賊人使。將軍守土關存亡。轉戰已無麾下士。白首親兵也大成。短衣匹馬相隨行。賊人注矢弦不鳴。環呼將軍是好人。我輩戒勿戕其生。將軍聞言忽噴喝。賊不我殺我豈活。急揮大成速突圍。他日呼兒收我骨。拔刀自剄血灑空。以血塗袂盡盡紅。手付大成成泣受。身僵直立橫屍中。賊人咋指盡羅拜。是將軍者真鬼雄。天兵迅掃檣槍犇。大成幸保將軍門。郎君間關歷戰地。瞥見高冢巍然存。將軍義不葬賊手。敢道骨寒今已久。啓土爭看忽大驚。異事流傳萬人口。五十三日顏如生。昔日刀瘢痂結成。吁嗟乎。將軍忠勇信無敵。將軍英烈真如神。同時死難歐總兵歐陽凱許副將許雲馬。將軍事未聞朝野。大書特書不一書。以告采風入史者。

袁綬階招集漁隱小圃賞柱

城西桂花多勝境。塔影

建即蔣園今建白公祠

雲蔭

蓮在白蓮溼

常游敖。一爲僧寮一別墅。苦無地主供香醪。袁君漁隱築小圃。圃中花木紛周遭。主人讀書常閉戶。每逢花放招同袍。臨池桂花數十樹。枝枝爭與書樓高。小山叢桂軒在五硯

樓下深秋開作衆香國。餘芳散徧楓江臯。連朝陰雨忽開霽。日光淡淡明堂坳。滿庭芳透芍藥醬。一林花滴珍珠槽。鼻觀但聞香隱隱。酒場不覺羣陶陶。天公似爲花護惜。特教我輩揮吟毫。江干日暮促歸櫂。寒山

古寺鳴蒲牢。



秋日書懷次南雅韻

雨風聲裏掩蓬廬。兀坐悠然萬慮除。畫虎羞邀名士目。塗雅偶學古人書。庭前野卉憑榮落。天外浮雲自卷舒。最是野王新句好。夢來栩栩醒蘧蘧。南雅句

王槐

字茂階。號丹宸。錢唐人。監生。有廢莪軒吟草。

蒲褐山房詩話。茂階因業吳鹽。寓居婁水。然不善生殖。每至屢空。性好吟咏。無聊賴。則爲五七言以發之。牢騷困頓中。亦往往肺腑。橙枒見于翰墨。從蘇君加玉學詩。大抵出入於賈孟皮陸。而風骨嶙然。獨傾心於余。暇輒擊舟過訪。談詩竟日。而後去。揆其品格。當在逸民獨行之選也。

先游東山至乾元宮

城中駐烟霞。幽禽喚早起。西山實奇崛。反從東山始。譬食甘蔗枝。欲使味逾旨。磴道盤高空。梵宇隔塵市。山下俱禪寺。游山者由寺後而登。林風卷衣裳。雲氣潤膚理。久未覩山色。觸境皆可喜。上登乾元宮。突兀山頂峙。水田布僧衣。人烟聚壘底。東望海一杯。微茫辨沙沚。西山隔城垣。奇勝略可指。頗聞盛三春。游人等蟲蟻。時過不復尋。經年絕游履。乃知世事乖。趨炎到山水。山靈苟有知。毋乃抱深恥。嗟余困塵寰。愛山入骨髓。今日始得償。胸中聊一洗。倘得一畝宮。棄世真敝屣。日落尋歸途。烟凝暮山紫。

橫山曉起

蒼松高矗天。白日不到地。忽聞竹雞聲。游人不能寐。徘徊草堂前。山光擁朝翠。胸懷淨緇塵。衣袂流雲氣。世人漫求仙。神仙此何異。

山川不在奇。靜者得真味。攜筇出門去。信步隨所至。春禽覓食喧。松巖見人避。所嗟不能留。烟霞空結契。倘遂買山緣。與世當永棄。

王 豫

字應和。號柳村。丹徒人。諸生。有種竹軒集。

蒲謁山房詩話。柳村居潤州之翠屏峯下。在大江南岸。正直金焦。江雲海月朝夕在几硯間。故其襟情瀟曠。超然物外。僅與詞客梵僧扁舟來往。顧數訪予三泖漁莊。從容談藝。得知其所造。詩宗劉春虛。王龍標。諸人。長於五言古體。古文亦似南宋人小品。

城南訪鶴山

山空景蕭然。以意適所至。百折出暮烟。一逕轉寒翠。峭壁百丈懸。風高石時墜。黃葉斷溪流。石橋通古寺。遙見山人居。雲房鼓松吹。策蹇往造之。但話桑麻事。擬待梅花開。同君十日醉。

石湖小憇

閒遊石湖濱。逕入湖邊寺。四峯分夕陽。一帆落空翠。明鏡蕩白雲。風引荷香至。緬彼盟鷗人。范石湖有道遙此高寄。淡然客思清。湖風吹薄醉。

棲霞寺東峰

皓月出海上。忽照東礪松。露下衣袂寒。石氣青濛濛。昔聞明高士。結屋棲茲峯。或言九節杖。化作青夫容。遺跡渺莫覩。崖壑秋烟封。予將鍊金骨。擬來殮紫耳。

秋日寶蓮菴同吳樸莊作

高閣闕寒翠。懸崖入大荒。江光浮樹杪。山色淡斜陽。芳草不成夢。蓮花何處香。寤歌誠足樂。況在水雲鄉。

翠螺山

山抱螭磯壯。江涵螺髻秋。曉風吹翠雨。都入謫仙樓。此地足高詠。蒼烟生古愁。美人碧雲外。疑挾鳳鸞游。

初冬村居寫懷

愁絕鬪辭酒。交多轉避名。霜嚴凋樹色。風冷助江聲。茅屋少塵事。田家多古情。著書擬閉戶。休更負平生。

蔣炯

字葆存。錢唐人。諸生。有蔣村草堂稿。

蒲褐山房詩話葆存所居西溪西南十餘里。山環水轉。宅幽勢阻。長松古檜梅花竹箭。彌望無際。中有陂田數千頃。澄湖曲址。復與烟嵐相間。蔣氏聚族而居。饒種稻魚蝦菱橘之利。屋數十椽。聚書萬卷。葆存摘蔬淪茗之外。羣研鉛槧。物外翫然。詩學中晚唐。散體文學三蘇。長于議論。浙東西名士多聞名而訪之者。高情朗志。卽不主風雅之盟。亦當爲山澤之癯也。

西溪舟行玩月

溪行隨岸轉。面面與月遇。月色不讓人。當舟占先步。羣山爾何來。若與月爭赴。寒翠半蒼茫。渺若隨烟霧。時見清輝流。散在隔溪樹。山盡月復來。照見前村路。

冷泉亭納涼。同李光甫作。

風泉生夜涼。月上古松頂。石亭無人行。峰峰散秋影。窅然倚迴欄。心空萬緣淨。入秋憚餘暑。趨避苦無境。誰知深山中。四時水長冷。僧廬如可惜。終年此習靜。

冬暮自南塘歸杉墩

冬溪無近渡。水澗港路斷。溯洄遵古塘。白午每及旰。寒山若迎人。隱見殘蘆岸。移時入前浦。溪狹如在澗。進退隨水勢。微路爭一綫。回思三月時。桃花春水漫。到門無十里。快若坐雲漢。隆寒縮地脈。勞逸乃縣判。安得乘輕風。揚帆去如箭。

徐雪廬過訪草堂。是日適探梅花。天柱山。愜然有懷。

我家風溪南。君家風溪北。溪水日夕深。思君意無極。相思不相見。渺渺含春愁。空留溪上月。照君梅花樓。種梅憶西溪。探梅向天柱。遲君盪舟來。我又入山去。九峰多白雲。見梅卽思君。欲折瑤華贈。恨乏山中人。歸來誦君詩。清言敵瑤玖。悵君不少留。醉我梅花酒。梅花開又殘。漠漠溪風寒。春心欲飛渡。愁隔大遮山。

晚步西圩

明月溪上來。照我柴門樹。幽光散積翠。因風化寒霧。風定霧旋合。溟濛若無路。林隙露溪光。水月漾成趣。安得命扁舟。溯洄向前渡。

響水巖

探幽步易窮。緣澗屢得路。潺潺不知遠。導入泉深處。巖迴澗復折。巨石忽橫布。至此羣流匯。奔騰勢陡住。雲根伏萬竅。水脈暗傾注。急若雲璈鳴。清如玉磬度。迴環無定響。節奏自成趣。跌坐臨長林。靜聽發深悟。山鳥時驚飛。亭午滴殘露。

西方庵觀雲海

西峯時險絕。峭壁摩蒼穹。宛轉陟梯級。直下無留蹤。僧庵若鳥巢。鑿石安房櫳。松煙落禪榻。化作朝嵐濃。虛檐納空曠。萬山羅心胷。須臾見鋪海。白雲生逢逢。羣峯類萍浮。出沒波濤中。晃漾迸奇彩。倒浴金輪紅。積氣久始散。漸辨天宇空。振策上崖岨。衣袂吹罡風。

犁田曲

削木爲軌橫牛脊。駕以長犁約三尺。麻繩雙絡垂牛腰。膝高水淺行易勞。駕牛老翁頭盡白。叱牛揚鞭雙蹠赤。牛行在前翁在後。人牛齊心復齊力。雨犁水田土易勻。旱犁阪田多苦辛。牛毛半脫牛尾掉。驅牛不行翁怒噴。歸來解牛放道左。大牛嬉游小牛臥。年年犁田無盡時。問翁那不鬢成絲。

### 何元錫

字夢華。錢唐人。監生。候補主簿。有秋神閣詩鈔。

#### 中秋後招同人集張園來青閣

西郭幽棲地。尋秋倚薄醺。柳疎先受月。波靜欲歸雲。旅雁還求侶。沙鷗總戀羣。何當樓上宿。花雨看紛紛。

#### 淮陰釣臺

劉項興亡代幾更。釣臺三尺尚崢嶸。早知推解翻成餌。自願綸竿老此生。渭水後車王者夢。桐江高臥故人情。可憐一樣投緇處。只有淮流怒未平。

### 姚椿

字春木。華亭人。監生。有望雲集。

蒲禍山房詩話。春木無所師承。而才情宏放。正如天馬凌空。不宜羈勒。由是而充之。則所謂詞源倒流。三峽水筆陣橫掃千人軍。足以繼吾鄉趙升之張策時而起也。自蜀還吳。正值潢池寇驚。直書所見。有杜白新樂府之風。予嘗勸其知古知今。積爲經濟。無以尋章摘句。搜僻矜奇。至獨角麟類于萬牛毛也。

#### 舟發錦江

十八游京師。出門道路長。二十還成都。入門拜家慶。侍養及二年。出入常在旁。昔乘劍門馬。今上錦江航。此行分安穩。反恐傷高堂。東望陣雲塞。阿翁猶嚴裝。文書事填委。戎馬氣慨慷。若非急壻除。病軀何能當。

阿母性淡泊。不索甘旨膏。軍中及途中。兩兩勞衷腸。唯當勉加餐。毋使心旁皇。我歸婦始來。計程八千強。今去婦如子。何以事尊章。無爲行役艱。望遠意感傷。

舟過長壽感賦

嘉慶之三載。孟夏月上旬。舟行發巴渝。薄莫瀕江濱。因思去年冬。此邑遭黃巾。傳聞意尙惻。何況目睹真。一山在城西。廟宇黯不新。不知何王宮。樓觀棲微塵。棟梁未盡圯。階級猶可循。劫火所偶遺。此亦靈光倫。折行人禹席。明德昭明禋。謂當食萬年。何意荒荆榛。內有前縣令。坐繫經年春。守土弃土走。何以腰垂紳。謀告反得死。何以謝萬民。席前雙桂樹。圍大容專輪。曾見探丸來。烈燄飛城闔。我欲從之語。無言獨含顰。偶焉遇牙郎。爲我瑣細論。自云有父兄。同來達巴岷。與君爲同鄉。身亦江南人。嗟哉爲利謀。豈意遭難屯。先是警風鶴。寇至聞比隣。令當靜境內。大義慷慨申。民心旣以安。士氣亦以振。常時乏備禦。臨難猶逡巡。游偵彼何辜。乃向長流湮。靜鎮爾豈能。聞賊意則瞋。城中擊鐘鼓。城外叢棘種。此地高踞山。其下爲通津。寇來何坦如。不用設距堙。官守死其職。去就民所遵。縣令倉卒逃。餘衆尤私身。擠排大江中。戢戢爲魚鱗。親戚誰復知。但聞呼救頻。縣尉獨守廨。平日頗寬仁。賊渠知好官。摧磨使之馴。願爲厲鬼死。氣結不復呻。元戎率滇師。解圍策如神。首問失城罪。有喙何能伸。章綬宜在腰。積貯宜在困。狂狴宜有囚。庫藏宜有銀。一一皆自服。爇俟軍事竣。獨惜十萬家。一炬皆泯泯。至今月黑時。野闊飛青燐。衆者化爲少。富者化爲貧。

弟行尋其兄。兒啼號其親。身亦有父兄。欲問無由詢。孤身客佗鄉。已矣長含辛。吾聞此言悲。涕泗橫無因。蜀中苦兵久。惟有呼昊旻。作詩紀姓氏。尉張令則陳。生者戒守吏。死者勸爲臣。

上闕天鋪

朝過牛皮菁。莫過闕天鋪。兩險皆絕倫。我行一朝莫。爲貪利涉途。勇往力須努。巉巖排雲起。曲徑屢愁誤。一氣數十折。輿石兩觸迂。輿旋竟無地。石滑不受履。其間土扶寸。插腳僅能步。出險心稍夷。不敢重回顧。所恐記憶真。夢魂醒猶怖。前臨走九坂。嶄絕下山路。

十二夜幾失道。隨月行二十里許。夜半乃達旅店。

水行月莫春。陸行句初夏。朝發迎日東。夕宿已及夜。奇險飽已經。氣結不能咤。初疑連岡斷。謂是達平垣。豈知岸勢失。輿從出石罅。輿底擊有聲。石巨步難跨。前升後益俯。趾高身乃下。危橋彌凌兢。僅以二木架。飛流百道泉。其下迅噴瀉。舉足足退縮。欲進無可藉。鷗鴉如兒啼。作意使人怕。此橋劃然裂。此身與之化。空山人煙稀。秉燭向誰借。天帝知我愁。亟遣素靈迓。雲中爛銀盤。何異夜珠假。崖根行復息。彳亍達旅舍。作詩記涉險。浩歌淚盈把。

過垣

楚南但苦旱。勿憚水荒涸。此中有健者。激水使之濺。中流峙巨垣。一里數回旋。簸舟聲若灘。灌田利同堰。



水車圓如環。四角相貫穿。雙木丁字橫。虛中受以轉。出水幾丈餘。倒向岸頭捲。天風吹不動。飛雨灑白練。鏗然琴箏鳴。水樂奏一片。船從東南來。輕舸苦難牽。我行船稍巨。懷安意所便。長年自云強。久行勿辭倦。毋爲小敵怯。出死力與戰。哀哀邪許聲。聲盡不能嘯。叢叢短木立。記里如置傳。船底寧有棧。相觸響忽遍。篙師據地撐。自顧性命賤。却羨下水船。急卸速于箭。

見山中采煤者。以詩告之。

五行火無質。乃自佗物掇。油與薪炭外。煤賤利莫奪。惟患伐取艱。山根恣搜括。洞深杳無底。洞口丈餘闊。墮落黑海中。側足無路達。斧斤聲丁丁。地脈刻意割。十步置一鏡。照見腓無胘。冥行歷寒暑。食盡耐饑渴。掘久山骨空。當頭壓肩骸。生理獨何辜。一崩百夫闕。或鑿水脈通。橫流勢難遏。受此山水災。九死一或活。面目誰復識。皮骨使疑脫。錢刀亦錙銖。性命竟豪末。無煤用猶濟。無生意所怛。我欲封此山。毋使山靈聒。

瀘州聞滇黔官兵過境

城中擾攘雞犬呼。城外慘澹人煙無。官行索吏吏走匿。市兒大號兵過途。兵來滇黔亦非遠。一身無功意驕蹇。前驅供頓聲勢張。役夫嗷嗷日將晚。欲來不來行遲延。口索夫馬意索錢。倉卒使爾悞軍限。高貨急納充腰纏。可憐縣官受噴責。吾爲爾民來殺賊。此曹平時性命輕。身到疆場反愛惜。蜀道當關重一夫。頻年征調困軍租。却思丞相天威遠。六月炎蒸此渡瀘。

夜泊醴陵

山勢低連岸。江聲曲抱城。晚霞天五色。新月夜初更。柝斷還鄉夢。帆催去楚程。愁聽笛中調。辛苦怨南征。

卻寄沈州判梅

東陽才子久從戎。把首韉刀氣轉雄。萬里行吟孤露後。半生遺恨履霜中。狂能慢世醒猶醉。詩到窮人拙亦工。莫爲近來豪興減。渭城無暇唱忽忽。

將抵龍潭

山行十日憚途長。暫喜嚴程此卸裝。身帶雲歸衣尙溼。林吹雨過草微香。尋詩境每招奇句。出險人如到故鄉。撇却蠻中風景劣。扁舟直爲下辰湘。

枕上口占

寂寂徒供鄧禹嗚。飄飄未受馬卿知。狂緣病減先嘗酒。懶與愁兼久廢詩。春色二分人去後。雨聲一夜夢回時。無端驚聽簷前鐵。猶道軍書劍外馳。

楊文蓀

字秀實。海寧人。諸生。有述鄭齋詩鈔。

紫雲洞

空青孰擘碎。腹裂下疑井。峭聳驚鬼工。窳穢異人境。短笻力安恃。步跼不敢猛。石縫陰飈吹。颼颼入肌冷。圓穴耽微光。一綫透巖頂。翻訝造化力。有意示奇警。虛房滴乳泉。佇聽心亦靜。轉轉出幽竇。驚魂夢初醒。

同蔣蔣邨炯遊西溪

夙願慕鹵溪。茲遊出意外。同心得蔣邨。杉艇喜共載。緩櫂緣溪流。岸曲繞如帶。十里無行人。水竹互向背。遠翠皆飛來。隨雲共明晦。魚鳥亦習靜。忘機自相對。漸入彌覺佳。輞川境疑在。意愜已忘歸。興劇幸無礙。去舟尙遲遲。暮山忽曖曖。

陳曼生鴻壽招同人集第一樓分韻得鳥字

尋幽踐宿諾。理楫及清曉。隔浦聞漁歌。客來狎鷗鳥。同心得數子。登樓豁襟抱。林霏淡成烟。山容靜逾悄。百五風日佳。斯遊覺彌好。歸櫂故遲遲。鐘聲隔雲表。

上述菴先生

當時小謫賦從征。戎幕曾隨萬里行。磨盾千言朝草檄。飛書一紙夜徵兵。金沙鏡壁移師地。雅雨黎風作客情。勳業于今爍天壤。更教絕域震威名。鄭學齋中萬卷儲。精研祕籍總膏腴。禮詳郊禘宗高密。易辨蒼爻祖上虞。任筆沈詩當代重。鸞湖鹿洞衆材趨。問奇擬載元亭酒。可許侯芭侍座隅。

吳引年

字子長。錢塘人。諸生。有益壽室初稿。

蒲褐山房詩話啓侯一字雲裳。少年多病。常有憂生之歎。謁余於西湖梅莊。以詩見示。大抵前仿襄陽。後仿昌穀。清詞妙旨。人所應無盡無。

曉出清波門至長橋

夜雨霽山郭。松翠曉猶滴。徑路聊延緣。芒屨因之濕。古塔接雲氣。空亭聚野色。寓目皆天機。去住任所適。嵩棲願久違。塵網苦見逼。不及釣魚人。湖灣獨吹笛。

青煥外舅游台山歸以黃精見餉

偶隨白雲去。忽與飛鳥還。雲鳥亦超忽。安知心更閒。囊中有仙草。采之自名山。謂我久服食。可以駐紅顏。

舟過五里塘

遠樹鬱蒼蒼。揚舲向野塘。風吹涼雨過。一路藕花香。客在聞鷗外。興隨流水長。相將有漁父。垂釣亦徜徉。

游雲居寺懷胡庾香

蕭寺舊相識。今來獨款扉。秋風下古堞。涼氣滿生衣。佛共踈花靜。僧先宿鳥歸。悵然天末望。所惜故人違。

蔡元春

字芷衫。江寧人。諸生。有在山堂詩集。

初夏同人集翦湘巢

城陰得小閣。窗臨溪一灣。誰施快翦刀。翦此碧玉環。草樹蕩空水。新綠澄爲潭。湘簾一以卷。湘雲落其間。主人謝塵事。愛客復愛閒。坐中吳越彥。風雅同追攀。搖風有叢葦。窺烟來白鷗。却憶老居士。看山猶未還。  
謂連門先生。

李將軍射虎圖歌

將軍伉爽真神武。猿臂善射誰能伍。失職家居頓足舞。躍馬出射南山虎。是時太陰爲震怒。夜半盲風雜怪雨。脫幘大呼勇可賈。熊羆早已空林莽。萬竅怒號草木豎。依稀有物憑險阻。意石爲虎爪牙踞。猛氣橫穿石氣腐。石死不滯血一縷。朝來見石石飲羽。大笑疑飛馬陵弩。靜念身爲北平主。長城坐鎮如安堵。亦曾提兵從幕府。幾回投石更超距。七十戰中驅虎旅。刁斗自鳴人不語。却恨生平建旗鼓。數奇未得當前部。聲如霹靂目如炬。彎弓不殢單于父。射馬射人百夫禦。如何棄置當強虜。鳴鏑荒郊偶一舉。裂眚空看鐵色土。吁嗟乎君不見將軍射石石俱古。衛青李蔡終狐鼠。

登長干寺塔

身無羽翼飛不能。平地瞪視秋空鷹。偶遊長干逢老僧。指示古塔試一登。茲塔雄麗衆所稱。赤烏永樂剏建仍。丹樓紺殿梯層層。金碧之氣空中蒸。振衣直上雙眸凝。俯視一切殊自矜。三山迢遞排岡陵。六代宮

闕幾廢興。江搖素練何奔騰。長烟皓月同清澄。誰摘天星綴以繩。天女入夜燃神燈。竭來御風兩腋乘。放眼世外感不勝。塔從前代始崇宏。爲母資福金錢增。吾謂孝治理可徵。橫天塞地大業升。式廓丕基孫子承。齊梁佞佛轍當懲。此宰堵波安足憑。忽發高言俗且憎。遙聞大笑如蒼蠅。

古道

九折原通蜀。千盤復向秦。可憐嘶老馬。長此怨離人。冰雪關河氣。風塵豪傑身。年年楊柳發。猶自傍前津。

秋鐘

萬籟當秋肅。聞鐘意渺然。一聲清夜氣。餘響入霜天。古寺僧看月。寒山客在船。此中發深省。空外道心傳。

讀蕭相國世家

曾無奇節逐羣雄。早附眞王起沛豐。秦代圖書歸掌上。漢家根本在關中。獨追韓信知英傑。却薦曹參化黨同。諸將紛紛誇汗馬。誰能第一奏元功。

袁文揆

字時亮。保山人。貢生。官甘肅縣丞。有食蛤吟。

蒲褐山房詩話。永昌袁氏。家風醇謹。子弟咸能讀書教品。乾隆己丑。余以壽軍駐其地。時亮同其輩。從成來受業。漢中風雅久衰。今以詩鳴者。蔣太史鳴鹿。陳明府文錦。及時亮。而三人皆出予門。下時亮。又撰漢南詩略二十四卷。遺文舊事。稍存十一。亦足爲邊隅文獻。

安肅阻雨

客從新樂來。臨河方躑躅。及茲安肅縣。霖雨復相續。銀河倒奔流。通衢竟爲谷。襍被盡淋濕。轅駒等局促。主人勸客飲。言姑進醴醕。今年秋夏交。橫潦害百穀。可憐禾麻地。河魚來聚族。難言竈下薪。況問瓶中粟。且喜免官稅。吏肯莫子毒。請客更停駕。泥塗亦窘足。嗟哉農家子。苟完更何欲。寄語遠遊人。何年安蔭屋。

西巖夜泊

擬傍魚翁宿。西巖有數家。寒江明遠火。絕壁動棲鴉。衣薄風兼入。篷低雨易斜。今宵故園夢。應在水之涯。客舍獨坐有懷

客心怯邊塞。歲序又將終。日薄晴飛雪。山多夜吼風。孤吟倍騷屑。短夢只倥偬。前夕君猶共。寒飽勸屢空。晚過天心湖

秋色蒼茫接洞庭。寥蘭何處弔湘靈。日沉天際雲全紫。月到波心烟更青。四顧杳無山露影。三更徐快客揚舲。生平久有江湖興。不待而今讀水經。

舟發大孤塘得順風

樓頭縹緲與雲平。風轉帆檣曙色清。纔見雲端移塔影。便從山下聽鐘聲。地連吳楚分秦郡。水合江湖下皖城。最喜小孤先入望。曉烟霏處櫂歌行。

胡謩年

字瑀章。歙縣籍。監生。僑居太倉。有曙戒軒詩鈔。

晚過青浦

適從吳淞來。江水淨如練。扁舟信晚風。浙浙乘潮使。遠火漾中流。孤城辨鄉縣。但看雉堞移。不覺清流轉。九峯暮煙沉。螺髻迭隱現。愛此宵景幽。欲臥有餘戀。回首隔市囂。鐘聲起禪院。

晚步韜光北徑

適從鷺嶺來。散步韜光麓。山水向夕佳。映此萬竿竹。石徑歷盤紆。到眼無雜木。天風時一拂。清籟滿虛谷。僧歸落照間。鬢眉忽已綠。更聽引泉遙。泠泠漱寒玉。一笑別此君。茲遊可醫俗。

蘇餐霞點定拙稿并辱賦詩見贈率成長句一律

僻耽毫素寄遐心。把臂蘇髯許入林。自覺有情多感慨。非關無病作呻吟。劍光每向宵中發。琴理還從絃外尋。引我狂言莫相笑。古來難得是知音。



# 湖海詩傳卷四十五

華瑞潢

字秋槎。無錫人。監生。官臨海知縣。

宿松門普照寺

密竹沿門繞。危橋倚碧湍。僧樓一雨過。客夢五更寒。隔嶺猿啼樹。推窗月滿欄。勞勞行役者。何日解征鞍。

自國清寺度金地嶺

一徑緣溪轉。行行上翠微。遙從青嶂外。時見白雲飛。殘葉鳴空谷。疎煙淡落暉。入山猶未遠。已喜足音稀。

松陵道中

一帆秋色過垂虹。回首金閨煙靄中。曉夢不成黃葉雨。暮愁無際白蘋風。鐘聲隔浦藏孤寺。塔影中流壓短篷。七十二峯青未了。渡湖可惜太匆匆。

高岑

字韻苔。江南華亭人。錢塘籍。諸生。有笑讀軒存稿。

遊圓通寺

中有軒名妙心

舍舟就平陸。隨處借幽尋。潮音有遺蹟。步履來疎林。清磬一聲寂。落葉紛塔陰。徑迂引勝入。謾謾松風吟。梵宮出雲際。結構依青岑。老僧啓幽軒。儵然生妙心。稍坐欲移時。碧雲秋正深。

辛村晚歸口號

暝色忽無際。驅車返古原。亂煙迷遠樹。新月澹前邨。馬踏平沙軟。人歸近郭喧。問余何僕僕。一笑已忘言。

重至平山天桂書院卽景偶成

周遭依舊綠陰遮。鴻爪空留感物華。滿院微風飛燕子。一簾細雨落槐花。蠅頭試寫黃庭字。蟹眼初烹顧渚茶。笑我重來纔十日。渾忘此處是天涯。

施晉

字錫蕃。無錫人。諸生。有閩遊草。

斷藤峽在桂平三十里

千林頸血淋漓濕。六軍駐馬無人色。怪底村疇縛馬前。及出衣間始知賊。韓公天威信有神。么磨鬼蜮空紛綸。銳師直入取蝟虎。黑夜斫斷妖龍鱗。投戈餘孽乞殘命。捲金乃下班師令。生編生貔歷有年。爲獍爲梟豈其性。大哉仁勇來文成。書生胸中百萬兵。三十六巢朔風捲。兩堡八塞煙塵清。至今灘流勁於弩。峽裏砰訇震金鼓。尖峰怪石森戈鋌。白日青天壞橋榜。我行城東路稍紆。掛帆安穩百不虞。況逢太平日無

事。峒獠耕作安良圃。回看峽雲隔一舍。舟楫春暈在其下。弔古猶令心膽寒。雨生黑霧沉山夜。

長至後雷雨大作

疾雷迸地震屋瓦。欹枕欲碎頭怳怳。是時招搖柄指子。起例毋乃符麟經。豈知荒徼事多異。若論氣候原無憑。雷州仙犬抱雷子。月黑往往呼雷耕。惡谿靈洞神所穴。飛車急鼓交旬旬。只看兩粵一隅耳。莫怪百里非時驚。尼父居夷計未遂。若令到此書宜停。今年夏秋況苦旱。山田萬頃黃沙平。卻憑疾響警龍睡。快聽急雷翻盆傾。娟娟蕎麥吐輕素。鬱鬱病菜蘇餘青。田家得此亦良足。稍救瑣尾魴魚頰。披衣開窗看庭樹。小桃紅綻當窗橫。

炎徼

炎徼遷流客。扁舟倚短篷。草先霜已白。楓到晚能紅。身世催衰鬢。行藏著惱公。年年對搖落。得弗感秋風。

食橘

憑仗園官着意栽。人煙取次晚寒催。誰聞二叟園棋話。絕勝千奴供絹來。勻顆滿盤香欲破。寒漿繞齒感初迴。懷歸輸與兒童好。曾博衰顏一笑開。

朱鐘

字質亭。歙縣人。諸生。有謙山詩鈔。

南池謁杜工部祠

菰蒲八月天雨霜。城隅洗馬秋風涼。沿波小艇漾荇藻。紛紛橘綠橙柑黃。是時南池開景光。摳衣來謁杜老堂。紅亭倚桂花簇簇。石橋瀦水魚泱泱。詩情畫意入幽邃。參差浦溆虛蒼茫。先生遊興何悠揚。風流主簿褰衣裳。東郡趨庭蹟已杳。南池放艇名猶香。豐碑矗最蟠屋角。天章雲漢增輝煌。浣花草堂竟何在。秋風茅屋嗟飄颻。胸懷稷契剩皮骨。十年奔走西南鄉。薄游任城亦偶爾。山東李白相翱翔。何劉沈謝風格下。詩壇振起調宮商。謫仙酒樓幸咫尺。雲旗晝下生光芒。但覺高歌神鬼泣。毋乃棄逐賢豪傷。我來任城日弔古。兩公勝蹟追相羊。白雲在天樽在手。南池之水流湯湯。人生富貴何足道。隙駒電影眞荒唐。惟公詩名塞天地。金薤萬古垂琳琅。

春過嚴灘

一派桐江水。梅花十里開。人間春信至。天上客星來。片石懸清節。荒詞長綠苔。不知銅馬帝。何處有雲臺。

懷孫彭山

愁心似芳草。綠到錦官城。一夜岷江雨。春波萬里生。寒鴉驚返照。斷雁有歸聲。予亦飄蓬客。汀洲采杜蘅。

寄弟黃州

吳山楚水望迢迢。夢裏黃州又幾宵。多難逢人偏慷慨。少孤爲客倍蕭條。風塵我自憐王粲。詞賦今誰識



小閣夜坐同梅園話舊

君賦新詩我苦吟。夜闌小閣共登臨。花飛空苑餘紅雨。風定重簾透綠陰。三月春愁頻中酒。十年舊夢話題襟。別情卻憶長安月。一片秦雲望裏深。

上巳遇雨同家兄古村作寄弟東橋

對牀永夕屋西東。擁鼻微吟刻燭紅。三月風光春黯淡。兩隄花事雨冥濛。繡簾辛苦銜泥燕。畫舫蹉跎爪雪鴻。佳節故園池草綠。夢回應是有詩筒。

山中漫興

風雨湖山不掩扉。杜鵑啼斷送春歸。懷人江上青衫冷。對酒天涯白髮稀。地僻更無車馬跡。病餘已息利名機。北窗讀罷羲皇卦。靜看閒雲濕翠微。

山中曉起寄弟東橋

曉窗詩思玉壺清。竹屋茶煙聽早鶯。老樹生花春有信。寒山凝翠雨新晴。羈情客感登樓賦。隱跡人傳賣藥名。憶爾閉門能索句。鬢絲禪榻不勝情。

項壩

字金門。錢塘人。貢生。候選州同知。

蒲褐山房詩話：秋子少以詞賦擅長。乾隆庚子高宗純皇帝南巡，獻賦行在。壬寅癸卯間，子應制軍聘修西湖志，在事者二十餘人。秋子與焉。與子晨夕聚首，請益問字，執禮彌謹。爲人情狀，風雅與協。朋簪自少，卽爲倪侍郎承寬諸君所知。既而老成徂謝，壇坫久空。秋子西冷文酒之會，每月舉行。月榭風亭，籃輿畫舫，勝流交集。人望如仙，故阮中丞芸臺、謝中丞蘊山、秦臬使小岬，皆相引重。

### 湖上雨中觀桃

看花恰值雨纖纖，世事何能美必兼。亭館霏霏紅霧溼，水波淼淼碧痕添。老來遇物情多感，興至逢人韻強拈。幾日禁煙期又近，好同覓醉趁青帘。

### 雨情

乾鵲呼晴雨乍收，曉寒猶着木棉裘。楊梅盧橘垂垂熟，又近陂塘五月秋。

### 胡量

字元謹，號眉峰，長洲人，監生。

### 七里灘登嚴子陵釣臺

瀧聯峯亦迴，緣源造幽境。面面青芙蓉，七里開奩鏡。聊放一葉舟，雲光忽遠映。灘聲雖聒耳，神閒氣適定。野禽隔屋啼，江天轉螺逕。釣磯何崑崙，登嘯衆山應。緬懷羊裘翁，占此巖棲勝。清風邈難追，弔古發微詠。夕陽在岡巒，萬籟入虛聽。

### 上巳日西山道中遇雨雪舟上人留宿何亭有懷崧嵐居士

修禊過蘭若。清禪訪道林。澗聲喧晝夜。山氣變晴陰。蔬笋嘗兼味。鶯花入苦吟。有懷江上客。半臂峭寒侵。

飛來寺

荒江浩淼瘴雲邊。古寺飛來不計年。鬱鬱松篁遮曲磻。層層樓閣護輕烟。品泉僧爲畱清供。題壁人還結淨緣。卻笑芒屨行萬里。雪中鴻爪總茫然。

袁廷禱

字又愷。號綬階。吳縣人。監生。

蒲褐山房詩話。又愷六俊之後。荆州太守。繼玉。其從高祖輩也。嗜風雅。好友朋。又得王岡齡小停雲館。楓橋水西來。透其前。中爲漁隱小圃。有貞節堂。竹柏樓。紅蕙山房。楓江草堂。吟暉亭。五硯樓等十。六景。樓四見。楞伽。靈巖。諸山。花藥扶疎。實朋。禽集。子與。曉微。少。皆爲文以記之。後有撰吳地記。吳都文粹者。所當採錄也。

五硯樓

所藏先世遺硯

先澤在硯田。經訓是菑畲。灌溉若穎發。筆耕信非虛。開窗面平野。樓中看荷鋤。

吟暉亭

孤亭對初日。幽砌露未稀。離離見寸草。融融樂春暉。吟哦東野句。零淚沾衾衣。

夢草軒

一榻近池塘。獨臥布衾底。忽聞魚夜躍。根觸披衣起。年年春草生。謝夢今已矣。



洗硯池

舍後有清池。池清可洗硯。綠縠縞千層。冰輪沉一片。風吹翰墨香。青蓮生水面。

信宿靈祐觀呈少詹夫子

問字隨函丈。精廬信宿居。方言徵記載。雜詠寫樵漁。林屋題名字。仙壇放故墟。當年無礙子。住此樂何如。

借鈕匪石周懶漁遊東山翠峯寺和懶漁韻

山抱招提古。人行積翠中。重雲寒釀雪。幽壑暮雲濃。題壁推邦彥。尋碑憶不空。言歸望湖渚。漁火影微濛。

陳基

字竹士。元和人。諸生。

湖莊卽事

鳥亦知晴好。芳林振羽過。曉寒臨水重。春夢近花多。客到惟看竹。池寬合種荷。畫簾風動處。吹酒綠生波。

山夜有憶

待月空庭夕。茫茫離思多。吟蟲依落葉。高樹瀉明河。道遠書難寄。山寒客少過。誰憐今夜夢。更繞洞庭波。

陳達

字吉甫。青浦人。諸生。有東橋詩鈔。

中條山

王官谷口晝冥冥。曲逕尋幽一騎停。烟外鳥啼千樹碧。雲中樵唱數峯青。新愁驛路沾村釀。故宅司空問草亭。如此溪山容小隱。好攜琴鶴訊山靈。

明州鎮海樓

憑江俯海古明州。戎馬烽烟異代愁。越國山川推重鎮。唐家節使盡通侯。時清罷擊千門鼓。海晏晴開萬里秋。笑語燕齊迂怪士。三山何處問丹邱。

方燮

字子和。南安人。諸生。寓居吳縣。有雪鴻樓近榻。

早春歸自北平。艤舟郭門書所見

二百五長亭。歸颿帶曉星。燒痕連夜赤。山色過江青。近郭門還閉。當花檝暫停。桅前雙喜鵲。先我到家庭。

居庸秋望

觱篥吹殘一夜霜。關門曉色辭蒼蒼。長城飲馬千年窟。大漠呼鷹百戰場。絕徼土田歸版籍。大平邊塞盡農桑。堪憐落木蕭騷裏。猶有飢烏覓稻梁。

鈕樹玉

字非石。吳縣人。布衣。

蒲褐山房詩話。匪石早營貨殖。往來齊魯吳楚間。然性嗜縹緗。又好校讐。攷訂。遇有漢魏善本。及經世之書。必錄而藏。非並通音律。予嘗告以古樂久亡。東晉時僅存鹿鳴魚麗四首。後并無之。今欽定詩經樂譜。取三百篇。悉註以四上工尺。且將簫笛琴瑟而盡譜之。君誠好樂。能舉是書商諸同志。擇優伶數輩。絃習俾古音復著於世。實六經之鼓吹。而藝苑之功臣也。

冬月贈戈大襄

一櫂沿清流。得與幽人晤。鷺聲遠市闌。微陽隱半樹。耽此曠朗懷。不辭來往屢。紛華謝外假。素履任坦步。既殊沮溺流。亦無仙佛慕。悠然觀所尚。自適有餘裕。

己未季秋陳大鴻壽招集小園繪圖索題

疏林澹秋氣。天宇轉高爽。適然偕同調。一往延心賞。茲園雖近郭。面勢頗寬廣。潛鱗樂深池。飛鳥脫塵網。良友豈易逢。佳辰足俛仰。短韻激清商。長嘯振逸響。陳君今謫仙。超絕誰能做。雲夢具曾懷。烟霞出指掌。中夜爲此圖。流暉月正朗。異時儻重游。風景殊可想。

楊之灝

字箕山。婁縣人。諸生。

月夜江行數百里

日斜初上漢口船。月出已過道士洲。臨流對月還命酒。青山過客如相逐。一江無人夜欲寒。兩槳不動去。

仍速水月光相與閒。飄嫌船過微生穀。遠聽乍聞柔櫓聲。叢蘆知有征鴻宿。快哉此行畫不如。烟中早露黃山麓。

辛丑八月將出都之秦汪小蘭諸君招集陶然亭賦別

輦紅回首隔人天。一片秋光在眼前。積水曉開千匹練。空亭晴人萬家烟。砧聲遠近催寒信。屐齒依稀記往年。舊雨不來今雨集。停雲重與駐吟鞭。

朱桂

字林一。嘉興人。諸生。官淳安教諭。

發沅江過洞庭湖口

朝發沅江渚。初日向和煦。遠水浸垂楊。中洲沒芳杜。水鳥拍拍飛。回旋妙楚舞。揚帆入森莽。破浪隨仰俯。山低岸影移。浪疊雲容聚。浩浩滋心胸。呱呱思往古。酌酒奠芳魂。美人渺何許。

六月十五夜泊辰谿對月

萬里一輪月。波光上下浮。故鄉當此夕。清影入高樓。萍梗憐蹤跡。壺觴強勸酬。明宵何處宿。雲擁楚天愁。

何其偉

字韋人。青浦人。諸生。有簪山草堂吟稿。

蒲褐山房詩話。薛山不在吾鄉。九峯之數。而澄泓蕭瑟。昔董思翁常作水墨圖長卷。頗有事外遺致。章人世居此山之下。曾祖王樸。精岐黃術。亦能詩。章人曾從曲阜顏運生。學廉遊。故知讀畫愛古。憫人搜采。而剞劂之。亦有功于先哲者矣。

### 通波塘道中

放櫂尋幽勝。迢迢溪路長。三篙新水綠。九點暮山蒼。牧笛花邨外。漁罾柳市旁。歸來燈火處。指點是山莊。

### 出京口

帆翦西津渡。推篷入畫圖。樹連瓜步暗。雲擁蒜山孤。跋浪神魚出。團沙宿鳥呼。廣陵何處是。小泊傍菰蘆。

### 湖上過梅莊訪陳花南司馬賦贈

落拓生涯去住便。湖山小隱絕塵緣。名園舊植梅千樹。客館新營屋數椽。水閣夏涼聽雨坐。蕉窗晝靜抱書眠。六橋煙月誰消受。盡付先生樽酒邊。

偶來湖上叩雲亭。鎮日淹留雨未停。新竹漸添三徑綠。好山常放一簾青。赤城霞彩餘詩卷。時從天台游歸烏戍溪流入畫屏。先爲烏鎮通判最羨重陽籬菊綻。題襟囊屐又盈庭。去歲曾作展重陽詩會。期於今秋再聚梅莊。

### 湯禮祥

字典三仁和人。諸生吏部侍郎右曾曾孫。有栖飲草堂詩。

蒲褐山房詩話。典三自言懷清堂集宗派。能守不墜。然少宰清幽秀雅。出入漁洋綿津。而典三詩頗有奇氣。未必不厭家雞而喜野鷺也。

吾師顧涑園太守曾宰清豐有惠政距今五十年矣戊午十一月其邑人有過杭者知公里居無恙相率三十餘人登堂羅拜而去禮祥作詩紀其事以脩輜軒之採云

山鷄愛毛羽志士重脩名況乃爲民牧毀譽尤易成清豐有賢宰吾鄉推耆英憶昔漳衛水一決連魏城哀哉城下骨尙帶蛟龍腥賑恤招流亡溝壑餘零丁三上河渠書議格終不行紀災淚盈紙鴻雁同哀鳴公有勸災吟四章詞甚凄楚距今五十載父老來西陵自言清豐民我曹皆侯生侯今喜健在侯昔何賢能中有年少子傳聞自父兄今幸睹侯面恨未竹馬迎或長跼不起或稽首階庭或起焚鑪香或笑或涕零何以獻我侯紫棗雜黃橙何以頌我侯壽考而康寧我公前致辭小惠何足稱無端念衰朽而我媿益增願爾爲良民願不負太平手摩父老頂歡愛如孩嬰出門尙回顧觀者填柴荆允矣古遺愛亦足驗民情民情有如此願共惜賢聲

壽先生歌并序

先生諱同春諸暨人佐臺灣淡水郡丞程峻幕丙午冬林賊亂郡丞死之竹塹城陷先生糾義民克復之明年十二月官軍進發遂駐烏牛欄初十日進逼賊巢賊懼設伏以出義民潰先生馬蹶被獲罵賊不屈死時年七十二

布衣之勇不可敵七十老翁來殺賊躍馬大呼壯士趨義氣一激吞澎湖狼豕猙獍忽奔突軍聲不動鼓

聲咽。血光射海海水紅。狂氛惡霧迷西東。馬蹄一蹶落虎口。怒罵羣凶爾莫走。十萬官軍在爾後。殲爾凶殘傳爾首。是時月黑羣鬼號。賊兵林立揮長刀。須臾見刀不見人。可憐萬刀攢一身。嗚呼幕府之客有如此。布衣不媿真男子。

李 一福

字子仙。吳縣人。諸生。有嘯月軒草。

嚴子陵釣臺

自有高人蹟。桐江水獨清。一竿常在手。三聘竟忘情。天子何能屈。先生豈好名。至今釣臺上。夜夜客星明。

咏西楚霸王

中原騷擾獨橫行。地盡身亡氣不平。鉅鹿先時誅宋義。沐猴失計拒韓生。萬人敵早降秦將。八載天應厭楚兵。帳下悲歌數行淚。英雄兒女各吞聲。

徐雲路

字起萬。崑山人。諸生。有釀花居詩。

擬古

陽和二三月。桃李華參差。天冶倚東風。婀娜不自持。得氣既微薄。悅世遂以姿。恆恐冰雪至。汲汲開及時。

東籬有黃菊。秋老挺霜姿。孤山有老梅。歲寒意自知。何爲看花者。桃李路成蹊。  
停君白玉卮。聽我彈清琴。冥心衆籟寂。妙悟得古音。一彈流水咽。再彈山月沉。急雨灑空江。悲風動遙岑。  
獨賞良亦佳。安用求知心。

陳蘭汀招集小蓬瀛作

俊侶適然集。開罇傍夕陽。纖雲流濕翠。曲澗闋幽香。獨鶴警宵寂。高梧侵夢涼。永懷仙客去。酒醒幾回腸。  
護經室寓齋示戴生竹友

萬花叢裏讀書堂。寶篆茶烟裊細香。馬老未諳迷詰曲。鳳雛已覺勢飛翔。客來屐損苔紋古。酒罷談銷畫  
燭長。尙有金鍼花樣好。閒教妙手繡鴛鴦。

石鈞

字遠梅。吳縣人。監生。有清素堂詩。

青石嶺

絕壁一線開。雙崖插天壯。連山走東南。截海作屏障。上蟠太古松。元氣殷摩盪。高鳥倒翅飛。石角森怒向。  
孤雲輕一觸。破碎變萬狀。赤豹從黃狐。出沒負嵎望。險絕聞劍關。茲嶺復不讓。我今陟危梯。足縮意舍館。  
通塞命固然。作歌當樵唱。



登潼梓門海中眺望

揚帆赴滄溟。倏失萬重嶺。怒濤挾風雷。海底蛟龍聘。映天黑如漆。水色詔北溟。浪花沒前舟。瞥眼絕形影。須臾駕高浪。忽若坐山頂。我行駭神魂。險絕閱異境。四面水壁立。孤舟落深井。上下捷騰梭。掀簸風力猛。稍師嚴振柁。到此各相警。靜念垂堂言。慨焉發深省。

仰天塢尋石林山房

披烟上層崖。危亭塞嶺隘。蘿徑屢曲盤。磴轉躡山背。佳趣隨境深。流雲隔塵壘。潛游空翠中。稍漏日光碎。礪花多妙香。竹泉無驚瀨。俯仰澄孤懷。憇息玩掩籟。幽禽不飛鳴。坐久聞梵唄。理策轉蒼茫。精廬竟何在。曉度山海關。

馬首西風緊。關門曉霧開。地形隨海盡。山勢抱城來。磊落心猶壯。飄零髻已摧。從今清宴日。不必戍龍堆。

李方湛

字光甫。仁和人。諸生。有小石梁山館詩。

西溪道中

一舟搖款乃。曲港容延緣。竟日不見人。十里菰蒲天。白雲起我後。青山落我前。稍稍現墟落。遂覺耳目遷。兒童看雞犬。返照柴門邊。水光澹叢竹。翠色何娟娟。漸入境轉佳。身與鷗鳧間。相將發高唱。意適不欲旋。

微雨溪上來，散作蘆花煙。

人日偕施樹存姜淳庵家允升河渚探梅

獻歲厭塵雜，拏舟尋花叢。素心二三子，聯此物外蹤。沿溪欲窮源，烟樹何蒙茸。斜陽照殘雪，明滅八九峯。老梅萼未吐，已抱冰雪容。有如瓊仙耀，高躅不易逢。咤茲清景絕，百慮一以空。何當把春鋤，來作梅花農。

二月二日偕家允升重游河渚看梅泊舟雲溪庵

鷗鳥見已慣，復來導烟艇。遙山回春姿，掩冉無定影。花光水上來，化作溪雲冷。濛濛染衣裳，風香任人領。清磬一聲圓，茅庵隔畦町。

白衲庵曉起同舍弟方洽

春山挾春雲，浮動不自主。東風一以吹，散作前溪雨。雨止山依然，風定雲更吐。幽人曉夢清，披衣聽鳥語。初陽尙未升，山間雲縷縷。不知身在山，但覺雲滿戶。

河渚

舟蕩一溪煙，凌風意渺然。竹光多在水，山影不離船。欲置三間屋，曾無二頃田。回頭語朋好，風景勝斜川。

蒹葭里

蒼茫一片雲，蒹葭欲無岸。盡日不見人，亭亭起樵爨。

溪清石齒齒。沙淨鷗娟娟。微風吹波光。散作花上煙。

### 金學蓮

字青儕。吳縣人。諸生。有環中集。

#### 登三泉亭後最高閣晚眺

秋色擁蒼烟。秋聲亂高樹。四山微雨來。慨然秋已暮。三泉引游人。聽泉得行路。整衣上高閣。下瞰飛鳥度。頓覺心神開。滿目欣所遇。梵聲送天香。妙理從此悟。

#### 山居秋暝

暝色有無間。秋光滿竹關。小池明月上。照見一痕山。風靜響初歇。形忘心益閒。稍聞西澗水。林外過潺湲。

#### 秋庭桂開遲朱礪東不至

籬落翛閒處。士家可憐詩。卷寄生涯人。歸小閣餘楓樹。酒熟空山發桂花。幾片薄雲時待畫。一簾秋雨自煎茶。徘徊莫助幽居興。檢點殘書半榻斜。

#### 大雪良鄉曉發

良鄉冬盡雪花飛。路遠江南夢亦稀。父曰嗟予猶北望。歲云莫矣曷南歸。馬開曉凍蹄應脫。城罨重陰樹已微。始信朔方寒氣盛。誰憐客子嘆無衣。

李斗

字□□號艾塘儀徵人□□有艾塘詩。

蒲褐山房詩話艾塘矜情既勝詩筆亦佳嘗作揚州畫舫錄十八卷山水園林勝流佳話多見其中雖雅鄭雜陳而風流旖旎使讀者如在綠揚城郭二分明月閒然乾隆丁丑翠華再幸鹽政高君鳳紅橋之平山堂二十四景屬余各爲小紋題之進呈行幄荷蒙留覽而此錄未及蒐探知所遺尙多也余過廣陵艾塘以詩見示寥寥無幾摘而錄之一滴亦可知味爾

東平道中

曉發東昌道晨光積翠間。馬嘶孤店月。鷄唱半城山。柏老秦封古。蘆收魯道閒。十年游子夢。記取此間關。  
過嶺至南安

翠屏丹嶂不成圍。露出城南白板扉。雨後亂流鞭馬渡。樹梢殘月趁鴉歸。倚天關塞空長劍。匝地風霜但短衣。此去誰爲東道主。荒亭且與息驂騑。

周中孚

字信之烏程人。諸生。有山茨詩錄。

秋夜書感

蕭齋秋雨。寂寞一燈懸。短笛飄殘夜。疎砧擣暮天。自憐吟積瘦。深惜酒成顛。怪底西窗月。偏來照獨眠。

過問松庵

空山環面面。隱見問松庵。暮靄迷紅樹。寒鴉點翠嵐。鐘鳴修竹裏。人語小橋南。雅尙耽禪悅。行同彌勒龕。  
明歲擬讀  
書庵中。

### 游萬魁塔院

古刹傍危巒。凌虛足壯觀。諸峯浮翠黛。一水漾清瀾。梵響法雲裏。猿聲幽樹端。殷勤尋勝跡。不覺夕陽殘。  
月夜泛舟

良宵如此月。載酒木蘭橈。漁火依遙渚。星光落晚潮。半帆清影碎。一帶宿烟消。經過蒲塘路。良朋抗手招。  
時途過沈  
四淦齊。

### 東劉丈海寧

劉子杼山隱。飄然鸞鳳儔。閉關惟頌酒。乘月獨登樓。忽憶隅園好。駕言滄海游。何時一篋笠。鼓棹白蘋洲。  
過費宏韜齋

小圃經年築。蓬門鎮日關。栽花疑入畫。疊石宛成山。竹外茶煙靜。籬間鳥語閒。結隣曾有願。勝景許同攀。  
贈潘二翁

白蘋洲畔綠楊陰。靜掩衡門歲月深。高士書還藏萬卷。真人方自擅千金。客來嶠外頻談劍。鳥語窗前獨  
撫琴。安樂窩中幽趣在。隱居何必定山林。

春夜同人讌集時周三敬歸自河間

亭亭新月照窗扉。促席清談與俗違。雪上偶然知己合。河間喜得故人歸。梅花一盞詩懷淡。春雨三更酒力微。茲夕剪燈真韻事。應教游客悔前非。

董國華

字琴南。吳縣人。貢生。候補訓導。有讀書帷初稿。

海潮庵晚坐

湖山生夕陰。涼月掛喬嶺。琅然何處鐘。遠聽發深省。衿衣怯微風。稍覺露華冷。不見支公流。松間淡秋影。送友入蜀

陶梁

字寧求。號堯鄉。長洲人。諸生。

蒲菟山房詩話。堯鄉風流儒雅。爲近日吳閭文士之冠。尤擅倚聲。吳穀人倪米樓諸君。敏手推之子。雅續詞綜。搜采編排。多其所助。詩不多作。少學長慶集。而能去其淺率。無乖正始之音。

蘆庵贈梅嶼上人用樊榭韻

谿行夕彌佳。羣山轉宵窈。秋蘆渺無際。月出淡四照。相攜款精廬。禪客並才峭。吟寒應齒落。才峭自名垂。姚合贈賈島句也。示

我一卷詩。踈野絕俗調。嗟余困塵鞅。役役過年少。發想結林麇。于此理耕釣。手投巢父竿。肩荷丈人篠。盟言有如水。梅花莫相笑。

硯山丙舍

崇阿抱佳城。林木闕深冷。面山屋數椽。絕塵事幽屏。落日聞樵歌。四圍亂峯影。

梵香齋

往昔住參寥。空齋坐禪悅。妙香靜者聞。逆風吹梵筴。安得契元言。相依理白業。

棲雲閣

高閣俯山逕。春花落如雨。開窗嵐翠濃。霏霏溼衣履。棲託本無心。閑雲自來去。

聞思精舍

香龕半跏趺。觀心澈三界。溪聲與禽響。妙解偶然會。何如斷聞根。天空寂萬籟。

西溪秋雪庵

延緣渚中去。倚棹趁朝暎。秋水白無岸。遠山青到門。鳥聲喧佛頂。蘚字蝕牆根。彈指空輿廢。閒從老衲論。

庵有彈指樓。

西溪道中口占

涼風晴日過殘秋。出郭攜朋汗漫游。纔指秦亭西去路。青山紅葉滿船頭。

層嵐迎面起寒烟。芡港菱灣別有天。未許豪游人到此。野橋只進庫篷船。

樊榭西溪詩。梅花繫庫篷船。

### 楊惕龍

字健齋。海寧人。貢生。有得樹軒詩稿。

### 舟中望九龍山

不知九蒼龍。飛來自何代。一龍化一峯。天際浮遠黛。隱現無全形。俄頃有諸態。神遊坐超忽。目極迷向背。鳥度青嵐間。鐘鳴白雲內。舟行望已隔。眉宇翠猶在。無由攜蠟屐。把酒登龍背。日落半規銜。渾疑抱珠睡。

### 曉經太湖

夜談五湖奇。殘夢墮雲水。七十二山靈。夢中呼我起。潮平月稍落。極望波瀾滿。人語寒蘆間。中有漁舟橫。長烟迷白鷗。平林沒青蕪。俄頃朝陽升。萬象歸眼底。修蛾翠若埽。匹練淨于洗。不知遠峯外。湖光復幾里。豈無濟勝具。坐惜孤帆駛。一舸倘浮家。發興自茲始。

### 從軍行

匹馬度陰山。黃沙一望間。陣雲低壓帳。邊月迴臨關。鼙鼓消春色。烽塵損壯顏。深閨知報國。未敢唱刀鐮。

### 憩萬峰庵



幡影香臺畔。蕭然晝掩關。客依幽鳥坐。僧帶野雲還。一徑入紅樹。半窗橫碧山。平生清絕意。喜得暫時閒。  
晚晴散步湖上

湖光洗出碧玻璃。遊屐微沾雨後泥。斜照忽明孤塔杪。落霞都在亂峯西。一林晚磬烟藏寺。十里秋荷水拍堤。乘興卻忘歸路暝。步隨漁火度前溪。

### 楊試昕

字允成。丹徒人。監生。有海嶽山房詩草。

### 雪後登石頭城

窗外飢雀喧。曉雪紛已積。聯袂登石城。一水通鄉國。皎潔寫素懷。周覽心更適。山容掩空翠。江光破虛白。昔日王謝流。清談緬遺跡。何當恣幽尋。古梅弄寒色。

### 九華山

凭欄俯視羣峯小。雨過秋泉飛木杪。蓮臺香氣繞雲中。石磴盤空煙縹緲。山僧畱我古雪堂。清談剪燭開懷抱。花間不覺露華明。天雞忽唱山窗曉。

### 吳山觀潮

雪捲千山白。天開一線青。勢疑挾風雨。聲忽走雷霆。不見錢王迹。誰招伍相靈。波濤吾久涉。鼓棹入滄溟。

西溪

兩岸荻花遠。一溪秋水深。山光忽左右。竹翠與浮沉。遠籟出雲表。空香清道心。境幽延賞劇。泛棹入疎林。

徐鉞

字彥常。仁和人。諸生。有竹光樓稿。

靈隱借秋閣觀貝葉經

吾觀西域書。三藏十二部。率皆支那本。梵筴未曾覩。偶尋山僧來。高閣坐逃暑。云有貝葉經。藏弄歷年所。茶餘出示客。几淨還拂麈。香吐栴檀函。濯手許摩撫。尊如啓耆櫝。葉葉帖然貯。四十有餘翻。中通貫綦組。長逾桐葉圭。闊倍箭筈羽。微黃隱碧色。細脈繞金縷。堅韌勝雲箋。滑笏比玉楮。竹映若新採。風來恐輕舉。其字雜半滿。其體殊媚嫵。紆餘鳥跡聯。屈曲蚊腳聚。非篆亦非籀。有啄復有努。纖濃得三昧。訣法受諸祖。墨鍊難足煤。光明乃如許。恍疑用竹冊。點漆學上古。想見碧眼僧。力寫亦良苦。腕底開青蓮。人天爲眉舞。此經延平時。萬里進中土。無煩白馬馱。寧懼毒龍取。流傳免塵劫。完好在佛宇。惜無竺法騰。譯此祕密語。諦觀字茫然。但以手畫肚。三點尙識伊。一勺竟非與。欲明菩提旨。難誦釋迦譜。且復倚高窗。雲陰待涼雨。

龍井一片雲石歌

深山古井神龍宅。龍過蓬萊雲五色。擲得青雲一片歸。擲向巖前化爲石。玲瓏瘦碧雷斧雕。至今屹立神

自超望之髣髴如輕綃。勢將一躍干層霄。雲頭欲起雲腳牢。依然闌在青林梢。停雲不動行雲聚。雲去雲來作雲主。

夏日登敬光庵遇雨

獨上清涼地。經樓梵唱停。竹風綠澗響。江雨到山青。池想金蓮湧。泉留石室聽。坐深幽鳥散。霽色滿雲屏。

朱壬

字謂卿。錢塘人。彭子諸生。有畫舫齋稿。

冷泉亭坐月

明月如故人。到山若相識。愛茲林壑閒。迴與塵境隔。流泉通雲根。涓涓漱石脈。水光交月光。倒射潭底白。夜靜生峭寒。凭欄清露滴。茲遊不易逢。聊以永今夕。

吳山觀潮兼送遠梅時庵遊金華

秋放萬山青。潮來一線橫。浪花低越嶠。樹杪走江聲。不盡登臨感。還增離別情。金華洞天好。相送去帆輕。

送陳新筮歸黃山

黃山奇秀處。三十六芙蓉。未識君歸去。高居第幾峯。閒騎幽澗鹿。靜聽隔林鐘。何日來相訪。同看六代松。

聞李光甫北行作此送之

河梁忽聽唱驪歌。一片孤帆逐遠波。鴻雁南來君北去。不知何處稻梁多。

吳 儼

原名尙錦。字敦素。常熟人。監生。

別石太守繼玉

縹緲雲陽路。驪歌落日斜。萬山來劍外。孤櫂去長沙。住久難爲別。情深此亦家。碧雞坊下客。淪落聽悲笳。

答友

太守憂時切。殷勤訊益州。大江天設險。落日鳥知愁。地僻斷樵徑。山危多戍樓。年年聞戰伐。無計覓吳鉤。

于 淵

字靜齋。丹徒人。有第一村詩鈔。

送李祖佑之邗上

肝膽憑忠信。風流愛典墳。情深常話舊。酒盡更畱君。斜日沉江水。秋山隱暮雲。那堪揮手別。落木正紛紛。

與倪米樓王柳村季雲崖暨揖峯夫子登江上小閣

村路梅花放。天風飄古香。爲登江上閣。一繫月中航。春氣涵孤嶼。濤聲到客牀。今宵頻剪燭。話別意蒼涼。

米樓有欲至  
漢上之意。

戴延介

字受茲歙縣人寓居吳縣監生有古藤山館詩鈔

題陳永齋初哲觀察登華圖遺照爲蘭汀賦

百二秦關使節開。參天嶽色勢崔嵬。秋從白帝祠邊肅。人自金龍頂上來。讀畫倍增耆舊感。徵詩更賴子孫才。芙蓉九朵雲千疊。常護芸香慰夜臺。

吳傑

字卓堂號梅梁山陰人貢生。

蒲褐山房詩話梅梁瑤林玉樹風格超羣而慧業性成清才泉湧年纔弱冠與歸安邵保初升秦弟保和履成名相上下芸臺中丞貢入成均益越中之秀也予在數文書院嘗以西湖柳枝詞課士芸臺謂自鐵厓沒後五百餘年無繼擊者而鈍翁姑蘇柳拔詞和者亦夥因編徵諸吳越士大夫同作者凡數百人芸臺序而行之今酌選數首附于卷末以當他日西湖故事云

登臥龍山望會稽禹陵

臥龍不化梅梁飛。玲瓏佳氣騰翠微。風雲萬里護名鎮。百神朝罷迴靈旗。蒼松翠柏儼成列。玉書金簡精光結。宛委山頭雷雨開。窆碑亭上龍蛇掣。峒巖石氣涵餘青。玉帛千重會大廷。回首蓬萊舊城闕。鷓鴣啼破雲冥冥。越王宮殿鎖歌舞。衰草荒煙自終古。瑯琊北徙爭中原。一朝金玉藏黃土。豈如不封不樹明德馨。馭下九龍臥風雨。

西湖柳枝詞

十里蘇堤半綠條。籃輿宛轉馬蹄驕。折來欲挽同心結。無奈相逢是斷橋。  
風前嬌態情誰扶。映李遮桃入畫圖。縱是楊花飄莫定。浮萍猶得住西湖。

章柱

字巨卿。分水人。諸生。

西湖柳枝詞

西泠吹雨晝冥冥。深淺螺峰疊畫屏。似替蘇娘作寒食。小桃墳畔一枝青。

邵保和

字履咸。歸安人。諸生。

西湖柳枝詞

無限長條又短條。白蘇堤畔不勝嬌。行人漫唱驪駒曲。畱得春光住六橋。

王紹舒

字作明。青浦人。諸生。有澹園詩鈔。

試聽風前斷續聲。樓頭孤客漫關情。呼羣寒浦飛難定。流影空江字不成。塞北無端愁遠別。天南從此歎遐征。如何石上藤蘿月。照見蘆花一夜明。

聞雞

宿霧籠烟散未收。黃雞聲裏曙光浮。燭房已隔游仙夢。茅店應生遠客愁。九塞雲荒催落月。五更霜冷逼殘秋。平生不羨劉琨舞。日上三竿被擁頭。

王莊壽

字椿齡。號硯傭。青浦人。諸生。

復歸樂天廬舊居

年來闌闌逐鷺塵。刺促徒慙近市身。一笑故廬尋息壤。烟霞欣得舊時鄰。茅舍田家雨乍晴。邨邨枷板樂豐盈。我來長物嗟何有。兩架圖書一酒鎗。試啓蓬門落葉稠。滿林寒色露華浮。蔬芽昨夜抽新綠。好佐空廚一夕謀。遙指西林日欲晡。竹爐活火煖村醪。奚僮入市歸來晚。買得松江半尺鱸。未向長安逐錦韉。時濟園三兄將赴都下。且從三泖狎鷗眠。吾廬吾愛原非隱。舊額由來是樂天。樂大廬高祖命名。





# 湖海詩傳卷四十六方外

明中

字大恆。仁和人。幼投嘉興楞嚴寺出家。晚主西湖淨慈寺入寂。有疾虛大師遺集。

蒲褐山房詩話大恆梵誦之餘兼習詩畫交厲樊樹施竹田周穆門諸君故其詩澄澹幽邃灑然以瘦皎然以清如孤鶴警露清猿嘯霜杭太史董浦謂以蒼松翠竹清泉白石爲供養以經行晏坐打鐘掃地爲職業以寒山拾得爲本師以皎然清畫爲程式信也行脚入京侍永覺無礙禪師直萬善殿歸主西湖之聖因寺上南巡製一絕賜之後住淨慈最久乾隆戊子示疾棄其稿命弟子佛齋求香樹尙書及董浦爲序而屬梁山舟侍講刻焉先是歲丁丑秋余過西湖大恒留宿山房乘月夜遊天台齊次風宗伯與董浦及僧讓山汎母歷三潭斷橋諸勝迄夜分始返其寄與蕭寂如此編法門人實蔭不能詩而山水頗得其法

## 送陸南香之廣陵

得得來東湖。秋晴愜幽抱。西風不作寒。勝事縱探討。珠臺繪烟林。詩壇問諸老。況復籬花黃。流連托同好。先生忽言別。重尋竹西道。山堂記曾遊。石磴冷荒草。遙指萬松間。一榻爲君埽。

## 題畫

黛色連修林。春曉破烟靄。時從湖上看。偶與幽意會。白雲何娟娟。奇姿不可繪。遐思輞川人。展卷坐相對。觀妙各有得。喧寂兩無礙。聊以物外心。參之畫三昧。

林悽愴所適。勝概恣登臨。秋清景物曠。蒼翠紛遙岑。山中寒意早。疎瘦愛烟林。塵慮不待遣。日夕娛沖襟。蕭然禪誦暇。卽此窮幽尋。何人攜野屐。相訪丹崖陰。

早春椒園看雲荔帷過訪山中坐梅花下茶話分得聞字

入春未匝月。草木便欣欣。獨有耐冷花。不藉東風薰。山中一枝早。朝暮棲白雲。尋幽來素侶。短棹烟波分。空香引屐齒。世界銷塵氛。相對各無語。微妙在寂聞。經行或坐臥。蕭散如鷗羣。須臾晚鍾動。疎影明斜曛。轉憶西溪西。籬落方繽紛。擬探輒又止。清夢嗟徒殷。期游四溪不果。

招沃田雲汀讓山晬實蹤甘墩村看桃花以李青蓮犬吠水聲中爲韻得水字

故人雲間來。訪我碧巖裏。夜雨龜燈寒。幽事喜重理。乘霧陪清游。游情詎肯已。人生合并難。風光況云美。更問甘村花。擘音出春水。稗柳搖輕烟。濯濯十數里。波痕九曲靜。蒸霞四面起。短篙礙平橋。將進如欲止。欣然攜枯藤。仄徑行花底。紅雨飛晴空。白雲狎羅綺。匝地花陰生。凌亂趁芒屨。忽焉俯仰迷。安能辨桃李。青春去堂堂。開落一彈指。撫景乃放吟。惜哉日趨矣。柴門啼鳥下。斜陽白沙觜。蒼茫喚歸船。隔岸鶴峰紫。

寓梧竹居同陸數南張鐵珊夜話

遲客過秋寺。西風石徑斜。晚鐘吹落葉。清雨對霜花。一鉢詩情在。孤燈髻影華。最憐深竹處。覓句共量茶。

秋日同竹田鐵珊四照亭看雨。用賈仲穎詩句雨聲中爲韻得詩字。

短棹西風握手遲。空亭茶話又移時。四山雲氣曉初濕。萬竹雨聲秋最宜。畫愛米家新潑墨。地隣天竺舊題詩。此間清景供消受。試與芒屨訂後期。

廣陵重遊馬嶰谷行庵

香茅一抱屋三椽。彈指聲中憶舊緣。隔岸疎林猶著雨。到門修竹欲生烟。秋光卻趁重來衲。詩案仍參未了禪。際此蕭辰莫辜負。不妨遲上渡江船。

小滿日雨中同樹田嶺雲集小有天園得陰字

雲影空濛一壑深。偶畱雙屐笑無心。碧潭雨過來寒瀑。綠樹烟昏墮濕陰。高閣寂時幽鳥下。亂山圍處晚鐘沈。眼前好景誰收拾。錯向南宮畫裏尋。

題畫

秋樹無定色。秋泉無定聲。支筇過橋去。衣袖秋雲生。板橋疎竹外。門對一峰青。溪柳未全綠。風蒲已滿汀。

題畫

徑僻聞無人迹。山空只許雲來。聽得風泉亂處。烟篁翠濕琴臺。

秋日喜江聲竹田過訪白雲堂卽次竹田韻

遊迹吟情兩不孤。獨慚燒笋出荒廚。疎簾清簾秋聲裏。爲寫張爲主客圖。  
曉烟霽屨五峰陰。看雨尤憐到石林。蠟屐風流還信宿。不須爲問去來心。

辛未初冬重遊京師道出清江與慈雲主人夜話口占斷句二首以誌別懷

帝里遊情記得曾。十年重作打包僧。暫來一宿清江寺。絲髻相看話佛燈。  
茶板聲殘禪板催。紙窗寒透月來時。翻嫌見面成多事。未盡離懷又別離。

宿西水驛

三分秋月照當頭。樹影參差認故邱。不信到家還是客。聽殘戍鼓水西樓。

### 篆玉

字讓山。錢塘人。住南屏萬峰山房。有話墮集。

蒲褐山房詩話。讓山居西湖之北。雲水綽然。與瓦虛掩關卻掃。同擅詩畫。爲法門兄弟。不啻無着天親。瓦虛供奉萬壽殿。賜紫迎鑾。有紅樓應制之作。而讓山參學之外。不入軟紅。又如雪嵯之於天童也。其詩幽新清悟。有攬擷之不盡者。昔維摩詰默然晏坐。而諸大士十二義皆墮。是以初祖西來。掃盡語言文字。然無言之教。藉言以顯。三乘所同。正不礙以吟咏作佛事耳。

雨後集雲居望湖上諸山

雨止整游屐。清思遂紛紛。微風拂林杪。疾卷陰壑雲。興會固無適。登陟從所欣。修廊展遐矚。物態呈殷勤。  
重湖界若畀。山暉鎔氛氳。羨彼衆峰影。徧繞荷香熏。天空愜晴望。連袂忘遽分。側行淨莎圃。示我瘞髮墳。

各循城坳歸。喧寂雨不聞。回首綠沈寺。啞啞鴉叫羣。

法相寺

樞衣躡沙嶺。著意度花津。忽聽穿林磬。來參不壞身。爐烟昏古殿。庭樹綠初春。卓錫泉猶在。直堪濟世塵。

題竹西園

幾回欲買竹西舟。今日翻從畫裏遊。隔水蒼松千點翠。照人明月二分幽。固無陳迹關清夢。難忘遺文在選樓。暫別重湖定相訪。涼聽歌吹入新秋。

秋日南屏坐雨

黃妃塔影曉。霏微山色蒼。茫碧四圍。妨帽略刪。指徑竹。延賓方啓。傍巖扉。一聲柔櫓衝烟出。幾對閒鷗背雨飛。我亦願同湖上去。擬將荷葉補秋衣。

實源

初名三友。號一泉。青浦人。居白鶴江。投來青庵出家。

蒲褐山房詩話。一泉居停橫雲山。張氏山莊。歲久。故其書宗法文敏。又編梅多。允彙縱橫之氣。持較前對神韻。或不逮。而瘦硬亦可喜也。然題句頗有佳者。如半塢寒雲依水石。一鈞新月挂橫櫺。看人自有奇香處。對客常含不語情。兩岸巖風吹玉樹。一灣春水浸雲根。薄批明月歸詩肆。笑約春風伴酒觥。九碗慈闈爲上客。六橋風氣是知音。漠漠遠香來。問谷微春色。染林塘。世有陳希。蘇輩。必亟爲集錄也。錢唐金壽門。莫晉。送其歸青浦云。夢醒梳根日未脯。願聞妙法闡醍醐。石人閉口寧相妬。蓮子空心白不汗。成。佛。莫。居。靈。運。後。驚。天。得。似。道。安。無。祖。肩。持。盃。師。歸。去。如。益。涼。雲。薛。灑。湖。後。遊。

京師借一侍者往  
禮五臺遂不復反

和村居雜咏

攜鉏抱瓮寄閒身。雨甲煙苗滿院春。一覺東華塵土夢。於陵常作灌園人。小園  
 蕉衫葵箒送新涼。六曲紅闌亞字牆。一翦微風香不斷。桂花如霰撲空廊。黃雪  
 疎陰滿逕鹿胎斑。凍雀無聲晝掩關。紙帳峭寒人未醒。舊遊依約到孤山。徑香  
 紅嫣紫姪衆芳敷。一片迷離錦繡鋪。天女散來真色相。可曾微笑佛前無。花韻  
 晤對蕭齋臭味同。仙根五色白雲封。應知綺季風流在。夢到商山第幾峰。芝室  
 彷彿倪迂翰墨林。珊瑚鐵網遍搜尋。馬肝鳩眼皆皮相。珍重磨礪一片心。女硯  
 沙禽撲漉破烟叢。池面波翻菡萏紅。好是晚涼殘照裏。釣竿斜罨瀟絲風。妙香  
 疏璃一碧漲春灘。回首風波行路難。何似翦燈同話舊。孤蒲疎雨夜窗寒。話雨

題語石畫

瞻禮花公已有年。曹溪法乳續高賢。即觀翰墨留千古。遙想宗風比具禪。

逸雲

字念亭。一名正威。長洲人。住支硎中峰寺。有嘯雲山房詩鈔。

蒲謁山房詩話念亭住中峰在支硎之後弱冠出家豁然自遠不與時俗往還性喜吟咏吳竹垞愛之故常造其廬且於峰前池上作水平樓以居之時偕予輩遊談後移居梁溪晚歲復回山中則樓亦圯矣其詩幽閒澀澀如染香人身有香氣者是也同時以詩名者靜菴住支硎之院兩曾與予同庚皆先寂滅而靜菴詩其徒不戒於火求之無有存者

### 秋杪呈五峰李客山先生

雲臥驚時暮秋深木欲落路遠尺書遲山暝聞棲鶴松子墮空塔夜涼侵高閣離思悵難同北風助蕭索

### 雨霽偕汪大紳步至法螺小憩

山雨夜來歇霽景聊幽尋欣與烟霞侶清吟度竹林相攜出蘿逕初旭開遙岑飛泉注邃壑清磬如鳴琴綠泉不覺遠直入重雲深詎知寒巖裏樓閣倚森沉茂林交晴光孤花表澗陰鐘磬動齋時看下林間禽憩久欲忘言澹然冥禪心

### 張雨亭新構小閣詩以貽之

愛君嗜閒靜構閣近雲根雨過頻移竹花時獨閉門野橋通小市曲水抱孤村莫厭今相過蒼苔破履痕

### 省齋上人雨阳中峰

錫駐近雲霄中峰一逕遙林花經雨潤巖雪到春消風竹頻蕭瑟烟巒自暮朝不知溪畔路新漲想平橋

### 答王蘭泉都中寄懷

憐君鸞鳳侶何事念山居泉石心偏切煙霞興未疎禪庭冷似昔世味淡如初出處雲泥隔多情慰遠書

秋日汪愛廬王鳳喈李禹亭金南溟同過中峰畱宿

承訪幽蹤借素侶，卽依曲徑到香林。松蹊雨後苔添滑，巖壑秋來葉漸深。久近樵蘇荒禮數，懶同麋鹿枉招尋。諸公倘就繩牀宿，月色柴門夜不禁。

湛 汎

字藥根江都人有雙樹堂詩鈔。

蒲留山房詩話藥根捨身柰苑而以孝聞。趙侍御青藜極重之。來往揚州江寧與諸名士倡和書法亦工。學於秦學士劍泉得其指授。

新秋雨中同程香溪太史黃北垞閔玉井許藕生章葯軒程筠榭書舸諸君過沙圃分韻

商飆吹颯爽，涼雨洗寥廓。不辭泥濘艱，來踐良友約。沙圃結構精，曲折饒邱壑。樹繁深院宇，荷靜閒池閣。幽興殊不孤，好懷斯可託。坐待莫鴉歸，暝色一林薄。

將之焦山別邢上諸子用岑嘉州終南山雙峰草堂韻

我本雲水人，交多素心輩。彈琴且賦詩，相與晨夕對。偶欲躡焦巖，長揖別英概。去此不百里，乃在松寮內。繁喧勿我擾，孤寂性所愛。茫茫宇宙寬，浩浩江海大。舒嘯雙峰巔，周覽衆奇會。黃鶴擬可招，青山逸如帶。巍峩不波亭，靈風吹夕靄。高樹隱參差，修篁響細碎。坐傍焦公祠，何異巖子瀨。諸君倘與游，扁舟可同載。

江邨訪呂涼州



茅構臨江屋。尋君野興寬。春風窗四面。幽鳥竹千竿。山好如留客。人間似去官。殷勤憐稚子。茗碗助清歡。

秋郊野步

出郭意何極。郊原緩步通。雲從天際薄。秋向寺門空。蛩語野塘水。鴉棲老樹風。那能盡游興。斜日酒旗紅。

性仁

字慈恆。號懋膺。海軍人。爲陳文勤公從子。住揚州建隆寺。

同人天寧寺竹岡閒步分韻得半字

愛此修竹岡。行吟其蕭散。烟開鐘磬餘。氣爽陰晴半。林深翠影稠。風急蟬聲亂。避炎固所宜。尋秋深可玩。遙山秋雲生。近水野田漫。眺望意何窮。沉沉日將晏。

冬日張喆士蔣秋涇吳葑田陳竹町對鷗兄弟過寺看黃葉分賦

西風日卓午。稽阮同乘興。不嫌郊寺荒。卻愛桑林勝。任意憩空齋。落葉聲可聽。寂寞在忘言。妙理各契證。慚余非惠然。風幡論難罄。何時淨業開。相與參清磬。

秋日洪闈公史茗涇焦五斗沈江門諸君子暨松亭藥根小集桐柏軒用孟襄陽游景空寺蘭亭

韻

犬吠秋陰夕。細聽人叩關。雨驅殘暑去。秋放小庭閒。詩思碧梧外。客懷紅蓼閒。荒廚無款待。煮茗語空山。

過桃花庵

隔林鳥語正綿蠻。落盡桃花客到關。楊柳陰中移畫舫。樓臺闕處見青山。漏聽蓮葉琴初罷。茶熟松風鶴未還。來向石頭尋畫本。豈知身在畫圖間。庵僧石莊善丹青。自號石頭和尚。

達澄

字如鑑。江寧人。住持揚州高旻寺。

蒲褐山房詩話：高旻寺僧照圓，早歲得天童之傳，開堂叩法，如鑑與慧超，巨超皆其入室弟子。參學之外，兼工吟咏詩，取法于放翁。夢樓極稱之。予南北往還，過瓜洲，必與盤旋竟日。

辛亥秋九月，同夢樓先生暨汪梅村居士游寶華山，乘輿至攝山，歸宿焦山，借菴方丈，次韻。

琴書林下士，瓢笠水邊僧。共泛晴江棹，同扶秋寺藤。溪山行處遠，樓閣望中增。日暮風旛定，微明丈室燈。徵君棲隱處，策杖入煙霞。苔澗千秋雪，霜楓二月花。留賓僧繒綵，礙路石砧砑。欲暢登臨興，籬陰一逕斜。探幽情未盡，懷古詠猶餘。特趁一帆便，來尋三詔廬。齋鐘香飯後，漁火夜潮初。浙瀝空林外，時聞雨滴疎。

夏日放生河亭與無餘居士納涼

竹密煙深一逕廬。桐陰如幌覆塔除。庭前時有窺簾鳥。池內應無避釣魚。南浦潮隨明月上。西林鐘帶夕陽疎。人間莫漫愁煩熱。好共臨流此卜居。

池亭瀟灑絕纖埃。竹裏披襟坐石苔。世事且隨流水去。吟懷閒對晚涼開。風從綠樹濃邊起。雲向青山缺

處來沙鳥有情還戀我。煙波飛去復飛回。

### 達瑛

字慧超。丹徒人。今居焦山寺。有練塘詩鈔。

### 寄空青山主

新秋桐葉飛。蠅蠅涼風起。遙望江上山。空青烟霧裏。幽人杳不見。展轉心何已。日暮勞我吟。白雲橫素几。相思寄何處。一片浣花紙。爲乞幾月團。試此東冷水。

### 山居雜興

雙峰突兀似蓬瀛。百尺高樓近水晶。庵名蕉雨一窗詩思淨。松風半榻夢魂清。出牆花影橫書幌。隔岸山光潑畫楹。薄暮來尋三詔洞。綠陰深處有啼鶯。

### 海雲樓

波光雲影接樓臺。一幅王維圖畫開。簾捲斜陽人獨立。帆移斷岸客初來。倚欄點筆題黃葉。着屐登山破綠苔。更汲東泠烹石鼎。松風謾謾響江隈。

### 鶴壽堂夜坐懷如鑑上人

銀河耿耿澹秋光。無那伊人天一方。浙瀝雨聲楓葉落。霏微露氣桂花香。琴彈石上桐三尺。雁到江頭字

一行蓮漏滴殘清不寐。松風羅月夜蒼涼。

寄禹門上人

日暮空江採白蘋。天涯悵望素心人。禪通柏子庭前意。夢隔梅花嶺上春。十載風塵同是客。半生泉石與為鄰。遙知細雨孤燈夜。得句惟應寄海濱。

餞秋

九十清光逐水流。西風惜別客悲秋。青帘一角離亭晚。紅葉千山祖道愁。攬轡馬嘶衰草路。銷魂人倚夕陽樓。蘆花何事多情甚。也為秋歸白了頭。

清恆

字巨超。海寧人。住焦山寺。有借庵詩鈔。

蒲褐山房詩話巨超住松寥得照圓衣鉢之傳劉石庵尙書贈以對聯萬疊江山工絕唱三秋水月證參禪蓋道其實也丁巳予往訪之下榻山樓三更呼起看長江墮月五更後促觀滄海朝霞胸次高曠若此故其詩亦非九僧等可比

桃花澗坐雨

身人萬重煙。濤聲澗底泉。一庵棲白足。千佛擁青蓮。坐久鬚眉綠。陰多草木鮮。桃花開已過。門掩竹籬邊。

懷楊夢蓮

海上分襟已十年。萍蓬鬢髮總蒼然。嘗多世味心方冷。聽到鄉音喜欲顛。夜雨梧桐蕭寺聲。四風楊柳廣陵船。忽驚歲晚空相憶。咫尺烟波各一天。

喜晤茅耕亭學士鮑論山農部同古岩作

寂歷虛堂壁四懸。追隨雙屐到峰前。羣鷗暮狎烟中浦。一雁秋涵水底天。鼎煮松風留客醉。門開蘿月向人圓。不知禪榻香消盡。爲覓新詩和智仙。

落松

蕭蕭復蕭蕭。可聽不可數。山童睡忽驚。報道窗間雨。

垂虹亭

夕陽曾倚小亭空。渺渺長橋掛彩虹。又卸夕陽帆一片。蘆花如雪捲西風。

默可

字杲堂。吳縣人。住海棠庵。

題淡子秋山策杖圖

闔閭城中老詞客。生平落落恥彈鋏。故人盡擬拾瑤草。默口空山踏紅葉。古逕深深絕塵染。悄然不聞吠村犬。倚筇小立疎林間。閒看白雲舒復卷。

卽事

四十餘年事竺仙。而今情味益蕭然。養生小圃蔬盈畝。息影荒村屋數椽。飯後閉門惟面壁。人前緘口不談禪。故園歸櫂猶慵買。豈暇攜瓢到市廛。

寄嶺南諸故人

瓶盃寥寥怯遠游。庵居蓑笠老林邱。雲遮庾嶺三生杏。楓落吳江兩鬢秋。數畝幸無官吏擾。一枝恥爲子孫謀。幽懷豈是思丹荔。夜夢頻隨度海舟。

際祥

字主雲。仁和人。住持淨慈寺。善畫。爲大恆孫。

題畫

巖花圃草鬱紛紛。濕翠千巒隱白雲。莫訝草堂人不到。恐無佳句可貽君。

性僻耽泉石。看山我未曾。松花香似飯。水氣冷於冰。路轉藏村落。林深見佛燈。最宜攜枕簟。消夏此間能。

題畫

路繞西湖西復西。夕陽紅樹板橋低。秋風記得春歸日。花落柴門雨滿溪。

覺銘

字慧照青浦人住閩津禪院

蒲褐山房詩話吾鄉圓津禪院本精舍瀕於漕溪有烟水之勝國初僧語石蕉上皆工詩畫故太倉吳梅村王烟客崑山葉詒庵徐健庵同邑王西亭陸孝武諸公皆結支許之契有清華閣墨花禪以淨慈爲語石四代孫亦能詩尤工於畫北至京師南至武林如梁侍講山舟錢少詹竹汀咸以方法外流之翹楚也

雲柄

招提何幽深竹徑路幾曲疎雨度遙岑淡烟鎖羣本燈明空翠懸地迴萬嶺肅焚香拜蓮池慈光清心目我願續瓣香下品心亦足

陪王述庵司寇雨宿淨慈寺卽贈方丈主雲和尚

昨識南屏路松陰一徑通人行青嶂裏門掩白雲中蓮社招元亮香臺訪法融此行成宿願踏雪笑飛鴻宿宿歌今夕隨緣寄客蹤助談殘夜雨破寂暮山鐘墨海窺三昧王畫雲門辨五宗珠林多軼事採輯藉

陶鎔時方屬宋映潛先生修輯寺志

劉敏

字崑培號伴霞青浦人爲道士於城西萬壽道院

蒲褐山房詩話伴霞業宗符籙從周邵翁爲師嗣西河薩眞入宏宣一派院在城西地考下伴霞悉取其旁窪地築爲堤岸雨水至不爲災是以歲收恒稔所作埜屋故深清池周匝建壑利支天傑閣

所謂才情故能有多許也。上琴能畫，  
邵珽庭珥張巨來夢繁咸與唱和。

次韻酬且拙

皓月娟娟照兩心。雨餘綠漲一篙深。庭花撲檻如招飲。梁燕窺簾似索吟。託興慢裁新玉版。賞音重拂古瑤琴。詩狂欲據南樓坐。烟暝前村樹色沉。

寄琴村再次前韻

同具蕭然物外心。清虛轉覺道情深。半窗冷韻梧桐雨。四壁秋聲蟋蟀吟。腕健欲摸新搨帖。指生難問舊傳琴。蘓鱸又復催秋思。漁步西風一釣沉。



